


中華文史叢書之九  
適園叢書本影印  
王有立主編

# 國朝群雄事略

(全)

錢謙益撰



台灣華文書局印行

國初羣雄事略

漢唐齋藏鈔本

國

雅

十

少

夷

二

羣

時

養

國初羣雄事略序

序錄開國羣雄首滁陽亭都者何也志創業也數月而館甥  
期年而別將脫真龍於魚服之中而借以風雷傳之羽翼滁  
陽之於 聖祖其亦天造草昧有開必先者乎元失其鹿斬  
木揭竿魚書狐呼之徒汝頴先鳴淮徐響應濠城遙借聲勢  
因緣起事而滁陽位又在四雄之下彭趙徐城之逋寇也儼  
然踞坐堂皇指撝奔走所謂微乎微者也滁陽既歿孤軍無  
倚假灤城之虛名噓崖山之餘燼用以部署東南號令天下  
定臺城開吳國建帝王萬世之業日月出而燭火熄於是龍  
鳳之君臣事業風銷煙滅杳然蕩爲窮塵而淪爲灰劫矣嗟  
夫安豐之擐甲寧逆耳于青田瓜步之膠舟終歸獄于德慶

漢祖天授不諱受命于牧羊光武中興聊復稱帝於銅馬用是繫以年月疏其終始倣司馬遷楚漢月表之意俾後世有觀焉昔張衡上書謂更始居位光武初爲其部將然後卽真宜以更始之號建于光武之初然則龍鳳之號或亦高皇帝之所不廢也次僞天完次僞漢次僞夏志割據也次東吳次慶元志盜竊也天命不僭夷狄有君故以擴闢陳友定終焉於乎有元非暴虐之世庚申非亡國之君也惟其聰明白用優柔不斷權分椒塗政出姦佞寵賂於焉滋章紀綱爲之委替沙河之潰師費以億萬而敗將歸踞于臺端高郵之圍寇功在漏刻而大軍立卸于城下省院之駁議未決而航海之寶賄直達于宮中江淮之壁壘方新而曠林之干戈相尋

於闐外馴至撫軍之院朝設而夕罷講解之書此奉而彼格  
南討之詔旨甫出河北而北征之師旅已擣燕南然後仰觀  
乾象而喟然知事之不可爲也寧有及乎詩不云乎殷鑒不  
遠在夏后之世後之人主讀儀鑒之詩而以庚申爲前車雖  
與天無極可也

舊史官錢謙益序

This image shows a page from a traditional Chinese ledger or account book. The page is ruled with vertical lines to create columns for recording data. On the right side, there is a header section containing vertical Chinese characters, which likely identify the account or the type of entries. The rest of the page is blank, indicating it is a ledger page without any data entered.

Header (Right Side)									

國初羣雄事略卷一

虞山錢謙益牧齋甫編

宋小明王

姓韓氏至正十五年二月卽位於亳建國號曰宋改元  
龍鳳又號小明王在位凡十有二年丙午冬十二月歿  
於瓜步

至正十一年辛卯五月辛亥潁州妖人劉福通作亂以紅巾爲

號陷潁州初灤城人韓山童祖父以白蓮會燒香惑眾謫

徙廣平永年縣至山童倡言天下大亂彌勒佛下生河南及  
江淮愚民皆翕然信之福通與杜遵道羅文素盛文郁王顯  
忠韓咬兒等復鼓妖言謂山童實宋徽宗八世孫當爲中國



主福通等殺白馬黑牛誓告天地欲同起兵爲亂事覺縣官捕之急福通遂反山童就擒其妻楊氏其子韓林兒逃之武

安  
元史順帝本紀

先是至正庚寅間參議賈魯以當承平之世欲立事功首勸脫脫丞相開河北水田造至正交鈔皆不克行及河決南行又勸脫相求禹故道開使北流身專其任瀕河起集丁夫二十六萬餘人朝廷所降食錢官吏多不盡支河夫多怨韓山童等因挾詐鑿石人止一眼鐫其背曰莫道石人一隻眼此物一出天下反預當開河道埋之掘者得之遂驚亂是時天下承平已久法度寬縱貧富不均多樂從亂不旬月眾殆數萬人

葉子奇草木子

先是庚寅歲河南北童謠云石人一隻眼挑動黃河天下  
反及魯治河果於黃陵岡得石人一眼而汝潁妖寇遂乘  
時而起

胡粹中元史續編

至正十一年濮州遂安童謠云挖了石佛眼當時木子反  
是年芝麻李稱王

五月潁川紅軍起號爲香軍蓋以燒香禮彌勒得名也其  
始出趙州灤城韓學究家已而河淮襄陝之民翕然從之  
故荆漢許汝山東豐沛以及兩淮紅軍皆起應之起潁上  
者推杜遵道爲首陷朱皋據倉粟從者數十萬陷汝寧光  
息信陽起斬黃者宗彭瑩王和尚推徐真逸爲首陷德安  
沔陽安陽武昌江陵江西諸郡起湘漢者推布三王孟海

馬爲首布三王號北鎖紅軍奄有唐鄧南陽嵩汝河南府  
孟海馬號南鎖紅軍奄有均房襄陽荆門歸峽起豐沛者  
推芝麻李爲首

庚申外史

韓山童詐稱徽宗九世孫僞詔略曰蘊玉璽於海東取精  
兵于日本貧極江南富誇塞北蓋以宋廣王走崖山丞相  
陳宜中走倭託此說以動搖天下當時貧者從亂如歸朝  
廷發兵誅之雖卽擒獲而亂階成矣

草木子

十二年五月監察御史徹徹帖木兒等言河南羣盜輒引  
亡宋故號以爲口實宜以瀛國公子和尚趙完普及親屬  
徙沙州安置禁勿與人交通從之

元史

壬申命同知樞密院事禿赤以兵討劉福通授以分樞密院

印  
元史

朝廷聞紅巾起命樞密院同知赫廝禿赤領阿速軍六千并各支漢軍討潁上紅軍阿速者綠睛回回也素號精悍善騎射與河南行省徐左丞俱進軍二將沈湏酒色軍士但以剽掠爲務赫廝軍馬望見紅軍陳大揚鞭曰阿卜阿卜者言走也於是所部皆走至今淮人傳以爲笑其後赫廝死於上蔡徐左丞爲朝廷所誅阿速軍不習水土病死者過半

庚申外史

是月劉福通據朱皋攻破羅山上蔡真陽礮山遂犯舞陽葉縣等處

元史

六月汴梁路同知黃頭守項城縣被執不屈死時尙乘卿

邢海戍項城謂子伯忽都姪阿刺不花等曰彼虜新執黃頭勢驍突甚與其坐斃孰若進討苟天未厭亂吾一門不忝卜尙書矣伯阿等曰大人誓許國兒輩何愛死遂力戰多所殺獲卒以援絕咸死之七月安東萬戶朵哥十戶高安童並中流矢死潁川

王逢至正十一年大小死節臣詩後序

西臺御史張桓謝職居確山縣賊久知桓名襲獲之羅拜請爲帥弗聽囚六日仰天詈叱屢唾賊面賊知終不可屈遂刺之

元史

王逢序云妻孥九人并遇害

八月丙戌蕭縣李二及老彭趙君用反攻陷徐州李二號芝麻李亦以燒香聚眾而反

元史

太祖實錄作趙均用

芝麻李邳州人也值歲饑其家惟芝麻一倉盡以濟人故  
得此名賈魯挑黃河所在廢業芝麻李與鄰人趙君用謀  
起事曰朝廷多事百姓貧苦無告吾聞潁上香軍起官軍  
無如之何此男子取富貴之秋也君用者趙社長也君用  
曰我所知某人某人可用燕城南彭二勇悍有膽略我當  
爲汝致之入門見其方礪斧斤問之曰汝將何爲彭二應  
曰官府不足靠日夜伺州縣賑濟饑無所得將伐薪入城  
換米喫耳君用呵之曰好男子何處不得一頓飽飯喫耶  
汝能從我豈但衣食而已富貴從汝彭二卽解其意應曰  
其中有芝麻李乎君用曰然遂引見芝麻李因得八人歃  
血同盟八月十日僞爲挑河夫夜投徐城留城中門卒拒

之曰我挑河夫也借一宿何傷其半因突入其半在外夜  
四更城內熱四火城外亦熱四火應之既而復合爲一城  
內外吶喊相應城內四人奪軍仗斬關城外四人突入同  
聲叫殺民皆束手從命天明樹大旗募人爲軍從之者有  
十餘萬浮橋四出掠地奄有徐州近縣及宿州五河虹縣  
豐沛靈璧西并安豐濠泗事聞朝廷省吏抱牘題曰謀反  
事脫脫觀其牘改題曰河南漢人謀反事識者知元不復  
能有天下矣河南漢人可盡誅乎其後張士誠起淮海趙  
明遠起徐州毛貴起山東明元帥起四川獨 本朝龍興  
江南卽以建康爲天下根本先是童謠曰富漢莫起樓貧  
漢莫起屋但看羊兒年便是吳家國迨 本朝定都建康

築郊壇於南門郊天受命改至正二十七年爲吳元年實  
丁未也豈不驗哉

庚申外史

蘄州羅田縣徐貞一名壽輝與麻城人鄒普勝等以妖術陰  
謀聚眾遂舉兵爲亂亦以紅巾爲號

元史

九月劉福通陷汝寧府及息州光州眾至十萬

元史

九月汝寧知府完哲府判福祿護國連抗十日城垂陷仰  
天呼曰臣等義不辱竟投水中

王逢詩序

王子命御史大夫也先帖木兒知樞密院事及衛王寬徹哥  
總率大軍出征河南妖寇

元史

汝穎之間妖寇聚眾反以紅巾爲號襄樊唐鄧皆起而應  
之脫脫乃奏以弟也先帖木兒爲知樞密院事將諸衛軍



十餘萬討之 元史脫脫傳

十月命知樞密院事老章以兵同也先帖木兒討河南 元史

十二月辛丑也先帖木兒復上蔡縣擒韓咬兒等至京師誅之 元史

十二月宣徽院使帖木兒河南萬戶察罕相繼鏖死南陽

臥龍岡下 王逢詩序

十二月布三王陷鄧州襄陽 庚申外史

至正十二年 壬辰 正月命遂魯曾為淮東添設元帥統領兩淮所募鹽丁五千討徐州 元史

淮東元帥遂善之上言官軍不習水土宜募場下鹽丁可以攻城又有淮東豪民王宣亦上言鹽丁本野夫不如募

城豎幡勇慣捷者可以攻城前後各得三萬人皆黃衣黃帽號曰黃軍脫脫用以攻徐州一鼓克之 庚申外史

正月孟海馬陷襄陽徐真逸陷湖廣 庚申外史

是年正月定遠縣富民郭姓者燒香聚眾稱亳州制節元

帥十一月起定遠縣二月二十六日克濠州三月初二克

曹州 俞本皇明紀事錄

二月乙亥朔定遠人郭子興孫德崖及俞某魯某潘某等起兵自稱元帥攻拔濠州據其城守之 太祖高皇帝實錄

三月壬子河南左丞相秦不花克復南陽等處 元史

秦不花引剌吉氏老章出師久無效詔秦不花將兵往代之未期月平南陽汝寧唐隨又下安陸德安等路軍聲大

振 元史泰不花傳

脫脫調阿剌吉太尉攻汝寧汝寧紅軍懼退保亳州阿剌吉攻平汝寧城 庚申外史

辛酉命親王阿兒麻以兵討商州等處賊以鞏卜班知行樞密院事 元史

赫廝既死朝廷別命鞏卜班平章為將領侍衛漢軍合愛馬韃軍合數萬眾屯汝寧沙河岸日夜沈溺酒色醉臥不醒敵人偷營遽失大將所在次日閱死人得其屍死人中軍遂退數百里屯項城縣 庚申外史

閏三月甲戌朔

大明太祖高皇帝起義入於濠州 太祖實錄

也先帖木兒駐軍沙河軍中夜驚軍潰退屯朱偃鎮

元史

也先帖木兒盡棄軍資器械北奔汴梁收殘卒屯朱偃鎮  
朝廷以爲不習兵命別將代之也先帖木兒徑歸昏夜入  
城仍爲御史大夫

元史脫脫傳

也先帖木兒總精兵二十餘萬金銀物帛車數千輛河南  
北供億計億萬駐軍沙河未及兩月軍中夜驚也先盡棄  
軍資器械運糧車輛山積僅收散卒滿萬人直抵汴城下  
時文濟王在城頭遙謂之曰汝爲大將見敵不殺何故自  
潰吾將劾汝此城必不容汝也遂離城四十里朱偃鎮屯  
焉朝廷乃命蠻子平章代之

庚申外史

詔四川行省平章政事咬住以兵東討荆襄賊克復忠萬夔

雲陽等州四月復歸州進攻峽州誅賊李太素等遂平之元史

五月答失八都魯到荆門募兵趨襄陽與賊戰大破之

元史

十一年特除四川行省參知政事從平章咬住討賊於荆襄咬住兵既平江陵請自攻襄陽進次荆門賊十萬官軍三千餘遂用宋廷傑計招募襄陽官吏及土豪避兵者得義丁二萬編排部伍敗賊於蠻河進至襄陽城南大戰生擒僞將三十人腰斬之賊閉門不復出乃相視形勢內列八翼包絡襄城外置八營軍峴山楚山以截其援自以中軍四千據虎頭山以瞰城中城中之人縋城爲內應五月朔日破之僞將王權領千騎西走遇伏兵被擒襄陽遂平

元史答失八都魯傳

九月太傅中書右丞相脫脫總兵復徐州屠其城芝麻李遁走

元史

紅巾芝麻李據徐州脫脫請自行討之九月師次徐州攻其西門賊出戰以鐵翎箭射其馬首脫脫不爲動麾軍擊賊之城堅不可猝拔用也速計以巨石爲礮晝夜攻之賊困莫能支也速攻入其外郭明日城破芝麻李遁去獲其黃繖旗鼓燒其積聚追擒僞千戶數十人遂屠其城詔卽軍中加脫脫太師趣還朝

元史脫脫也速傳

芝麻李據徐州元命脫脫總番漢兵數十萬平之改爲武

安州

皇明紀事錄

脫脫平徐州以得芝麻李奏功月餘始獲芝麻李械送京

師脫脫密令人就雄州殺之 庚申外史

趙君用彭祖住率餘黨奔濠州脫脫命賈魯追擊之

龍飛紀略

彭祖住寶錄作早住彭大之子也奔濠州者當爲彭大其辨詳見滁陽事略中

是歲察罕帖木兒與李思齊同起義兵 元史

察罕帖木兒系出北庭家河南爲潁州沈丘人幼篤學嘗應進士舉身長七尺修眉覆目左頰有三毫或怒則毫皆直指居常慨然有當世之志至正十一年盜發汝潁不數月江淮諸郡皆陷朝廷徵兵致討卒無成功十二年察罕帖木兒乃奮義起兵沈丘之子弟從者數百人與信陽之羅山人李思齊合兵同設奇計襲破羅山事聞朝廷授察

罕帖木兒中順大夫汝寧府達魯花赤李思齊知汝寧府  
於是所在義士俱將兵來會得萬人自成一軍屯沈止數  
與賊戰輒克捷

元史察罕傳

潁州沈止探馬赤軍察罕帖木兒與羅山縣典史李思齊  
集眾號義兵克復羅山朝廷授察罕羅山縣達魯花赤李  
思齊縣尹上曰人言國家輕漢人如此果輕漢人也下吏  
部再議於是察罕授汝寧府達魯花赤思齊知府

庚申外史

至正十三年癸巳五月壬午元將賈魯卒於濠州軍中元兵解  
圍去

元史賈魯傳

十二月陝西平章政事孛羅四川行省右丞答失八都魯復  
均房等州詔孛羅等守之



九月率兵略均房平穀城攻武當山寨數十獲偽將杜將

軍十二月趨攻峽州破偽將趙明遠木驢寨十四年正月

復峽州 元史答失八都魯傳

至正十四年 甲午三月丙子潁州陷

五月甲子安豐正陽賊圍廬州

十月戊戌詔答失八都魯及秦不花等會軍討安豐 元史

十一月答失八都魯復苗軍所據鄭均許三州

十二月復河陰鞏縣 元史

龍鳳元年 至正十五年乙未閏正月我

太祖取和陽遂守之 龍飛紀略

二月己未劉福通等自礪山夾河迎韓林兒至立為皇帝又

號小明王建都亳州國號宋改元龍鳳以其母楊氏爲皇太后杜遵道盛文郁爲丞相羅文素劉福通爲平章劉六知樞密院事拆鹿邑縣太清宮材建宮闕遵道等各遣子入侍遵道得寵專權劉福通疾之命甲士搃殺遵道福通遂爲丞相後爲太保

元順帝本紀

至正十五年乃小明王龍鳳元年稱帝於亳後遷都安豐號宋徽宗九世嫡孫臣民稱爲主公實韓哥哥之子也小名林兒太保劉福通等扶以爲主於時

上受節制

俞本皇明

記事錄

林兒徒擁虛名事皆決于福通

高岱鴻猷錄

毛會田豐杜遵道等奉韓山童爲主公分兵攻掠其下有

劉太保者每陷一城以人爲糧食人既盡復陷一處故其所過赤地千里

草木子

樞密院掾史杜遵道棄去不仕適潁川遂爲紅軍舉首先  
是伯顏爲丞相馬札兒台爲知院遵道爲書生上言請開  
武舉以收天下智謀勇力之士馬札兒台遂補爲掾史既  
而知其不能行其策遂棄去後爲賊中舉首

庚申外史

馬鑑壽州人年十四爲盛文郁養子冒其姓文郁卒鑑代  
領其眾居安豐自爲同僉我師救安豐鑑遂來降復馬姓  
官至前軍都督府僉事洪武二十七年卒

實錄

三月郭子興卒四月汝頴倡亂者杜遵道劉福通等迎韓山  
童之子林兒爲帝居于亳遣人詣和陽招諸將欲爲己用諸

將推張天祐往天祐尋自亳歸齋杜遵道檄推子與之子爲  
都元帥天祐爲右副元帥

上爲左副元帥

上曰大丈夫寧能受制於人邪遂不受 太祖實錄

汝穎倡亂者杜遵道劉福通立韓林兒爲君都于亳時羣  
雄是其門弟子皆從之韓林兒造言宋苗裔也時王甫卒  
歸葬滁陽未久聞召諭造言門弟子孰先後之創亂之功  
孰魁况孫德崖以滁陽部將意欲統滁陽之眾其子聞之  
懼辨不能以文召 上代辨 上總兵於和陽日與元戰  
諸戰將謂張天祐曰公當自察果能率眾禦胡則朱往不  
然則公往張遂代往 上發兵及親率將和陽西南民寨

節次削平張自毫歸齊亳州杜遵道文憑授滁陽王子為

都元帥張為右副 上為左副 皇明本紀

郭元帥卒眾奉其長子郭天敘為都元帥張天祐次之

上次之 俞本皇明記事錄

上初欲不受曰大丈夫寧能受制于人邪後以諸將議欲

藉為聲援從之紀年稱龍鳳然事皆不稟其節制 高岱鴻猷錄

六月

大明皇帝起兵自和州渡江取太平路自紅巾妖寇倡亂之

後南北郡縣多陷沒故

大明從而取之 元史順帝本紀

置太平興國翼元帥府諸將奉

上爲大元帥 太祖實錄

六月我 太祖起兵仍稱龍鳳年號 陸深平胡錄

十一月郭元帥張天祐戰歿 太祖獨任元帥府事 俞本記事

錄

十一月答失八都魯攻夾河賊大破之 元史

六月進次許州長葛與劉福通野戰爲其所敗將士奔潰

九月至中牟團結屯種賊復來劫營掠其輜重遂與其子

孛羅帖木兒相失劉哈刺不花進兵來援大破賊兵獲孛

羅帖木兒歸之復駐汴梁東南青堽 元史答失八都魯傳

劉福通劫敗長葛營趙明遠陷嵩汝以及雒陽 庚申外史

賊陷懷慶命河南行省右丞不花討之 元史

十二月答失八都魯大敗劉福通等於太康遂圍亳州僞宋  
主遁於安豐 元史

香軍陷安豐二月陷和州三月破廬州宣讓王棄城由浙  
浮海還燕香軍遂乘勝渡江破太平建康寧國遂據江東  
既而池州安慶尋皆敗歿 庚申外史

是歲察罕帖木兒與賊戰於河南北屢有功 元史

十五年賊勢滋蔓由汴以南陷鄧許嵩雄察罕帖木兒兵  
日益盛轉戰而北遂戍虎牢以遏其鋒賊乃北渡盟津焚  
掠至尊懷河北震動察罕帖木兒進戰大敗之河北遂平  
元史察罕傳

龍鳳二年

至正十六  
年丙申

三月庚寅

大明兵取集慶路 元史

三月答失八都魯父子親與劉福通對敵自巳至酉大戰數合答失八都魯墜馬字羅帖木兒扶令上馬先還自持弓矢連發以斃追者夜三更步回營中 元史答失八都魯傳

秋七月己卯朔諸將奉

上為吳國公以元御史臺為公府置江南行中書省上兼總省事 太祖實錄

時置江南行中書省我 太祖總其事以李善長為參議官郭景祥陶安為郎中各分房掌事至是諸將奉 太祖為吳國公得專征伐因置前後左右中翼元帥府 龍飛紀略

通鑑綱目卷之六十一

通鑑綱目卷之六十一



是月毫都陞 上為樞密院同僉以帥府都事李士元為

經歷尋陞 上為江南等處行中書省平章以故元帥郭

天敘弟天祐為右丞經歷李士元改名善長為左右司郎

中以下諸將皆陞元帥 俞本皇明記事錄

八月李武崔德破商州奉元路判官王淵起兵復之 元史節要

九月庚辰汝潁賊李武崔德等破潼關參知政事述律杰戰

死 元史

潼關失守哭參政述律杰存道詩云十月三日天地昏將

軍拒戰死轅門火飛華嶽三關破血浸秦川萬馬奔望越

伍胥徒抉目戰箕先軫不歸元北風吹盡英雄淚倚劍悲

歌一愴魂 張翥蛻庵集

迺賢贈張直言南歸詩云載憂山東盜兵禍久連結誰憐  
酈生辨竟墮韓侯譎注云參政述律存道事與酈食其同  
迺賢金臺集

壬午豫王斌納失里同知樞密院事定住引兵復潼關河南  
行省平章政事伯家奴以兵守之丙申潼關復陷伯家奴兵  
潰豫王復以兵取之李武崔德敗走戊戌賊陷虢州及陝州  
元史

是月察罕帖木兒復陝州及虢州復襲敗賊兵於平陸安邑  
元史

賊西陷陝州斷殺函勢欲趨秦晉答失八都魯調察罕帖  
木兒與李思齊往攻之察罕帖木兒卽鼓行而西夜拔殺

陵立柵交口陝爲城阻山帶河險且固賊轉南山粟給食以堅守攻之猝不可拔察罕帖木兒乃焚馬矢營中如炊煙狀以疑賊而夜提兵拔靈寶城守旣備賊始覺不敢動卽渡河陷平陸掠安邑蹂晉南鄙察罕帖木兒追襲之蹙之以鐵騎賊回扼下陽津死者甚眾相持數月賊勢窮皆遁潰

元史察罕傳

十月乙丑淮安城陷江東廉訪使褚不華死之

元史續編

汝穎盜發勢張甚不華行部至淮安極力爲守禦計賊與青軍攻圍日急總兵者按兵不救城中艸木螺蛤魚蛙燕鳥及鞞皮鞍韉革箱敗弓之筋皆盡而後老穉更相食城陷猶據西門力鬪見執爲賊所斃不華守淮安五年殆數

十百戰人比之張巡云

元史褚不華傳

元鎮南王孛羅普化鎮揚州招降青軍元帥張明鑑為濠  
泗義兵元帥俾駐揚州丙申三月明鑑等以食盡謀作亂  
逐鎮南王而據其城鎮南王出走至淮安為趙君用所殺  
實錄

至正十六年三月長鎗軍帥大小張鑑叛據揚州鎮南王  
退駐淮安時憲使褚不華拒寇趙負城胡陳寨首鼠兩端  
司馬木真靈保說胡誘獲趙人畜千百計既饑軍民相食  
數求救老張平章援不應十月城陷不華抗敵死王被執  
逾月不屈妃某偕投水死靈保由海趣浙寄跡老氏  
元史諸書皆云寇陷淮安而不記為何寇觀實錄及王逢

王逢詩序

詩則其爲趙君用明矣君用自濠州圍解後以甲午夏陷  
盱泗以丙申冬陷淮安以丁酉冬據淮稱王以己亥奔益  
都殺毛貴復爲續繼祖所殺則君用之失淮當卽在戊亥  
間耳俟更考之

十一月河南陷河南廉訪副使俺普遁

元史

劉福通遣將分略河南山東河北大書旗聯云虎賁三千  
直抵幽燕之地龍飛九五重開大宋之天遠邇傳聞元都

大震

福陽元龜政要

十二月答失八都魯遣使來獻捷

元史續編

十一月攻取夾河劉福通寨十二月庚申次高柴店偪太  
康三十里是夜二鼓賊五百騎來劫以有備亟遁火而追

之比曉督陣力戰自寅至巳四門皆陷壯士緣城入其郭  
斬首數萬擒偽將軍張敏孫韓等九人殺偽丞相王羅二  
人辛酉太康平遣孛羅帖木兒獻捷

元史答失八都魯傳

龍鳳三年

至正十七年丁酉

二月壬子賊李武崔德犯七盤藍田命察罕帖木兒以軍會  
答兒麻亦兒守陝州潼關哈刺不花由潼關抵陝西會豫王  
忒納失里及定住等同進討

元史

戊辰知樞密院事脫脫復邳州調客省使撒兒答溫等攻黃  
河南岸賊大破之

元史

壬申劉福通遣其黨毛貴陷膠州僉樞密院事脫歡死之

元史

毛貴一賊橫行山東侵犯畿甸駕幸灤京賊勢猖獗無異

唐宋 陶宗儀輟耕錄

是月李武崔德陷商州察罕帖木兒與李思齊以兵自陝虢

援陝西 元史

詔以察罕帖木兒爲陝西左丞思齊爲四川右丞

續通鑑

賊尋出襄樊陷商州攻武關遂直趨長安至灊上分道掠同華諸州三輔震懼豫王及省院官屬皆洶懼計無所出行臺治書侍御史王思誠移書求援察罕帖木兒卽領兵入潼關長驅而前與賊遇戰輒勝殺獲以億萬計賊餘黨皆散潰走南山入興元 元史察罕王思誠傳

三月詔答失八都魯至京師帝見之私謂侍臣曰此人死期至矣罷還軍先是秦不花軍士失律劫掠汴民臺御史

彈之有旨卸其軍褫職爲白衣聽達失調至是復命爲湖  
廣省左丞相仍提前軍往征山東毛貴達失八都魯率本  
部兵渡河征曹州盛文郁于是二將皆渡河相次失守矣  
庚申外史

三月毛貴陷萊州守臣山東宣慰副使釋嘉訥死之甲午毛  
貴陷益都路益王買奴遁自是山東郡邑皆陷元史

同知海南海北道宣慰使司事王英致仕家居年九十六  
益都陷謂其子弘曰吾世受國恩忍食異姓之粟乎水漿  
不入口者數日遂卒毛貴聞之使具棺衾以殮舉其屍不  
動焚香祝曰公子弘請公歸先塋祝畢屍卽起元史王英傳

毛貴由海道得海船長驅破益都庚申外史



丁酉毛貴陷濱州四月丁卯陷莒州 元史

毛貴陷益般陽等路而濟南又告急董搏霄提兵援之賊眾自南山來攻濟南望之兩山皆赤搏霄按兵城中設伏欄上合戰大破之般陽賊復約泰安之黨踰南山來襲乃列兵城上默開東門放兵出賊後城上兵皆下合擊之賊敗走濟南始寧有疾其功者譖於總兵太尉紐的該令依前詔從卜蘭奚同征益都搏霄卽出濟南城未幾命守河澗之長蘆十八年搏霄以兵北行曰我去濟南必不可保旣而濟南果陷 元史董搏霄傳

五月乙亥命知樞密院事孛羅奚進兵討山東戊寅平章政事亦克溫帖木兒復武安州等三十餘城 元史

六月劉福通犯汴梁其軍分三道關先生破頭潘馮長舅沙  
劉二王士誠寇晉冀白不信大刀敖李喜喜趨關中毛貴據  
山東其勢大振 元史

其軍分三支關先生等入晉冀由朔方攻上都白不信等  
趨關中毛貴合田豐趨大都 庚申外史

賊犯汴梁守臣求援于秦不花至十往返猶按甲不進睢  
毫太康俱陷邊報日急顧左右大言曰無多言我自有神  
算也日縱兵出掠繼又渡師河北聲取曹濮遂駐于彰德  
衛輝而曹濮之賊奔竄晉冀大同相繼不守遂蔓延不可  
制朝廷兩遣重臣諭旨秦不花恬不爲意十八年三月詔  
以中書右丞相總兵山東五月削官爵安置蓋州尋被殺

元史泰不花傳

七月己丑鎮守黃河義兵萬戶田豐叛陷濟寧路分省右丞  
寶理門遁義兵萬戶孟本周攻之田豐敗走本周還守濟寧  
元史

義兵黃軍下萬戶田豐叛入紅軍遂破東昌東平大名等  
處 庚申外史

是月歸德府知府林茂萬戶時公權叛以城降於賊歸德府  
及曹州皆陷

八月癸丑劉福通兵陷大名路遂自曹濮陷衛輝路字羅帖  
木兒與萬戶方脫脫擊之 元史

九月甲午澤州陷陵川縣尹張輔死之 元史

秦不華復大名路并所屬郡縣

命紐的該加太尉總山東諸軍守禦東昌時田豐據濟濮率眾來寇擊走之

元史

閏九月乙丑潞州陷丙寅賊攻冀寧察罕帖木兒以兵擊走之

元史

十月戊戌曹州賊入太行山

是月白不信大刀敖李喜喜陷興元遂入鳳翔察罕帖木兒李思齊屢擊破之其黨走入蜀

元史

白不信攻秦隴陷之又攻破鞏昌以李喜喜守之不信遂

入鳳翔

高岱鴻猷錄

賊出自巴蜀陷秦隴據鞏昌遂窺鳳翔察罕帖木兒先分

兵守鳳翔城而遣謀者誘賊圍鳳翔賊果來圍之數十重  
 察罕帖木兒自將鐵騎晝夜馳二百里往赴比去城里所  
 分軍張左右翼掩擊之城中亦鼓譟而出賊大潰自相蹂  
 踐斬首數萬級伏屍百餘里餘黨皆遁還關中元史  
察罕  
 傳

答失八都魯與知樞密院事答里麻失里討曹州賊官軍潰  
 敗答里麻失里死之元史

九月取溝城東明長垣三縣十月詔遣知院答失八都魯  
 來援分兵雷澤濮州而答里麻失里為劉福通所殺達達  
 諸軍皆潰答失八都魯力不能支退駐石村朝廷疑其玩  
 寇使者促戰相踵賊覘知之詐為答失八都魯通知書遺

諸道路使者果得之以進答失八都魯一夕憂憤死明年

正月詔其子孛羅帖木兒爲河南行省平章政事總領其

父軍馬

元史答失八都魯傳

答失八都魯既死其部下察罕帖木兒兵勢甚盛先爲刑

部侍郎號長鎗侍郎

庚申外史

十一月壬寅賊侵壺關察罕帖木兒大破之

元史

癸亥豫王忒納失里與陝西行省左丞相朵朵陝西行臺御

史中丞伯嘉訥分道攻討關陝

元史

是歲趙君用及彭大之子早住同據淮安趙僭稱永義王彭

僭稱魯淮王

元史

義兵千戶余寶殺其知樞密院事實童以叛降於毛貴余寶

遂據棣州

元史

龍鳳四年

至正十八年戊戌

正月丙寅田豐陷東平路

丁卯知樞密院事不蘭奚與毛貴戰於好石橋敗績走濟南

元史

二月己巳朔毛貴陷清滄州遂據長蘆鎮

元史

癸酉毛貴陷濟南路守將愛的戰死毛貴立賓興院選用故官姬宗周等分守諸路又於萊州立三百六十屯田每屯相去三十里造大車百輛以挽運糧儲官民田十止收二秀冬則陸運夏則水運

元史

董搏霄駐兵南皮縣之魏家莊毛貴兵猝至而營壘未完

因拔劍督兵以戰賊眾突至搏霄前摔而問曰汝爲誰搏  
霄曰我董老爺也眾刺殺之無血惟見白氣衝天其弟昂  
霄亦死之 元史董搏霄傳

壬午田豐復陷濟寧路甲申輝州陷丙戌紐的該聞田豐逼  
近東昌棄城走 元史

紐的該以乏糧棄城退屯北鄉東昌遂陷

丁亥察罕帖木兒調兵復涇州平涼保鞏昌 元史

戊子出豐陷東平路庚寅王士誠自益都犯懷慶路周全擊  
敗之 元史

三月庚子毛貴陷般陽路 元史

癸卯王士誠陷晉寧路總管杜賽因不華死之



甲辰察罕帖木兒遣賽因赤等復晉寧路 元史

賊由絳州垣曲縣襲晉寧城陷城中死者十二三晉寧人

喬彝整冠衣坐井上令妻子婢輩循次投井而已隨之 元史

忠義傳

己酉劉福通遣兵犯衛輝李羅帖木兒擊走之進克濮州 元史

庚戌毛貴圍薊州詔徵四方兵入衛乙卯毛貴陷薊州犯灤

州至棗州樞密副使達國珍戰死遂略柳州同知樞密院事

劉哈刺不花以兵擊敗之貴退走據濟南 元史

毛貴據山東由河間趨直沽漸逼京都中外大駭或勸乘

輿北巡以避之或勸遷都關陝中書左丞相太平以為不

可起同知劉哈刺不花于彰德與戰于柳林大敗賊眾京

城遂安

元史太平劉哈刺不花傳

丙辰冀寧路陷丁巳田豐陷益都路辛酉大同諸縣陷察罕帖木兒遣關保等往擊之是時賊分二道犯晉冀一出沁州一侵絳州

元史

平胡錄關先生破頭潘等

旨濮賊分道踰太行焚上黨掠晉冀陷雲中雁門代郡烽火數千里復大掠且南還察罕帖木兒先伏兵南山阻隘而自勒重兵屯聞喜絳陽賊果走南山縱伏兵橫擊之賊皆棄輜重走山谷其得南還者無幾乃分兵屯澤州塞盩于城屯上黨塞吾兒谷屯并州塞并陘口以杜太行諸道賊屢至守將數血戰擊卻之河東悉定

元史察罕傳

四月壬午田豐陷廣平路大略退保東昌元帥方脫脫以兵

復廣平

察罕帖木兒李思齊會宣慰張良弼郎中郭擇善宣慰同知拜帖木兒平章政事定住總帥汪長生奴各以所部兵討李喜喜於鞏昌李喜喜敗入蜀 元史

五月戊戌朔察罕帖木兒遣董克昌等以兵復冀寧詔察罕帖木兒還兵鎮冀寧庚子賊兵踰太行察罕帖木兒部將關保擊敗之 元史

劉福通攻汴梁壬寅汴梁守將竹貞棄城遁福通等遂入城乃自安豐迎其僞主居之以為都 元史

安豐賊劉福通等陷汴梁造宮闕易正朔號召羣盜巴蜀荆楚江淮齊魯遼海西至甘肅所在兵起勢相聯結 元史

察罕

傳 庚申外史記在十七年五月

乙巳關保與賊戰於高平大敗之庚申關先生破頭潘等陷  
遼州虎林赤以兵擊走之關先生等遂陷冀寧路察罕帖木  
兒調虎林赤關保同守潞州以察罕帖木兒爲陝西行省平  
章政事便宜行事 元史

秋七月丁酉湖廣行省參知政事周全據懷慶路以叛附於  
劉福通時察罕帖木兒駐軍雒陽遣伯帖木兒以兵守盩子  
城周全來戰伯帖木兒爲其所殺周全遂盡驅懷寧民渡河  
入汴梁 元史

丁未不蘭奚以兵復般陽路已而復陷 元史

己未劉福通遣周全引兵攻雒陽守將登城以大義責全全

愧謝退兵劉福通殺之 元史

守將續通鑑作察罕帖木兒

叛將周全棄覃懷入汴城合兵攻雒陽察罕帖木兒下令  
嚴守備別以奇兵出宜陽而自將精騎發新安來援賊至  
城下見堅壁不可犯退引去因追至虎牢塞城皋諸險而  
還 元史察罕傳

八月辛巳義兵萬戶王信以滕州叛降於毛貴 元史

九月關先生攻保定路不克遂陷完州掠大同興和塞外諸  
郡 元史

關先生為察罕所扼遂引還自塞外攻保定出掠塞外諸  
郡轉兵而東軍聲大振 龍鳳事蹟

丙午賊兵攻大同路壬戌平定州陷十月壬辰九同路陷完者帖木兒棄城走

元史

孛羅帖木兒統領諸軍攻曹州參政匡福統苗軍自西門入孛羅帖木兒自北門入克復曹州擒殺偽官武宰相仇知院獲印金牌等物

元史孛羅傳

十一月丁未田豐陷順德路

十二月癸酉關先生破頭潘等陷上都焚宮闕留七日轉略往遼陽遂至高麗庚辰察罕帖木兒遣樞密院判官瑣住進兵於遼陽

元史

關先生沙劉二破頭潘等由大同直趨上都焚毀宮殿望虎賁司犯大寧虎賁司去上都二百里世祖皇帝所立三

十六屯在馬先是大雪人跡不通至是雪晴暖氣如春庚申

外史

關先生等兵東向開平焚宮闕一盡元主不復時巡矣既

而欲修之大興工作中書省參議陳祖仁諫止之龍飛紀略

是年十月 上親領馬步數萬眾一馬軍兼二步軍征浙東

懸金牌鐫云奉天都統中華

十二月克婺州設浙東行省于金華府 上于省門建立二

大黃旗兩傍立二牌旗上書云山河奄有中華地日月重開

大宋天牌上書云九天日月開黃道宋國江山復寶圖俞本記事

錄

龍鳳五年至正十九年乙亥

正月丙午遼陽行省陷懿州路總管呂震死之

元史

破頭潘關先生趨全寧焚魯王官府駐軍遼陽

庚申外史

寇陷上京廣寧路總管郭嘉躬率義兵出禦旣而遼陽陷

嘉將眾巡邏去城十五里遇青號隊伍百餘人給言官軍

俄果脫青衣變紅嘉出馬射賊分兵夾攻之死者無算頃

之賊至圍城亙數十里嘉開西門逐賊力戰以死

元史忠義傳

三月辛巳樞密副使朵兒只以賊犯順寧命張立將精銳由

紫荆關出討令鴉鶻由北口出迎敵

元史

甲申賊楊誠由飛狐靈丘犯蔚州據之

元史

孛羅帖木兒領兵豐州雲內與關先生戰關軍奔潰是月

奉詔鎮大同爲京師捍蔽

元史孛羅傳



匡不著左丘明年一

四月癸亥朔賊陷金口等州司徒知樞密事佛家奴調兵平之元史

甲子毛貴為趙君用所殺元史

四月先是徐州芝麻李故將趙君用彭早住據淮安僭稱

王早住死君用益自尊未幾奔山東依宋將毛貴至是又

殺貴龍鳳事蹟

此記早住之死在同君用據淮之後可以正史之誤

己丑賊陷寧夏路遂略靈武等處元史

五月察罕帖木兒大發秦晉諸軍討汴梁圍其城元史

察罕帖木兒圖復汴梁五月以大軍次虎牢先發遊騎南

道出汴南略歸亳陳蔡北道出汴東戰船浮於河水陸並

下略曹南據黃陵渡乃大發秦兵出函關過虎牢晉兵出太行踰黃河俱會汴城下首奪其外城察罕帖木兒自將鐵騎屯杏花營諸將環城而壘賊出戰屢敗遂嬰城以守乃夜伏兵城南旦日遣苗軍跳梁者略城而東賊傾城出追伏兵邀擊敗之又令弱卒立柵外城以餌賊賊出爭之弱卒佯走薄城西因突鐵騎縱擊悉擒其眾賊自是益不敢出

元史察罕傳

七月丙辰趙君用旣殺毛貴其黨續繼祖自遼陽入益都殺君用遂與其所部自相仇殺

山東元守將毛平章被淮安趙平章所殺將士忽亦殺趙眾奉其幼子仍爲總兵以鎮山東之地 上欲知齊魯燕

冀虛實復遣何必聚爲毛平章燒飯食以探中原小毛平章年幼聰敏必聚至數日待之甚厚以金盒盛玉帶一條謝之

俞本記事錄

八月戊寅察罕帖木兒督諸將攻破汴梁城劉福通奉其僞主遁退據安豐

元史

八月諜知城中計窮食且盡乃與諸將閻思孝李克彝虎林赤賽因赤答忽脫因不花呂文完哲賀宗哲安童張守禮伯顏孫熹姚守德魏賽因不花楊履信關關等議各分門而攻至夜將士鼓勇登城斬關而入遂拔之劉福通奉其僞主從數百騎出東門遁走獲僞后及賊妻子數萬僞官五千符璽印章寶貨無算全居民二十萬不旬日河南

悉定獻捷京師詔告天下

元史察罕傳

十九年羣盜由開平東屯遼陽冬詔太平子也先忽都以知樞密院事率師往討太平以其年少數請改命不允至則遣將拔懿州省治盜踰遼河東奔而朝廷讒搆日甚罷爲上都留守

元史太平傳

賀太平當相位奏用其子也先忽都總兵取遼陽太平意謂關先生等自晉冀兩京歷上都兵常無留行其破遼陽必不能守可以成功其子至則關潘之軍日治戰馬一無退意宿留不前竟潰而歸昏夜入城仍陞爲翰林集賢學士

庚申外史

是歲五月

太祖爲儀同三司江南等處行中書省左丞相是月

太祖親征衢州 國初事蹟

十二月克處州亳州陞 上爲丞相同僉 俞本記事錄

是歲冬十一月我 太祖得處州命分省都事孫炎爲處  
州總制龍泉人葉子奇上炎書曰愚聞正天下之統者必  
新天下之化興天下之治者必革天下之弊設使弊不革  
則治無由而興化不新則統亦無從而正矣洪惟聖宋之  
重興實由天厭于元德命茲宅中於華夏宜當修德以應  
天竊謂復聖宋之治其綱條之大者有八正彝倫以清化  
原簡英賢以熙庶績隆廉恥以革貪風紀孝行以敦禮本  
汰冗官以一其權正刑賞以齊其柄通錢幣以權輕重驗

產力以均賦役凡此八者當革戎夷之弊風一復我家之  
舊制則統不期正而自正治不期興而自興太祖太宗禮  
樂刑政之綱化夏文明之教將復見於今日矣又上炎論  
賦額書曰伏遇丞相以雄傑之才紹開中興之業總制先  
生以通誠之器特受丞相之知聖朝肇造區夏務存寬仁  
立法之初尤宜致謹方今征討之秋非謂軍國之需全不  
科取於民但當一掃危邦之陋風以出興王之令典則蒼  
生幸甚

葉子奇靜齋文集

龍鳳六年

至正二十  
年庚子

正月初一日

上於府門親書桃符曰六龍時遇千官覲五虎功成上將封

正月癸卯太寧路陷 元史

賊陷太寧詔也速往討之賊兵次侯家店也速遇敵卽前與戰自昏抵曙散而復合也速遣別騎繞出賊後賊腹背受敵大敗遂拔太寧擒首賊湯通周成等三十五人磔于都市 元史也速傳

楊誠據蔚州李羅帖木兒攻之追至飛狐縣東關誠棄軍遁降其潰卒 元史李羅傳

三月戊子朔田豐陷保定路乙巳冀寧路陷四月庚申命大司農司都事樂元臣招諭田豐至其軍爲豐所殺 元史

五月破頭潘關先生沙劉二軍入高麗王京高麗王奔耽

羅其臣納女請降將士皆以女子醜遂與高麗如姻婭往來高麗人各藏其馬林中一夕傳王令除高麗聲音者不殺其餘並殺之沙劉二關先生皆死惟破頭潘裨將左李率輕騎萬人從間道走西京降孛羅已而又降擴廓庚申外史

七月辛酉孛羅帖木兒敗賊田豐偽將王士誠於臺州元史

八月乙未永平路陷元史

賊雷帖木兒不華程思忠等陷永平堅守不可下也速外

築大營絕其樵采數與賊戰獲偽帥二百餘人擒雷帖木

兒不華送京師程思忠棄城遁去追至瑞州賊遂東走金

復州元史也速傳

九月壬戌賊陷孟州又陷趙州攻真定路癸未賊復犯上都



右丞忙哥帖木兒引兵擊之敗績 元史

十一月癸酉賊犯易州十二月辛卯廣平路陷

龍鳳七年 至正二十一年辛丑

二十一年正月亳都陞

上為吳國公 俞本記事錄

正月乙丑河南賊犯杞縣察罕帖木兒討平之 元史

二月甲申同僉樞密院事迭里帖木兒復永平灤州等處 元史

二月癸酉察罕帖木兒調兵討永城縣又駐兵宿州擒賊將

梁綿住 元史

五月李思齊受李武崔德等降 元史

劉福通所遣將李武崔德以西略地無功福通責其逗遛

叛降於李思齊

高岱鴻猷錄

六月丙申察罕帖木兒總兵討山東七月辛亥平東昌是月  
進兵復冠州八月討東平遣使招諭僞丞相田豐豐降魯地  
悉平進兵濟南劉珪降遂圍益都 元史

察罕帖木兒既定河南乃以兵分鎮關陝荆襄河雒江淮  
而重兵屯太行營壘旌旗相望數千里乃日修車船繕甲  
兵務農訓練士卒謀大舉以復山東二十一年謀知山東  
羣賊自相攻殺而濟寧田豐降于賊六月乃輿疾自陝抵  
雒大會諸將與議帥期發并州軍出井陘遼沁軍出邯鄲  
澤潞軍出磁州懷衛軍出白馬及汴雒軍水陸俱下分道  
並進而自率鐵騎建大將旗鼓渡孟津踰覃懷鼓行而東

復冠州東昌八月師至鹽河遣其子擴廓帖木兒闖思孝等會關保虎林等將兵由東河造浮橋以濟賊以二萬餘眾奪之關保虎林赤且戰且渡拔長清擣東平東平僞丞相田豐遣崔世英等出戰大破之直抵其城下察罕帖木兒以田豐據山東久軍民服之乃遣書諭以逆順之理豐降東平平令豐爲前鋒從大軍東討棣州俞保降東平王士誠東昌楊誠等皆降遂復東平濟寧魯地悉定時大軍猶未渡羣賊皆聚于濟南而出兵齊河禹城以相抗乃分遣奇兵取問道出賊後南略泰安逼益都北徇濟陽章正中循瀕海郡邑自將大軍渡河與賊將戰于分濟大敗之進逼濟南城而齊河禹城俱來降南道諸將亦報捷再敗

益都兵于好石橋東至海濱郡邑聞風送款攻圍濟南三月城乃下遂移兵圍益都環城列營凡數十大治攻具百道並進賊悉力拒守復掘重塹築長圍遏南洋河以灌城中仍分守要害收輯流亡郡縣戶口再歸職方號令煥然矣

元史順帝紀察罕傳

山東毛貴死其將爲復仇殺趙君用國內遂大亂花馬王田豐埽地王王士誠互相攻伐察罕乘之破其冠州東昌濟南諸郡進圍益都田豐來降豐時提兵在穆陵關使人來言總兵如不信我心且不與總兵相見當爲平沿海諸城然後相見未晚也察罕喜卽以朝命授豐爲山東行省平章且重犒其所部已而沿海登萊沂密等處皆降附田

庚申外史

豐遂與察罕相見益都城西

八月己卯朔遣使至汴梁與元將察罕帖木兒通好時察罕

帖木兒用兵山東招降東平田豐樂安俞寶等其勢頗盛太祖

實錄

太祖嘗曰河南李察罕帖木兒兵威甚振先遣楊憲往彼

通好及察罕帖木兒下山東又遣汪河往彼結援不意田

豐王士誠刺殺察罕帖木兒

太祖遣千戶王時等齎銀三千兩往方谷真附海船到本

都體探元朝及李察罕李思齊等軍馬事情谷真差吳都

事同去既回帶到馬十匹

實錄載在癸卯三月但云令方谷真市馬

俱劉辰國初事

太祖以都事汪河及錢禎往察罕軍中結援河至軍中議

論稱旨 龍飛紀略

龍鳳八年 至正二十年壬寅

二月偽平章左李道楊榮祖至大同降於孛羅帖木兒 元史孛羅

六月戊寅元中書平章察罕帖木兒遣使致書於

上上謂左右曰予觀察罕書辭媚而婉是欲啗我我豈可以  
甘言誘哉況徒以書來而不返我使者其情為可見予方有  
事之秋未暇與較姑置不答 太祖實錄

壬寅十二月元遣戶部尚書張昶航海至慶元欲通好於  
我方國珍遣檢校燕敬來告 上不之答敬還國珍懼乃

送昶于福建平章燕只不花所時有丞王溥在建昌聞之遣人報 上上命溥招之來且命符璽郎劉紹先候之于廣信溥招昶果至遂偕紹先赴建康昶見 上問其所以來昶俛首無一言 上不欲窮詰命中書館之時召問以事知其才可用遂留之 實錄

太祖聞李察罕帖木兒下山東江南震動遣使通好時陳友諒據上江雙刀趙扼安慶張士誠據平江故有北方之好元朝遣戶部尙書張昶郎中馬合謀奏差張璉齋龍衣御酒八寶頂帽榮祿大夫江西等處行中書省平章政事宣命詔書昶等航海至方國珍處及一年國珍兩遣人來告 太祖不答國珍遂令昶等往福建平章燕只不花遣

人往福昌告平章王溥溥欣然遣儒士饒某到京奏昶等在鉛山界首等候 太祖命符璽郎劉宗啟於廣信迎之昶等果至宗啟伴至衢州械昶等到京城外裸其體入城至省前 太祖賜各人衣冠入見不拜 太祖怒曰元朝不達世變尙敢遣人扇惑我民將出廢之昶無一言馬合謀抗對不遜 太祖命壯士縛之至暮留昶一人以死囚代之與馬合謀張璉出聚寶門誅之以三人首發與福建界首示眾監刑官都事韓留亦誅之數日後謂劉基宋濂曰元朝送一大賢人與我爾等可與議論及出乃昶也除行中書省都事不久陞參政自知政多合 上意賞賜甚多權勢震動李文忠克杭州執平章長壽丑的等官皆給



與腳力送至境上任其還鄉昶心懷舊主以國事陰通獲其書 太祖令馮國勝楊憲鞠之處以極刑謂李善長曰被他侮弄我這幾年碎其骨投之于水 劉辰國初事蹟 俞本記事作都事馬木舌

張昶潛以書通元朝泄江南兵機至安武州獲之昶凌遲死 俞本記事錄

李察罕下山東天下震動 太祖亦遣使通好元遣戶部尙書張昶郎中馬合謀以江西行省平章授 太祖 太祖祖聞察罕死不受馬合謀不屈死 月山叢談

按察罕破汴梁下山東海內震動我 太祖遣使通好察罕亦致書相答已而有張昶馬合謀之來察罕爲之也

上曰察罕書辭欲以甘言陷我所謂甘言陷我者卽榮祿  
平章之命也元史以航海來淹留逾年而察罕被刺之問  
亦至矣野史所謂 太祖聞察罕死不受命者是也 太  
祖聞察罕死歎曰天下無人矣又曰元朝不達世變尙敢  
遣人扇惑我民察罕之死關係豈不重哉劉辰國初事蹟  
大書其事無所隱避國史雖多微詞亦不盡沒其實參互  
之可以考見劉辰又云 太祖以孤軍獨守別無趨向成  
敗當聽其自然在後滅陳擒張信知天命有歸卽位後始  
圖中原然吾以爲察罕一死天意灼然歸我明矣嗚呼帝  
王之興豈不有天命哉 聖祖極推重察罕卽位後幸汴  
梁特遣使往祭其意可知厥後洪武九年宋濂奉敕撰方

國珍神道碑歷數一時羣雄皆直書其名而於察罕則云齊國李忠襄王察罕保釐何其嚴重之如此非本于聖祖之意當時史臣寧敢輕獎亡國之臣以干聖祖之怒耶或曰聖祖祭忠襄文頗多譏評之語亦非聖祖之初意也

戊子田豐及王士誠刺殺察罕帖木兒遂走入益都城眾乃推察罕帖木兒之子擴廓帖木兒爲總兵官復圍益都詔以擴廓帖木兒爲中書平章政事兼知河南山東行樞密院事一應軍馬並聽節制元史

時山東俱平獨益都孤城猶未下六月田豐王士誠陰結賊復圖叛豐之降也察罕帖木兒推誠待之不疑數獨入

其帳中及豐既謀變乃請行觀營壘眾以爲不可往曰吾推心待人安得人人而防之左右請以力士從又不許乃從輕騎十有一人行至王信營又至豐營遂爲王士誠所刺訃聞帝震悼朝廷公卿及四方之人不問男女老幼無不慟哭者先是有白氣如索長五百餘丈起危宿埽太微垣太史奏山東當大水帝曰不然山東當失一良將卽馳詔戒察罕帖木兒勿輕舉未至而已及其難追封忠襄王諡獻武及葬追封潁川改諡忠襄

元史察罕傳

察罕方調兵攻圍益都俾田豐軍塞益都南門爲營圍數月田豐頻往察罕營議事見其待朝廷使者甚簡傲又所設施多用術數乃忿曰我以山東全地降汝誠以汝爲元

朝中興人物也今若此乃漢室之曹操耳使汝爲曹操我豈不能自爲之耶於是與王士誠私謀曰十五日察罕必巡兵圍我預椎牛釀酒邀一切幕官大小部帥行酒汝選驍勇者侍立兩人夾一人以擊鼓爲令自察罕以下皆殺之謀既定察罕于十四日時從馬騎二人來田豐營士誠勇而躁見察罕輕身出意謂得間帶刀入侍豐目之使退士誠誤以爲嗾已也轉身自察罕後揮刀中其肩田豐知其不可止遂擊鼓三城中開門納之田豐軍遂擁察罕入城城中欲推察罕爲主以拒朝廷田豐不可已而察罕死察罕入城之夕諸將惶惑軍中頗有異謀同僉白瑣住乃察罕舊人倡言曰總兵奉命討逆總兵雖死朝命不可中

止況今總制官王保保爲總兵養子朝廷又賜其名擴廓  
若立以爲主總兵雖死猶不死也于是率先下拜眾亦皆  
拜人心始定帝聞察罕死哭之慟孛羅帖木兒在西京聞  
之亦哭曰察罕若在我省用多少氣力中原婦人皆爲嗟  
歎流涕

庚申外史

王逢七月聞河南平章凶問詩云六月妖星芒角白幾夜  
徘徊天市側尋聞盜殺李上公窮旅孤臣淚沾臆當時寬  
猛制崔澤安得受降翻受敵上公忠名垂竹帛書生奚爲  
費禕恤東南風動旗黃色蒲稍天馬長依北

梧溪集

太祖聞察罕帖木兒爲田豐所害歎曰天下無人矣

天潢玉牒

己亥益都兵出戰擴廓帖木兒生擒六百餘人斬首八百餘

臣不養九  
級九月癸卯朔劉福通以兵援田豐至火星埠擴廓帖木兒  
遣關保邀擊大破之十一月乙巳擴廓帖木兒復益都田豐  
等伏誅

擴廓帖木兒既總兵柄身率將士誓必復仇人心亦思自  
奮圍城益急賊悉力拒守乃以壯士穴地通道而入遂克  
之執其渠魁陳蹂頭等二百餘人獻闕下而取田豐王士  
誠之心以祭其父餘黨皆就誅卽遣關保以兵取莒州于  
是山東悉平 元史察罕傳

十二月元將擴廓帖木兒遣尹煥章來獻馬 太祖實錄

先是察罕駐兵汴梁 上嘗遣使通好既而察罕亦以書  
來聘 上以前所遣使不返不之答至是察罕死擴廓帖

木兒乃遣煥章送我使者自海道還因以馬來獻實錄

龍鳳九年至正二十三年癸卯

至正二十三年

上卽吳王位於金陵俞本記事錄

正月乙巳天寧陷是春關先生餘黨復自高麗還寇上都孛

羅帖木兒擊降之元史

丙寅遣中書省都事汪河送尹煥章歸汴以書報擴廓帖木

兒太祖實錄

書略曰閣下先王奮起中原英勇智謀過于羣雄聞而未識是以前歲遣人直抵大梁實欲縱觀未敢納交也不意先王捐館閣下意氣相期遣送使者涉海而來深有推結



之意自今以往信使繼踵商賈不絕無有彼此是所願也  
實錄

二月癸酉張士誠將呂珍攻劉福通等於安豐入其城殺福通等先是福通等兵勢日蹙以安豐來附至是爲珍所殺三月辛丑朔

上率右丞徐達參政常遇春等擊安豐時呂珍殺劉福通而據其城聞大軍至極力拒守廬州左君弼出兵來助珍遇春擊破之珍與君弼皆遁走

上乃還命達移師圍廬州七月乃還

太祖實錄

韓林兒建都亳州答失八都魯圍亳州林兒遁於安豐劉福通陷汴梁乃自安豐迎其主居之以爲都察罕破汴梁

福通奉其主遁歸癸卯三月張士誠圍安豐福通請救

太祖親援之先遣常遇春至安豐士誠遂解圍福通奉林

兒棄安豐遁于滁州居之士誠兵復入安豐守之丙午三

月太祖取安豐

劉辰國初事蹟

張士誠圍安豐劉福通請兵救援太祖親援之太史劉

基諫曰不宜輕出假使救出來當發付何處不聽徑過廬

州平章左君弼不出迎及安豐解兵回攻廬州三月不克

後太祖謂劉基曰我不當爲安豐之行使陳友諒乘我

之出直擣金陵我進無所成退無所歸友諒不攻建康而

圍南昌此計之下者也

同上

據實錄劉福通爲呂珍所殺國初事蹟則云福通奉林兒

遁於滁州庚申外史則云丙午冬與小明王俱沈於瓜州  
二說未知孰信史乘考誤以劉辰所記爲非然淇武實錄  
多舛誤又諱言龍鳳事吾亦未敢以爲信也

上至安豐擊呂珍破之珍棄城走 上遂以宋主韓林兒  
還金陵諸將議于中書省設御座奉林兒劉基曰彼牧豎  
耳奉之何爲密陳天命所在 上意悟會陳友諒來入寇  
遂議征討不果奉 高岱鴻猷錄

誠意伯行狀載不奉小明王事在庚子年以時勢考之恐  
未必然高岱記于癸卯安豐遁退之後與國初事蹟不當  
輕敵之言相合所謂陳友諒入寇者非庚子龍灣之役而  
癸卯南昌之役也似爲近之第云 上奉林兒還金陵丙

午殂於金陵則承小說家之譌耳

安豐被張氏圍困城中人相食有屍埋于地而腐者亦掘而食之或以井底泥爲丸用人油煤而食之者小明王在城中號安陽奕劉太保等饑餓無措遣人求救 上親率大兵援之大敗張氏軍士每名各齎白米二斗積於東門外以救城中饑者邀請小明王及母妹并臣劉太保悉領五奕官軍棄城悉詣廬州營中 上設鑿駕織扇迎駐滁州剏造宮殿居之易其左右宦侍奉之甚厚 俞本記事錄 是年三月十四日小明王內降制善贈我 太祖三代曾祖考九四公資德大夫江西等處行中書省右丞上護軍司空吳國公會祖妣侯氏吳國夫人祖考初一公爲光祿

大夫江南等處行中書省平章政事上柱國司徒吳國公

祖妣王氏吳國夫人考五四公開府儀同三司上柱國軍

國重事中書右丞相太尉吳國公妣陳氏吳國夫人龍鳳事蹟

龍鳳十年至正二十四年甲辰是年小明王在滁州

春正月丙寅朔李善長徐達等奉

上為吳王時羣臣以

上功德日隆屢表勸進

上不許羣臣固請不已乃即吳王位太祖實錄

是歲二月授陶安黃州府知府十二月授鄱陽府知府其

劄付俱稱龍鳳十年皇帝聖旨吳王令旨陶學士文集

龍鳳十一年至正二十五年乙巳

是年小明王在滁州

龍鳳十二年

至正二十六年丙午

是年小明王在滁州

高皇帝平僞州先有榜喻之曰皇帝聖旨吳王令旨總兵

官準中書省咨敬奉令旨 敬此除敬遵外咨請施行準

此合行備出榜文曉諭敬奉令旨事意施行龍鳳十二年

五月二十一日本州判官許仕傑齎到

祝允明九朝野記

丙午至正二十六年是歲廖永忠沈韓林兒於瓜步大明惡

永忠之不義後賜死

通鑑博論

洪武二十九年九月十七日寧王權奉 敕編進

先是小明王駐安豐為張士誠攻圍乘黑風暴雨而出居

於滁州至是朱鎮撫具舟楫迎歸建康小明王與劉太保

至瓜州渡遇風浪掀舟沒劉太保小明王俱亡

庚申外史

龍鳳十二年冬十二月宋主殂丁未我太祖稱吳元年

至正之二十七年也

陸深平湖錄

史乘考誤載國初事蹟云丙午三月太祖取林兒安置

按國初事蹟云丙午三月太祖取安豐無安置之語諸

本皆然此考誤之誤也

十二月是時羣臣皆上言一代之興必有一代之制作今新

城既建宮闕制度亦宜早定

上以國之所重莫先廟社遂定議以明年爲吳元年命有司

營建廟社立宮室

太祖實錄

高岱論曰韓林兒在宋未足方義帝更始其赤眉之盆子

乎我 聖祖之開創于宋無毫髮藉以和陽一命奉之終身至安豐之圍尺書告急卽親將赴援不從劉基之諫不恤陳寇之侵卒以脫林兒于虎口林兒不死不改元下令猶以皇帝聖旨先之恐漢高之于義帝光武之于更始未必能若是也嗚呼明之德其可謂至德也已矣

李文鳳論曰秦氏暴虐陳勝吳廣斬竿揭木以爲天下先雖尋就覆亡後之議者猶曰秦民之湯武也胡元非我族類重以庚申不君民不聊生韓氏父子君臣起義號召天下天下雲合響應羣雄並爭不謀而同然當是時據河南蕩山東矚趙魏躒上都入遼東略關西下江南大抵盡宋之將帥不謂之中國之湯武不可也天命有德真人龍興



定鼎建業處漢吳二強寇之間東西掃蕩從容指揮元之不能以匹馬隻輪臨江左者以有宋爲捍蔽也韓氏君臣非特有功于中國其亦大有功於我明也乎草澤崛起無憑依鬼怪與夫暴戾糾紛之氣象然建國十有餘年其間所以能自立要必有可紀者惜載籍泯泯莫究萬一得則爲王失則爲虜悲夫

月山叢談

丁未至正二十七年乃小明王龍鳳之十三年改爲吳元年  
俞本皇明紀事錄

國初羣雄事略卷一

國初羣雄事略卷二

虞山錢謙益牧齋甫編

追封滌陽王

王諱子興姓郭氏濠州定遠縣人其先曹州人也至正壬辰二月起兵乙未一月卒於和陽洪武元年追封滌陽王

王父少好術數嘗從異人游得其書年長未娶南游定遠邑人神其術叩之必驗邑中富翁家有瞽女王父過其門翁以女命求卜曰此貴人也翁曰此女瞽未配王父曰翁能不鄙我乎則妻之翁曰諾既娶不數年家日贍生子三女一王中子也始生父卜之喜謂人曰是兒異日非常必大吾家既長

兄弟皆善殖產元末民間有造言者王誤信之甚篤遂散家

財陰結賓客至正壬辰汝潁兵起王識天下當變乃召所結

賓客子弟拔濠梁據之敕賜滁陽王廟碑 洪武十七年三

月承直郎太常司丞臣張來儀奉

至正十一年辛卯五月潁州妖人劉福通作亂陷潁州八月蕭

縣芝麻李及彭大趙君用攻陷徐州

至正十二年壬辰二月乙亥朔定遠人郭子興孫德崖及俞某

魯某潘某等起兵自稱元帥攻拔濠州據其城守之太祖高

皇帝實錄

十二年正月定遠縣富民郭姓者聚眾燒香稱亳州制節元

帥十一月起定遠二月二十六日克濠州三月初二日克曹

縣 俞本皇明記事錄

皇上潛居民間爲訛言所逼懼禍將及遂挺身入濠梁抵其城爲門者所執將欲加害人以告王王親馳活之撫之麾下聞召與語異之取爲親兵

廟碑

壬辰二月二十七日陷濠梁而拒守之哨掠四鄉焚燒廬舍不兩月越境犯他邑所過亦然胡帥徹里不花率騎三千營城南三十里逡巡不進四掠良民以絳繫首稱爲亂民以獻功於是良民受害呼親喚舊相繼入城合勢共守予當是時尚潛草野託身緇流於是禱於伽藍容予倡義遂決入濠城以壬辰閏三月初一日至城門門者不由分訴執而欲斬之良久得釋被收爲步卒入伍幾兩月餘爲

親兵終歲如之

紀夢

高皇帝御製文集

閏三月一日晨旦抵濠城守者縛而欲斬之有人報於首  
雄良久得免收入步伍幾月拔長九夫首雄滁陽王郭子  
興也既長九夫王嘗召與言論久之王知上非可久屈  
收爲家人親待同子弟

皇明本紀

居數月王謂曰汝單居當爲汝婚王暮歸與夫人飲食語及  
斯事次夫人忽惋惜謂王曰方今兵亂正當收召豪傑是子  
舉止異常若不撫於家反使爲他人之親是失智也王悟遂  
以女妻之孝慈皇后是也

廟碑

初宿州閔子鄉人馬公素剛直重然諾愛人喜施避仇定  
遠與子興爲刎頸交馬公有季女甚愛之嘗言術者謂此

女當大貴及遇亂謀還宿州起兵應子興以女託子興曰  
幸公善撫視子興與其妻張氏撫之如己子已而馬公死  
上時未有室子興與張氏謀曰昔馬公與吾相善以女  
託我然視眾人中未有當吾意者因言 上度量豁達有  
智略可妻之張氏曰吾意亦如此子興意遂決乃以女妻

上卽 孝慈高皇后

太祖實錄

滁陽王夫人張氏次夫人亦張氏按張來儀廟碑初勸滁  
陽館 高帝於二室者次夫人也滁陽被械攜二子從

高帝奔告魯淮者亦次夫人也厥後女爲 上妃生三王  
二公主人知滁陽能識真主於魚服之中不知皆其次夫  
人啟之也且倉卒之中能奔告魯淮以免其夫斯可謂賢

明婦人矣實錄但云子興夫人張氏遂沒次夫人之賢余故表而出之此按滁陽夫人生三子皆與上不協而次夫人獨能知高帝又以其女相託則當時周旋側陋次夫人之功多矣滁陽事實高帝手藁以授來儀宜其不沒次夫人之德也

是時我

太祖高皇帝贅於郭元帥義女馬氏領兵攻五河二月初六日復取定遠縣攻南宿州固鎮十六日至濠州元帥賈魯兵圍之至九月退

命本皇明紀事錄

按元史十二年八月賈魯從脫脫平徐州九月脫脫班師命魯追餘黨分攻濠州次年五月卒於軍中魯誓師曰吾

頓兵於濠七月矣則俞本所記賈魯圍濠自二月至九月者誤也或別將之師非賈魯耳

王爲人勇悍善戰時軍帥四人名位皆在王上王素剛直不屈人下每遇事四人瞋目語難而王剖決通敏數以非語侵之眾故含忿

廟碑

王爲人志氣雄暴列諸雄之上其雄有四俞魯孫潘出於農其性麤直謀智和同獨與王異王少出外而多居內每視事四雄者每待王久不至則四人專主之三五日乃一會會則四雄瞋目視王四雄言有不當王出言相侵四雄亦姑忍之王久乃覺謂上曰諸人若是奈何上曰不過會簡而至是耳王曰然明日出與會三日後復如初彼



此防疑不相安矣

皇明本紀

碑云四人名位在王上本紀云王列諸雄之上當以廟碑爲是

九月脫脫平徐州彭大趙君用率芝麻李餘黨奔濠州脫脫命賈魯追擊之

未幾客軍首帥彭趙以兵來駐濠二姓皆僭稱王王等遂爲所制

廟碑

遇徐州亂雄敗其殘雄趣濠梁合勢共守其殘雄勢本受制不料俞孫潘郭反屈節以事之未旬月人各受制後因彭趙僭稱王號勢在魯淮趙稱名而已

皇明本紀

是年九月元兵復徐州徐州彭早住趙君用率餘眾奔濠

德崖等納之二人本以窮蹙來奔德崖等四人與子興反  
屈己下之事皆稟命遂爲所制早住頗有智數攬權專決  
君用但唯唯而已

太祖實錄

按實錄癸巳夏五月後書云彭趙二帥旣據濠州挾德崖  
等爲己用是冬早住自稱魯淮王均用稱永義王所謂是  
冬者癸巳之冬也滁陽王廟碑及皇明本紀記二姓僭  
號是在壬辰奔濠之時與實錄異以高帝紀夢考之則  
云明年元將賈魯死城圍解予歸鄉里收殘民數百獻之  
上官以我爲鎮撫當年冬彭趙僭稱部下多凌辱人所謂  
當年冬者亦癸巳之冬也以時勢言之二姓雖草草僭王  
亦當在元兵解圍之後而不在自徐奔濠之日或當以實

錄爲正耳又按元史順帝紀辛卯八月蕭縣李二及老彭趙君用攻陷徐州老彭者早住之父彭大也芝麻李旣敗則彭大當與君用俱奔濠實錄不書彭大而書早住又書於甲午六月上取滁陽之後云未踰月彭趙遣人邀

上守盱泗上辭弗往未幾二人自相吞併早住亦亡惟君用專兵柄云按順帝紀又於丁酉年書趙君用及彭大之子早住同據淮安趙僭稱永義王彭僭稱魯淮王則丁酉歲早住尙在以理度之癸巳之夏與君用併吞而亡者乃彭大非早住也實錄於早住旣亡之後記上使人說君用及賂其左右以解子興而廟碑與天潢玉牒俱云彭趙東屯泗州挾王以往遣人賂彭趙得縱歸則又早住不

死之明證也二姓僭稱之事在壬辰癸巳間者諸書載之甚確而順帝紀又載於丁酉歲者蓋彭大既亡之後早住與君用同陷盱泗同據淮安君用仍僭稱永義而早住襲其父之舊仍稱魯淮故元史仍從而記之也元史稱彭大之子早住其意甚明修太祖實錄者殆未及考耳己亥歲君用殺毛貴旋爲續繼祖所殺獨早住不知其所終而丙午歲梅思祖以淮安降上諭之曰汝等多故趙君用部曲往往皆挾重名繼歸張氏復食其祿則數年之內君用輩披猖淮泗間略可想見惜紀載闕如無從援據耳姑書此以訂實錄之誤

一日眾挾趙勢拘王於獄將害之

皇上自軍馳歸或曰勿往曰再生父母有難可不赴乎遂入王家明日彭帥聞遣人釋王以歸

廟碑

滁陽王奉魯淮而輕趙俞魯孫潘恃趙威於市衢擒王

上出淮北聞王被擒急趨歸友人止之曰爾主被擒亦欲

擒爾且勿歸 上曰再生之恩有難不入何丈夫之爲也

卽入見其家止存婦女諸子弟皆匿 上曰舍人安在諸

婦人佯言不知 上曰我家人也釋疑從我謀詢知舍人

所在乃以實告 上曰主君厚彭薄趙禍必自趙欲脫此

難非彭不可明且以次夫人攜二子往告彭彭怒曰孰敢

若是乃呼左右點兵搜疆 上亦返舍去長衣披堅執銳

與諸人同圍孫氏椽舍 上掀椽揭瓦諸軍殺其祖父母

於晦窟中得見滁陽王鉗足繫頭肌肉浮蕩令人負歸皇  
明本紀

九月初九日 上攻懷遠縣及安豐十月破元平章月乞察  
兒營克焦山陳章營攻塔崗招安壯丁十二月賈魯復圍濠  
州

至正十三年

癸巳

上克凱里蕭縣寨 四月攻宋山寨克含山縣攻平塘營克  
靈璧縣虹縣 並俞本記事錄

壬辰冬元將賈魯與月哥察兒圍濠城城中極力拒守

癸巳夏五月壬午賈魯卒元兵解圍去 太祖實錄

脫脫平徐州命魯追餘黨分攻濠州魯誓師曰吾奉旨統

八衛漢軍頓兵於濠七月矣必以今巳午時取城然後食  
魯上馬麾進抵城下忽頭眩下馬且戒兵馬勿散病愈亟  
攻竟卒於軍中十三年五月壬午也 元史賈魯傳

俞本記五月大敗賈魯六月海子口搭浮橋攻賈魯於藕  
塘下營按五月賈魯已卒此云攻賈魯於藕塘下營或魯  
之殘兵也

時濠州乏糧 上謁友人得鹽數引乃泛舟以鹽易於懷  
遠將糧數十石以給王家 皇明本紀

明年夏還故里收元卒七百獻王王就令將之 廟碑

六月丙申朔濠州自元兵退軍士多死傷

上乃歸鄉里募兵得七百餘人以還子興喜以 上爲鎮撫

太祖實錄

當時予雖在微卒嘗觀帥首之作度之既久甚非良謀明年春元將賈魯死圍城解予歸鄉里收殘民數百獻之於

上官授我為鎮撫 紀夢

七月再克定遠縣 俞本記事錄

至正十四年 甲午

五月陞 上為總管克全椒縣 俞本記事錄

又明年 甲午 夏染末疾未瘥王聞元義兵欲歸將說之左右無

可使特過寢門示意趙趙因請扶疾往卒說降之得其精兵

三千 廟碑

當年冬彭趙僭稱部下者多凌辱人予識彼非道棄數百



人內率二十四名銳者南游定遠忽有義旅來歸者三千  
率練之六月取橫澗山破義兵營得軍二萬餘人入滁陽  
葺城以守之 紀夢

朕居擾攘之間遂入行伍爲人調用者三年俄而匹馬單  
戈日行百里有兵三千效順於我於是乎帥而南征 御製

閱江樓記

彭趙二雄以力禦眾部下多凌辱人 上以七百人讓他  
人統之惟拔徐達等二十四人南略定遠中途染疾而歸  
半月乃瘥方三日滁陽王扶筇過門嘖嘖有聲 上卧聞  
之問傍人曰王適扶筇而過聲意恨惋胡爲若是答曰遠  
方有兵聲言欲降猶豫未決王知友人在其中令人往說

奈何家無可行者故惋恨耳

上乃扶病詣王寢室王曰

汝來何爲曰聞他方有欲歸者未定何人欲扶病往視王曰汝病方瘥未可行

上知王意決行不辭王許之遂入

定遠以計縛其帥首收壯士三千人七日後東破元將老

張營得精兵二萬練未及旬率而南入滁陽

皇明本紀

六月招安武口張寨

是時郭元帥之兵雖據定遠縣前有義丁城口張寨不能進後有元軍不能退乃集將士問曰城口張寨深爲吾患爾等能招降卽領寨兵

上請往郭曰汝未能次日又問

上請往云令必來郭曰往需何物用幾人

上曰唯執

旗單騎耳次日單騎至門寨主領馬步兵百餘出問曰汝

爲誰來此云何。上曰郭元帥部下朱總管有密報卽邀入寨。上跪曰今夜達兵劫寨奉元帥命來報須謹備。張曰汝何由知。上曰哨獲達軍知之因以天道人事說之。張喜是夜達軍果來劫寨已有備人馬擄獲大半。張曰郭元帥好人也其何以報非汝幾敗我事。偕汝往見之。上曰不宜遲元帥見汝當重賞必令汝守此寨。張卽具本寨兵馬錢糧數目隨上至元帥大勞之授以名爵令上齎榜安本寨軍民遂令其精銳從元帥攻河州新塘克三。汧河陽泉保住達魯花赤營克徐倉官寨。

俞本紀事錄

克泗州盱眙

俞本紀事錄

六月己酉盱眙縣陷庚戌陷徐州官軍潰

元史

續通鑑賊陷盱眙又陷泗州官軍皆潰命刑部尙書阿魯  
於海寧州等處募兵討泗州賊元史載盱眙之陷不指名  
爲何兵而繫於張士誠寇揚州之下平吳錄諸書皆云士  
誠攻揚州尋陷盱眙及泗州是時士誠方起高郵攻揚州  
其兵豈能遽及盱泗今考俞本記事錄其爲濠兵無疑也  
洪武實錄於甲午七月克滁陽之下書曰未踰月彭早住  
趙君用遣人邀上將兵守盱泗滁陽廟碑亦云彭趙東  
屯泗州則知陷盱泗者彭趙之兵也是時濠兵以彭趙爲  
主彭趙攻盱泗而上攻滁雖分兵爲兩其實皆濠兵也  
記事者亦無從分別言之耳

是月十三日克梁縣至大橋廟

七月初二日克張保實錄襲元知院老張于橫澗山除其民兵男女七萬得精壯二萬南略滁陽  
閻碑駱二寨克把頭寨

十八日克滁州

八月克六合縣

既而彭趙東屯泗州因挾王以往

皇上方駐和陽知眾不可共事獨堅守以待復遣人賂彭趙

左右賂行王得縱歸滁陽時王兵共四萬其麾下僅萬人

皇上所部三萬有奇廟碑 天潢玉牒同

克滁陽未踰月永義魯淮二王遣人促兵以駐盱泗 上

知非久弗從未幾二王自相吞併善戰者多死於盱魯淮

亦亡惟存永義而已彼時滁陽王尙受制於盱貽幾為所

吞而卒幸免 上遣一介去說永義從滁陽王南行初王  
首倡義時兵八百人後 上亦以七百部下招誘者不過  
萬餘 上之兵眾已三萬有奇踰兩月王爲讒所惑掣近  
行掌文案者數人李善長終不棄去是後四方征討總兵  
之事不令 上與 皇明本紀

彭早住趙君用遣人邀 上將兵守盱泗 上以二人麤  
暴淺謀不可與共事辭弗往未幾二人自相吞併戰士多  
死早住亦亡惟君用專兵柄子興勢益孤 上遣人說君  
用曰公昔窘於元兵奔濠城郭公開門延納旣不見疑又  
屈己以事公郭公之德於公爲大公乃不思報反聽左右  
之言欲先圖之是自翦其羽翼失豪傑心又況人心難以

逆料郭公雖或可圖其部屬猶眾萬一事有不然公亦豈能獨安時君用聞上入滁州兵勢甚盛心頗恐上又使人賂其左右以解之子興乃得免遂將其所部萬人至滁州居再閱月子興惑於讒意欲疑上悉奪左右用事者凡兵事皆不得與旣而元兵圍滁有任某者譖曰上每戰不力子興頗信之比出城接戰任未十步卽被矢走還上獨前奮擊徐還子興乃愧歎凡軍中有所得上輒分給羣下他將有所獲輒以獻子興子興以故不說孝慈皇后知其意後將士有獻者悉以遺子興妻張氏張氏喜后又和順以事之由是疑釁漸釋

太祖實錄

十月元將脫脫攻高郵分兵圍六合子興命

上將兵往救元兵欲攻滁

上設伏敗之復謀款其師由是滁城得免

太祖實錄

元史十一月脫脫兵至高郵連戰皆捷分遣兵平六合賊勢大蹙成化間史館續修綱目亦因仍書之蓋不知是時我太祖在六合與耿再成守瓦梁壘等處失於考證而不知避諱也

龍飛紀略

元將脫脫圍六合被圍者請救來使乃上之友也中夜來叩門上卽起隔門與語謂之曰姑少待我告王闢門而進王與六合之雄有隙聞求救暗鳴奮怒不肯許上因助來使其說之至日昃王意少解諸將畏脫脫以狡不吉爲詞王乃召上曰汝宜白神上曰六合受圍勢同



一家辱亡則齒寒若命我總兵神可弗白於是決出師東之六合與脫脫戰微失利歸皇明本紀

時子興名稱尙微且無意遠略欲據滁自王上察知其意因說曰滁山城也舟楫不通商賈不集無形勝可據不足居也子興默然事遂止太祖實錄

至正十五年乙未春兵入和陽與元兵戰三月而元兵解去紀

正月戊寅上率師取和州時上數諫王王爲人所譖

初少被責辱上終不以爲意王性聰明納諫如流俄又

中讒輒復嗔恚因是致疾兵眾乏糧謀議所向遣人召至

再三終不能會復遣人召至定計出軍上許之謀曰三

千人衣青衣垂髻左衽祥爲彼兵令萬人衣絳衣兵先至

敗走至暮青衣兵抵城下破之會敗兵先歸報王驚怒責  
上失計俄城南報元使來招王驚恐益甚 上命以三

門兵合滁陽南門然後令來者膝行以見 上代王諭之  
眾欲殺來者 上曰不如縱歸示以大言彼不知我虛實

必不敢加我明日元師遁去王命 上往收敗軍及總守

和陽遂南趨和陽 皇明本紀

至正十二年李扒頭據無爲州雙刀趙據含山聚眾劫水  
寨俱稱彭祖家

乙未正月二十一日克和州李扒頭寨克太山同知及韓把  
頭寨并雞籠山攻彭祖水寨含山縣 俞本紀事錄

明年乙未王命守和陽旣而信流言親至和陽視師值王儼

人亦在其中聞王至移軍他處

皇上禮送行者俄爲所禽王聞驚懼得疾尋卒

廟碑

辛巳元兵十萬攻和陽

上以萬人守連兵三月元兵數

敗解去未幾彼眾皆走渡江時濠梁舊雄俞魯孫潘亦乏糧其部下皆就食和陽孫德崖軍遂入城假居焉滁陽王信讒聞軍中多取婦女財物意欲歸罪於上左右讒者欲因而致上於死地不旬日王果至上往視之王怒久而不言久而謂上曰誰上答曰某王曰其罪何逃

上曰兒女之罪又何逃耶家中事緩急皆可理外事當速謀王問何事曰曩與俞魯孫潘有隙長者受制某等圍舍踰牆殺彼祖父母脫長者之患今讐人在斯彼眾我寡

甚爲慮之明日五鼓德崖遣人謂上曰彼翁至矣吾將  
他往上大驚急報王以備之上復謂德崖曰兩軍合  
城今一軍盡起公當留後令軍先行德崖許諾上出城  
送友人去城十五里聞城內兩軍相鬪上策騎急歸彼  
軍大呼追逐抽刀以隘道上單騎入彼軍中德崖之弟  
繫上頸欲加害友人張姓者力止之往入城見滁陽王  
繫孫之頸其案而飲歸謂諸人曰如眾所爲幾傷兩命今  
各生存事不難矣諸人怒猶未解張留上同寢抱上  
首達旦明日復羈晦窟中又明日乃行徐達等奉王命以  
數人至於是得歸王亦釋孫王聞上被擒驚憂致疾後  
終不復起卒於和陽皇明本紀

子興為人勇悍善戰而性倖直不能容物故卒以憤恨而終 太祖實錄

四月張天祐齎杜遵道檄推子興之子為都元帥天祐為右副元帥

上為左副元帥 俞本紀事錄

郭元帥卒眾奉其長子天敘為都元帥張天祐次之又次之上

上曰大丈夫寧能受制於人耶遂不受 太祖實錄

太祖轉戰和陽會滁陽王卒遂併其兵納其次室之女 天潢玉牒

子興既卒孫德崖欲統其軍子興之子聞之懼不能辨乃

以書邀 上代辨之 太祖實錄

四月克裕溪中丞蠻子海崖水寨

六月

上率諸將渡江取太平諸將奉

上爲大元帥 太祖實錄

六月初二日 上親領將士萬餘乘風斗快船渡江無船者

以葦荻作筏而濟江東士民值太平日久無不股栗待命遂

克采石及太平府蕪湖縣是時三帥雖兵府置事運籌決策

皆自 上裁將士樂戰軍民傾向權歸於 上矣 俞本記事錄

七月克溧水

七月壬辰命元帥張天祐率諸軍及陳也先部曲攻集慶路

弗克而還

八月克溧陽

九月戊戌命郭元帥張天祐率所部軍攻集慶己亥天祐等至方山攻破左答失納識里營走之陳也先遂叛與元福壽合兵來拒戰於秦淮水上我師失利天祐郭元帥皆戰死

太祖實錄

至正乙未夏五月今江南等處行御史大夫西夏永年公由淮南行中書平章特膺是命六月淮西寇渡江攻陷太平縱兵四劫潛趨集慶攻南門公晝夜拒守相率引去秋七月復至又敗之九月寇大至圍城四面凡七日公身先士卒且戰且守而鋒大挫先是淮西義兵元帥陳也先率

其徒渡江屯集慶城南之板橋行臺命與官軍俱征太平  
已而我師失利也先陷寇質其妻子使爲先鋒務必取集  
慶也先素服公威信輸密款願擒首賊以自效眾疑其詐  
公獨采聽之無惑下令俾官軍與也先表裏合攻遂生擒  
僞元帥郭張二人及其餘僞官甚眾殺死者無算因乘勝  
逐北鼓行趣太平而也先爲鄉兵誤殺舉軍痛惜之 是歲  
臘月陳基撰西夏永年公勳德詩序

九月元義兵元帥陳也先領兵攻太平府士卒登城 上親  
率死士拒之城中危急是時 上娶孫伯英妹爲次妃妃言  
於 上曰府中金銀若干何不盡給將士使之奮身禦敵倘  
有不虞積金何益次日敵再至 上盡置金銀於城上分給



將士遂大敗敵兵生擒也先 上親釋其縛坐與語也先許以全軍歸附 上與結爲昆弟宰烏牛白馬以祀天地歃血爲誓約共攻建康府卽令還營整兵以待並進

十月郭張二元帥督兵由官塘經同山進攻建康之東門陳也先自板橋直抵建康攻南門自寅至午城中堅守也先邀郭元帥飲殺之擒張元帥獻於福壽亦殺之也先會元兵夾攻大軍遂潰部下總管趙繼祖躍馬遁也先單騎追逐鴈門孟萬戶涵殺之 並俞本紀事錄

十一月郭張二帥旣沒

上獨任元帥府事

至正十六年

丙申

二月二十五日攻克三山中丞水寨三月初

三日 上親統大軍克板橋營擒陳也先姪陳勝

初十日 上親克建康 以後事具國史

丙申三月亳都陞 上為江西行省平章以故元帥郭天敘

弟天爵為右丞戊戌七月右丞郭天爵謀叛誅之 俞本紀事錄

夫人張氏生三子長戰沒次為降人所陷 即郭元帥 幼與羣小陰

謀伏罪次夫人張氏生女一為妃生蜀王豫王如意王女二 廟碑

洪武元年天下既一剖符行封追念更生之恩實帝業所始  
乃封滁陽王配張氏封夫人建廟滁陽命有司歲時率滁人  
祭之 廟碑

洪武三年二月癸未封故元帥郭子興為滁陽王妻張氏為

滁陽王夫人立廟滁州仍繪其三子從祀凡生卒之日及節序皆命有司致祭

實錄

洪武八年四月

上幸中都次滁州遣官祭滁陽王廟曰曩者羣雄鼎沸之時民不堪命王乃奮臂定遠拔濠城而守之朕方從軍幾被他人所害惟王能活我致有今日盡平天下家國已成再生之恩終世難忘今日督工鳳陽道經環滁瑩祠在斯遣官致祭

尙饗

御製文集實錄

皇帝制諭滁陽千百戶王傑等自古豪傑之士有大功於天地人神者生雖不獲其福死必血食廟祀焉所謂死而不亡名傳永世者也惟滁陽王定遠之民當元運將終羣雄並起

王亦乘時倡義旅克濠城拒守二載時朕從事恩禮甚厚歲  
癸己王行兵盱眙甲午移駐環滁乙未南巡和陽嬰疾而斃  
先是命朕率兵鎮禦和陽及王斃王子不能馭諸豪英兵且  
乏食朕率眾渡江十有三年帝業乃成朕追念舊恩特封滁  
陽王立廟於州歲時奉祀洪武十五年秋召守滁陽千百戶  
等免徵田租者二十員名永供時祀其宥民首率而祀之故  
茲制諭

一祭祀日期用四孟日

一祭物用羊一犛猪一口

一奉祀人員官一十七戶看廟人宥奶子等三戶

洪武十五年欽定滁陽王廟碑歲祀冊

洪武十六年十一月七日

皇上親藁滁陽王事實召太常司丞臣張來儀諭之曰王之  
恩德注在朕心今滁有廟祀而碑刻未具甚闕典也汝其據  
此爲文於石臣伏聞自古帝王之興雖受命於天未始不因  
乎人蓋必有所佑助而後成惟我

皇上奮布衣提一劍而起外無尺土一民之助而王能脫危  
難識潛微納於貳室授以兵柄慨然不少吝惜遂肇大業可  
謂有知人之鑒矣及今大統既定四海一家推本尋源實由  
於王爰建顯號俾永永血食蓋非王無以開萬世之業非  
皇上無以永王之名臣謹卽是爲銘

廟碑

國初羣雄事略卷二

國初羣雄事略卷三

虞山錢謙益牧齋甫編

天完徐壽輝

壽輝一名貞一蘄州羅田縣人至正十一年十月僭稱

皇帝國號天完改元治平在位十年為陳友諒所弑

至正十一年辛卯治平元年

八月蘄州羅田縣人徐貞一名壽輝與黃州麻城人鄒普勝

等以妖術陰謀聚眾遂舉兵為亂以紅巾為號元史

紅巾起蘄黃者宗彭瑩王和尚推徐貞一為首陷德安鄱

陽安陸武昌江陵江西諸郡庚申外史

壽輝體貌魁岸木強無他能以燒香聚眾起初袁州慈化

寺僧彭瑩玉以妖術惑眾其徒周子旺因聚眾欲作亂事  
覺元江西行省發兵捕誅子旺瑩玉等走至淮西匿民家  
捕不獲既而麻城人鄒普勝復以其術鼓妖言謂彌勒佛  
下生當爲世主遂起兵爲亂以壽輝相貌異眾乃推以爲  
主舉紅巾爲號

實錄徐貞一本傳

先是瀏陽有彭和尚能爲偈頌勸人念彌勒佛遇夜然火  
炬名香念偈拜禮愚民信之其徒遂眾徐貞一本湖南人  
姿狀龐厚無他長生平以販布爲業往來蘄黃間及妖人  
彭鼓眾欲爲亂思得其主一日徐於鹽塘水中浴眾見其  
身有光眾皆驚異遂立爲帝反於蘄春東南遂大亂湖廣  
江西浙江三省城池多陷沒開蓮臺省於蘄春然姿性寬

縱權在臣下徒存空名爾

草木子

正正十一年中原盜起壽輝於山中獲口鐵十斤麻城鐵工鄒普勝居耦壽輝夜夢有黃龍蟠其鐵碓明日壽輝攜鐵過之令製耨鉏蹲坐鐵碓上普勝心異之告之曰今天下尙須耨鉏活耶當鍊一劍贈君耳於是兩人深相結陰謀舉大事會彭和尚妖黨作亂普勝乃與眾共推壽輝爲主舉兵以紅巾爲號借聖人堂於多雲山中溪水日再潮溪傍有巨石狀類艤舟壽輝命鑿一穴樹梳其上祝之曰天助壽輝當揚帆出溪口石爲行十餘丈壽輝遂決意反

湖廣總志

彭祖師惑荆襄民徐貞一據蘄州稱帝徵饒郡民率眾掠



江淵 俞本紀事錄

九月徐壽輝陷蘄水路及黃州路 元史

十一年徐壽輝起蘄黃威順王寬徹不花與其子別帖木兒荅帖木兒引兵至金剛臺壽輝部將倪文俊敗之執帖木兒威順王世祖之孫賜金印鎮武昌 元史威順王傳

沔陽盜倪文俊號蠻子世以漁業居黃州黃陂其生之夕母夢有白虎入室及徐僭號倪爲僞相用多槳船疾如風晝夜兼行湖江出沒故多克捷所至殺害擄威順王諸子妻其妃子庚申帝特降詔招撫然亂端已成俱無所及王諸子竟爲所殺荆岳潭鄂黃蘄澧安陸常德寶慶江虔洪吉等州皆爲所據然驕恣不撫其下后竟爲其下所殺前

夕母復夢白虎死遂遇戮戮之一二日前有大星落蠻子舟前蠻子曰必有大官人當死吾手不知其身當之也其弟倪文郁同亂后封長沙王鎮岳州蠻子誅文郁亦見殺獨季弟倪七不從亂亦不及禍今尙居漢川縣耕稼爲業富於牛田

草木子

九月蘄州總管李孝先分守蘄州縣死之贈河南參政諡義愍

王逢詩序

十月徐壽輝據蘄水爲都國號天完僭稱皇帝改元治平以鄒普勝爲太師

元史

攻陷饒州又陷信州

元史續編

魏中立以陝西行臺御史中丞遷守饒州以義兵擊賊被

執以紅巾被其身立叱之鬚髯盡張執歸蘄水大罵不已  
遂被害總管于大本以土兵備禦賊首項甲破東門而入  
執大本至蘄水為俘獻為主釋其縛畀偽印一鈕大本投  
印於地指偽主痛詈之亦遇害 元史忠義傳

至正十二年 壬辰 治平二年

正月丙辰徐壽輝遣偽將丁普郎徐明遠陷漢陽丁巳陷興  
國府己未徐壽輝遣鄒普勝陷武昌威順王寬徹普化湖廣  
行省平章政事和尙棄城走 元史

詔追奪寬徹普化印而誅和尙 元史寬徹普化傳

正月孟海馬陷襄陽徐真逸陷湖廣其將曾元帥陷安陸

江陵 庚申外史

辛酉徐壽輝遣僞將曾法興陷安陸府知府丑闍不勝死之  
元史

蘄賊曾法興犯安陸丑闍敗賊前隊乘勝追賊而賊自他  
門入亟還朝服坐公堂賊脅以白刃丑闍疾叱之賊以刀  
斫右脅斷而死

辛未徐壽輝兵陷沔陽府 元史

蘄黃賊逼境推官俞述祖領民兵守綠水洪城陷被執械  
至僞主徐壽輝所述祖罵不輟壽輝怒支解之 元史忠義傳

壬申中興路陷山南宣慰司同知月古驕失出戰眾潰宣慰  
使錦州不花山南廉訪使卜禮月敦皆遁走 元史

十二年寇犯中興山南廉訪使卜禮牙敦以兵與抗射賊

多死明日擁眾來襲東門力戰被執不屈而死又明日賊復來攻中興判官上都統兵出擊之既而東門失守上都倉皇反鬪被執大罵賊剗其腹而死

元史忠義傳

順帝本紀廉訪卜禮月敦遁忠義傳云被執死當以忠義傳爲正曾法興陷安陸又陷沔州及中興路

實錄

二月乙酉徐壽輝兵陷江州總管李黼死之遂陷南康路

元史

初盜陷蘄黃造船北岸銳意南攻九江雖下流實東西襟喉之地黼上攻守之策於江西行省請兵屯沅北以拒賊衝不報及渡江陷武昌舳艫蔽江以下江西大震乘勝破瑞昌右丞李羅帖木兒方軍於江聞之遁遊兵至境倉卒無號墨士卒面統之出戰賊大敗殺獲一萬餘黼曰賊不

利於陸必以舟薄我乃以長木數千冒鐵錐於杪暗植沿岸水中逆刺賊舟謂之七星樁賊舟揚帆順流而下舟遇樁不得動黼發火翎箭射之焚溺無算時西自荆湖東際淮甸守臣往往棄城遁黼守孤城提孱旅中外援絕二月甲申賊將薄城分省平章政事禿堅不花自北門遁賊攻入北門與之巷戰知力不敵揮劔叱曰殺我無殺百姓賊自巷背來刺黼墜馬與從子秉昭俱罵賊而死

元史忠義傳

丙戌徐壽輝兵陷岳州

元史

是月徐壽輝僞將歐普祥陷袁州

元史

二月陷江州南康分兵歸州岳州房州三月遣歐普祥陷

袁州

實錄

普祥黃州黃岡人歲辛卯從徐壽輝以燒香起兵爲元帥  
人稱爲歐道人壬辰二月引兵掠江西諸郡縣攻陷袁州  
焚室廬掠人民以去遣別將守之旣而分宜縣人彭繼凱  
與元帥別速堅起義兵復袁州普祥怒九月復往攻之不  
克乃攻陷分宜新喻等縣括其丁壯團結營寨癸巳二月  
復攻袁州元帥別速堅與萬戶寶同等堅守城中民困食  
盡死者相枕籍十二月城陷普祥遂據之分兵陷吉之安  
福瑞之上高等縣與元兵屢戰屢勝壽輝屢加普祥左丞  
大司徒袁國公普祥性殘暴所過室廬皆殘掠無遺庚子  
歲陳友諒弒壽輝徵兵於普祥普祥不聽其節制壬寅王  
師取江西普祥令其子文廣納款歸附 上厚賜之命普

祥仍以本部軍馬守袁州甲辰六月丁巳卒

實錄歐吉祥本傳

至正十二年歐道人據袁州

俞本記事錄

三月丁未徐壽輝偽將許甲攻衡州洞官黃安撫敗之偽將

陶九陷瑞州總管禹蘇福萬戶張岳敗之甲子偽將項普略

饒州路遂陷徽州信州

元史

正月湖廣陷禿堅不花由江州遁還二月普顏不花將兵

往江州至石頭渡遇賊戰敗江西行省平章政事卽懷省

印遁走普顏不花還與張伯顏定城守之計後數日道童

始自南昌民家歸來三月賊眾來圍城凡兩月民無離志

因奮擊敗賊走之

元史道童傳

饒志彭翼達項普略破吉安路彭翼卽彭和尚一名妖彭



平胡錄

平胡錄卷之二

閏三月乙酉徐壽輝僞將陳普文陷吉安路鄉民羅明遠起義兵復之

元史

已而普文反兵復陷其城

實錄

閏月十三日靳黃紅巾自江州直抵廬陵攻破吉安鄉民

羅明遠復之

平胡錄

丁酉湖廣行省參知政事鐵傑以湖南兵復岳州四月乙卯鐵傑及萬戶陶夢貞復武昌漢陽尋再陷

元史

辛未荆門知州聶炳復荆門州

元史

炳知荆門州纔半歲淮漢賊起荆門不守炳出募土兵得眾七萬復荊州又與四川行省平章咬住復江陵其功居

多 元史忠義傳

五月乙卯咬住復中興路

野峻台升四川行省參政與平章咬住討賊賊方據巴東縣攻拔之平歸陝等州進拔枝江松滋兩縣乘勝趨江陵據清水門與賊戰三時頃咬住軍止百步外不救賊飛槍刺之遂死 元史忠義傳

七月庚辰饒徽賊犯昱嶺關陷杭州路 元史

賊攻昱嶺關鎮撫桂完澤再戰關下皆勝尋與其妻弟全德皆被執反縛於樹臨以白刃完澤呼德曰全舅男子漢卽死不可聽賊因大罵賊怒剖二人之腹而死 元史忠義傳  
賊犯餘杭江浙行省參知政事樊執敬調兵出戰皆不利

賊至執敬遽上馬率兵出中途與賊遇射死七人賊填溢街巷縱火眾潰執敬奮力斫賊中槍而墮從僕田也先馳救之亦中槍死

元史忠義傳

至正壬辰七月十日徽寇犯杭樊時中執敬爲浙省參政禦於歲寒橋遂死之

王逢梧溪集

壬辰秋蘄黃徐壽輝賊黨攻破昱嶺關徑抵餘杭縣七月初十日入杭州城僞帥項蔡楊蘇一屯明慶寺一屯北關門妙行寺稱彌勒佛出世以惑眾浙省參政樊執敬死於天水橋寶哥與妻同溺於西湖其賊不殺不淫招民投附者注姓名於簿籍府庫金帛悉輦以去至二十六日浙西廉訪使自紹興率鹽場竈丁過江同羅木營官軍剋復城

池賊遂潰散三平章定定逃往嘉興郎中脫脫過江南越數日攜省印來會權署省事至是亦同四平章教化自湖州統軍歸舉火焚城殘傷殆盡附賊充偽職者范縣尹等明正典刑里豪施尊禮顧八爲迎敵官軍劓於市家產悉沒縣官明慶妙行亦然省都事以下坐失守城池罷黜不敘省官復任如故朝廷法度旣墮刑賞失宜欲天下太平不可復得矣

董搏霄率兵攻杭州遂復徽州

元史續編

搏霄從江浙平章教化移軍援江南遂渡江至湖州德清縣而賊已陷杭州搏霄曰賊皆野人見杭城子女玉帛必縱慾不暇爲備宜急攻之今若退保湖州賊乘銳趨京口

則江南不可爲矣拔劍誓諸將遂進兵杭城賊迎敵至鹽橋凡七戰追殺至清和坊賊奔接待寺塞其門而焚之遂復杭州徽饒賊復至昱嶺關寇於潛搏霄以臨安新溪爲入杭要路分兵守之而進兵叫口及虎檻遇賊大破之遂復於潛縣旣又復昌化縣及昱嶺關降賊將潘大齋二千八賊復攻獨松百丈幽嶺三關搏霄乃先以兵守多溪扼三關要路而分三軍出三關會兵擣賊巢遂乘勝復安吉克廣德有蘄賊與饒池諸賊復陷徽州賊中有道士能作十二里霧搏霄以兵擊之已而妖霧開豁諸伏兵皆起襲賊後斬首數萬級獲道士焚其妖書而斬之遂平徽州

史董搏霄傳

元

七月紅巾陷錢塘九月陷吳興延陵十月陷江陰州州大  
姓許晉字德昭與其子如章聚無賴惡少資以飲食賊四  
散抄掠誘使深入殪而埋之戰於城北之祥符寺父子皆  
死

輟耕錄

十二月冬徽州陷常萬戶張珍引兵伏橫林連敗之乘勝深  
入常悉平

王逢詩序

是月徐壽輝偽將王善康壽四江二蠻等陷福安寧德縣等  
處

元史

賊自邵武間道徧福寧和州王伯淵與監州阿撒都刺分  
扼險阻賊帥王善俄壅眾直壓州西門伯淵麾下惟白挺  
市兒數百人賊以長槍舂馬馬僕見執善說伯淵降爲我

尹此州伯淵嚼舌出血嘆善面唾罵之挺頸受刃頭斷湧  
白液如乳明年州有僧林德誠起兵討賊望空呼曰王州  
尹宜率陰兵助我賊方祠神觀紅衣軍來以爲僞帥康將  
軍亟往迎之無有也四面皆青衣官軍賊大敗斬其酋江

二蠻福寧遂平

元史忠義傳

八月安陸賊將俞君正復陷荆門州知州聶炳死之賊將黨

仲達復陷岳州

元史

俞君正合兵來攻荆門炳率孤軍晝夜血戰城陷被執極  
口罵不絕賊以刀抉其齒盡乃斷左臂而支解之未幾賊  
陷潛江縣達魯花赤明安達爾擒其將劉萬戶進營蘆洲  
賊眾奄至其家殲焉

襄陽路達魯花赤孛羅帖木兒率義兵進攻潛江縣梟賊將劉萬戶許堂主等賊大至與戰抵暮咬住等軍各當一面不能救孛羅帖木兒被重創見執罵賊遇害一家死者二十有八人

元史忠義傳

九月乙亥俞君正復陷中興咬住領兵與戰於樓臺敗績松滋本路判官上都死之癸未中興義士范忠偕荆門僧李智率義兵復中興路俞君正敗走

元史

是月江西平章星吉與賊戰於湖口死之

元史續編

星吉至江東詔令守江州時江州已陷賊據池陽賊號百萬募兵得三千人泝江而上四月復池州又復銅陵敗賊於白馬灣追及於白湄擒其偽相周驢奪船六百艘死者



蔽江江水爲赤乃命諸將分道討賊復貴池石埭建德諸縣時賊久圍安慶焚營解去進復湖口縣克江州命王惟恭柵小孤山而白駐鄱揚口綴江湖要衝以圖恢復時湖廣已陷江西被圍淮浙亦多故轉戰六月餘兵食俱竭九月二十日賊取蒹葦編爲大筏杜上下流縱火夾攻我軍殊死戰且盡星吉從子伯不花將親兵數千人亦死賊射星吉中目仆舟中賊素聞其名昇至密室中至旦少蘇饋以食星吉斥之不復食凡九日忽自力起北面再拜而絕九月二十九也

元史星吉傳

宋濂星吉公神道碑

徐壽輝兵侵江東西詔江淞行省平章政事卜顏帖木兒討之時星吉蠻子海牙皆駐太平宿留不進乃與俱前復

銅陵池州遂遣將分討而自駐池口以防邊上流江州再陷星吉死之海牙與威順王軍俱潰而東安慶被圍益急卽大發帑藏以周之潰軍皆大集安慶之圍遂解

元史卜顏帖木

見傳

星吉之死元史續編平胡錄載在十一月今以星吉神道碑正之

趙普勝周驢等據池陽太平諸州郡

平胡錄

十二年冬十一月賊悉眾寇安慶水陸並進上萬戶蒙古尹廝連破之輕舟追賊中流矢卒是月二十九日也先是尹廝鎮江陰時海內無事州人王逢謂曰太歲在辰候當保障一方戰勝恐後不利已而果然

梧溪集

至正十三年癸巳治平三年

三月賊眾十萬攻池州卜顏帖木兒命諸將分番與戰大

敗之乘勝率舟師以進五月與戰於望江又戰於小孤山

及彭澤又戰龍開河皆敗走之進復江州元史卜顏帖木兒傳

五月辛未江西行省左丞相亦憐真班江淞行省左丞老老

引兵取道自信州元帥韓邦彥哈迷取道由徽州浮梁同復

饒州蘄黃等賊望風皆奔潰六月答失八都魯克復安陸府

七月壬申湖廣行省參知政事阿魯輝復武昌及漢陽府元史

七月卜顏帖木兒進兵攻蘄州擒偽帥魯普泰遂克其城

進兵道士泐焚其柵抵瀾溪口殲黃連砦賊巢分兵平兩

巴河於是河路始通元史卜顏帖木兒傳

十月丁未廣西元帥甄崇福復道州誅賊將周伯顏

元史

十二月江浙平章卜顏帖木兒等擊徐壽輝於蘄水敗之壽

輝遁走

元史續編

十一月與蠻子海牙四川省行參知政事哈臨禿左丞桑

禿失里西寧王牙漢沙軍合而湖廣左丞伯顏不花等軍

皆會十二月分道進攻蘄州縣拔其僞都獲僞將相而下

四百餘人徐壽輝僅以身免

元史卜顏帖木兒傳

星吉大夫以舟師自安慶征湖廣至湖口適與黃紅巾遇

風勢不利敗績死之紅巾遂順江而下攻安慶爲義兵所

破大敗南還旣而蠻子海牙中丞復總水軍義軍南征破

黃連大寨徐真逸等遁入黃梅山中及沔陽湖中官軍盡

復武昌等處未幾盡抽軍下據廬州官軍勢退而賊勢亦熾矣亦憐真班丞相以馬步由江東援江西至龍興逾月而卒左丞大爾赤總其兵攻臨江復瑞州進攻袁州與歐軍相持數年不決後卒敗亡

庚申外史

十三年江西賊帥王善寇閩破羅原破兩道攻福州連江縣寧善鄉巡檢劉濬拒之辰山俄聞福州陷眾多潰去濬帥其子健進兵遇賊於中麻鏖戰三時頃濬中箭墮馬健下馬掖之俱被擒濬戟手大罵賊斫其手指盡及兩腕與足濬罵彌厲遂割其喉舌而死健亦以死拒賊善義之舍健使陸父屍健歸請兵於帥府弗聽盡散家貲結死士百人詐爲工商流丐入賊中夜半發火大譟賊驚擾自相屠

戮健手斬殺其父者張破四并擒善及寇首陳伯祥來獻

磔之 元史忠義傳 龍飛紀畧

至正十四年 甲午 治平四年

三月江西左丞相亦憐真班卒 元史續編

江西白道童政治懈弛亦憐真班至風采一新盜賊謀歸

款至是卒所部為之喪氣 元史續編

十二月詔威順王寬徹不花還鎮湖廣 元史續編

寬徹不花率領王子及本部怯薛丹屢討賊立功十四年

詔復鎮武昌還其金印 元史威順王傳

至正十五年 乙未 治平五年

正月丁丑徐壽輝偽將倪文俊復陷沔陽府 元史

寬徹普化命其子報恩奴接待奴佛家奴同湖南元帥何  
思南以大船四十餘隻水陸並進至沔陽攻徐壽輝偽將  
倪文俊且載妃妾以行兵至漢川縣雞鳴汊水淺船閣不  
能行文俊以火筏盡焚其船接待奴佛家奴皆遇害而報  
恩奴自死妃妾皆陷寬徹普化走陝西

元史威順王傳

三月癸巳徐壽輝兵陷襄陽路

元史

五月庚戌倪文俊自沔陽陷中興路元帥朵兒只班死之  
七月壬寅倪文俊復陷武昌漢陽等路

斬黃賊陷宣州嘉議大夫禮部尙書致仕汪澤民死之九月  
己亥倪文俊圍岳州路

元史

十一月庚戌賊陷饒州路

元史

至正十六年

丙申

治平六年

正月倪文俊建偽都於漢陽迎徐壽輝據之

元史

三月壬午徐壽輝復寇襄陽丙申倪文俊陷常德路總兵官

俺都刺遁五月丙申倪文俊陷澧州路

元史

六月卜顏帖木兒復以兵守池州十一月卒

元史卜顏帖木兒傳

八月庚申倪文俊陷衡州元帥甄崇福戰死十一月倪文俊

陷岳州路殺威順王子歹帖木兒湖廣參知政事也先帖木

兒與江左義兵萬戶鄧祖勝合兵復衡州

元史

至正十七年

丁酉

治平七年

二月倪文俊陷陝州破鞏關明玉珍又進陷川蜀諸郡因

據守之

實錄徐壽輝本傳



五月丙申常遇春遣興國翼分院院判趙忠元帥王敬祖等  
攻池州青陽縣蘄州徐壽輝將趙普勝出兵來拒敬祖以數  
十騎衝其營陣陣亂眾兵乘勢擊之遂破之克其縣

趙普勝者本巢湖水軍元帥初與俞通海等皆來降中道

叛去降於壽輝爲人饒勇善用雙刀人號爲雙刀趙云

實錄

至正十二年雙刀趙據含山聚眾結水寨稱彭祖家十五  
年正月克彭祖水寨含山縣十六年六月院判趙子忠攻  
池州樅陽不克守賊乃雙刀趙十七年郎中趙興守南陵  
雙刀趙聞興元名不敢侵十一月院判趙子忠并帳前黑  
先鋒攻池州樅陽俱克之

俞本記事錄

九月倪文俊謀殺其主徐壽輝不果自漢陽奔黃州壽輝僞

將陳友諒襲殺之友諒遂自稱平章

元史

十二月明玉珍據成都玉珍爲文俊守蜀文俊死玉珍遂自

據之蜀中郡縣皆附

平胡錄

元史續編

陳友諒寇安慶守將余闕拒卻之

元史續編

十五年拜江淮行省參知政事仍守安慶池州趙普勝帥  
眾攻城連戰三日敗去未幾又至相拒三旬始退懷寧縣  
達魯花赤伯家奴戰死十七年趙普勝同青軍兩道攻我  
拒戰一月餘竟敗而走秋拜淮南行省右丞安慶倚小孤  
山爲藩蔽命義軍元帥胡伯顏水軍戍焉十月沔陽陳友  
諒自上游直擣小孤山伯顏與戰四日夜不勝急趨安慶  
賊追至山口鎮明日癸亥遂薄城下闕遣兵扼於觀音橋

俄饒州祝寇攻西門闕斬却之乙巳賊乘東門紅旗登城  
闕簡死士以擊賊復敗去戊申賊併軍攻東西二門又卻  
之元史余闕傳

至正十八年

戊戌

治平八年

正月丙午陳友諒陷安慶路守將余闕死之

元史

賊豎柵起飛樓金鼓震地晝夜不息癸卯賊益生兵攻東門  
丙午普勝軍東門友諒軍西門祝寇軍南門四面蟻集西  
門勢尤急闕身當之獨徒步提戈爲士卒先孤軍血戰斬  
首無算而闕亦被十餘創日中城陷城中火起闕引刀自  
剄墮清水塘中妻及子女皆赴井死

闕三上宰相書不達援兵亦不至故城陷而死

庚申外史

友諒義闕之死求其屍殮葬於西門外

陳氏事蹟

四月甲申陳友諒陷龍興路省城道童火你赤棄城遁

元史

陳友諒復攻江西城火你赤素與道童不相能且貪忍不得將士心見城且陷遂夜遁去道童亦棄城退保撫州路賊追者至遂爲所害

元史道童傳

吳當字伯尙澄之孫也陳友諒陷江西諸郡火你赤棄城遁當乃帶黃冠著道士服杜門不出友諒遣人辟之當卧牀不食以死自誓乃舁牀載之舟送江州拘留一年終不爲屈隱居廬陵吉水之谷平逾年以疾卒

元史吳當傳

是歲陳友諒陷江西龍興司徒道童左丞火而赤總管安謙棄城從新門走撫州賊陷瑞州守城臨江同知給事中

死之至臨州守臣定住降之陷吉安宣差尙書總管海尙書皆死之陷撫州達魯花赤完者帖木兒被獲不屈死之  
庚申外史

甲午陳友諒遣王奉國陷瑞州路

元史

四月己巳朔徐壽輝平章陳友諒遣其將趙普勝自樅陽寇池州陷之樞密分院院判趙子忠被執

實錄

五月壬寅陳友諒遣康泰趙宗鄧克明等以兵寇邵武路庚戌陷吉安路辛酉陷撫州路

六月癸酉中翼右副元帥謝再興元帥趙德勝總管劉貞等率兵畧石埭縣與陳友諒兵遇戰敗之擒其將錢清孟友德張遵道等及部卒四百餘人

實錄

八月庚辰陳友諒兵陷建昌路九月乙丑陳友諒陷贛州路  
江西行省參知政事全普庵撒里及總哈海赤死之 元史

江西下流諸郡皆爲友諒所據遣其將辛文才率兵圍贛  
登城拒戰凡四月義兵萬戶馬合謀沙欲舉城降普庵撒  
里不從遂自剄城陷之日哈海赤謂賊曰與汝戰者我也  
毋殺贛民當速殺我遂見殺 元史忠義傳

十月戊子元帥羅友賢復取建德縣時陳友諒將趙普勝旣  
陷池州又攻建德縣陷之友賢退軍祁門收集精銳復出與  
戰敗普勝於葛公嶺斬其萬戶汪彥章普勝遁去友賢復取  
建德 實錄

十一月陳友諒陷汀州路

至正十九年己亥治平九年

正月甲午朔陳友諒兵陷信州路守臣廉訪副使伯顏不花的斤力戰死之元史

十八年友諒遣王奉國寇信州號二十萬明年正月伯顏不花的斤自衢引兵援焉遇奉國城東力戰破走之二月友諒弟友德營於城東繞城植木柵攻我益急日夜與賊鏖戰糧竭矢盡而氣不少衰軍民食草苗茶紙既盡括鞮底煮食之又盡掘鼠羅雀及殺老弱以食六月奉國親來攻城穴地百餘所咸魚貫梯城而上城陷伯顏不花的斤力戰不勝遂自刎元史忠義傳

三月癸巳朔陳友諒遣兵由信州略衢州復遣兵陷襄陽路

元史

丁巳陳友諒將趙普勝寇寧國之太平縣總制胡惟賢命萬戶陳允同義士汪秉叔率鄉兵五千擊敗之普勝復寇陵陽石埭等縣僉院張德勝與戰於柵江口復破走之實錄

四月癸酉復池州初趙普勝既陷池州遣別將守之而自據樅陽水寨數往來侵掠境上元帥徐達遣院判俞通海等擊敗之俘其將趙牛兒等普勝棄舟陸走又擒其部將洪鈞等并獲艨艟數百艘遂復池州實錄

五月雙刀趙破石埭太平二縣段興王卿力戰死俞本記事錄

六月僉院俞通海率兵攻趙普勝不克而還實錄

諸將患之上曰普勝雖勇而寡謀友諒挾主以令眾上



下之閒心懷疑貳用計離之一夫力耳時普勝有門客頗通術數嘗爲普勝畫策普勝尊爲謀主乃使陽與客交而陰閒之又致書與客故達普勝普勝果疑客客懼不能安遂來歸於是厚待客客喜過望傾吐其實盡得普勝平日所爲乃重以金幣資客潛往說友諒所親以間普勝普勝不之覺見友諒使者輒自言其功悻悻有德色友諒由是忌之

實錄

八月辛酉朔倪文俊餘黨陷歸州

元史

九月癸巳徐達張德勝率兵自無爲登陸夜至浮山寨擊走趙普勝部將胡總管敗之於青山追至潛山界陳友諒參政郭泰引兵渡沙河迎戰德勝復大破之斬郭泰獲馬牛畜千

餘軍資無算遂克潛山縣命詹元帥守之 實錄

七月 上以朱文正同徐達俞通海等水陸進攻安慶不克

八月大軍由潛山回遂克無爲州張德勝攻淝州 俞本記事錄

俞通海青溪口破雙刀趙海船

乙未陳友諒殺其將趙普勝

初友諒既忌普勝又有言普勝欲歸於我者及是憤潛山之敗友諒益欲殺普勝仍詐以會軍爲期自至安慶圖之普勝不虞友諒圖已聞其至具燒羊迎於雁汊登舟見友諒友諒遂執殺之并其軍初友諒與普勝攻陷安慶令普勝守之至是殺普勝卽生爨於我 實錄

十月壬申元帥俞廷玉攻安慶不克卒於軍 實錄

十一月戊辰陳友諒兵陷杉關 元史

十二月陳友諒以江州爲都迎僞主徐壽輝居之自稱漢王 元史

友諒遣兵略衢州破杉關而自引兵至江州迎壽輝初壽輝聞友諒破龍興欲徙居之友諒忌其來不利於己不從壽輝不得已而止至是壽輝欲往友諒遣人止之不聽引兵發漢陽十二月至江州友諒陽出迎而伏兵於城西門外壽輝旣入門閉而伏發盡殺其部屬惟存壽輝居之友諒遂自稱漢王立王府於城西門外置官屬自是事權一歸於友諒壽輝但擁虛位而已 實錄徐壽輝本傳

至正二十年 庚子 治平十年

五月陳友諒兵寇池州徐達等擊敗之

實錄

友諒既殺趙普勝卽有窺池州之意上察知之乃遣常  
遇春往池州與徐達共禦之使謂曰友諒兵至當以五千  
人守城遣萬人伏九華山下俟彼兵臨城城上揚旗鳴鼓  
發伏兵往絕其後破之必矣友諒兵至其來甚銳直造城  
下城上出兵鳴鼓伏兵悉起緣山而出循山而下絕其歸  
路城中出兵夾擊大破之斬首萬餘級生擒三千餘人友  
諒遣使來白此戰非我意乃巡邊者偶戰耳其矜詐如此

實錄

閏五月丙辰朔陳友諒攻陷太平

友諒攻城三日不得入乃引巨舟入城西南士卒緣兵舟

尾攀堞而登城陷首將樞密院判花雲及院判王鼎知府  
許瑗俱死之 實錄

戊午陳友諒弒其主徐壽輝於采石 實錄

初陳友諒犯太平挾壽輝以行既陷太平志盈滿急謀僭  
竊乃於采石舟中先使人詣壽輝前佯爲白事陰令壯士  
持鐵槌自後擊碎其首弒之壽輝死友諒遂以采石五通  
廟爲行殿昇殿中行像顛倒置門外而僭位其中羣下草  
次行禮於江岸又值大雨冠服皆濡濕略無儀節識者知  
其必無成 實錄

陳友諒乘勝下江東至太平弒徐真逸於舟中而自立既  
而大敗於金陵南還後於江州建都焉 庚申外史

友諒旣殺倪文俊遂率兵攻金陵謀篡位乃勒死於采石  
是年五月友諒旣弒壽輝改大義元年則天啟天定友諒  
已不用治平矣

平胡錄

元史順帝紀五月丁亥朔陳友諒弒其僞主徐壽輝於太  
平實錄載在閏五月陷太平之後似當以實錄爲正

國初羣雄事略卷三



國初羣雄事略卷四

虞山錢謙益牧齋甫編

漢陳友諒

友諒沔陽王沙縣人治平十年五月弒其主徐壽輝而自立僭稱皇帝國號漢改元大義在位四年癸卯八月死於涇江口子理立改元德壽次年國亡

至正二十年

庚子 治平十年 大義元年

五月丁亥朔

實錄閏五月 戊午

友諒弒其僞主徐壽輝於太平路遂

號皇帝國號大漢改元大義已而同駐於江州

元史

壽輝死友諒遂以采石五通廟為行殿仍以鄒普勝為太師張必先為丞相張定邊為太尉

實錄



陳友諒沔陽人本姓謝祖千一贅于陳遂從其姓父普才黃逢漁子也友諒幼岐嶷比長膂力過人優于武藝常爲縣吏不

徐壽輝與倪文俊兵起慨然往從之爲文俊

簿書掾佐文俊陷諸州郡有功尋用領兵爲元帥

童承敘平漢錄

歲乙未文俊治宮室于漢陽迎壽輝居之而專其政柄友諒心不平丁酉九月文俊謀殺壽輝事覺懼怖走黃州友諒因襲殺文俊并其眾自稱宣慰使尋爲平章明年兵陷安慶池州又破龍興瑞州諸郡因分遣康泰趙宗鄧克明等攻取邵武別將取吉安而自以兵破撫州八月破建昌九月破贛州乙亥正月破信州三月遣將取襄陽又出兵攻衢州遂取杉關友諒疑其將趙普勝貳已殺之十二月

以江州爲都奉壽輝居之遂自稱漢王庚子閏五月友諒挾壽輝犯太平陷之既得太平欲僭稱遂殺壽輝

實錄陳友諒本傳

庚子歲僞漢王陳友諒殺其君徐眞一稱帝於采石五聖廟友諒原沔陽人承平爲縣貼書及從爲盜兄弟四五人專兵爲衛先是徐雖爲君權皆在倪蠻子友諒其所部倪爲丞相頗驕恣待其下無恩陳因與其黨襲殺之其黨復謀殺之事泄見殺于是大權盡歸于陳封僞漢王欲舉兵收臺兵至采石謀稱帝而後下兵遂遣其黨殺徐引兵攻臺大敗而歸營江州爲都

草木子

乙未陳友諒羅忠顯陷辰州

元史

閏五月庚申陳友諒既僭號乃遣人約張士誠來寇建康乙丑友諒引師東下大敗于龍灣實錄

陳氏入寇 上召公問計公奮曰先斬主降議及奔鍾山者乃可破賊爾誠意伯行狀

上以康茂才與友諒有舊俾致書速其來茂才家老閻嘗事友諒令齎書以往友諒得書甚喜問康公安在曰見守江南橋問橋何如曰木橋也乃遣還曰歸語康公吾卽至至則呼老康爲號關者歸具以告乃命李善長改築江東橋又于新河口跨水築虎口城以兵守之命馮國勝常遇春率帳前五翼軍三萬人伏石灰山側徐達軍南門楊璟駐大勝港張德勝朱虎帥舟師出龍江關外 上總大軍

于盧龍山戒持幟者曰寇至則舉赤幟舉黃幟則伏兵皆起乙丑友諒引舟師東下至大勝港璟整兵禦之水路狹隘友諒舟不得並進遽引退出大江徑以舟師衝江東橋見橋皆鐵石連呼老康不應卽與其弟號五王者率舟千餘向龍灣先遣萬人登岸立柵時暑酷熱 上衣紫茸甲張蓋督兵士卒流汗命去蓋眾欲戰 上曰天將雨且就食當乘雨擊之須臾雨大注赤幟舉 上下令拔柵諸軍競前拔柵友諒麾其兵來爭戰方合雨止命發鼓黃幟舉馮國勝常遇春伏兵起徐達兵亦至張德勝朱虎舟師並集內外合擊友諒軍披靡不能支潰兵趨舟值潮退膠淺不能動殺溺死者無算俘其卒二萬人其將張志雄梁鉉

喻國興劉世衍等皆降獲巨艦名混江龍塞斷江撞倒山  
江海鰲者百餘艘及戰舸數百友諒乘別舸脫走張志雄  
故趙普勝部將口長張怨友諒殺普勝故龍灣之戰無鬪  
志及降言安慶無守禦可取 上亟命徐達等將兵追友  
諒又命俞元帥將兵取安慶張德勝追及友諒于慈湖縱  
火焚其舟至采石與大戰德勝死之馮國勝以五翼軍蹙  
之友諒與其將張定邊出阜旗軍號黑旋風者迎戰又敗  
之友諒晝夜不得息遂收餘兵棄太平遁去俞元帥遂取

安慶

實錄

友諒遣其弟五王領大船侵應天府龍江城下城堅塹深  
又剗蓮花椿于江瀕二里許以拒艦五王舟至不能近城

移海船于石灰山其虎口城雙刀之兵攻龍灣友諒以其將長張元帥兵先導 上調常遇春拒長張於龍灣邵榮拒五王于石灰山徐達居中應援數戰不利 上調邵榮兵沿江風急水湧不能開幫率眾俱降 上于石頭城山上力戰天晴占者曰今日午時有雨敵大敗至其時大雨如注頃刻復晴再戰大破友諒兵五王僅免登舟而遁兵登舟不及死者不可勝計其被傷及死橫於道者兵不得行生禽數萬人俱赦之旋作水牢羈之月餘死者過半次日 上遣廖永忠俞通海等領海船泝流襲之追至三山磯及采石青沙連戰皆捷僉院黑張同知觀音奴陣亡陳氏兄弟率敗卒夜奔江州 俞本記事錄

戊寅克信州

實錄

友諒寇龍江 上命胡大海出兵擣廣信以牽制之王愷  
謂大海曰廣信爲友諒門戶彼傾國入寇必以重兵爲守  
非大將統全軍以臨之不可大海從之遂克之 實錄

七月乙丑陳友諒浮梁守將于光等來降

實錄

友諒守浮梁院判于光左丞俞椿與饒州幸同知有隙出  
兵攻之光等遂遣人來降命仍守其地友諒遣其參政侯  
邦佐攻陷浮梁光遂輕騎謁 上于龍江 實錄

九月戊寅故徐壽輝將袁國公袁州歐普祥參政劉敬遣人  
來降 實錄

十二月友諒聞普祥降于我遣其弟友仁攻之普祥與

將劉仁黃彬戰敗其眾獲友仁鞭而囚之友諒懼命其太師鄒普勝與普祥和約各守其境乃釋友仁歸

至正二十一年

辛丑

大義二年

正月院判朱亮祖率兵擊陳友諒平章王溥于饒州安仁之石港不利而退

實錄

五月陳友諒將李明道寇信州

實錄

明道聞胡大海在浙東懼其來援遣兵據玉山之草平鎮以遏我師元帥夏德潤出兵爭之遂戰死六月明道攻信州益急守將胡德濟閉城固守大海率兵由靈溪來援德濟乃出城與明道力戰大海縱兵夾擊大破之擒明道及其宣慰王漢二漢二普之弟也朱文忠令二人爲書招溥



上命皆仍舊職用爲鄉導以取江西

七月壬申陳友諒知院張定遠陷安慶守將俞元帥等奔還建康 上怒俱斬之 實錄

安慶乃長江之要地上流雙刀趙普勝據守 太祖累發兵攻之不利後調黑先鋒領兵水陸並進船至樅陽普勝於水中闊以鐵索橫截柁著索不行黑先鋒及將士皆被禽陸路軍馬皆潰散陳友諒陷太平又殺其主徐壽輝自稱皇帝友諒與普勝同事壽輝恐其變誘執普勝往江州誅之別留軍馬守安慶 太祖克之命僉院趙伯仲都先鋒程八守之友諒遣兵復破安慶趙伯仲與程八遁至龍江知府譚若李亦遁中途聞寇退復回入城撫安百姓

太祖命各給弓弦一條自縊死 國初事蹟

八月甲申鄧愈克浮梁 實錄

八月雄峰翼分院元帥王思誠克鄱陽之利陽鎮遂會鄧愈兵于三洞源議取浮梁攻之不下至是克之守將侯邦佐棄城走于光復攻樂安州擊敗友諒總管蕭明禽其萬戶彭壽等六十餘人遂克之 實錄

八月癸卯 大明兵取江州路時偽漢陳友諒據江州爲都至是退都武昌

庚寅 上親率舟師伐陳友諒先是李明道至建康具言陳友諒自弒徐壽輝將士離心政令不一驍勇之將如趙普勝者又忌而殺之雖有眾不足用也及安慶之敗遂決

意伐之至是率徐達常遇春等各將舟師發龍灣 上御  
龍驤巨艦建大旗于前署曰弔民伐罪納順招降諸軍乘  
風溯流而上友諒江上斥堠望風奔遁戊戌至安慶敵固  
守不戰 上以陸兵疑之敵兵動乃命廖永忠張志雄以  
舟師克其水寨遂克安慶長驅小孤友諒守將傅友德及  
丁普郎迎降壬寅師次湖口遇友諒舟出江偵邏 上命  
遇春擊之敵舟退走乘勝追至江州友諒親率兵督戰  
上分舟師爲兩翼夾擊大破友諒獲其舟百餘艘友諒窮  
蹙夜半挈妻子棄走武昌癸卯我師入江州獲馬二千餘  
匹糧數十萬 上遣徐達進兵追聞友諒欲出沔陽戰艦  
拒戰達乃屯於漢陽之沌口以遏之甲辰遣兵攻南康克

之丙申斬黃廣濟降 實錄

戊申陳平章吳宏以饒州降命仍其官守饒州九月辛亥陳友諒平章建昌王溥降 實錄

吳宏餘干州人仕友諒為江西行省參政守餘干 上取

江州遂全城請降王寅 上至龍興宏率眾來見遂改鄧

愈江西參政宏代守饒州下武昌以功拜中書左丞後左

遷親軍指揮宏涉獵經史事母至孝見重于士大夫 開國功臣錄

陳友諒弒壽輝于太平以王普為宣慰元帥進攻建昌 實錄  
翁顯傳

溥以其弟漢一被執又聞友諒失九江勢孤不能支帥孫

德壽等遣萬戶羅康榮奉書來降 上命各復其官仍守

建昌壬戌溥復遣檢校劉巨川以南豐州及臨川金谿等

八縣來獻

實錄

溥從克武昌升資善大夫中書右丞洪武元年兼副詹事

從大將平山東河南燕冀陝西賜文幣七表裏三年論功

行賞升河南行省平章食祿而不視事子孫世襲指揮同

知十一年定諸臣歲祿之數溥每歲七百五十石于江西

官田內給與與李伯昇潘元明同祿

實錄

九月二十二日攻湖廣徐達令右丞薛暉兒領士卒焚漢

陽城沿江舟楫次日攻城友諒登黃鶴樓袖手觀之令閉

門堅守達等未備攻具自寅至午不克遂焚城外房屋大

軍遂退二十三日達領大軍船隻駐襄沔以竹編巨簍貯  
磚石于內填塞壩口出水高丈餘闊十丈令桑院判領快  
船三百餘隻哨鄂州至青灘而回大軍駐船旋三江口十  
一月大軍復上江州大敗五王之兵殺死被擒者數萬俞本  
記事錄

十月戊子命理閩谷繼先討陳友諒與國路石榴山寨克之  
獲寨首嚴院使及其官屬實錄

十一月己未命平章吳宏等率兵取撫州實錄

鄧克明新淦人自少無賴恣橫鄉里紅巾寇陷臨江克明  
與其弟志明亦聚眾而起依賊帥陳普文據縣之修德欽  
風太平玉筍四鄉遂陷撫之樂安崇仁宜黃等縣自稱元

帥陳友諒發兵掠新淦克明率眾歸之友諒以克明爲右  
丞志明知州事克明復轉掠永豐寧都石城河州寧化等  
縣遂陷建昌破杉關掠光澤道順昌以攻建寧不克還兵  
據撫州是冬吳宏率兵取撫州宏遣人招之鄧愈駐兵臨  
州之平塘克明欲走新淦不果乃僞請降愈察其詐潛以  
兵夜襲破其城克明乃出降愈遣志明還新淦收其故部  
曲送克明見 上于九江中途逃歸新淦仍肆劫掠壬寅  
正月 上至龍興城克明懼不自安乃詐爲商賈乘小舟  
至龍興城下潛使人覘伺可否爲去就事覺被執并獲克  
明囚送建康是歲大都督朱文正遣志明從征贛州志明  
乃據麻州嶺沙阮牛陂爲寨拒命不行甲辰八月常遇春

鄧愈討平之執志明送建康與克明俱伏誅克明兄弟凶

暴殘忍御眾無紀律所渴荼毒人以鄧賊稱之

實錄

十二月己亥陳友諒行省丞相胡廷瑞平章祝宗遣宣使鄭

仁傑詣九江納款

實錄

陳氏洪都守將胡君美使約降請禁止若干事 上初有

難色公自後賜所坐胡牀 上意悟許之君美遂以城降

誠意伯行狀

是月 上班師以右丞相徐達總大軍船隻仍駐三江口

記事錄

本

至正二十二年

壬寅

大義三年

正月庚申

大明取江西龍興諸路時江西諸路皆陳友諒



所據 元史

正月乙卯 上以胡廷瑞來降遂伐九江如龍興辛酉

上至龍興胡廷瑞祝宗暨左丞張民瞻參政廖永堅樞密  
僉事康泰左右司郎中潘有慶等俱迎謁於新城門外

上入城

寶錄

戊辰建昌王溥饒州吳宏各率眾見袁州歐普祥遣其子文  
廣來見令普祥仍以本部守袁州

寶錄

王溥以建昌降率將士赴京居住自備軍食不支官糧令  
溥於聚寶門外南街住置立牌樓號其街曰宰相街以寵  
之後溥爲事毀之又江西僞丞相胡廷瑞以南康降 太  
祖入城拜其母以安之

國初事蹟

至正十九年 上遣帳下衛士何必聚往探江西袁州守將歐平章年已老其動靜偵知之 上問汝到袁州有何爲記答曰歐平章門有二石獅吾斷其尾尖後克袁州果然 俞本記事錄

癸酉守吉安土軍元帥孫本立曾萬中與其弟粹中來降

乙亥陳友諒平章彭時中以龍泉降 實錄

本立廬陵人少無賴不事產業紅巾亂起義兵從元守臣納速兒守吉安萬中兄弟亦聚兵吉水陳友諒遣其將熊天瑞攻吉安納速兒丁戰敗遁去萬中兄弟與本立遂降天瑞乃并其軍使其婿徐指揮吳員外馬斷事等與本立萬中同守吉安本立爲徐下心常不說 上至龍興乃詐

與徐謀請假犒師名往覘兵勢徐從之遂同萬中粹中見  
上納款 上以本立爲江西行省參政授以銀印命復  
其職萬中爲都元帥粹中爲行軍指揮俾還守吉安中納  
友諒所授銀印命復其職別以行省印授之二月己丑孫  
本立還吉安秘其納款事徐指揮稍覺謀邀本立等飲就  
圖之徐有愛將泄其語于官妓妓以告本立本立乃邀徐  
吳馬三人至其家與其屬皆登樓劇飲醉而潛去其梯本  
立手刃殺之遂遣人來報併上其軍民錢糧之數實錄

三月癸亥祝宗康泰叛攻陷洪都府四月甲午右丞徐達等  
復取洪都 實錄

祝宗走新淦依鄧志明志明函其首來獻康泰走廣信追

兵復送建康 上以其爲胡廷瑞之甥特宥之 實錄

癸巳陳友諒將熊天瑞寇吉安守將孫本立戰敗走永新天瑞復攻破永新執本立至贛州殺之友諒使其知院饒鼎臣守吉安 實錄

天瑞荊州人初以樂工乘亂聚兵從徐壽輝攻掠江湘間後以陳友諒命攻陷臨江吉安又攻贛州凡四越月下其城友諒命加參政守贛州兼統吉安南安饒州諸郡縣孫本立之降於我也遣姪士安攻贛之興國縣爲天瑞子元震所敗天瑞因攻本立殺之復據吉安遣弟三子劫掠山寨獲貨財牛馬而歸乃造戰艦揚言欲領兵東下署其幟曰無敵自稱金紫光祿大夫司徒平章軍國重事兼侍衛

親軍都指揮使歲癸卯陳友諒攻江西檄天瑞以兵來援  
天瑞坐觀成敗不應命及友諒敗死乃佯遣其子元震赴  
援已而與彭時中爭萬安地以兵相攻又欲圖取廣東乃  
于南雄造戰艦遣元震攻掠程鄉興寧長洛山寨遂陷韶  
州命部將袁仲任守之壬辰春戰艦成率兵數萬進攻廣  
州忽天晝晦大雨如注雷震而檣舟不能進天瑞仰天祝  
曰廣州非予所有則天爲清明當卽日還師祝已天果霽  
乃歸贛是年以兵攻湖南桂陽山寨皆俘獲之以歸王師  
克臨江天瑞始懼遣元震築壘太壺頭爲備禦計九月王  
師至贛天瑞閉城拒守常遇春鄧愈浚濠立柵以困之十  
月元震竊出覘兵勢遇春亦從數騎出猝與相遇元震不

知其爲遇春也過之及遇春還元震始覺來襲遇春遇春遣壯士揮雙刀擊之元震奮鐵槌以拒且鬪且卻遇春日壯男子也舍之乙巳正月天瑞援絕糧盡遣元震出降天瑞亦肉袒詣軍門遇春送之建康元震本姓田氏爲天瑞養子遇春喜其才勇薦之授指揮後復姓田氏

實錄熊天瑞本傳

鼎臣慄慄有膽略所至毒害人呼爲饒大膽陳友諒旣滅鼎臣乃守吉安甲辰八月常遇春鄧愈兵次吉安遇春遣人謂之曰吾今往取贛可出城一言而去鼎臣不敢出遣其幼子出見遇春命坐而飲之又贈以衣服遣歸曰歸語而父將欲何爲匿而不見吾往矣不能爲而留可善自爲計鼎臣卽夜棄城走安福遇春遂復吉安鼎臣旣走安福

與其黨劉顛等仍肆剽掠鄧愈自贛還兵討之久不下乙巳六月復命元帥王國寶會參政何文輝黃彬討之鼎臣棄城走茶陵復合浦陽羣盜于南峰山寨與友諒將劉平章寇掠益甚十一月國寶出兵邀擊鼎臣中弩死餘黨皆

潰散 實錄

五月陳友諒復侵安慶守將院判趙伯中遁九月達領眾平

安慶陳氏夜遁修城塹命將士守之 俞本記事錄

十二月朱文正遣裨將率兵取吉安饒鼎臣走出遂以參政

劉齊陳海同李明道曾萬中粹中共守之 實錄

至正二十三年 癸卯 大義四年

四月壬戌陳友諒復大舉兵圍洪都 實錄

友諒忿其疆土日蹙乃作大艦來攻艦高數丈外飾以丹漆上下三級級置走馬棚下設板房爲蔽置艫數十其中上下人不聞相語艫箱皆裹以鐵載其家屬百官空國而來洪都城始瞰大江 上旣定洪都命移城去江三十步友諒巨艦至不復得近乃以兵圍城其氣甚盛都督朱文正乃與諸將分城拒守丙寅陳友諒兵攻洪都之撫州門其兵各載竹盾如箕狀以禦矢石極力來攻城壞三十餘丈鄧愈以火銃擊退其兵隨豎木柵敵爭柵朱文正督諸將死戰且戰且築通夕城完

實錄

友諒親率高稍子戰船兵號六十萬圍南昌用雲梯等攻具百道進擊朱文正城上發礮石檣木火箭無不破之

國初



五月己巳朔陳友諒知院蔣必勝饒鼎臣等復陷吉安 實錄

李明道與曾萬中兄弟不協明道因潛約必勝兵至城下  
明道舉火爲應開西門納之陳海萬中皆被殺執參政劉  
齊知府朱叔華曾粹中亡走經其仇家黃如淵里中如淵  
本萬中部曲怨萬中兄弟虐其家叛投鼎臣執粹中送鼎  
臣殺之必勝脇降齊等齊等不屈必勝又破臨江執同知  
趙天麟亦不屈俱送友諒以三人徇洪都城下仍以  
明道同鼎臣等守吉安 實錄

甲辰二月李明道被獲送武昌伏誅明道豐城人家富于  
貲乘亂起兵附徐壽輝後附友諒及見獲於胡大海 上

命爲行省參政令與曾萬中等守吉安復叛附友諒友諒  
亡明道走歸豐城翦其鬚髯逃匿武寧山中有茶客識之  
縛送武昌 上數其反覆之罪戮于鮎魚口沙上明道有  
畜犬爲我軍攜至武昌見明道被戮嗥鳴不已銜聚其肉  
跑沙瘞之 上義此犬命衾葬明道 實錄本傳

癸酉陳友諒兵陷無爲州知州董曾死之

實錄

寇逼其降曾抗言不屈遂縛之沈於江

實錄

丙子友諒復攻洪都之新城門薛顯將銳卒開門突戰斬  
其平章劉進昭擒其副樞趙祥敵兵乃退六月辛亥友諒  
圍洪都久不克增修攻具攻水關欲破柵以入朱文正使  
壯士以長槩從柵內刺之復來奪手皆灼爛不得進友諒

又攻宮步士步二門元帥趙德勝力禦之中流矢死洪都被圍既久內外阻絕乃遣千戶張子明告急于建康還至湖口爲友諒兵所獲僞許友諒誘降至城下大呼令固守友諒怒殺之

實錄

六月癸酉

上自將救洪都時徐達常遇春等亦自廬州還是日會師禡纛龍江舟師凡二十萬俱發癸未師次湖口丙戌友諒圍洪都至是八十有五日聞上至卽解圍東出鄱陽湖以迎我師上率諸軍由松門入鄱陽丁亥遇于康郎山

實錄

戊子 上分舟師爲十二屯命達遇春永忠突入虜陣呼聲動天地矢鋒雨集礮聲雷鞠波濤起立飛火照耀百里

之內水色盡赤焚溺死者動一二萬流屍如蟻滿望無際  
已丑焚僞平章舟刈戮二千餘辛卯復酣戰虜將張定邊  
素號梟猛 上親禦之將士皆死戰歷一二時遇春等左  
右夾擊殺士卒無算張中矢百餘而退潛保鞬山不敢吐  
氣我師亦移據湖口扼彼喉衿列柵南北江岸置火筏中  
流水陸嚴戒以候其發 宋濂平江漢頌序

戊子命徐達等進兵薄戰達擊攻敗其前軍獲一巨舟而  
還俞通海乘風發火礮焚寇舟二十餘艘指揮韓成元帥  
宋貴李兆先等俱戰死友諒梟將張定邊奮前欲犯 上  
舟舟適膠淺遇春從傍射中定邊定邊舟始卻通海來援  
舟驟進水湧 上舟遂脫永忠隨以飛舸追定邊定邊走

身被百餘矢是日命徐達還守建康己丑旦 上親布陣  
與友諒戰敵兵舟艦相連至晡東北風起 上命以七舟  
載荻葦貯火藥束草爲人飾以甲冑命敢死士操之乘風  
縱火須臾抵敵舟燔數百艘煙燄張天湖水盡赤友諒弟  
友仁友貴及平章陳普略等皆焚死友仁卽所謂五王也  
眇一目有智數梟勇善戰友諒爲之喪氣普略卽新開陳  
也庚寅 上所乘舟檣白友諒欲并力來攻夜令諸船盡  
白其檣旦莫能辨辛卯復聯舟大戰俞通海廖永忠張興  
祖趙庸等以六舟深入敵連大艦拒戰我師望六舟無所  
見謂已陷沒有頃六舟旋繞敵船而出我師見之勇氣百  
倍合戰自辰至午敵兵大敗旗鼓器仗浮蔽湖面張定邊

欲挾友諒退保鞏山爲我師所扼不得出乃斂舟自守不敢更戰

實錄

按實錄紀戊子之戰張定邊直犯御舟中矢百餘而走平江漢頌之序則繫于辛卯相去凡四日實錄戊子之戰上與遇春舟俱膠淺及闕開平神道碑則繫于壬戌禁江口之戰廖永忠等相去凡三十有五日又實錄紀辛卯之戰六舟深入而鐵冠子傳則云己丑戰湖中之康郎山常忠武王深入虜舟數四圍之僉以爲不可救上曰勿憂也亥時當自出如期果出連戰輒大勝僞漢王陳友諒及將士溺死者無算辛卯己丑相去又三日三文皆出宋學士手筆不知何以與國史錯互如此更相考之

是日移舟泊柴棚明日泊左蠡友諒二金吾將軍率所部來降實錄

我師泊左蠡友諒亦移舟出泊豬磯相持者三日先是友諒數戰不利右金吾將軍欲焚舟登陸直趨湖南謀再舉左金吾將軍請決戰友諒兵敗乃曰右金吾之言是也左金吾懼及禍遂來降右金吾亦從之友諒兵力益衰上移書告之曰曩者公犯池州吾不以爲嫌生還俘虜將與公爲約從之舉各安一方以俟天命公失此計乃先與我爲仇我是以破公江州蹂蘄黃漢沔之地因舉龍興十一郡奄爲我有今又不悔復起兵端困於洪都敗于康山殺其弟姪殘其兵將此逆天理悖人心之所致也公乘尾大

不掉之舟頓兵弊甲與我相持以公之狂暴正當親決一戰何徐徐隨後若聽吾指揮者無乃非大丈夫乎公早決之友諒得書怒留使不遣猶建金字旗周迴巡寨令獲我戰士皆殺之 上命悉出所俘視有傷者賜藥遣還又令祭其弟姪及將之戰死者 實錄

我師遂出湖口命遇春永忠諸將統舟師橫截湖面邀其歸路又令一軍立柵於岸控湖口者旬有五日友諒不敢出 實錄

又移書與之曰昨兵泊豬磯嘗遣使齎記事往不覩使回公度量何淺淺哉大丈夫謀天下何有深仇江淮英雄惟存吾與公耳何乃自相吞併公之土地吾已得之縱力驅殘兵來死城下不可再得也設使公僥倖逃還益宜修德



勿作欺人之寇卻帝名而待真主不然喪家滅姓悔之晚矣友諒忿恚不能答 上遣裨將攻蘄州及興國克之實錄

八月大明兵與僞漢兵大戰於鄱陽湖陳友諒敗績而死其子理自立仍據武昌爲都改元德壽元史

八月虜食盡遣舟五百艘掠糧都昌又爲我大將所獲壬戌虜計窮冒死突出將上趨九江 上命諸將一時俱合其大戰如戊子自辰達酉督戰益急友諒中飛矢死斃于舟中癸亥降其眾五萬上命釋之不戮一人平江漢頌序

八月壬戌友諒窮蹙欲奔還武昌乃率樓船百餘艘趨南湖嘴爲吾師所遏遂欲突出湖口 上麾諸將邀擊之吾師與敵舟聯比順流而下自辰至酉力戰不已至涇江口

涇江之師復擊之未幾有降卒來奔言友諒在別舸中流矢貫睛及顱而死諸軍聞之大呼喜躍敵眾大潰擒其太子善兒平章姚天祥等明日友諒平章陳榮參政魯某樞密使李才小舍命王副樞賈僉院及指揮以下悉以其樓船軍馬來降得士卒五萬餘人太尉張定邊楊丞相韓副樞乘夜以小舟竊載友諒屍及其子理走武昌追之不及定邊等至武昌復立理爲帝

實錄

陳友諒與大兵戰鄱陽湖中箭死友諒篡徐眞逸僭號大漢改元天定大義至是亡

庚申外史

友諒攻隆興久不下臺兵至合戰鄱陽前後相持者八十餘日大戰者五六死者六七萬人兵既不支欲退出湖口

爲流矢所中而卒 草木子

友諒有權術兵強一時及弒主稱帝羣下多不服而叛遂至滅亡死時年四十四自稱帝至死僅四年友諒之初起也其父甚恐曰汝一捕魚兒欲圖大事吾不願也何不守汝故業友諒曰昔有術者觀先世葬地謂我後當富貴今正其時及稍貴遣人迎其父父曰汝不聽我言而起事至此吾懼不能免至是果敗 實錄陳友諒本傳

友諒解南昌圍退出康山與 太祖大戰 太祖頗懼問劉基氣色如何基曰吾兵必勝之氣當力戰友諒中流矢死 太祖謂基曰我不當有安豐之行使友諒乘我之出京城空虛順流而下擣我建康我進無所成退無所歸友

諒不攻建康而圍南昌此計之下者不亡何待乃知天命有所歸也遂班師

國初事蹟

三月徐達領大軍攻廬州老左堅守不克圍至七月陳友諒親率大船進鄱陽湖來侵徐達棄圍援之上親領舟師往征衣甲鎧仗旗幟火礮火銃火箭火蒺藜大小火鎗大小將軍筒大小鐵礮神機箭及以蘆席作圈圍五尺長七尺糊以布紙絲麻纏之內貯火藥捻子及諸火器名曰沒奈何用竿挑頭桅之上兩船相幫燃火線刀斷懸索沒奈何落于敵船中火器俱發焚毀無救上敕相國徐達平章常遇春爲前鋒平章廖永忠俞通海爲左右翼餘船列幫而進上以所乘船如征江州之勢令愈嚴肅師愈

鮮明舟愈齊整戒將士曰晝則視旗幟夜則視鐙籠遠則  
聆信礮近則聽金鼓以翱翔二船爲左右副以風斗快船  
爲前導大小船隻相繼而進兵至左蠡旌旗蔽日金鼓振  
天帆幔遮水衣甲耀日遙列數百里友諒後繼之船盡則  
俘獲江西守將朱文正鄧薛二參政率軍力戰友諒將士  
不能近城聞 上援兵至棄圍赴戰友諒戰船塗紅爲號  
大者容三千人中者二千五百人小者容二千人其船以  
灰麻艚底艚與兩廂頭尾不艚或謂友諒曰何至艚底友  
諒曰此一去船何須盡艚以故友諒戰船皆不及 上船  
之堅以白紅分兩軍陳氏之兵曾經龍江江州湖廣三處  
大敗善戰折損卻於湖潭荆襄等處徵田夫市子三丁抽

一爲軍號曰蓬合且十人無一二慣戰及船相幫望見白船水上周旋迅疾旗幟帆幔衣甲器械又聞金鼓礮銃之聲魂魄俱喪安能操戈執弓哉友諒惟恃巨艦未知軍心恇怯白船往來湖中仰而射紅船堅駐不便轉動一日攻數次白船輪次而戰紅船軍力疲倦

七月二十一日大戰紅船焚溺二十隻煙燄障天咫尺不能辨聲振山谷軍浮水面波浪漂沒白船亦被火裏焚者七隻紅船將士焚溺者殆六萬人白船焚溺者七千餘人餘船相幫紅船被白船相撞卽爲碎薪是日友諒之弟五王溺水而死將士浮水求救者蔽水面 上遣快船濟之次日 上設大牢少牢遣使致祭五王之柩於軍友諒亦

以禮遣歸又數日 上遣人齎書詣友諒約出江決戰友諒無紅船欲出湖口恐白船襲其後遂讓白船先出 上遂令江西之船堅拒黃泥州及樵市令諭將士曰我船出了湖口便占上流埠岸選精銳馬步兵登岸待戰風斗快船艤岸排列海船依次排江中次日遂行白船盡出紅船方行白船正出之時紅船不敢追襲者何也大船泊淺小船兵穴故也紅船出到湖口撞埠俱被白船已占值西風大作紅船之勢高拒順流如箭而下無所措手足流至金江口拋五鐵猫始住兩軍相望二十餘里 上指謂都督仇景福曰那紅船何人的景福對陳氏所乘 上曰我提百萬兵數千里遠來除暴荷天以此子付我掌中此機不

可失諭達等曰平暴定亂正在今日遂令將士各措火器  
兵仗衣甲於所立信地

二十四日 上於所乘每號船頭敕曰將士勿動捧香爐  
拜祝曰黎民被難數十年吾今除暴解紛實天祐之克此  
姦雄四方寧息汝等士卒俱令富貴今當盡心以報天意  
卽拔劔敕曰交鋒之際擅離信地不用心者斬遂令釘其  
水門平基撤其上下木梯拽搖兩廂懸鈴兵皆倒身搖櫓  
又值西風順水船下如箭比至紅船三百步間箭銃將軍  
筒標又俱發如雨紅船將士無所躲避僅以板牌遮身或  
伏匿或趨走無出視者白船竟過矣 上命親軍指揮康  
茂木率二十八宿令船水捧挽船而上十五里許順流再



下紅船將士望之如山崩友諒度不能支出首箭窗中呼從紅船而白船已至箭銃齊發友諒左太陽中箭須臾陳氏卒泅水報曰友諒死矣 上傳令曰友諒已中箭死兵船將士敢有擅殺一人者斬陳氏將士聞之全船來歸者相繼不絕友諒屍已爲近侍竊載遁於湖廣矣部下省院官及八陣指揮率領海船再戰俱不勝而降輜重盡爲俘獲惟知院蟒張海船不戰而遁向友諒所謂一去船者今果驗矣所獲戰船上下左右箭刺如蝟 上大悅諭眾曰友諒中箭而死將士之功勝於赤壁走曹操遠矣稠人難辨射中者均給重賞以勞汝等次日 上執爐焚香朝天拜祝曰異日天下一家與汝等巴都兒共享富貴教汝都

做大官拜畢 上於樓船上設金椅坐定保駕都督仇景  
福率八枝壯士一千三百人稱萬歲謝恩遂設一筵卽命  
班師後至王宮以在船一千三百人羅於兩廡下賜以酒  
食恣其醉飽次日每人給以金龍宮段一表裏冬夏布五  
匹銀五兩麥各五石銅錢六千文省府衛及千百戶鎮撫  
等官給賜各有差

甲子遣兵追陳理於武昌九月丁卯朔

上發湖口還建康壬午命李善長鄧愈留守建康率諸將親  
征陳理於武昌冬十月壬寅

上兵至武昌十二月丙申朔

上發武昌還建康 實錄

上率馬步舟師水陸並進命遇春等分兵立柵圍之又于江中聯舟為長寨以絕其出入之路分兵徇漢陽德安諸郡上還建康命遇春總督諸將守營柵諭之曰彼猶孤狃處牢中欲出無由若來衝突慎勿與戰久當自下也實錄是年十月湖廣偽姚平章張知院陰遣人言於擴廓帖木兒設計擒殺偽漢主陳理及偽夏主明玉珍不果元史

至正二十四年甲辰德壽元年

正月丙寅朔李善長徐達等奉

上為吳王二月乙未朔

上以諸將圍武昌久不下復親往視師實錄

先是張定邊潛遣卒夜由觀音閣縋城走岳州告其丞相

張必先使入援必先去城二十里軍于洪山 上命常遇春率精銳五千乘其眾未獲擊之遂擒必先必先驍勇善戰人呼爲潑張城中倚以爲重乃縛至城下示之必先亦呼定邊曰吾已至此矣兄宜自圖定邊氣索不能言武昌城東南有高冠山下瞰城中傅友德一鼓奪之城中益喪氣後數日上乃遣友諒舊臣羅復仁入城諭降復仁于城下號哭理招之入復相持痛哭乃諭以 上意理與定邊等遂請降 實錄

臺兵攻圍武昌一年不拔潑張以潭岳兵赴援兵敗見執遂俱降 草木子

二月友諒將知院潑張領精兵數千援湖廣 上命達率

兵數千敗之俘軍一千餘人每四人共用麻編頭髮木椿釘于鸚鵡洲上是夜雨雪迨曉死者過半宥潑張而羈之洪武三年鄧愈克河州班師至謂原潑張參政心懷叵測

上遣人齎密旨于愈卽時斬之

俞本記事錄

癸丑陳理銜璧肉袒率其太尉張定邊等出降

實錄

理至軍門俯伏戰慄不敢仰視上見其幼弱起挈其手曰吾不爾罪勿懼也命宦者入其宮傳命慰諭友諒父母凡府庫儲蓄令理悉自取之遣其文武官僚以次出城妻子資裝皆俾自隨友諒兄友才亦降友才所謂二王者也友諒命與左丞王忠信守潭州忠信遣來武昌戰敗而降上授忠信參政仍守潭州友才聞其降而復來率兵拒

于益陽之高山忠信巽詞開諭之于是友才亦降與其子

大俱送建康

實錄

以陳理祖父及所生母并伯叔后妃嬪宦載赴應天府納友諒次姬爲妃命右丞周德興守城

俞本紀事錄

上至建康丙寅封陳理爲歸德侯下令諭告中外

實錄

封友諒父普才承恩侯理歸德侯友諒弟友富歸仁伯友直懷恩伯弟友仁追封康山王命有司塑像歲祀焉後普才徙滁理徙高麗

平漢錄

洪武五年正月歸德侯陳理歸義侯明昇居常鬱鬱不樂頗出怨言

上聞之曰此童兒輩言語小過但恐爲小人蠱惑不能全始

終宜處之遠方則釁隙無自生可始終全保矣於是徙之高麗遣元樞密使延安答理護送而往仍賜高麗國王紗羅文綺四十八匹俾善待之

實錄

高岱論曰友諒之勇略雖或未及項羽而慄性狡悍出沒飄忽大困而不餒屢躓而復振觀其龍江敗歸還襲安慶九江之失疾奔武昌及徐達召還不旋踵而有江州之入是皆敗衄之後旬日之間而能陷城摧敵其能開拓封疆奄有荆楚亦一世之雄也惜其昧強弱之勢失先後之著據形勝之地不能進取襄鄧以窺中原昧觀釁之法漫焉輕涉龍江已取覆敗及我方有安豐之役金陵空虛則又老師洪都而不爲批擣之計用兵之道當如是乎豈可盡

委天命哉然我 聖祖之所以得耑力於友諒則以士誠  
之乏遠圖耳鄱陽之戰亟命徐達歸守友諒既殂不肯直  
擣武昌而還師再舉皆恐東吳之乘其後也區區戎簡輩  
一老書生焉足以知聖算哉



國初羣雄事略卷四

國初羣雄事略卷五

虞山錢謙益牧齋甫編

夏明玉珍

玉珍隨州人至正二十二年自稱皇帝國號大夏改元天統在位五年二月卒壽三十六子昇立改元開熙在位六年國亡

至正十一年辛卯天完治平元年

蜀有明氏一曰晏氏名玉珍隨州玉沙村人也家世務農玉珍身長八尺目有重瞳性剛直鄉閭有訟皆往質焉黃標

平夏錄

徐壽輝起蘄水玉珍與里中父老謀避兵父老曰足下素

剛直能集壯勇保全鄉里是所望也玉珍于是招集鄉人

得千餘屯于青山結寨柵自固眾推玉珍為屯長

實錄明玉珍本

傳

重慶號旻瞎子先沔陽人瞎一目為巡司弓兵牌子頭隨

倪蠻子為盜

夏主母夢與神遇遂娠而生有異相家世以農畝為業少

負大志不屑為也辛卯兵起潁蔡間因部署諸鄉豪屯青

山修柵治城以保鄉里有眾十餘萬眾遂推為屯長

新都楊學

可編明氏實錄

至正十三年

癸巳

天完治平三年

癸巳冬十一月徐壽輝使人招玉珍曰予起兵舉義期逐

胡虜以靜中夏若歸共圖大事不來且先誅之玉珍懼且欲保鄉里不得已從焉壽輝待以殊禮授統兵征虜大元帥仍領所部益兵俾鎮沔陽時元帥哈麻禿爲患洞庭玉珍與連戰湖中流矢中右目

明氏實錄

壽輝攻陷荊湖州縣遣人招玉珍曰早降共富貴不來舉兵圖之玉珍懼遂降壽輝俾爲元帥復益兵俾鎮沔陽與元將哈麻禿連戰湖中流矢中右目

平夏錄云人呼爲

旻瞎子

實錄本傳

壽輝招玉珍在癸巳十一月但云壽輝都漢陽玉珍歸之則誤也壽輝以壬辰春陷漢陽癸巳五月阿魯輝復漢陽乙未七月倪文俊復陷之至丙申冬壽輝方都漢陽癸巳

十一月尚在斬也玉珍之歸天完定在丙辰己巳兩年其  
詳不可攷矣 明氏實錄

至正十七年 丁酉 天完治平七年

二月倪文俊陷陝州破鹿盧關明玉珍又進陷川蜀諸郡因  
據守之 實錄徐壽輝本傳

二月甲戌倪文俊陷陝州詔以高寶爲四川行省參知政  
事將兵取中興不克賊遂入鹿盧關是歲倪文俊陷川蜀  
諸郡命僞元帥明玉珍守據之 元史順帝紀

玉珍既鎮沔陽甲午秋沔陽水澇連歲民采菱魚而食乙  
未夏玉珍將兵萬餘駕斗船五十艘上夔府哨糧時夷陵  
屬天完參政姜珏鎮守玉珍泝流至巫峽資糧皆滿載蜀

人亦不知擾也丙申冬王珍自巫峽將還先是元四川行  
省右丞相完者都鎮重慶募兵辰州人楊漢者元義兵元  
帥也以精兵五千屯西平寨丁酉春三月漢以兵至重慶  
屯江北完者都誘漢來謁席間殺之欲併其軍漢將士謀  
復仇不克乃虜船下流適遇王珍于巫峽訴其事且言重  
慶城中兵備單弱完者都與左丞相哈麻禿兩不相下若  
回船出其不意攻之取重慶如反掌耳王珍猶豫未決萬  
戶戴壽曰烏困投林人困投人且明公脩兵沔陽爲民也  
哨糧于蜀亦爲民也不若分船爲二以其半載糧還沔以  
濟荒以其半因漢兵攻重慶事濟則據之不濟則歸何損  
也且此兵之出窺隴蜀據上流保荆襄開糧道一舉三得

幸勿他慮玉珍從之遂率兵至重慶時蜀中承平日久忽  
斗船大集遠近騷動完者都夜遁果州哈麻禿出戰被執  
父老迎玉珍入城玉珍禁止侵掠城中安堵如故旁近降  
者絡繹不絕遣使獻哈麻禿于壽輝是歲秋壽輝以玉珍  
爲隴蜀省右丞

平夏錄

明氏實錄

丁酉春倪文俊陷峽州令玉珍以斗船五十艘掠糧川陝  
間時四川行省右丞完者都左丞哈麻禿募兵重慶義兵  
元帥楊漢聞之率兵五千自西平寨至重慶屯兵江北單  
騎入謁完者都欲圖其兵置酒飲漢酒酣欲殺之漢覺脫  
身走歸營將士皆怒遂放船下峽按實錄載哨糧事在丁  
酉春又云楊漢走歸與平夏錄明氏實錄互異俟更考之

實錄本傳

十二月丙戌徐壽輝將明玉珍據重慶路 實錄

十二月明玉珍據成都初壽輝將倪文俊陷川蜀命玉珍守禦文俊死玉珍遂自據成都 元史續編

是年九月玉珍訪求儒碩有陳隱君者居五峰山中玉珍以萬戶告身招之不至 明氏事蹟

至正十八年 戊戌 天完治平八年

明玉珍遣兵劫烏牛山寨破嘉定城又親率眾攻克大佛寨自是蜀中郡縣相繼下盡有蜀川之地 實錄

戊戌二月完者都自果州率兵至嘉定屯于大佛寺 一名凌雲

規復重慶玉珍遣義弟明二領兵禦之明二者黃陂人也



智勇過人玉珍寵愛之妻以弟婦稱爲明二一曰後復姓三奴後復姓名曰萬勝明二攻嘉定夜遣軍人陳夜眼緣城劫烏牛山寨擣嘉定城皆破之惟大佛寨未下相持越半載玉珍親率兵攻之旬日完者都兵內潰入之趙資行省參政也與完者都平章朗革反同守嘉定明二陷嘉定時完者都朗革反先遁惟資守大佛明二執資妻於江岸以招資資嘻曰癡婦胡不死汝不見平章婦乎平章婦者朗革反妻城陷時赴水死語畢以強弩射殺妻復欲射其子爲眾擁去乃止已而大佛陷資亦遁三人者會于龍州謀興復爲游兵執至重慶玉珍欲用之館之治平寺使人諭意三人曰國破家亡祈速死耳玉珍猶欲生之時傳趙參政兵將至

遂同斬于大十字街蜀人謂之三忠玉珍以禮葬之

平頁錄

戊戌春二月完者都自果州來會蜀省平章朗革反參政趙資率兵屯嘉定州謀取重慶玉珍遣義弟明三領兵泝流圍攻嘉定未克相守半載玉珍兵駐瀘州己亥玉珍親領兵至嘉定圍之令明三率銳兵直趨成都時元行省平章買奴參政韓叔亨爲青城

一作青巾

賊所執城中窘迫

惟都事粹元理署省事守省兵皆新募者聞明兵至皆驚潰明三領兵入省中虜朗革反趙資妻子順流而歸朗革反妻謂舟中人曰吾家祖宗三世受羊皮宣命吾爲平章夫人義不受辱自投於江明三以趙資妻見玉珍玉珍待之以禮曰執政乃我中國人何故反爲胡虜守戰夫人能

招使降當裂土以贈翌日兩軍會戰玉珍驅資妻臨陣謂  
資曰妾與鎖兒受擒於此明公甚以禮待參政念結髮之  
情顧子母之命言既其號泣其子亦大呼兩軍觀者淚下  
資住馬執弓厲聲曰癡婦不死何待乃引弓發矢中其胸  
殪之又欲射其子眾以盾護之乃免玉珍揮兵勇進分左  
右二翼襲之元兵大敗遂生擒完者都朗革反趙資至重  
慶戮于大十字街以禮葬之

明氏實錄

按實錄本傳及平夏錄不載玉珍遣明二攻成都事又皆  
載于戊戌年而不及己亥皆紀載之闕略也以明氏實錄  
爲正

按元史順帝紀辛丑五月癸丑四川明玉珍陷嘉定等路

李思齊遣兵擊敗之實錄本傳載在戊戌歲則相去四年矣玉珍之絕友諒稱隴蜀王在庚子歲而元史記于壬寅五月其稱帝于癸卯正月至玉珍之攻陷雲南在癸卯十一月而元史記于壬寅之三月其錯互不一如此蓋元史脩于洪武元二隴蜀未入職方之時而實錄則平夏之後本其載記而存之也斷當以實錄爲正

至正十九年紀天完治平九年

秋遣使貢於壽輝實錄

時友諒矯命使會兵建康平夏錄

十二月陳友諒以江州爲都迎僞主徐壽輝居之自稱漢王元史

至正二十年庚子天完治平十年

實錄

閏五月戊午陳友諒弒其主徐壽輝於采石

明玉珍為徐壽輝立廟絕陳友諒不與通遂自稱隴蜀王實錄

本傳

庚子夏友諒弒壽輝自主玉珍曰陳友諒倪文俊同在徐朝為臣子今弒逆子當討之遂令莫仁壽領兵守夔關絕不與通立壽輝廟于城南春秋奉祀眾推玉珍為隴蜀王

平夏錄

玉珍攻四川陷成都殺戮既盡退居重慶陳矯徐命使會兵建康既而憤陳之弒逆竟引兵歸曰汝能為帝我豈不能帝耶據有全蜀之地絕不與陳通居位六年

草木子

二十二年五月辛未明玉珍據成都自稱隴蜀王遣僞將  
楊尙書守重慶分兵寇龍州青州犯興元鞏昌等路元史  
順帝紀

玉珍爲隴蜀王因下令曰胡元運去中國豪傑並起而逐  
之予本鄉農因亂爲眾所推殆自爲保夫豈圖人邇者義  
兵一起羣醜底寧湖湘向化顧茲蜀地久被青巾之亂莫  
有爲之翦除者予奉天誅罪豈能自安已經殄歿凶徒幸  
爾坐收全蜀是乃天意夫豈人謀方今圖爲畫一之規與  
民共享太平之治誠恐百姓不知以予爲爭地殺人之師  
非弔民伐罪之舉予取爾蜀于青巾之手非取諸元爾輩  
亦當復見中華文明之化亦不可安于胡元之陋習也更

宜洗心從治慎勿取惡招尤

明氏實錄

至正二十一年

辛丑

四月以劉禎爲參謀

實錄

戊戌歲玉珍攻完者都道出瀘州宣使劉澤民曰此閒有劉禎者字維周歷官大名路經歷元進士也有文章能政事避青巾李喜之亂隱居方山蓋往見焉玉珍曰可與俱來澤民曰此可就見不可坐致也明日遂往見之與語時事玉珍喜曰吾得一孔明也延至舟中卽舟中拜爲理問官朝夕侍講書史預決政事至是擢爲王國參謀禎屏人從容說玉珍曰今天下大亂中原無主西蜀形勝之地沃野千里東有瞿塘可以達江左北有劍門可以窺隴右自

遭青巾之虐民物凋耗明公加意撫養民幸蘇息民心歸附天命可知且陳友諒弒主自立明公必不肯聽命也此時若不稱大號以繫人心部下將士皆四方之人或思其鄉土而去明公尙難以自保全蜀況欲取天下乎弗聽明日禎又言戴壽張文炳力贊之聲息已彰于外說服者多玉珍不得已乃咨謀于眾其議始定

平夏錄

明氏實錄

至正二十二年壬寅夏天統元年

春三月己酉玉珍自稱帝卽位於重慶國號大夏紀元天統立妻彭氏爲皇后子昇爲皇太子

實錄本傳

平夏錄並同

以後俱同上

壬寅三月己酉明玉珍稱帝于重慶

實錄

二十三年癸卯正月壬寅朔四月明玉珍僭稱皇帝建國



號曰大夏紀元曰天統元史順帝紀

壬寅春三月戊辰祭告天地卽皇帝位建都重慶國號大夏改元天統詔曰天主斯民必立司牧夏商周之迭運漢唐宋之繼統其來遠矣元以北狄汙我中夏倫理以之晦冥人物爲之消滅咸云天數敢謂人謀邇者子孫失道運祚衰微上天有命示厭棄之機豪傑乘時興驅逐之策惟我家國肇跡湖湘志欲除暴救民聊爾建邦啟土成湯七十里盛德已振於三巴歷數八百年神功終收于一統上承天命下順民心謹以壬寅年三月初二日祭告天地祖宗及屢代帝王卽皇帝位國號曰大夏其以今年爲天統元年嗚呼蒸行天罰革彼左衽之卑汙昭顯茂功成我文

明之大治尙賴遠邇豪傑勿吝嘉謀庶幾大小臣工協登  
偉績 明氏實錄

立郊社祭以春秋追帝其四代立廟祭以四時分蜀地爲八  
道 明氏實錄

倣周制設六卿卽日以戴壽爲冢宰萬勝爲司馬 卽玉珍義弟明二至

是復姓名張文炳爲司空向大亨莫仁壽爲司寇吳友仁鄒

興爲司徒劉禎爲宗伯置翰林院以牟圖南爲承旨史天章  
爲學士太子昇朝夕受學焉內設國子監教公卿子弟外設  
提舉司教授所教養郡縣生徒府置官曰刺史州曰太守縣  
曰令設科舉策試進士去釋老二教而專奉彌勒

立進士科八道鄉試充貢有司次年會試宗伯廷試分五

及第出身去釋老并彌勒佛堂

明氏實錄

夏始定賦稅十取其一農無力役之征

秋廷試進士賜董重璧等八人及第餘皆出身有差

實錄作重璧明

氏實錄作董璧

置雅樂置奉天征虜大將軍府於漢中以進取陝右置奉天

征蠻大將軍府於夷陵以進取友諒

明氏實錄

冬使司馬萬勝領兵出漢中攻剽坎侯普顏達夫平章敗走獲其人馬萬口

冬平夏錄云癸卯春似誤

復遣司馬萬勝等率兵攻雲南

勝兵由界首入司寇鄒興由建康入指揮芝麻李由八番入勝兵不滿萬皆以一當十

明氏實錄云勝兵十一萬

至正二十三年癸卯天統二年

三月平夏錄十月八日勝兵至雲南梁王李羅帖木兒一名把都及雲南

行省廉訪司官先二日棄城走退保金馬山一曰皆走楚威勝入城

據之實錄本傳

三月初八日勝兵抵雲南屯兵金馬山鄒李皆不至梁王

李羅雲南省廉訪司官先二日皆走勝遣使四方告諭招

安繼日齋宣牌面納降降者不可枚舉明氏實錄

鄒李兵不至勝遣使四出招諭降者日至即遣侍中楊源

表聞獲其眾以獻表曰聖德孔昭誕受維新之命王師所

至宜無不服之邦大軍既發於三巴踰月遂平于六詔穹

祇交賀遠邇同歡恭惟皇帝陛下勇智如湯文明協舜既

念中華之貴反爲左衽之流矧在位之貪殘致生民之困  
踣恭行天罰遂平定乎多方禮順人情卽進登於五位忝  
茲南詔鄰彼西戎藩公挾便宜行事之文專任儉王滋其  
饕餮守宰無惻怛愛民之意肆爲虐政害彼黔黎下詔揚  
庭出師討罪初臨烏撒蠻酋納款以供輸繼次馬隆敵眾  
望風而奔潰遂由駟路蹋入滇池士民冒雨以爭降官吏  
叩頭而請罪一毫不染萬室皆安勝等愧以庸才欽承威  
命凡此大勛之集斷非小器之能皆聖人大庇之洪休抑  
諸將效勞于忠力深入不毛臣愧偶同於諸葛誕敷文命  
帝德齊美于有虞此鄒興所撰也

平夏錄

四月萬勝引兵還重慶

實錄本傳

勝兵之入雲南也鄒興芝麻李尙未至梁王不意勝兵奄及故棄城遁及梁王之傳大都出兵率偵敵獲勝部將姬安禮問勝兵幾何曰八千於是大都會大理段平章兵擊勝殺傷者過半勝以孤軍深入約兵未至而戰士多中傷遂引兵還所過暴掠爲民患玉珍不能制上齎遣書諭之實錄 玉珍本傳

四月梁王下王傳官大都領兵來攻城萬勝領兵回哨援之勝敗于關灘時招安元師姬安禮被執至行邸問兵多寡曰八千於是大都命集於大理是役也勝以孤軍不可深入士多戰傷乃留逮水元帥府千戶聶瑾領八千人與大都拒守遂引還重慶 明氏實錄

二十二年三月甲寅明玉珍陷雲南省治屯金馬山陝西  
行省參知政事車力帖木兒等擊敗之擒玉珍弟明二元  
順帝紀元史記于壬寅年又云擒明二皆誤也

癸卯明玉珍自楚入蜀據之分兵四掠號曰紅巾明玉珍  
自將紅巾三萬攻雲南梁王及憲司官皆奔威楚諸將悉  
亂總管大理段功謀于員外楊淵海進兵至呂閣敗紅巾  
于關灘江殺獲千計紅巾收合餘眾再戰復勝殺段氏驍  
酋鐵萬戶紅巾屯古田寺段氏夕潛火其寺紅巾軍亂死  
者什七八又追至回磴關大敗之紅巾大呼曰待明年來  
復仇時功在戰閒得玉珍母寄其子書云爾征南務得之  
不得輕還軍少糧乏我當添補楊淵海效其書跡易之曰

中國兵來急爾宜早歸遂募能入紅巾營者有小卒陳惠願行玉珍得書恐國中有變又新失利遂急收軍功追之至七星關又勝之而還梁王深德段功以女阿禧妻之爲奏授雲南平章

楊慎滇載記

按雲南之役玉珍不在行或卽明二之譌也

癸卯 九月表韓氏女爲貞烈

初丁酉歲九月青巾賊入成都有韓氏女年十七舉家從軍夏兵攻刺蹋破之韓女假爲厮兒被虜砍草養馬出入六七年人不知其爲女也至是征雲南還路逢其父贖之適尹氏貞烈如此

己酉辟劉湛爲仁壽縣學教授湛學行優裕造就人才升爲



國子監祭酒

明氏實錄

時有劉湛者字信翁江西人爲仁壽教官文章清古爲後

進所宗丁酉玉珍入蜀棄官隱居瀘州玉珍屢徵不就卒

弟子葬之小市廂

平夏錄

明氏事蹟同

至正二十四年

甲辰

天統三年

司馬萬勝率兵攻興元圍城三日不克而還

平夏錄

秋巴州叛命司寇鄒興攻克之留兵鎮守

同上

攻拔巴州尙倉置軍守之

實錄本傳載在癸卯秋

至正二十五年

乙巳

天統四年

春更六卿爲中書省樞密院以戴壽爲左丞相萬勝爲右丞

相向大亨張文炳知樞密院

平夏錄爲都察院

鄒興爲平章鎮成都

吳友仁爲平章鎮保寧莫仁壽爲平章仍鎮夔門鄧元亨爲

平章鎮通州寶英爲參政鎮播州明氏實錄鄧元帥爲平章

州播姜珏爲參政鎮黔南實錄本傳

冬徐國參政姜珏來朝乃令守夷陵就彼屯種置倉以贍國

用明氏實錄

是年冬我

太祖高皇帝遣使聘夏夏主遣參政江儼答聘平夏錄

秋遣參政江儼入貢實錄本傳

乙巳九月夏主明玉珍遣其參政江儼來通好 上遣都

事孫養浩往報遺書曰元政旣墮天下驅兵者蜂起往往

毒痛生靈未有能奉天道拯民于塗炭者也徐氏以昏懦

見殺陳友諒竊據荆襄肆其強暴自取顛隕又何足言昔者曹操虎踞中原假漢之名以號令天下操日夜思併吞吳蜀吳蜀不能合從以拒操而屢起釁端自相攻伐豈不失計之甚哉今之英雄據吳蜀之地者果欲與中國抗衡延國祚而保社稷惟合從爲上謀足下處西蜀子居江左蓋有類昔之吳蜀矣方天下之變中國士馬精強民庶繁衍者汴雒齊魯三晉爲然今皆在豪傑之手自彭城以南嵩汝之東兩淮之間三分人民予已得其二足下之兵雖出于潁之東南漢沔湘湖之地然而陳友諒握其權綱足下因有所見以偏師入蜀度其兵有三分之一茲旣奄有全蜀乃古今人物強盛之所寧不壯哉然西有李喜喜等

兵侵擾殺掠生民無幾近者王保保以鐵騎勁兵據有齊魯根培雒陽招賢納士練將養兵實處中國其志非小使其奸雄如操足下與予豈得高枕無憂乎當今之勢予與足下實相表裏將欲國祚之安備中原之患可不以昔之吳蜀爲鑒耶使至尊厚意故以書往報惟足下籌之明氏實錄乙巳十月己酉朔 上聞玉珍取雲南失利諸將暴掠不能制乃遺書曰自元失其馭天下兵起今十有四年凡昔之首事者十亡八九皆不思救民恣行殘忍自絕于天以底禍敗也近聞足下發兵與蠻夷爲敵兵之所過郊圻之內民舍一空此如割股以啖腹飽而身斃果何益哉西蜀沃野千里劉備據之以三分天下苟不善保而使他人有

之誠爲足下之憂予與足下中心相孚欣戚相同故以相告譬如弈者當局有不自知旁觀者能審之矣若足下旁觀於予亦幸有以相告豈不美哉

明氏實錄

吳王始遣都司孫養浩來結好書曰吳王奉書夏國皇帝間者得姜珪誥命觀其文義安貼辛卯歲兵起蔡穎有陳友諒恃其土地之廣甲兵之強一旦迫區區之境不得已而應之三年遂決胡人本處沙塞今反居之中原是冠履倒置足下應時而起居國上流區區有長江之險相爲唇齒協心同力并復中原事定之日各守疆宇時遣使通好惟足下圖之是年秋遣參議江儼答書曰夏主皇帝奉書吳王足下邇者夷狄運衰中原氣盛天必降生豪傑驅逐

胡虜以爲生民主是乃天意之有在也弟以中原人物解此者少尙爲彼用殊爲可恨足下應運而興目視赤子之塗炭想亦不忍也區區人馬二十萬北出漢中東下荆楚期盡殘虜以安黎庶特遣使奉復通好不敢後約惟高明亮之

明氏實錄

冬元威順王侯普顏達失平章率兵由雲南間行如陝西遣丞相戴壽追襲之至秦州弗及而還是月全蜀星隕如雨

實錄

本傳

至正二十六年

丙午天統五年

春二月玉珍有疾召其臣僚諭曰西蜀險塞汝等同心協力以輔嗣子可以自守不然後事非吾所知汝等勉之遂死葬

於江水之北自僭號至是五年壽三十六子昇嗣立年始十歲改元開熙母彭氏同聽政玉珍爲人頗尙節儉好文學蜀人經李喜喜殘暴之餘賴以羸安然喜自用昧于遠略而嗣子稚弱政出多門國事去矣

實錄本傳

丙午春夏主不豫召臣下諭之曰中原未平胡虜未逐志不能遂也此殆天意今西蜀險塞予沒後汝等同心協力但可自守慎勿妄窺中原不可與各鄰國構隙言畢遂殞在位五年壽三十六葬江北永昌陵羣臣尊上廟號曰太祖文武至聖皇帝遺詔太子卽位遣使報訃于吳及各國兼致遺物

實錄

明氏

史官方孝孺贊曰夏主方有意于據蜀羣臣遭青巾之虐

百無一二夏主躬行儉約興文教闢異端禁侵掠薄稅斂  
一方咸賴小康焉惜不能謹之于始私家倍于公室倉帑  
空虛不能展其疆界歷年雖永民至今感歎焉然不能以  
文詞盡其賢也

明氏實錄

夏太子昇卽皇帝位年十歲尊母彭氏爲皇太后垂簾同聽  
政立妃王氏爲皇后改元開熙

明氏實錄

詔曰皇天眷命篤生我太祖皇帝恭行弔伐創業開基期  
盡中原以登至治願大業未遂龍馭上昇舉國臣民攀號  
莫及予小子哀疚方殷而臣民以嗣位爲請謂神器難以  
久虛國家不可無主懇請再三辭遜無術謹于四月初一  
日祇告天地祖宗卽皇帝位予稚年涼德忝任君師惟敬



天以勤民在脩身而法祖纘承烈緒任洪業以無疆誕敷  
武文祈天命于有永尚賴臣工協志同濟時艱補缺拾遺  
匡矛不逮其以明年為開熙元年除舊布新與民更治仍  
遣使詣吳及諸國告即位 明氏實錄

二月辟鳳山趙善璞為翰林學士不就

善璞歸隱於樂殞山中所著有陶真集正誼藁有自述詩  
曰錦里棲遲處飄然遠俗囂地偏車馬少山近市廛遙謝  
事惟求避居官懶折腰讀書明至道忘味學遺韶對坐花  
千點充饑水一瓢放情隨灑落得句自推敲種菊開三徑

橫琴詠九皋唐虞今在上許我學由巢 明氏實錄

吳王遣使來弔祭又遣使來送葬 吳王遣使來賀即位 明氏

實錄

丞相萬勝與知院張文炳有隙密遣人殺之內府舍人明昭等復矯后旨召勝入縊殺於崇文樓下拜劉禎爲右丞相明氏

實錄

月山叢談同

萬勝與張文炳有隙文炳使玉珍義子明昭矯彭氏旨召勝殺之使劉禎代爲丞相勝有開國功死非其罪人多不服平夏錄

玉珍居位六年後爲其弟殺之其妻復圖殺其弟立其子爲帝以其黨戴壽爲冢宰事皆專之小受主擁虛名而已  
草木子

楊學可曰右丞相萬勝者德安府黃陂縣人也壯歲智勇

過人夏主寵愛之妻以弟婦故稱爲明二數載總兵信賞必罰士卒樂從所向克敵開國之功良多夏主賓天立幼母后臨朝小人閒謀張萬自相屠戮而非以有罪見誅不及五載國遂亡是自取之也

明氏實錄

按平夏錄記張萬相戕之事未詳草木子尤繆當以明氏實錄爲正

秋廷試進士龐百里等六人及第餘出身有差幼主吟桂花詩賜諸進士曰萬物凋殘我獨芳花心金粟帶微黃莫言些小難堪翫露冷風清大地香

明氏實錄

命丞相戴壽領兵攻烏撒不克而還

明氏實錄

九月己亥夏主明昇遣使來聘

實錄

上因與語使者輒自誇其國險阻富饒 上笑曰蜀人不以修德保民爲本而恃山川之阻誇其富饒豈爲國長久之道耶然自用兵以來商賈路絕民疲財匱乃獨稱富饒豈自天而降耶使者退因語侍臣曰吾平日只要務實不尙浮僞嘗遣使四方戒其謹于言語勿爲誇大恐貽笑于人如蜀使者之繆妄當以爲戒也 實錄

丙午遣參政蔡哲報聘于蜀 實錄

上諭哲曰蜀使者多飾浮詞誇大其國汝無效此彼有所問但以實告之耳 實錄

吳元年 未 開熙元年

三月參政蔡哲歸自蜀 實錄

具言蜀自明玉珍喪後明昇闇弱羣下擅權且挾畫史以  
往圖其所經山川扼塞以獻哲字思賢先仕陳友諒爲御  
史歲壬寅來歸後爲侍御史坐事免尋卒 實錄

十一月乙亥夏主明昇遣使者鄧良叟來聘命良叟從大將  
軍徐達觀所下城邑 實錄

保寧鎮守平章吳友仁叛

友仁移文于郡縣曰昔與先王自沔陽而至重慶共樹奇  
勳開邦啟土今者矯旨殺戮功臣異日我輩亦如此耶遂  
據城謀叛遣使與陝西李思齊張良弼通幼主數調兵誅  
伐皆敗而還

洪武元年戊戌開熙二年

大明皇帝來告即位遣平章鄒敬奉書往賀

四月命丞相戴壽討吳友仁友仁來歸

丞相戴壽總兵八萬往征友仁友仁入城自守謂壽曰不須用兵可遣參政文彥彬來卽降是日遂遣彥彬入城友仁與彥彬約丞相可設策將義子明昭等誅之不然必爲所害壽回奏事因朝會設計擒明昭等盡誅之友仁同彥彬至重慶請罪謝恩

明氏實錄

或作文彥彬

吳友仁以萬勝之戮移檄興兵昇命戴壽討之友仁遺書曰不誅明昭國必不安昭若朝誅吾當夕至壽乃奏誅昭友仁入朝謝恩

平夏錄

十月戊辰朔夏主明昇聞王師克元都遣使來賀十二月壬

辰遣使以書諭之實錄

書曰朕昔以令先公起事老成又能通使修好以安生靈足下以幼冲之年處新造之國朕感念先好安得不爲足下慮哉足下舊臣竭力推誠奉足下甚至然度德量力審機觀變在足下自處何如耳誠能日延羣臣問安靖生靈之道必有能籌善後之策者擇而行之是寶融錢俶見于今日也承平之福當共享之足下其圖之

洪武二年己酉開熙三年

七月丙辰蜀明昇遣使來貢實錄

初我師之西出也不數月關陝悉定蜀人爲之震恐戴壽謂昇曰大明遣將用兵所向無敵以王保保李思齊之強

尙莫能禦況吾蜀乎吳友仁曰蜀地非中原比設有緩急據險可守軍資又充足其若我何爲今之計莫若外加交好以緩敵內修武事以備禦昇從其言復遣修貢

實錄

朝廷遣使入蜀求大木昇亦遣使來貢使還上賜璽書答之曰朕歷觀古之有蜀者如公孫述劉備李特王建孟知祥輩皆能乘機進取而善守之道未聞今足下據此必圖所以善守可也朕連年出師所向皆捷諸將用命故能成功遠勞致禮益見厚意因使者回姑以此復

平夏錄

十月遣湖廣行省平章楊璟招諭明昇

實錄

璟至蜀諭昇以禍福使奉國入覲昇牽於羣議不能決璟還復以書曉之昇不能從

實錄書載璟事略中



十二月戊辰璟自蜀還言昇闈弱將佐皆庸材諭之再四終不悟不如舉兵取之上曰兵貴有名西蜀之地彼亦安能久據俟其悔悟來歸則師可不勞民亦無害姑緩之  
實錄

洪武三年庚戌開熙四年

四月大將軍徐達遣裨將金興旺張龍由鳳翔入連雲棧合兵攻興元興元守將劉思忠知院金慶祥迎降留興旺龍鎮守  
實錄

七月甲辰明昇遣使以香柑木來獻詔賜興與其國相戴壽知院向大亨及來使文綺紗羅有差  
同上

丙辰明昇將吳友仁寇興元守將金興旺擊卻之  
實錄

明日復來攻興旺面中流矢拔矢復戰斬首數百城中兵  
纔三千友仁兵三萬興旺斂兵入城友仁乃圍城決濠填  
塹攻益力興旺嬰城固守大將軍徐達令傅友德領兵三  
千竟趨黑龍江夜襲木櫓關攻斗山砦下令軍中人持十  
炬然于山上友仁軍見列炬大驚乘夜遁去同上

夏守瞿塘將莫平章以兵犯歸州欲報興元之役將陳文  
出兵南門與戰大破之斬首三百擒八十人送楊璟斬之  
鴻猷錄

是年大明遣使假道攻雲南戴壽不奉命秋再遣蔡參政  
招諭兼致禮物不從明夏竟絕和好平夏錄

大明遣使求木植丞相戴壽不與明氏實錄

秋丞相劉禎卒

禎元進士精于易數導夏主修道盡逐胡元以安中夏詔令多所代製人比之孔明云

明氏實錄

洪武四年

辛亥

開熙五年

正月丁亥

上親祀上下神祇告伐明昇命中山侯湯和爲征西將軍江夏侯周德興爲左副將軍德慶侯廖永忠爲右副將軍暨榮陽侯楊璟都督僉事葉昇率京衛荆湘舟師由瞿塘趨重慶潁川侯傅友德爲征虜前將軍濟寧侯顧時爲左副將軍暨都督僉事何文輝等率河南陝西步騎由秦隴趨成都上諭和等今天下大定惟川蜀未平朕以明玉珍嘗遣使修

好閔昇稚弱不忍加兵遣使數加開諭昇乃惑於羣言反犯  
吾與元不可不討行師之際肅士伍嚴紀律以懷降附無肆  
殺掠昔王全斌之事可以爲戒

以後並同

閏三月楊璟師進次夔州大溪口

蜀人自謂瞿塘天險遣平章莫仁壽守之以鐵索橫斷關  
口王師臨境又遣左丞相戴壽平章鄒興副樞飛天張益  
兵爲固守計壽等於鐵索外北倚羊角山南倚南城寨鑿  
兩崖壁引繩爲飛橋三平以木板置礮石木竿鐵銃其上  
旁橋兩岸復置礮以拒我師璟遣指揮韋權出赤甲山以  
逼夔州李某出白鹽山下逼夔府南岸攻南城寨璟與都  
督僉事王簡出大漢口進攻瞿塘扼江之眾璟戰不利赤

甲白鹽之師亦退還歸州 實錄

大明命湯和爲征西將軍廖永忠副之攻夔關戴丞相向知院峽中設大橋備禦船至以木頭撞下輒碎竟不得上屢戰不勝退兵峽外重慶城中每虛驚禁不能止

明氏實錄

四月丙戌傅友德攻階州克之

友德陛辭 上密語之曰蜀人聞吾西伐必悉其精銳東守瞿塘北阻金牛以拒我師若出其不意直擣階文門戶既墮心腹自潰兵貴神速但患不勇耳友德至陝集諸道兵颺言出金牛使人覘知青州果陽空虛階文守備單弱遂引兵趨陳倉選精兵五千爲先鋒攀緣山谷晝夜兼行大軍繼之直抵階州守將平章丁世貞來拒友德擊敗之

生擒其將雙刀王等十八人世貞遁去遂克階州

乙丑友德兵克文州

兵至文州距城三十里蜀人斷白龍江橋以阻我師友德督兵修橋以渡至五里關丁世貞等復集兵據險汪興祖中飛石死友德奮兵急攻破之世貞以數騎遁去癸巳友德兵度青州果陽白水江蜀人望風驚遁友德遣人諭降之遂以兵趨隆州

癸卯克綿州

友德兵徇下江油彰明二縣遂趨綿州別遣藍玉夜襲其壘守將向大亨軍驚擾達旦友德麾兵乘之蜀兵大敗遂克綿州大亨走保漢州五月兵至漢江阻水令軍中造戰

三三  
艦百餘艘已卯進兵漢州欲以軍事達湯和乃以木牌數千書克階文綿州日月投漢江順流而下重慶守者見之爲解體

六月壬午朔拔漢州

夏人聞王師伐蜀丞相戴壽太尉吳友仁等悉眾守瞿塘以扼三峽之險及友德破階文擣江油乃與友仁分瞿塘守兵還援漢州以保成都未至而友德舟師已逼漢州向大亨悉兵戰于城下友德選驍騎擊敗之旣而壽等兵至友德親率師迎擊大破之遂拔漢州壽與大亨留鄒平章守夔關引兵走成都友仁走古城遁還保寧

戊子廖永忠兵至舊夔府辛卯進兵瞿塘關遂入夔州

上聞湯和等住兵大溪口欲俟水平進師賜詔促之永忠聞命卽率所部先進戊子兵至舊夔府平章鄒興副樞飛天張出兵拒戰分前後軍出兩翼旁擊大敗之遂進兵瞿塘關山峻水急蜀人設鐵索飛橋橫據關口乃密遣壯士舁小舟踰山度關以出其上流衣青莎衣出崖石草木閒而率精銳由墨葉渡分二道攻水陸寨舁舟出江者自上流俱發夾擊大破之鄒興中火箭死飛天張及鐵頭張等皆遁去永忠入夔州明日湯和兵亦至率步騎約會于重慶

戊戌僞夏平章丁世貞陷文州指揮僉事朱顯忠死之傅友德兵來援世貞棄城遁去



夏守金州九龍山寨平章俞口赴友德降

己亥廖永忠率舟師抵重慶是日次銅鑼峽夏主明昇遣使詣永忠軍納款

明昇與右丞劉仁等大懼仁勸昇奔成都昇母彭氏泣曰事勢如此縱往成都不過延旦夕命何益仁曰然則奈何彭氏曰大軍入蜀勢如劈竹今城中兵民雖數萬皆膽破心慄若區區拒守死傷必多亦終不免也不如早降以免生靈于鋒鏑昇遂遣使詣永忠軍前納款永忠以湯和軍未至辭不受

六月二十一日夏丞相劉仁挾幼主并皇太后彭氏齎符璽詣軍門降

癸卯中山侯湯和至重慶會德慶侯廖永忠以兵駐朝天門  
是日明昇面縛銜璧與母彭氏及右丞劉仁奉表詣軍門降  
和受璧永忠解縛承制撫慰下令禁侵掠撫慰戴壽向大  
亨等令其子弟持書往成都招之遣指揮高德送昇等降  
表於京師表略曰乾坤正一統知天命之有歸日月仰大  
明撫華夷之無外萬方丕冒四海同歡欽惟 皇帝陛下  
功軼禹湯德侔堯舜運乾坤不息之妙寰宇肅清秉神武  
不殺之權生民永賴收豪傑于紛爭之日施仁義于墊溺  
之時景運維新皇謨丕顯故無征而不克無令而不從臣  
昇僻處偏方懵無學識旣靡寶融先幾之智又乏錢俶達  
事之宜見同井蛙計窮穴兔揣罪實由於已啟費用匪其

人自揆愚蒙冒干天討願閉關之何益遂開門以來降迎拜道旁竊效子嬰之繫頸仰瞻天上敢布孟昶之傾心謹將軍馬錢糧府庫及土地人民以獻

七月庚申傅友德圍成都辛酉夏丞相戴壽等以城降

夏丞相戴壽知院向大亨等以象載甲士逆戰友德命前鋒以弓矢火器衝之象中矢卻走壽兵死者甚眾會湯和遣人報捷壽等亦得其家書遂無鬪志乃籍府庫倉廩遺其子詣軍門納款翌日壽等率其屬降友德按兵入東門得士馬三萬壬戌分兵徇崇慶知州尹善清拒戰擊斬之成都既平分兵徇川蜀之未下者因籍其丁壯置守要害乙丑明昇等至京師及其官屬朝見封爲歸義侯

上聞大軍下蜀命中書集六部太常翰林國學定議受降等禮省部按宋太祖乾德三年蜀主孟昶入宋故事是日

上御奉天門宣令昇等於午門外跪進待罪表宣表訖承制官出傳制昇等皆俯伏待議舍人掖昇起跪聽宣制釋罪昇等五拜三呼萬歲又四拜出文武官行賀禮

曰孟昶專治國政所爲奢縱昇年幼事由臣下宜免其叩頭伏地上表請罪之禮是日昇率官屬朝見制授昇爲歸義侯賜冠帶衣服及居第于京師

八月庚子江夏侯周德興等克保寧執吳友仁送京師蜀地悉平十月上以其寇漢中起兵端致明氏失國命誅之

十一月湯和等師還各上所佩印綬并所得蜀金印冠冕儀仗銀印五十八銅印六百四十總制府七元帥府八宣慰宣撫司二十五州三十七縣六十七官吏將士凡五萬九百九十八人馬騾一萬三千八百餘匹

洪武五年正月歸德侯陳理歸義侯明昇俱徙高麗

已上俱出寶錄平夏錄平蜀記俱同

辛亥七月臺兵攻四川小旻主同其母俱降其後母召入宮以海舟送小旻主德壽陳少主去高麗飄飄然入于海矣

草木子

明昇降封歸義侯彭氏召入宮父子凡十一年而亡後送明昇入高麗今聞有子孫在

月山叢談

大明封幼主爲歸義侯彭后爲皇妃賜甲第以居以劉仁  
爲應天府府尹餘授職有差前後明氏二主幼主年十六  
歲起至正辛丑至洪武辛亥共十一年

史官方孝孺曰幼主雖春秋未富德性純雅通孝經論語  
爲權臣執國命不能宰制所以內相屠戮自翦其羽翼是  
以國內空虛天戈一揮若崩厥角歸於一統固其宜也明氏  
實錄

國初羣雄事略卷五終

國朝通志卷五終

三十一

國初羣雄事略卷六

虞山錢謙益牧齋甫編

東莞伯何眞

眞字邦佐廣東東莞人累官至榮祿大夫江西福建行  
中書省右丞洪武元年四月以廣東降累官湖廣左市  
政使二十年七月封東莞伯賜鐵券食祿一千五百石  
二十一年三月己卯卒年六十七

公世居廣之東莞至公始遷惠州生八歲而孤母夫人守志  
不奪少偉然有志

宋濂撰惠州何氏先祠碑

東莞之員岡人少英偉好書劍至正中仕爲河源務副使  
淡水鹽場管句中原兵起嶺海騷動棄官歸鄉里慨然以



生民爲念

黃佐撰何真傳

嘗爲淡水鹽場管勾後棄官居東莞員頭山

實錄何真本傳

至正閒嶺南盜起焚掠州郡真集義兵保鄉里

實錄本傳

至正中中原兵起廣民王成亦搆亂公爲小官卽請而討之  
先祠碑

至正十五年乙未邑民王成陳仲玉搆亂真請于行省舉  
義兵除之真躬擐甲胄往禽仲玉以歸成築砦自守乃使  
其弟迪驍將黃從簡高彬等頓兵圍之募人能縛成者鈔  
十千未幾成奴縛之以出真釋之引坐笑謂曰公奈何養  
虎遺患成掩面慙謝曰始以爲貓孰知其虎奴求賞真如  
數與之使人具湯鑊烹奴駕轉輪車數人推之使號于眾

曰四境毋如奴縛主以罹此刑也又使數人鳴鉦督奴事  
噓火奴一號則羣應之曰四境有如奴縛主者視此于是  
人服其賞罰有章以爲光武待蒼頭子密不能及也競趨  
歸之行省上其功

黃佐傳

解惠州之困逐叛將黃常復惠州

先祠碑

羣盜攻惠州真率眾走之城賴以完以功授惠州路判官尋  
升同知既而勦滅羣盜升廣東道宣慰司都元帥守惠州

實錄

本傳

居一年惠州人王仲剛與叛將黃常據惠貪暴肆放民不  
堪命眾慕真義迎以守惠遂解惠州之困逐常戮仲剛併  
有惠循二州行省又上其功授惠州判官尋遷惠陽路同

知廣東都元帥 黃佐傳

南海盜邵宗愚陷廣州真與子弟率兵分四路擊之宗愚敗走遂復廣州 實錄本傳

歲癸卯南海三山民邵宗愚陷廣州守將何深死之大肆焚掠真聞之率眾復廣州號令明肅廣人大悅擢廣東行省參知政事其後置江西分省于廣東進江西行中書省左丞階資善大夫分省治廣弟迪以從真功擢中奉大夫廣東道宣慰使都元帥兼僉樞密院事推恩封其二代皆廬江郡公未幾合江西福建爲一省改拜資德大夫江西福建行中書省左丞仍治廣州 黃佐傳 碑同

乙巳九月宗愚挾廉訪副使廣寧等叛圍廣真禦之踰十月

部將與賊通絕糧道真出避城陷丁未五月真率惠州部曲  
至廣民響應復克之宗愚退走誘右丞鐵里迷失以歸黃佐傳  
碑同

戊午制授真榮祿大夫自左丞升右丞黃佐傳

時中原大亂南北阻絕真益練兵據險保障一隅實錄本傳

真保有廣南或陳符瑞勸爲尉佗計者卽逮而僇之以示  
無二心黃佐傳

自左丞升右丞未拜而王師平江西詔至諭公公上廣東  
之籍以降先祠碑

二月壬寅朔命廖永忠爲征南將軍率舟師取廣東

時永忠在福州先遣人以書諭真曰元君失馭天下土崩

豪傑之士乘時而起或假元之號令或自擅其兵威暴征橫斂蠶食一方生民塗炭可謂極矣今天子受天明命肇造區夏惟兩廣僻在遐荒未沾聖化予受命南征順者撫綏逆者誅殛恐足下未悟輒先遣一介之使相告惟足下留意焉遂航海趨廣東

黃佐傳

三月甲戌何真籍所部郡縣戶口兵馬錢糧遣使奉表迎降初湯和等平福建真遣使由海道奉表于元遇和兵遂改其表請降且遣人回報真至是征南將軍廖永忠遣人送其使及表詣京師上賜詔褒之曰自元綱解紐羣雄並爭天下瓜分未見定于一者朕舉兵濠梁創業金陵除殘去暴十有四年邇者遣將四征所向克捷撫有七閩肅清齊

魯廣西之師相繼捷奏大將軍提兵北伐中原指日可定  
朕思昔豪傑之士保境安民以待有德若竇融李勣擁兵  
據險角立於羣雄之間非眞主不屈此漢唐名臣於今未  
見政此興歎爾眞連數郡之眾乃不勞師旅先命來降其  
視竇李奚讓焉今特驛召來庭錫爾名爵以旌有德於呼  
天厥紛紜人思平治爾之所舉實惟知時堅乃初心以懋  
厥績

壬辰師至潮州何眞遣其都事劉克佐詣軍門上其印章并  
所部圖籍四月辛丑朔永忠至廣東之東莞縣何眞帥官屬  
迎見閏七月辛丑眞率其官屬入朝詔授眞江西行省參政  
上諭之曰天下分爭所謂豪傑有二易亂爲治者上也保

民達變識所歸者次也負固偷安流毒生民身死不悔斯  
不足論矣頃者師臨閩越卿卽輸誠來歸不煩一旅之力  
使兵不血刃民庶安堵可謂識時達變者矣真叩頭謝曰  
昔武王伐暴救民諸侯不期而會者八百今主上除亂以  
安天下天命人歸四海景從臣本蠻邦之人邇者逢亂不  
過結聚鄉民爲保生之計實無他志今幸遇大明麗天無  
幽不燭臣愚豈敢上違天命 上曰夫能不賈禍於生靈  
者必世享其澤朕嘉卿忠誠念江西地近廣東是用特授  
爾江西行省參政以表來歸之誠古云令名德之興也卿  
令名已著尙懋修厥德以輔我國家  
真出見永忠仍以榜招降諸寨誅邵宗愚等餘孽悉平詔

至真乘傳入朝貢獻方物賜文綺紗羅綾絹各百匹銀千兩將士各賜有差侍膳內禁賜宴中書初賜詔諭援例各進繳真叩頭乞賜藏于家爲後世子孫榮 上可之授真

中奉大夫江西行省參知政事

實錄本傳

黃佐傳同

真莅官有德有威施政發令風行霆斷人莫敢犯而一主于寬厚尤好儒術平居讀書綴文無虛時 黃佐傳

三年三月召還遷山東行省參政四年命還廣東收集舊將士還京復任山東

五年六月參政何真收集廣東所部舊卒三千五百六十

人發青州衛守禦 實錄

九年致仕朝朔望十三年真請以其子貴參侍東宮卽除貴



北城兵馬指揮十四年命眞及其子貴同往雲南規畫糧餉  
開拓道路置立驛傳積糧草以俟大軍征進及還升山西右  
布政使十六年致仕是年復命眞及貴往廣東收集土豪一  
萬六百二十三人 實錄

六年六月眞還廣州招集舊所部兵士二萬七百七十七  
人并家屬送京師

遷朝拜貴明威將軍鎮南衛指揮僉事眞姪潤弼敬三人皆

拜官軍 今上御名 數十人皆授管軍百戶 實錄本傳

十七年復命眞往廣東收集未至軍士

閏十月致仕布政使何眞復招集廣東舊所部兵三千四  
百二十三人送京師聞多道亡者請追捕之 上曰彼爲

民久矣今復擾之宜其然也亡者勿問

實錄

十八年正月起復山西致仕左布政使何真爲浙江左布政使十九年十二月朝京師調湖廣左布政使二十年復使致仕

八月壬寅封湖廣左布政使致仕何真爲東莞伯

誥曰古云識時務者在乎俊傑曩者元運將終華夷鼎沸擅聲教而役生民朝興暮泯接跡於世終不能知時務而識天道尙驅民以應鋒鏑如此者豈一二人哉爾何真率嶺南諸州壯士保境安民鄰敵不敢窺其際嶺南之民莫不於爾仰賴洪武初朕命將西征所在雖有降者非義旗臨境則未附爾真聞八閩負固桂林驅民海上羣生亦不

量力爾真獨心悅誠服罄嶺南諸州具表入朝非識時務者乎常在朕心未及崇報今特命爾為東莞伯食祿一千五百石使爾祿及世世以報推誠之心尙益加恭慎以保祿位延及永久爾其敬哉

賜鐵券食祿一千五百石賜鈔萬貫仍賜第京師以其第

六子宏為尙寶司丞二十三年三月升尙寶司少卿實錄本傳

二十一年三月己卯真薨四月乙巳朔命其子榮襲父爵實錄

真為人豐偉美鬚髯吐音如鐘少時有相者謂曰公才兼

文武霸王之器惜生南方微帶火色位不過封侯既貴顯

先墓嘗有紫氣人指為符瑞輒斥絕之及事高皇帝夙

夜畏威惟謹高皇帝推心委任勿疑故能以功名終黃佐

傳

榮襲爵誥曰當元之季海內兵爭羣雄割據不可勝數其閒能識時務而審去就者幾人哉爾何榮父東莞伯何真昔能輯眾保有嶺南俟朕平定之秋不勞師旅卽納其土地而全其民人可謂深識時務者矣朕嘉其誠錫之封爵近以高年令終朕念不忘今特命爾榮襲封東莞伯爾其益勵忠實毋墜前業永保祿位以傳後人敬哉

二十五年命榮往陳州潁州二衛簡閱軍馬二十六年二月坐與藍玉謀反伏誅

是年十一月東莞叛寇何迪伏誅迪東莞伯真之弟也真次子宏以罪誅迪自疑禍及遂聚眾作亂南海衛以兵捕

國朝通志卷之四十一  
之迪伏眾阻殺官軍三百餘人遁入海島廣東都指揮使  
司務兵追擊敗之械送京師誅之

何榮招云榮廣東惠州府歸善縣人洪武二十五年九月  
欽差往山西抽丁本家置酒與何貴何宏弟閒話弟何貴  
說大哥想李太師延安侯眾人爲交結胡丞相都結果了  
我每老官人在時也曾去交結如今胡黨不絕只怕不饒  
我這一家兒榮說我心裏也常爲這事煩惱又沒躲避處  
由他看久後何如次日起程前去不期弟何貴在家怕前  
事發露又與龍虎衛指揮法古私通藍玉謀逆伏誅了當  
又招云二十六年二月十八日東平侯韓勳到鎮朔衛在  
榮下處喫酒酒閒密說前日宣寧侯使人來說涼國公收

拾四川人馬與陳義指揮等商議擺布要下京來做一手  
著我這裏聽候接應如今全寧會寧宣寧懷遠等侯劉真  
都督比先都是胡黨已商量接應他你心裏如何榮回說  
我先父亦曾交結胡丞相因見延安侯眾人廢了我與弟  
何貴常常煩惱久後不知何如既官人每都從了時我也  
和你每做酒畢各散在家一向與本官潛謀聽候不期奸  
黨敗露今蒙提問罪犯

何榮弟鎮南衛指揮何貴招云二十六年正月蒙古左衛  
指揮法古對貴說前日茅都督過江潛對法古說涼國公  
見

上只管病纏要謀大事你可收拾聽候你有一千軍在我衛

裏那裏頭目我都引去見了再教我同潘指揮來對你說  
貴說

上位關防大如何下手法古回說

上位只關防得各門上如今我衛裏虎刺指揮常隨涼國公  
出征他是廝殺好漢貴卽聽允次日到涼國公直房拜見  
至晚有本衛百戶朱成到貴家說常教官人來帶刀討分  
曉今早的言語謹慎著

何榮弟尙寶司少卿何宏招云

詳見詹  
徽內

涼國公奸黨敗露

被馬黑黑指出提問罪犯

已上俱逆臣錄

國初羣雄事略卷六終

國初羣雄事略卷七

虞山錢謙益牧齋甫編

周張士誠

士誠泰州白駒場人至正十四年正月僭稱誠王國號大周改元天祐十七年降於元授太尉二十四年自稱吳王二十七年九月被執自縊死年四十又七國亡

至正十三年

癸巳

五月乙未泰州白駒場亭民張士誠及其弟士德士信爲亂陷泰州及興化縣遂陷高郵據之僭國號大周自稱誠王建元天祐

元史順帝紀

按實錄士誠以癸巳正月起事此云五月者紀其陷高郵



之月也實錄士誠建國改元在甲午正月此則先事而書之耳

士誠小字九四泰之白駒場亭民以操舟運鹽爲業少有膂力無賴販鹽諸富家富家多凌侮之或弗酬其直弓兵止義者屢窘辱之士誠不勝憤癸巳正月遂與其弟士義士德士信結壯士李伯昇等十八人殺止義并所讎富家焚其廬舍延燒民居甚眾自度不可已乃入旁近場招集少年謀起兵行至丁谿大姓劉子仁集眾拒之士義中矢死士誠益憤怒欲滅子仁子仁眾潰入海士誠遂乘勝攻秦州有眾萬餘克興化結寨於德勝湖四月元以萬戶告身招之士誠不受命五月攻破高郵入據之

實錄張士誠本傳

張士誠淮南泰州白駒場人泰州地濱海海上鹽場三十有六隸兩淮運鹽使司士誠與弟士義士德士信並駕運鹽綱船兼業私販初無異志至正十一年天下兵起朱定一陳贊五汪宗五作亂江陰泰州人王克柔者家富好施多結游俠將爲不軌高郵知府李齊收捕於獄李華甫與麴張四素感克柔恩謀聚眾劫獄齊以克柔解發揚州後招安華甫爲泰州判四爲千夫長十三年士誠又與華甫同謀起事未幾士誠黨與十有八人共獲華甫遂併其眾焚掠村落驅民爲盜陷通泰高郵自稱誠王改元天祐設官分職把截要衝南北梗塞立淮南行中書省於揚州以扼其勢旣而亦招安之立義兵元帥府以官其黨然狙詐

百出卒不就降 輟耕錄

先是中原上馬賊剽掠淮汴間朝廷不能制張九四爲鹽場綱司牙僧以公鹽夾帶私鹽並緣爲姦利資性輕財好施甚得人心當時鹽丁苦於官役遂推其爲主作亂草木子

十三年張士誠爲亂破泰州河南行省遣高郵知府李齊往招降被拘久之賊酋自相殺始縱齊來歸泰州平賊徒尙蠶聚士誠鼓變殺參知政事趙璉掠官庫民財走入德勝湖俄陷興化縣行省以左丞僕哲篤偕宗王鎮高郵使齊出守暨社湖夏五月乙未數賊入城一譟呼官省憲官皆遁齊急還救城賊已閉門拒我遂連興化接德勝湖舟艦四塞蔓延入寶應縣已而有詔凡叛逆者赦之詔至高

郵不得入賊給曰請李知府來乃受命行省強齊往至則下齊獄中士誠本無降意特遷延爲繕飾計耳官軍謀知之乃進攻城士誠呼齊使跪齊叱曰吾膝如鐵豈肯爲賊屈士誠怒扼之跪齊立而詬之乃拽倒搥碎其膝而副之

元史忠義傳

河南兵起兩淮騷動乃析河南地立淮南江北行省於揚州以璉參知政事會張士誠爲亂突起海濱陷泰州興化行省遣兵討之不克乃命高郵知府李齊往招諭之士誠因請降行省授以民職且乞從征討以自效遂移璉鎮泰州璉乃趣士誠治划船趨濠泗士誠疑憚不肯發又覘知璉無備遂復反夜四鼓縱火登城璉力疾捫佩刀上馬與

賊鬪市衢賊圍璉邀至其船璉馳騎奮擊賊以槩撞璉墜地欲昇登其舟璉瞋目大罵遂死之 同上

泰州李二起行省移納速刺丁捍高郵德勝湖焚賊船二十餘柁李二失援遂降其黨張士誠殺李二復爲亂戕參政趙璉入據興化而水陸襲高郵屯兵東門納速刺丁以舟師會諸軍討之距三塚鎮發火箭火鏃射之死者蔽流而下賊繚船於背盡力來攻而阿速衛軍及真滌萬戶府等官皆遁走納速刺丁與其三子皆死之 同上

詔使往高郵不得達而還謬稱賊已迎拜但乞名爵耳行省不虞其欺遣本省照磨盛昭入高郵授所與士誠官士誠拒不聽拘諸舟中旣而官軍逼高郵士誠授昭以兵使

出拒官軍昭叱之大罵不絕口賊怒先剗其臂肉而後磔  
之同上

泰州鹽綱張士誠兄弟據高郵泰州及三十六鹽場俞本  
記事

癸巳正月張士誠起自泰州劉子仁兵潰其勢始振從者  
萬餘人三月攻陷泰州淮南行省告變元以萬戶告身招  
之不受五月復陷泰州及興化縣遂據高郵平吳錄

按癸巳正月士誠起事既陷泰州行省遣兵討之不克乃  
遣高郵知府李齊諭降降而復叛再陷泰州殺趙璉遂破  
興化據高郵殺李齊及盛昭平吳錄於三月書元以萬戶  
告身招之不聽又於五月書行省再遣李齊諭之不聽則

以一事爲二事矣又盛昭之死當在李齊之後元史忠義傳甚明平吳錄相傳出於吳文定公雜據元史實錄而歲月先後錯互不一今悉正之

六月命前河西廉訪副使也先不花爲淮西添設宣慰副使討秦州詔淮南行省平章政事福壽討興化

元史

至正十四年

甲午周天祐元年

甲午春正月甲子朔張士誠國號大周自稱誠王改元天祐實錄 平吳錄同

二月以湖廣行省平章政事苟兒爲淮南行省平章政事以兵攻高郵

元史

石普者徐州人也以樞密院都事從樞密院官守淮安時

張士誠據高郵普詣丞相脫脫面陳破敵之策且曰高郵負重湖之險騎兵卒莫能前與普步兵三萬保取之高郵既平則濠泗易破丞相壯之命權山東義兵萬戶府事招義民萬人以行汝中柏陰沮之滅其軍半又使聽淮南行省節制普行次范水砦日未夕令軍日具食夜漏三刻銜枚趨寶應其營中更鼓如平時抵縣卽登城樹幟賊大驚潰乘勝拔十餘砦將抵高郵分兵三道普自將攻北門賊敗遁入城普先士卒躡之縱火焚關門賊懼謀棄城走而援軍望之按不進且忌普成功總兵者遣蒙古軍千騎突出普軍前欲收先入之功而賊以死捍蒙古軍卽馳回普止之不可遂爲賊所蹂踐率墜水中普軍亂勒餘兵血戰



良久仗劍入呼直入賊陳中從者僅三十人日酉援絕墮  
馬步戰頭目左脅爲鎗所中猶手握其鎗斫賊與從者皆  
力戰死之

元史忠義傳

六月辛卯朔張士誠寇揚州丙申達識帖睦迺以兵討張士  
誠敗績諸軍皆潰詔江浙行省參知政事佛家閻會達識帖  
睦迺復進兵討之

元史

元史於此下記己酉盱眙縣陷庚戌陷泗州官軍潰平吳  
錄諸書皆牽連書之不知士誠兵力僅能出沒高郵揚州  
旋爲脫脫圍困僅而得免豈能遽及盱泗者蓋濠泗之兵  
非高郵也當時高郵濠泗兵勢頗相因依故石普告脫脫  
曰高郵旣平則濠泗易破脫脫旣圍高郵卽分兵西平六

合蓋爲此也詳在龍鳳事略中

九月辛酉詔脫脫以太師中書右丞相總制諸王各愛馬諸省各翼軍馬董督總兵領兵大小官出征高郵十一月丁卯脫脫領大兵至高郵辛未戰於高郵城外大敗賊眾乙酉遣兵平六合縣十二月丁酉詔以脫脫老師費財已逾三月坐視寇盜恬不爲意削脫脫官爵安置淮安路

元史

張士誠據高郵屢招諭之不降詔脫脫總制諸王諸省軍討之黜陟予奪一切庶政悉聽便宜行事省臺院部諸司聽選官屬從行稟受節制西域西番皆發兵來助旌旗累千里金鼓震野出師之盛未有過之者十一月至高郵辛未至乙酉連戰皆捷分遣兵平六合賊勢大蹙俄有詔罪

其老師費財以河南行省左丞相太不花中書平章政事  
月濶察兒知樞密院事雪雪代將其兵削其官爵安置淮  
安

元史脫脫傳

元貶脫脫詔畧曰答刺罕太師中書右丞相脫脫往年徂  
征徐土僅復一城不日而旋失茲者薦總大兵再期埽蕩  
老師費財已逾三月徒懷眷戀之思曾無尺寸之效坐視  
寇玩日減精銳虛費國家之錢糧誑誘朝廷之名爵皇子  
愛猷識里答刺俯從大宥可削去兵柄安置淮安路弟御  
史大夫也先帖木兒安置寧夏路脫脫有意外旅拒等事  
各以大義效忠從事宜讀畢脫脫匹馬北歸將士潰亂元  
兵不復振矣

俞本記事錄

十二月辛亥詔至軍中參議龔伯遂曰丞相出師時嘗被  
密旨今奉密旨一意進討可也詔書且勿開開則大事去  
矣脫脫弗從同上

脫脫總天下兵圍高郵日事攻擊矢石雨注城中幾不支  
日議降附又恐罪在不赦圍者亦指日成功忽有詔旨來  
卸軍軍中間之皆大哭當詔未開讀時龔伯遂勸奉密旨  
詔書且勿聽脫脫搖首曰不可遂受詔大軍百萬一時四  
散先是諸大臣子弟從行者哈麻歷告其家陰遣人來軍  
中曰詔書且至不卽散者當族誅故散之之遽如此其散  
而無所之者多從紅軍如鐵甲一軍入襄陽號鐵甲兵者  
是也是時高郵危困已甚脫脫分兵定眞州平六合將攻

國朝通志卷四十一  
濠徐遠近凜然國勢漸張而哈麻歷奸邪誤國遂至危亡  
不救可勝惜哉 庚申外史

脫脫師號百萬聲勢甚盛及抵城下毛葫蘆軍已有登其  
城者忌功者曰不得總兵官命如何輒自先登乃召還及  
再攻之不下未幾下詔貶脫脫師遂潰叛 草木子

詔未下時部將董搏霄對脫脫言天兵南下勢如破竹今  
老師費財何面目歸報天子不若先攻其易脫脫從其言  
分兵攻天長六合賊皆潰敗所殺者悉良民及攻高郵墮  
其外城城中震恐自分亡在旦夕忽聞詔解其權勇氣百  
倍出城拒敵諸衛鐵甲軍抱不平者盡皆散去或相聚山  
林爲盜高郵不可得而復矣 輟耕錄

脫脫兵攻高郵未下元主以讒解其兵柄士誠乘隙出兵奮擊元兵大敗

實錄本傳

士誠乘間與李伯昇等十八人潰圍突出走海上其下稍赴之

月山叢談

實錄潘原明本傳云士誠與李伯昇潘元明呂珍等十八人突圍北走按脫脫解兵之日開門縱擊元兵已星散矣何爲又出走海上哉

是年五月攻破揚州路士義被獲伏誅旣而退還高郵九月二十五日又攻破揚州適湖廣行省右丞阿魯恢引苗軍來十月初一日復退

輟耕錄

至正十五年

乙未

天祐二年

四月詔翰林待制烏馬兒集賢待制孫撝招安張士誠仍齎  
宣命印信牌面與鎮南王孛羅不花及淮南行省廉訪司等  
官商議給付之

元史

張士誠據高郵或謂其有降意朝廷擇烏馬兒爲使招諭  
士誠而用撝爲輔行撝家居不知也中書借撝集賢待制  
給驛就其家起之撝強行抵高郵士誠不迓詔使撝等旣  
入城反覆開諭士誠拘之他室或日一饋食或閒日一饋  
食欲以降撝撝唯詆斥而已乃令其黨捶撝肆其凌辱撝  
不卹也及士誠徙平江撝與士誠部將張茂先謀將撝所  
授站馬劄子遣壯士浦四許成赴鎮南王府約日進兵復  
高郵謀泄執撝訊問撝罵聲不絕竟爲所害後賊中見失

節者輒自相嗤曰此豈孫待制耶 元史忠義傳

實錄紀搆與烏馬兒招諭在癸巳四月誤也平吳錄亦誤  
五月命淮南行省平章政事咬住淮東廉訪使王也先迭兒  
撫諭高郵 元史

乙未淮東饑士誠留兵守高郵由通州渡江入福山港陷常  
熟縣 實錄本傳

江陰羣寇互相吞啖江宗三朱英分黨戕殺宗三將入城  
殺英時英就招安爲判官州之僚佐無如之何遂申白江  
浙行省云朱英謀反省差元帥觀孫壓境觀孫利其貨賄  
逗遛不進英因乘間挈家逃去過江求救於士誠仍質妻  
子借兵復仇士誠初亦疑惑弗聽英盛陳江南土地之廣



錢糧之多子女玉帛之富於是遣士德率高郵賊眾擊橫  
埧渡銷山 輟耕錄

江陰石牌民朱定者販鹽無賴武斷鄉曲與石橋富民趙  
氏有隙集眾相攻擊定乃降元授江陰判官尋復為盜元  
遣江浙參政納麟哈刺討之定窮蹙乃遣人導士誠兵由  
通州渡江入常熟陷平江士誠署定為參政遣元帥欒瑞  
為戍石牌 實錄

至正十六年 丙申 天祐三年

正月壬午朔張士德取常熟州 秘閣元龜政要

高郵兵由通州渡江入福山港時福山有曹氏富甲州中  
眾肆搶掠一夕而空 平吳錄

二月高郵張士誠陷平江路據之改平江路爲隆平府遂陷

湖州松江常州

元史

江南自兵興以來官軍死鋒鏑鄉村農夫薦罹饑饉投充壯丁生不習兵烏合瓦解江浙行省丞相達識帖木兒有旨得便宜行事升漕運萬戶脫因爲參政統領官軍民義捍禦境上平江達魯花赤六十病亡升松江府達魯花赤哈散沙爲平江達魯花赤領兵出戰除都水庸田使貢師泰爲平江總管巡守城池吳江境上止有元帥王與敬官軍一戰而殺死者過半殘兵千餘欲走入城城中閉門不納退屯嘉興旋抵松江士德眾纔三四千人長驅而前直造北門弓不發矢劍不接刃明日緣城而上遂據有平江

路二月壬子朔也劫掠姦殺慘不忍言脫因匿俞家園自  
刎不死游兵殺之哈散沙在境外聞城破自溺死旣而崑  
山嘉定崇明州人相繼來降維揚蘇昌齡避亂居吳門士  
德用爲參謀稱曰蘇學士毀承天寺佛像爲王宮易平江  
路爲隆平郡上省院六部百司凡有寺觀庵院豪門巨室  
將士分奪爭占而居了無虛者幾月

輟耕錄

兵入婁齊二門鎮將脫寅率兵禦之郡人楊椿力戰而死  
脫寅畏賊避匿於婁門十八營叢篠中爲亂兵所殺當是  
時吳中全盛甲仗錢穀如山守臣貢師泰輩棄之相率遁  
去士德旣入郡城卽承天寺爲府推其佛像據坐大殿復  
射三矢於棟上

平吳錄

平江缺守師泰以選爲平江路總管其年冬甫視事張士誠自高郵率眾渡江明年春守將斬關遁去師泰領義兵出戰力不敵亦懷印綬棄城遁匿海濱者久之

元史貢師泰傳

密聞貢平江詭姓張平軒遁海上

梧溪集

易姓名瑞禾氏隱居雲間

樂郊私語

至正十六年春正月辛亥晦義軍府參謀楊椿與守齊門淮兵奄至眾皆不知所爲獨謂寇不足畏明日城且陷猶躍馬呼其子若有所指授追者及之遂併遇害鉞交於胸終無少屈椿故吳下授徒屢應鄉試其舉將固所假館感知己而強起區區就小職乃自振拔如此

張又蔚楊參謀誄

士誠入姑蘇守將脫寅不能禦其參謀楊椿獨挺身前向

誓挫其鋒盜刃其胸瞋目怒罵而死明日其妻覓得其尸於張香橋亦自經死椿字子秀蜀之眉山人徙居吳中吳家藏集

君入幕之明日外兵即附城君戎衣率其卒晝夜獨守一

隅比明兵奪門入君猶持弓矢督戰遂死城下其一子年

十六亦死徐顯集傳

淮張入吳嘉定州倅奉印降州吏尤鼎臣沮之為其將繫

且諭以官抗不受杖百錮於家梧溪集

達識帖睦邇以苗師楊完者守嘉興王與敬以松江叛附於

周張士德取常州湖州秘閣元龜政要

淮人陷平江嘉興為藩鎮喉舌有司告援急若星火驛使

交道中不絕塔矢帖木兒兵少策無所出以完者來守之  
完者取道自杭以兵劫丞相升本省參知政事填募民入  
粟空名告身子之卽拜添設左丞

輟耕錄

進攻嘉興全軍刊沒

輟耕錄

楊完哲保嘉興丙申二月夜淮寇攻北門楊自暗中獨乘  
一騎突賊陣後奮擊出其不意左右繼至生擒其首其徒  
溺死者無算儒士董性存撰碑述其事

農田餘話

丞相與王與敬攝元帥事守松江與敬據郡應平江士德  
旣得松江仍以與敬統兵鎮守自引兵還居隆平

秘閣元  
龜政要

王與敬淮西人以軍功得官至元帥丙申春淮寇渡江以  
所部繫於常熟兵潰欲退保姑蘇參政脫因閉城不納乃

抵嘉興楊參政完哲欲殺之遂屯兵松江謀結水寨於澱山諸湖令上戶供給其軍爲自保之計楊參政遣裨將鐵木鍊怒陰圖之王知其謀其屬官戴萬戶嗾其異圖乃焚劫松江以叛時二月十九日也鐵木及守令以下皆遁數日完哲裨將蕭諒襲擊之奪其婦女數百人與敬敗走由上海投淮張僞命爲威虜將軍偕僞元帥史文炳復陷松江次年淮張納款除同僉書行樞密院事初淮寇入姑蘇丞相命楊完哲以苗獠由嘉禾方谷真以海舟由太倉水陸並進爲恢復計值與敬叛其事遂沮

農田餘話

誠王張士誠紅軍破平江與敬兵敗徑趨嘉興又與苗軍參政楊完哲不協乃投松江名曰守城實欲戀倡婦董賽

兒也達魯花赤八都帖木兒知府崔思誠皆與不協越二日浙省又命元帥帖古列思等提兵鎮守二帥抗衡不相下十八日夜與敬下萬戶戴列孫等自西門放火鼓譟而叛官僚潰散檢括金帛自與敬以下人口輜重皆出西門二十四日完哲下元帥蕭亮員成等率苗軍突至兵不與敵遂北出通波塘而去投降士誠子女玉帛悉爲苗軍所劫民亦持挺相逐列孫孔鎮撫等死者過半苗有松江一月火不絕截人耳鼻掠婦女劫貨財官庾粟四十萬悉籍爲己有局民兩遭鋒鏑死者填街塞巷水爲不流四月初十日士誠下元帥史文炳一部自湖泖入古浦塘破澱湖柵船艦相銜旌旗蔽日苗軍一矢不交夜遁而去

輟耕錄



常州豪俠黃貴甫閒道歸款許爲內應不戰而城破易爲

毘陵郡 同上

士德之圍常州也萬戶府知事劉良以援兵不至命其子

毅齋蠟書浮江閒道抵江浙行省求救毅未及還而城陷

良獨不屈闔門赴水死者十餘人劉辰良之從子也 秘閣元龜

政要

分兵入湖州一鼓而得易爲吳興郡 輟耕錄

四月壬子張士誠將趙打虎陷湖州 實錄

以周仁爲隆平府太守

仁家本鍛工稍習吏事性資深刻與士德同心戮力躬親

細故 輟耕錄

周鐵星刺歛臣周倌也張氏亡國亡於其弟士信趣亡於  
毒歛臣周倌倌山陽鐵冶子以聚歛功至上卿伏誅曰曰  
錢穀鹽鐵籍皆在我汝國欲富當勿殺我主者怒曰亡國  
賊不知死罪對我敢言是耶速殺之吳人快之或手額謝  
天曰今日天開眼也周鐵星國上卿談申韓爲法經釘筆  
杖爲國刑千倉萬庫內外盈十有三賦爭科名周鐵星鞭  
算箕歛無時停開血河築血城血戰艦血軍營刮民膏啣  
民髓六郡赤骨填芻靈齊雲倚天一日傾鐵星亡國法當  
烹尙持六郡金谷數丐死萬一充虞衡烏乎周鐵星十抽  
一雄百萬釘誓劔爾體作湯罍鐵星碎地啟曠天開顛楊  
頑詠史樂府

三月癸巳張士誠自高郵來隆平宮於承天寺萬歲閣改至  
正十六年爲天祐三年國號大周歷曰明時以李行素爲丞  
相弟士德爲平章蔣輝潘原明爲左右丞史文炳同知樞密  
院事 秘閣元龜政要

士誠來自高郵服御器用皆假乘輿設學士員開弘文館  
以陰陽術人李行素爲丞相弟士德爲平章提調各郡軍  
馬蔣輝爲右丞居內省理庶務潘元明爲左丞鎮吳興史  
文炳爲樞密院同知鎮松江 輟耕錄

平江承天寺初蓄大木將造千佛閣會浙省災責有司籍  
所在木植寺僧於閣木上皆鑿萬歲閣三字於是有司不  
敢取及閣成其字固在當承天重修時悅楚南來住持或

請題梁悅曰當有俗人來暫居後張士誠由淮渡浙據以爲宮盡撤殿上像設坐於其中且以僧原鑿字名其閣旣投降作太尉別造府越四五年復爲寺輟耕錄  
郡州縣正官郡稱太守州稱通守縣仍曰尹郡同知稱府丞知事曰從事餘則損益而已

至正丙申春江西等處行中書省平章政事楚國公渡江來念吳民多艱牧字者多非才悉選而更張之自令丞簿尉以及錄事錄判同日命十有一人各賜衣二襲馬一匹粟若干石肥瘠旨酒有差而丹陽張君德常爲吳縣丞三年考績陟縣尹又明年調同知嘉定州事壬寅秋調松江府判官

楊基送張府判詩序 德常明經

初立鎮海萬戶於太倉 平吳錄

六月甲寅江浙行省平章政事三旦入參知政事楊完者以兵守嘉興路禦張士誠 元史

南向欲取嘉興嘉興則有參政楊完者統領苗獠猺獠名曰答刺罕守禦甚堅屢攻不克

壬申降人陳保二叛降於張士誠誘執詹李二將 實錄

保二常州奔牛壩人初聚眾以黃帕首號黃包頭軍湯和等下鎮江徇奔牛呂城保二以眾降至是復叛 實錄

太祖差人往揚州招到青軍元帥單居仁馬某等過江居仁男單大舍糾同呂城黃包頭元帥陳保二執頭目叛降張士誠李文忠哨杭州獲陳保二太祖殺之克蘇州生擒

單大舍付居仁自處之居仁曰不忠不孝當碎其肉縛於市曹凌遲處死

國初事蹟

乙亥遺儒士楊憲通好於張士誠

實錄

書曰近聞足下兵由通州遂有吳郡昔隗囂據天水以稱雄今足下據姑蘇以自王吾深爲足下喜吾與足下東西境也睦鄰守國保境息民古人所貴吾甚慕焉自今以後通使往來毋惑於交搆之言以生邊釁士誠得書不悅拘

留憲不遣

實錄

七月張士誠遣兵陷杭州江浙行省平章政事左答納失里戰死丞相達識帖睦迺楊完者及萬戶普賢奴擊敗之復其城

元史

七月逼杭州達識帖睦邇卽棄城遁於富陽萬戶普賢奴力拒之而楊完者亦引兵至敗走張士誠達識帖睦邇乃還初達識帖睦邇以完者爲海北宣慰使都元帥尋升江浙行省參政至是遂升右丞苗軍素無紀律肆爲抄掠所過蕩然無遺達識帖睦邇方倚完者以爲重故完者驕矜日肆而不可制

元史達識帖睦邇傳

五月聲言張兵南下楊參政以數萬眾屯嘉興先鋒呂才以七千眾屯王江涇商旅不行軍容嚴肅張兵遂不敢取道嘉興乃自平望烏墩直擣武林達丞相恃楊漫不爲備僅以身免楊聞之跌足卽統苗土官軍分爲三路蔣英從大麻唐栖董旺從硤石長安身率劉震朱鉞從海鹽黃灣

而進呂才呂昇屯守嘉興張軍知楊分路而來遂應接不暇一敗於皋亭山再敗於謝村三戰敗於夾城港水從德清陸從海鹽遁還初楊過海上余勸其留兵三千遏其歸路楊云此行賊且成擒安得有歸者已而竟得逸去

樂郊私語

七月淮張弟士德據杭州眾號十萬完哲自嘉興赴援力戰士德幾不免由他道而遁省治以安楊去嘉興日告諸將曰我天賊必來比三日果至諸帥合擊敗之

農田餘話

八月士德與王與敬提兵入杭州大軍歛鋒不敵丞相退避蕭山士德軍檢括虜掠羅木營萬戶普賢奴及慶元路萬戶全駒兒之子年未弱冠智勇過人率兵先出完者都領苗軍繼民亦挺身巷戰士德軍大潰收拾殘兵十喪八九



及攻海鹽又爲乍浦鍾氏所撓後得馬道饒勇擒獲苗軍  
無算西南接境賴此無虞不然松江非士誠有矣

輟耕錄

平江兵入杭苗將吳大旺完者自嘉興來駐軍城東菜市  
橋外未卽進兵民自爲戰勝

同上

辛巳張士誠誘我斥候以舟師攻鎮江徐達等禦之敗其師  
於龍潭進攻常州擒其將張湯二將軍

張士誠遣兵來圍鎮江城官軍與倉夫出城擊敗之登  
船退去 太祖親率戰船繼至直追至黃石永沙不及而  
回郡人敘 太祖功蹟立碑於西城末寫龍鳳年號後

太祖命毀之

國初事蹟

張士誠部將呂同僉率兵侵鎮江哨至瓜埠 上親領舟

師迨至江陰大獲士卒船隻以歸俞本記事錄

秋攻常州擒張士誠梟將士誠恐怖致具儀物 太祖命

中山王暹之天潢玉牒

秋七月姑蘇張士誠以舟師來攻鎮江 上遣兵禦之癸

巳戰於龍潭焚其舟殺溺甚眾我師遂乘勝進攻常州徐

達等守東鄙 上謂之曰士誠起於鹽徒詐出多端交必

有變當速出三軍以攻毘陵儻有說客勿令擅言沮其詐

說困其營壘於是達等益督兵攻圍常州皇明本紀

諸書載禽張士德事附見

張士誠擅稱名號遣使已據毘陵旌旗相望其守者潛遣

閒諜誘我斥候王察知遣使歸告請勒兵以討朕許之王

將三萬人逼近其壘復遣使歸告賊勢少窘益兵可下朕遣戰將千餘員甲士三萬師會合圍毘陵士誠自姑蘇發其弟張九六將兵數萬來援王遣兵逆戰不移時破之生擒張九六

太祖高皇帝御製中山武寧王神道碑

達帥師圍常州進薄其壘且遣使來告言賊已蹙請益師上復遣三萬往於是達軍城西北湯和軍城北張彪軍城東南士誠遣其弟九六以數萬眾來援達曰張九六狡而善鬪使其勝勢不可當當以計取之乃去城十八里設伏以待仍命總管王均用率鐵騎爲奇兵達親督師與九六戰鋒旣交均用鐵騎橫衝其陣陣亂九六退走遇伏馬蹶爲先鋒刁國寶王虎子所獲并擒其將張湯二將軍九

六卽士德梟驚有謀士誠陷諸郡士德力爲多旣被擒士誠氣沮 上欲留士德以致士誠士德聞遣書士誠俾降元以謀我乃誅之 實錄

太祖命徐達攻常州於甘露寺下營士誠弟士德來戰達調元師王玉等擊敗士德士德策馬走玉令男虎子追之士德遇坎墜馬虎子擒之 太祖大喜曰張士誠謀主士德其人智勇被我擒之張氏之事可知矣遣人往平江和好士德母痛之議令士誠歲貢糧十萬石布一萬匹永爲盟信就以廖同僉易士德 太祖不許士德以爲失身事無所成陰寄書與兄可降元朝以爲之助遂不食而死 國事蹟

是月張士誠徵元江浙行省左右司員外郎楊乘乘自經死  
乘字文戴杭州陷寓居松江之青龍鎮七月十八日淮張  
遣所署官吳縣丞張經等齎禮幣造請公請擇日受命以  
禮幣致門外令子卣卓具牲醴告祖禰迨暮起行後圃顧  
西日晴好慨然曰晚節如是足矣夜分自經死輟耕錄

依故人彰德路同知章德居上海其卒也章殯之

梧溪集

士誠居吳頗好士元臣郭良弼董綬皆爲之用二人皆乘  
之徒也故言乘於士誠

平吳錄 元史忠義傳

八月己酉朔張士誠元帥江通海來降

實錄

史文炳率師攻嘉興楊完者擊敗之

秘閣元龜政要

文炳大舉兵攻嘉興東門悉爲苗軍所殲文炳僅以身免

戰耕錄

八月張氏以水師數萬攻嘉興楊完者以大軍四伏使小舟數十百艘餌之敵檣艣蔽天排川而下追至杉青東西岸多積葦以待南風大作岸上舉火敵舟焚燎至四十里不止死者甚眾遂舍舟登陸進逼城下戰於東瓜堰大破之斬首萬七千級俘者數千張士信以伏水遁還然完者凶肆掠人貨錢婦女部曲驕橫民間謠曰死不怨秦州張生不謝寶慶楊

樂郊私語

十月戊申張士誠遣其下孫居壽奉書來請和

我師攻城急士誠遺書卑詞求和願歲輸米二十萬石金五百兩銀三百斤以充軍用

皇明本紀

士誠兵旣敗於常州又以其弟九六被擒奉書來曰始者  
竊伏淮東甘分草野緣元政日弛民心思亂乘時舉兵起  
自泰州遂取高郵東連海澳番官將帥併力見攻自取遣  
散殺其平章實理門參政趙伯器遂成深讐波乃遣翰  
待制烏馬兒齎詔諭撫餌以爵賞卻而不受春據姑蘇  
若無名號何以服眾南面稱孤勢使然也伏惟上賢以  
武之資起兵淮右跨有江東金陵乃帝王之都用武之國  
可爲左右建立大業之賀向獲詹李二將禮遇未遣繼蒙  
遣使通好愚昧不明久稽行李今又蒙遣兵逼我書  
夜相攻咎實自貽夫復何說然省已改過與  
困阨歲輸糧二十萬石黃金五百兩白金三百斤以爲犒

軍之資各守封疆不勝感恩 上復書曰睦鄰通好有邦  
之常開釁召兵實由於爾向者用師京口靖安疆場師至  
奔牛呂城陳保二望風降附爾乃誘其叛逆給執我詹李  
二將繼遣儒生楊憲齋書通好又復拘留構兵開釁誰執  
其咎我是以遣將帥兵攻圍常州生擒張湯二將尙以禮  
待未忍加誅爾旣知過能不墮前好歸我使臣將校仍餽  
糧五十萬石卽當班師况爾所獲詹李乃吾偏裨小校無  
益成敗張湯二將爾左右手也爾宜三思大丈夫舉事當  
赤心相示浮言誇辭吾甚厭之士誠得書不報

十一月徐達大破士誠兵於常州擒其將張德

七月破僞吳張士誠水寨九月復從忠武王攻毘陵會清



軍叛與士誠合圍魏公於牛塘王與公大敗其眾擒其梟  
將張將軍

宋濂奉敕撰梁國公趙德勝神道碑

壬午徐達圍常州久不下 上復益精兵二萬人圍之士

誠守將誘我長興新附義兵元帥鄭僉院以兵七千叛去  
初我師四面圍常州及鄭僉院叛我兵四面去其三達營  
於城南遇春營城東南三十里外士誠兵挾鄭僉院攻徐  
達湯和壘達勒兵與戰常遇春廖永安胡大海自其壘來  
援內外夾擊大破之生擒其將張德餘軍奔入城士誠復  
遣其將呂珍馳入常州督兵拒守達復進師圍之城益困  
實錄

城守猶堅朕復益新附二萬合勢共圍守者誘我新附帥

首傾營入城助彼來戰 中山王神道碑

是年夏潘元明將兵過吳江華嚴寺夜漏下二刻月中見

浮圖上矢影取弓矢一發正中其巔舉軍皆賀 陳基丙申六月書

望亭新城二堡丙申冬張氏築玉逢詩云憶昔扁舟自西

下二堡相繼無一舍 格溪集

丙申春張氏據有平江俞俊以賄通松江偽尹鄭煥署宰  
華亭用酷刑朘剝邑民恨入骨髓 輟耕錄

至正十七年 丁酉 天祐四年

二月戊申耿炳文克長興

耿炳文劉成自廣德取長興士誠將趙打虎以兵三千迎

國刀書佳身各卷七

三三 適園叢書

戰敗之追至城西門打虎走湖州戊申克長興擒其守將  
李福安荅失蠻等義兵萬戶蔣毅率所部降

實錄

三月壬午克常州

常州兵雖少而糧足及叛兵入城軍多糧少我師攻益急  
呂珍宵遁遂取之

實錄

是月徐達等取馬馱沙克之

三月初四日達克常州生擒張鮑二將檻車送應天府

上以善言撫之不屈拘於東錦繡坊數日斬於市據實錄

禽張湯二將在丙申七月

俞本記事錄

五月乙亥朔耿炳文敗張士誠兵於長興

士誠遣左丞潘原明元帥嚴再興寇長興屯上新橋炳文

擊敗之生擒數百人原明等遁去

實錄

己亥克泰興

江淮分樞密院副使張鑑僉院何文政攻泰興士誠兵來  
救元帥徐大興張斌擊敗之擒其將楊文德等遂克泰興

實錄

樞密院判官通海趙馘以舟師略太湖馬蹟山降士誠將鈕  
津等遂徑東洞庭山

六月己未取江陰

長春樞密分院判官趙繼祖元帥郭天祿鎮撫吳良取江  
陰士誠兵據秦望山我師攻之大風雨夜潰遂據其山翌  
日攻克命良守之先是士誠北有淮海南有浙西長興江

陰二邑皆其要害長興據太湖口陸走廣德諸郡江陰枕  
大江扼姑蘇通州濟渡之處得長興則士誠步騎不敢出  
廣德窺宣歙得江陰則士誠舟師不敢泝大江上金焦至  
是並爲我有士誠侵軼路絕實錄

秋七月甲戌朔丙子攻常熟擒張士誠之弟士德

夏六月戊辰取江陰秋七月丙子攻常熟張士德出挑戰  
公麾兵而進士德就縛士德士誠之弟也遂征甘露望亭  
無錫諸寨宋濂趙德勝神道碑

六月取江陰州攻常熟擒張士誠弟士德以歸天潢玉牒

明年復破其兵於宜興湖橋擒其弟張九六並獲其戰船

馬匹皇明本紀

七月丁丑徐達兵徇宜興取常熟擊張士誠兵敗之獲馬  
五十匹船三十艘降其兵甚眾

實錄

陳基癸卯二月二十日舟中望虞山有感詩云一望虞山  
一悵然楚公會此將樓船閒關百戰捐軀地慷慨孤忠罵  
寇年填海欲銜精衛石驅狼願假祖龍鞭至今父老猶垂  
淚花落春城泣杜鵑

右陳基敬初夷白集詩也基臨海人至正初以薦授經筵  
檢討謝歸教授吳中張士德入吳網羅一時名士延至幕  
下仕偽吳爲學士入國朝預修元史集中所稱楚公及平  
章榮祿公者皆謂士德也平章榮祿者士德降元所授曰  
楚國公者元追封也按洪武實錄士德以丙申二月據平

江秋七月援毘陵中山武寧王設伏擒之我 太祖高皇  
帝御製武寧神道碑亦首載其事今基舟中望虞山之詩  
則以爲楚公身將樓船百戰捐軀之地此所謂傳聞異辭  
矣基身在士德幕中是詩作於癸卯二月渡江使淮之日  
不當爲無稽之言而豐碑國史簡冊昭然又豈宜有錯誤  
哉今年採輯開國功臣事略於宋文憲鑿坡後集得梁國  
趙武桓公神道碑云丁酉六月戊辰取江陰秋七月丙子  
攻常熟張士德出挑戰公麾兵而進士德就縛士德士誠  
之弟也遂征望亭無錫甘露諸寨以武桓之碑觀之則基  
之詩爲有徵矣文憲身任國史奉詔撰此碑必經呈進士  
德之就擒開國之大事也安得無所援據而輕以武寧之

功狀移於武桓碑於士德就縛之下又曰士德士誠之弟也其屬辭鄭重似有意欲疏通證明之者余因是而詳複考之則實錄之誤誠不可得而掩矣實錄七月擒張九六十月士誠以其弟被擒遣孫君壽請和願歲輸糧二十萬石黃金五百兩白金三百斤劉辰國初事蹟以謂士德母痛其子故也然士誠既已失弟而聳懼其母又以痛子而請和士誠之遺書何以不置喙高皇帝之復書則曰攻圍常州生擒張湯二將尙以禮待未忍加誅爾所獲詹李乃吾偏裨無益成敗張湯二將爾左右手也爾宜三思我師旣擒士德獲其謀主又何以匿而不言但及張湯二將耶其誤一也元史丙申七月士誠兵陷杭州楊完者擊



走之陶九成輟耕錄紀杭州之役士德與王與敬偕往以諸書互考之且士德陷杭在七月其敗歸平江當在八月安得有常州被擒之事其誤二也元史順帝紀及達識帖睦爾傳張士誠爲書請降達識帖睦爾承制令周伯琦招諭之詔以士誠爲太尉士德爲淮南行省平章政事時士德已爲大明兵所擒此丁酉八月事也若士德丙申七月就擒則去士誠納款已一載餘矣安得有平章政事之授耶又按達識帖睦爾傳元授士德淮南行省平章政事士信同知行樞密院事士德尋爲大明兵所擒復陞士信淮南行省平章政事曰尋爲大明兵所擒則其事在旬月閒矣元史之書法甚明其誤三也士德以好賢下士剏造伯

業如王逢楊維禎陳基者頌慕之詞久而不替不獨如陳  
基輩流召致館下者也假令以二月入吳七月就縛其居  
吳不及半載又提兵往來三郡無須臾之暇士德雖有過  
人之略何以能深得士心若此其誤四也王逢梧溪集云  
今太尉開藩之三月命部將王左丞晟書使踵海上招至  
吳中以予避地無錫說晟勸張楚公歸元擢淮省郡事予  
辭不就他年逢遊崑山懷舊傷今之詩亦云桓桓張楚國  
挺生海陵鄙玄珠操璧社白馬飲浙水三年車轍南北向  
復同軌量容甘公說情厚穆生醴誓擊祖逖楫竟折孫策  
筆天王詔褒贈守將躬歲祀士誠之歸元其謀皆出於士  
德逢以元之遺老與有謀焉令丙申之秋士德已爲俘虜

逢雖欲緩頰何以自效其誤五也元史記丁酉歲士誠屢  
爲楊完者所敗然後乞降士德之被擒在七月而元之招  
諭在八月則士德被擒時歸款之事已定矣實錄謂我欲  
留士德以誘士誠士德閒書遺士誠俾降元以謀我故誅  
之國史旣誤記士德被擒於前而又不欲泯其主降元之  
事故曲爲之辭非事實也其誤六也由此言之則士德被  
擒之事斷以趙武桓之碑爲正而實錄之誤爲無疑也予  
又考天潢玉牒云丁酉六月取江陰州攻常熟獲張士誠  
弟士德以歸皇明本紀云明年復破其兵於宜興湖橋擒  
其弟張九六並獲其戰船馬匹皆與武桓碑相合湖橋在  
虞山西北通福山港爲舟師入江要地故士德被擒於此

基由琴川次福山港舟中望虞山至今可想見其處本紀  
曰宜興傳寫之譌也又考實錄丁酉七月丁丑徐達兵徇  
宜興取常熟擊張士誠兵敗之獲馬五十匹舟三十艘降  
其兵甚眾武桓碑紀攻常熟在丙子實錄紀在丁丑相去  
僅一日固知卽此一役也云徐達兵取常熟而不言武桓  
者武桓方以領軍先鋒聽大將調遣常熟之兵亦聽武寧  
調遣故沒而不書獨於取常熟下脫士德就縛之事則以  
丙申誤記於前故也然此事所以傳譌者蓋亦有故丙申  
七月旣擒張湯二將軍十一月又擒其梟將張德用兵之  
際羽書交馳奏報錯至流傳旣久卽 聖祖製碑之日亦  
止據一時功狀書之未及是正耳平吳錄載士德援常州

被擒在丁酉三月尤爲無據其他紀載紛如又不足道也夫史家異同必取衷於國史而國史多不足信至如開國元勳之碑出自御筆傳諸琬琰非他金石之文所可倫擬而猶或未免於傳疑史家之難豈不信哉余以萬歷戊午讀夷白集懷疑胸臆如有物結轡者迄今數年排纒解剝稍有條理乃敢次第書之未知後之君子其以爲何如也天啟六年七月二十日虞山老民錢謙益書

覆南徐擣毘陵擊常熟擒張士德

蘇伯衡撰明威將軍王瑛墓誌

戊戌六月十二日徐達常遇春領大兵征常熟擒士誠弟僞平章張士德送應天府上以禮待之供珍膳俟其降士德不食不語斬之

俞本記事錄

八月平江路張士誠爲書請降江浙左丞相達識帖睦爾承  
制令參知政事周伯琦等至平江撫諭之詔以士誠爲太尉  
士德爲淮南行省平章政事時士德已爲大明兵所擒元史  
順帝紀

明年士誠寇嘉興屢爲完者所敗乃遣蠻子海牙以書詐  
降蠻子海牙嘗爲南行臺御史中丞以軍結水寨屯采石  
爲大明兵所敗因走歸士誠故士誠使之來而書詞多  
不遜完者欲納之達識帖睦爾不可曰我昔在淮南嘗招  
安士誠知其反覆其降不可信完者固勸乃許之士誠始  
要王爵達識帖睦爾不許又請爵爲三公達識帖睦爾曰  
三公非有司所定今我雖便宜行事然不敢專也完者又

力以爲請達識帖睦迺雖外爲正詞然實幸其降又恐拂  
完者意遂授士誠太尉其弟士德淮南行省平章政事士  
信同知行樞密院事其黨皆授官有差士德尋爲大明  
兵所擒復升士信淮南行省平章政事然士誠雖降而城  
池府庫甲兵錢糧皆自據如故於是朝廷以招安士誠爲  
達識帖睦迺功詔加太尉

元史達識帖睦迺傳

崑山數爲方國珍海軍攻擊託丁氏往來說合結爲婚姻  
崑山之民幸遂蘇息湖之長興與武康廣德相界花鎗軍  
出沒之地雖各有勝負然亦不勝其苦所跨三州皆鄰勅  
敵可畏者時集慶一軍最盛陸路則無錫宜興長興水路  
則太湖士馬震耀舳艫相銜自後長興陷常州又陷士德

戰敗被擒俘致集慶俾其作書勸士誠歸附士德以身殉  
之終無降意士誠勢窮力迫願就丞相招降使者往返迄  
莫成就周仁親詣江浙省堂具陳自願休兵息民之意議  
始定時十七年八月也朝廷詔赦其罪後授士誠太尉開  
府平江士誠以下授爵有差立江淮分省江浙分樞密院  
於平江以授其官屬

輟耕錄

士誠納款於元奉正朔元不得已拜爲太尉士誠雖假元  
封爵實不用其命立參軍府及江浙淮南二省

實錄本傳

立樞密院建百司集兵旅以腹心之將徐義徐志堅典親  
軍李伯昇制軍事幕官韓謙錢輔黃參軍等任謀略相與  
僂力遂南侵江浙至紹興北踰江淮抵徐州至濟寧之金



溝實錄

幕官韓謙錢輔及王敬夫葉彥文葉德新三人為參軍  
平吳

江浙行省丞相承制假周伯琦參知政事招諭平江士誠  
既降除同知太常禮儀院事士誠留之未行拜資政大夫  
江浙行省左丞於是留平江者十餘年  
元史周伯琦傳

伯琦被留於吳士誠為造第宅於乘魚橋北厚其廩給伯  
琦日與諸文士以文墨流連因亦忘歸  
平吳錄

十七年改隆平府為平江路  
盧熊志

士誠既授封始遷之府治  
平吳錄

太尉府妙簡屬僚淮南周君信夫由行樞密斷事官經歷

進辟掾史十八年八月二日也信夫嘗以樞府掾從事平  
章榮祿公矣太尉以武濟時以文經國不愛玉帛輿馬招  
來賢俊聞風而至者相望也列辟庶僚乃有忠謹老成如  
信夫者

陳基送周信夫序

上公柱國開藩府露布朝持拜冕旒八障風雲開羽扇百  
年江漢見輕裘鯨吹海雨來京口雁帶邊聲下石頭珍重  
晉公經濟手中興天子復神州 昨夜文星照南極今朝  
各省遇東維錦囊脫穎千年兔彤管光搖九尾龜墨捲風  
雲隨王氣恩分雨露出天池老夫未草平蠻策先寫新封  
楚國碑

楊維禎上張太尉詩

辛卯臣魯疏河時混一形勢先崩離甬東兒謠盧健健頽

上啗叫韓尸尸張公鴻鵠志不小繙然效順開藩維吳粵  
十萬上燕薊淮鹽千里通徐邳珠還明月光四挹車啟賢  
路塵交馳

王逢詩集

張九六事附見

嗚呼謂天無爲而生公耶則公之志量超乎等夷謂天有  
爲而生公耶則公之志業不宜遽止於斯夫力足以任天  
下之重而明足以燭事理之微奇謀足以坐制千里之敵  
而英略足以立決兩陣之機卑讓足以延攬四方之俊而  
威武足以雄驅百勝之師恩信足以得三軍之死力而仁  
勇足以拯萬姓之顛危而天不假年痛罹此極使千尋之  
木弗能扶大廈之傾萬斛之舟弗能濟蒼生之溺此天心  
之所以不可必而君子之所以長吁而太息鸞鳳豈不祥

於梟獍麒麟豈不仁於虎狼蛟龍豈不神於螻蟻稂莠豈  
足侔於稻粱今妖鳥得以賊祥禽醜孽足以辱仁類鳴動  
得以制介族之長惡草得以爲良苗之害豈天未厭亂而  
仁者不必壽耶抑民之無祿而淪胥以死者不必救耶何  
公之不幸一至於此而天之蒼蒼竟孰尸其咎耶然公能  
以貴下賤而不能屈身以從賊能以仁伐不仁而不能臨  
難以辱國能厲聲罵賊而不能與之俱生能視死如歸而  
不能食不義之食蓋公之生也民有父母國有股肱公之  
死也豪傑失倚賴君子失依憑獨忠肝義膽通神明而貫  
金石英聲盛烈掀天地而震雷霆上可以爭光於日月下  
可以垂休於汗青此所謂沒而不朽者在公可以無憾矣

然復仇之義不舉則終天之恨不平四郊之寇壘不除則  
九泉之精爽不寧某等之所以尤痛哭流涕而不能自己  
者以首見招於館下繼辱薦於朝廷義雖均於僚佐患難  
忘於死生旣不能漆身吞炭報知於國士又不能奮錐操  
匕以效死於賊庭惟鞠躬盡瘁恪勤於王事夙興夜寐勉  
強以力行臨風一奠蓋上爲軍國慟而下以哭吾黨之情  
陳基祭故平章榮祿張公文

王逢遊崑山懷舊傷今詩曰丈夫貴善後事或失謀始桓  
桓張楚國挺生海陵鄙一門蓄大志羣雄適鋒起玄珠探  
璧社白馬飲浙水三年車轍南北向復同軌量容甘公說  
情厚穆生醴誓擊祖逖楫竟折孫策箠天王詔褒贈守將

躬歲祀翼然東昆立蘭橈映疏綺青蘩春薦豆翠柏寒動  
槩乾坤宥孤臣風雨猖五鬼銅駝使有覺薦具卧荆杞

集

梧溪

按士德之死不詳其年月考逢之詩則知士德返葬於崑  
山而元有楚國公之贈楊維禎詩所謂先寫新封楚國碑  
者是也實錄載士德被誅而劉辰國初事蹟云不食而死  
今考陳基祭文云能厲聲罵賊而不能食不義之食則以  
爲不食而死者是也辰又謂士德之母欲以廖同僉易士  
德而太祖不可然則永安被獲在戊戌十月士德之死  
久矣其辨在永安事略中

是年冬張氏築城虎丘因高據險役凡月餘周南邾經輩

有詩紀之

虎正志

丙申中吳既陷無錫亦陷常州路總管完顏同知李秉方  
合宜興分帥嚴蒙舌不華騎步卒退保陽山其地阻湖憑  
險順逆不常至是山氓委心僇力戰拒張氏凡十六月張  
降浙省朝廷錄功嚴拜浙省參政完顏浙憲使秉方待制

翰林

梧溪集

至正十八年

戊戌

正月庚戌廖永安俞通海攻石碑張士誠元帥樂瑞降

實錄

十七年六月俞通海率水軍克石碑八月克望亭新安十  
四日盡獲朱州判海船十七日攻馬馱沙十八年四月俞  
通海攻石碑巫門子獲朱州判餘卒

俞本記事錄

甲寅士誠兵寇常州守將湯和擊敗之

實錄

士誠以水軍來寇我師禦之破其眾於太湖鮎魚口廖永安

又與戰於常熟福山港大破之復敗其兵於通州狼山獲其

戰艦而還

皇明本紀

八月己丑張士誠寇江陰吳良擊走之

實錄

達識帖睦邈陰約張士誠攻殺楊完者其部將員成率李福

劉震黃寶蔣英等來降

實錄

徽州建德皆已陷完者屢出師不利士誠素欲圖完者而

完者又強娶平章政事慶童女達識帖睦邈雖主其婚亦

甚厭之乃陰與士誠定計除完者颺言使士誠出兵復建

德完者營在杭城北不為備遂被圍苗軍悉潰完者與其



弟伯顏皆自殺其後贈完者潭國忠愍公伯顏衡國忠烈公完者既死士誠兵遂據杭州

元史達識帖睦爾傳

楊完者字彥英武岡綏寧之赤水人爲人陰鷲酷烈嗜斬殺恃權詐羣無賴嘯聚溪洞推以爲長湖廣陶夢禎舉師勤王遣使招之由千戶累階至元帥夢禎死阿魯灰總兵淮西招入中土畧上江順流而下直抵揚州不復可控制民起義兵攻殺之餘黨奔潰度揚子宿留廣德吳興間淮人陷平江答失帖木兒招完者守嘉興累官至左丞完者兵淫縱嘉興僅保孤城城外悉遭兵燹完者陽尊事丞相生殺予奪於已是決丞相僅得署成案然完者之威令僅行於嘉興杭州兩郡而已築營德勝堰周圍三四里子女

玉帛皆在焉用法刻深任意立威而鄧子文金希尹王彥  
良之徒又悉邪佞輕佻左右交煽時左丞李伯昇行樞密  
同知史文炳行樞密同僉呂珍等皆先魁淮旅而降順者  
丞相以其眾攻殺之既受圍遣吏致牲酒於文炳爲可憐  
之意曰願少須臾毋死得以底裏上路報不可完者乘謀  
力戰敗盡殺所有婦女自經以死獨平章慶童女以先往  
富陽得免平章女嘗許嫁親王完者強委禽焉至是未及  
三月故數其罪者此居首文炳解衣裹屍瘞祭之 宋興  
在嘉興閉城自守亦攻降之南邨野史曰完者寵榮過望  
豈有二志忠君愛民之道頗亦見諸行事獨矜已犯分貪  
財好色夷性固然君子可以略之兼以所部吏卒視完者

起身等一寒微威令不信壞法敗度遂卒至於如此亦可

哀已

輟耕錄

楊完哲字伯英家世播州楊氏湖湘亂以苗獠義軍征討自備糧餉衣裝所至多殺掠轉戰至江東駐軍廣德丙申江浙丞相達識公招守嘉興丁酉張氏遣偽隆平知府周仁詣軍門納款既降張氏部將史文炳往杭州見完哲相見甚歡文炳大設宴盛陳鳥銀器皿嵌金鐵鞍之類盡以遺楊自是約爲兄弟久之楊謀復建德文炳以所部從之及史王以麾下兵圍楊北關營中言是受丞相節制完哲出戰屢挫乃縊於營中

農田餘話

公諱完哲字世傑廣西之武岡人兵興率苗丁應募英標

勇悍所向多克官至海北道元帥江浙省丞相達識公承  
制拜參知政事淮張氏稱王吳中勢捲浙右公振師復省  
治保嘉禾張氏降江浙省奏拜張太尉淮南平章行樞密  
知院公加本省左丞越二年張發兵掩襲丞相陰拱竟不  
之援公嬰城閉守斬賜馬享士卒諭以大義拒戰十日遂  
經死弟伯顏同死之幕下員外郎王國賢嘗直言侵丞相  
丞相殺之

葉圯輓楊左丞詩序

五府驛代楊左丞留題詩云束髮從戎十五年戰回平地  
血成川英雄生世有如此忠孝報君當慨然倣擾弄兵俱  
赤子中興有道自皇天猖狂暫假姑蘇息繫頸終難拜馬

前張光弼集

談濟長沙湘潭人也歲壬辰湖湘騷動濟集眾捍城邑會  
武岡楊完者元帥率其部東下遂與俱東戊戌秋楊完者  
爲左丞江浙行省與張士誠有卻力戰自刺死行樞密院  
同僉員成立遣濟捧書往歸胡統軍

蘇伯衡談鎮撫傳

十月丁亥御史大夫拜住哥誘殺邁里古思部將黃中殺拜  
住哥家人以告於張士誠張乃遣其將以兵守紹興

元史

張氏據有平江部將左丞呂珍守紹興參將陳應子饒介  
之在張左右一日陳賦詩饒染翰題一紈扇寄呂云後來  
江右一賢傳又是淮陰保相家見說錦袍酣戰罷不驚越  
女采荷花呂俾人讀罷大怒曰我爲主人守邊疆萬死鋒  
鏑閒豈務愛子女而不驚之耶見則必殺之

輟耕錄

甲戌徐達邵榮克宜興廖永安率舟師擊士誠眾於太湖乘勝深入與呂珍戰為其所獲

實錄

上遣使謂達曰宜興城小而堅猝未易拔西通太湖口張氏餉道所出若斷其餉軍食必乏城必即破矣乃分兵絕太湖口併力攻城破之永安復率舟師深入遂為所獲

錄

士誠攻安吉永安與戰太湖被獲誤也詳見永安事略

十二月

上親征婺州聞士誠兵據紹興之諸暨乃取道蘭溪

實錄

至正十九年

己亥

正月戊申邵榮破士誠兵於餘杭

實錄

戊午我師攻臨安不克而還

雄峰翼元帥王遇成孫茂先攻臨安右丞李伯昇來援茂先擊敗之伯昇斂兵自守攻之不克

實錄

胡大海率兵取諸暨

士誠守將華元帥宵遁萬戶沈勝以眾降

實錄

二月甲子朔張士誠兵復寇江陰吳良擊敗之

戰艦蔽江而下其將蘇同僉駐兵君山良命弟禎出北門與戰元帥王子明出南門合擊敗之生擒陶元帥裨將宋貫蔣英以下二百餘人溺死者甚眾

今年春宣武將軍江浙行樞密院判蘇侯克恭承太尉公命督水軍往征西虜進兵抵江陰城下而虜帥黃哈喇把

都兒蔡忠唐元諒陳完者不花石伯顏等率徒屬五百餘人以十數艘遁城出江中通言款附侯不疑延納之諭以聖天子之威靈太尉公之寬仁尋以見太尉公公賞以金帛授之官秩而優遇焉其徒屬胥慶曰真所謂脫虎口而

歸慈母也

釋克新蘇侯招降詩序

癸酉邵榮率兵攻湖州

我師圍之翌日城中悉兵出戰我師不利還屯臨安諜知李伯昇欲來攻設伏以待山上旗舉齊擊之敵眾大敗伯昇憤整軍來攻又敗之我師亦引還

實錄

三月丁巳張士誠寇建德朱文忠擊敗之四月再寇建德駐兵大浪灘據分水嶺文忠皆遣兵破之是月陳保二寇宜興



守將楊國興禽送寧越伏誅士誠兵又寇常州湯和擊敗之  
李伯昇寇婺源孫茂先擊敗之 實錄

胡大海攻紹興敗士誠兵於蔣家渡及蕭山東門五月召還  
守寧越 實錄

大海回守婺有趙姓三人稱趙宋子孫請再命大海攻紹  
興願爲內應 太祖知其詐令法司考問張士誠令三人  
來將家屬盡誅之 國初事蹟

大海攻紹興不克於三山斗門白塔寺連戰皆捷擒元兵  
盡戮之 俞本記事錄

士誠降卒五千餘人分給帳下留守婺州恐生叛意欲帶  
回京恐中途遁去悉斬於雙溪上 同上

是年 上選衛士三十侍左右選得十三人佯稱得罪於  
上私降張氏士誠配以妻撫之甚厚不逾月同行周海  
首之俱斬於虎丘山下吳元年克蘇州擒海歸凌遲以祭  
方德成等十三人 同上

六月甲子呂珍圍諸全州胡大海率兵救之珍堰水以灌城  
大海奪堰反灌珍軍珍於馬上折矢求解兵大海許之 實錄

十九年朝廷因授士信江浙行省平章政事士信乃大發浙  
西諸郡民築杭城 元史

張氏既歸命本朝兄弟拜太尉平章之命十九年七月大  
城武林起平松嘉湖四路官民以供畚築海鹽一州發徒  
一萬二千分爲三番以一月更代皆裹糧遠役而督事長

吏復藉之酷斂鞭朴捶楚死者相望本年十月迄功凡費數十百萬而新城碑記以南仲山甫爲譬有曰有嘉太尉克綏我民疇其相之平章弟昆又曰我作我息我出我入變呻爲謳伊誰之力豈不有愧詞乎

樂郊私語

嘉興通守繆思恭當張氏攻嘉興楊完者命典者攻我師大捷張氏歸命大城武林檄繆統所屬工徒往役士信欲乘此僇辱之眾皆爲寒心繆殊不爲意繆嘗泊西北面數十百丈以松江路工徒屬之繆每事作則先人止則後眾勞來督罰殊得眾心視他所築倍堅好士信亦無奈何一日巡工至繆所日已暮而工猶未輟士信曰日入而息汝何獨勞民如此繆曰平章禮絕百司猶日夕敬共王事況

小民敢偷餘晷士信曰此人口利如錐何怪杉青闢畔烈  
烈逼人繆曰今幸太尉革面國家借此得成獎順之典若  
念杉青之役猶恨不力縱逸平章耳士信曰別駕好將息  
言及杉青猶使人肉跳不止 同上

九月詔遣兵部尙書伯顏帖木兒戶部尙書曹履亨以御酒  
龍衣賜張士誠徵海運糧 元史

先是海漕久不通朝廷遣使來徵糧士誠運米十餘萬石  
達京師方面之權悉歸張氏達識帖睦迺徒存虛名而已  
元史達識帖睦迺傳

元自中原旣亂江南漕久不通京師屢苦饑至是河南始  
平乃遣伯顏帖木兒等來徵漕貢伯顏等至杭州傳詔命

方國珍具舟以運而達識總督其事既而士誠慮國珍載粟不入京師國珍又恐士誠掣其舟乘虛襲已互相猜疑伯顏往來開諭糧得入京者僅十一萬石自是歲以爲常

平吳錄

二十年五月張士誠海運糧十一萬石至京師二十一年五月如之是年九月命兵部尙書徹徹不花侍郎韓禡來徵海運糧二十二年五月海運糧至京師如前數

元史

至正十八年戊戌海運後太尉張士誠知鐵厓名欲見之先生不往繼遣其弟來求言因獻五論及復書斥其所用之人其略曰閣下乘亂起兵首倡大順以獎王室淮吳之人萬口一辭以閣下之所爲有今日不可及者四兵不嗜

殺一也聞善言則拜二也儉於自奉三也厚給吏祿而奸  
貪必誅四也此東南豪傑望閣下之可與有爲者也閣下  
孜孜求治上下決不使相徇也直言決不使遺棄也毀譽  
決不使亂真也惟賢人失職四民失業者尙不少也吾惟  
閣下有可畏者又不止是動民力以搖邦本用吏術以括  
田租銓放私人不承制出納國廩不上輸受降人不疑任  
忠臣而復貳也六者之中有其一二可以喪邦閣下不可  
以不省也況爲閣下之將帥者有生之心無死之志矣爲  
閣下之守令者有奉上之道無恤下之政矣爲閣下之親  
族姻黨者無祿養之法有行位之權矣某人有假佞以爲  
忠者某人有託詐以爲直者某人有飾貪虐以爲廉者閣

下信佞爲忠則臣有靳尙者用矣信詐爲直則臣有趙高者用矣信貪虐爲廉良則蹠躄者進隨夷者退矣又有某繡使拜虜而乞生某郡太守望敵而先遁閣下禮之爲好人養之爲大老則死節之人少賣國之人眾矣是非一謬黑白俱紊天下何自而治乎及觀閣下左右參議贊密者未見其砭切政病規進閣下於遠大之域者使閣下有可爲之時有可乘之勢而迄無有成之效其故何也爲閣下計者少而爲身謀者多則誤閣下者多矣身犯六畏釁闕多端不有內變必有外禍不待智者而後知也閣下狃於小安而無長慮此東南豪傑又何望乎僕旣老且病爵祿不干於閣下惟以東南切望於閣下幸采而行之毋蹈羣

小誤人之域則小伯可以爲錢鏐大伯可以爲晉重耳齊  
小白也否則麋鹿復上姑蘇臺始憶東維子之言於乎晚  
矣歎惡其切直目爲狂生時四境日蹙朝廷方倚丞相達  
識鐵木兒爲保障而納賄不已復上書諷之由是不合久  
之乃徙居松江

橋李貝闕楊鐵厓傳

士誠以厚幣招致楊維禎維禎勉行至姑蘇適元以御酒  
賜士誠維禎飲酒遂賦詩曰江南歲歲烽煙起海上年年  
御酒來如此烽煙如此酒老夫懷抱幾時開士誠聞之默  
然遂不强留聽之歸

張氏事蹟

十二月甲子元帥何時明破士誠兵於分水

士誠以分水之敗遣其將陸夏二元帥花將軍據分水縣



之新城三溪結寨以遏我師世明率兵擊之斬陸元帥花  
將軍以下千餘人焚其營分水兵潰去自是士誠不敢窺  
嚴婺 實錄

戊辰命常遇春帥師攻杭州

遇春攻杭州戰數不利元帥劉忙古反掾史商尙質又皆  
戰死城不得下明年三月召還 實錄

己亥臘月妖寇犯杭先是行省左丞相達識帖木兒公與  
太尉吳陵張公以兵屬本省平章政事兼同知行樞密事  
張公鎮杭由冬及春寇百方攻城不利乃縱兵四掠燒民  
廬發冢墓三月辛丑大戰數合是夕寇潰斬首數千級生  
擒者以萬計寇平 陳基精忠廟碑

杭民尚淫奢己亥十二月金陵游軍斬關而入突至城下  
城門閉三月餘越數日米既盡糟糠亦與米價等又數日  
糟糠亦盡乃以油車餕餅擣屑啖之至有合家其沈於水  
一城之人饑死者十六七

輟耕錄

十二月邵榮總大軍攻杭州不克

俞本記事錄

至正二十年

庚子

庚子士誠闢地益廣南自紹興北至濟寧上下二千餘里濠  
爲

太祖發祥之地亦遣其將李濟據之

平吳錄

王逢寄陳昌道檢口時淮藩新復濠泗徐邳等州詩云右  
轄敷兵甃社湖須與草木遂全蘇登萊海色浮樓艦蒙羽

山光落版圖又有送吳藩錢郎中升參政分鎮淮徐邳三

州詩 梧溪集

二月徐達克高郵尋復失三月俞通海征福山劉家港白

茅港 俞本記事錄

三月張士信修宋岳鄂王精忠廟

三月寇退吳陵公命卽故址作新廟平章公率僚佐致祭

廟庭俾郡守謝節經理其墓田 陳基精忠廟碑

張士信鎮杭基以本職參佐岳飛墳蕪穢弗治基勸士信

新其廟爲文刻石墓上 尤義撰陳基傳

九月士誠兵侵諸暨元帥袁實戰死又遣兵三路寇長興守

將耿炳文大破之 實錄

同僉呂珍元帥徐義率舟師自太湖入陳瀆港分兵據下  
新橋五里牌蔣婆橋三路進兵以寇長興耿炳文遣將分  
禦之總管湯全張琪皆戰沒炳文與元帥劉成合兵大破  
之同上

至正二十一年辛丑

正月諸暨守將院判謝再興叛歸張氏參軍李希白知州  
樂秉德奔於江州俞本記事錄

八月胡大海率兵攻紹興總管張英恃勇輕進至城下遇伏  
被執死之大海圍城久不下乃還實錄

呂珍守紹興有才略善戰嘗以牛革囊兵宵濟以襲我師  
每戰令戰士及城中人爲歌高譟以詬胡越公紹興人王

冕不肯附珍詣我軍獻策攻之然亦弗克珍作保越錄誇守城之功既降乃泯之今越人有其書

九朝野記

胡大海克諸暨錢萬戶來降 太祖賜衣服令回後獻策於士誠離諸暨五十里溪中築一壩水發卽沒城以戰船攻之可克謝再興與爭戰數年後克紹興械錢萬戶到京誅之

國初事蹟

十一月戊午命遇春救長興

先是司徒李伯昇寇長興眾十餘萬水陸並進城中兵僅七千 上在江州命華高費聚等率三路兵往援寇兵夜劫營諸軍皆潰耿炳文嬰城拒守元帥劉成戰死寇圍城結九寨爲樓車下瞰城中運土石填濠隍放火船燒水關

城中晝夜應敵凡月餘內外不相聞十一月甲戌遇春兵  
至長興伯昇棄營遁遇春追擊敗之 實錄

平章邵榮接應長興 俞本紀事錄

至正二十二年 壬寅

三月張士信率兵圍諸全

初士誠乘蔣英之亂遣士信率兵萬餘圍諸全守將謝再  
興晝夜鏖戰二十九日未決設伏城外合戰大敗之士信  
憤益兵來攻再興告急於朱文忠文忠遣胡德濟往援復  
與史炳謀颺言徐達邵榮領大軍至嚴州剋日進擊使謀  
者揭榜於義烏之古朴嶺士信兵見之謀夜遁德濟與再  
興發壯士夜半出擊寇兵亂自相蹂踐及溺死者甚眾士

信驕侈不能撫循將士軍中常載婦人樂器自隨日以樗蒲蹴鞠酣宴爲事諸將往往效之故至於敗

實錄

七月張士信補刻西湖書院書籍

西湖書院舊有書庫十九年九月士信一新之二十一年復命釐補其書版俾左右司員外郎陳基錢用王率其事明年七月二十三日訖工

陳基西湖書院自敘

西湖書院舊有經史書版兵後零落卽白平章出官錢補綴成帙

陳基傳

八月平章邵榮參政趙繼祖等部海船於二村港哨張氏謀叛部下士密告之上令廖永忠等邀飲擒之泣數其罪共宴數日中秋俱斬於聚寶門

俞本記事錄

九月江浙行中書省左右司員外郎陳基錢用壬同參平章  
張士信軍事於淮安

陳基集

基八月發吳門詩云少壯不解武衰老卻從軍將相比出  
師部伍各駭奔水師歛龍驤鐵騎紛雲屯如皋縣云王師  
重拯亂主將加隱惻戒吏翦蒿萊分曹理鹽筴眷眷惜瘡  
痍遲遲歷阡陌弔徐節孝文云九月基與錢用壬同參平  
章吳陵公軍事於淮陰冬十月望戎事甫解嚴率僚友謁  
節孝之墓基與用壬向參佐士信鎮杭此云參軍事於淮  
陰則士信又出鎮淮陰也趙君用以丁酉冬據淮己亥七  
月爲趙繼祖所殺則士誠取淮當在亥子之間是年八月  
之出師蓋以史椿守淮安與汪同謀應金陵故也考汪同



傳可見

甲寅士誠殺淮南行中書省左丞汪同及其左丞史椿

同字仲玉至正壬辰集義兵捍禦鄉井累官徽州路治中兼元帥丁酉七月爲鄧院判所得庚子六月領兵征饒境單騎潛往浙張太尉以禮召至姑蘇同見張心不純乃往淮安見史左丞氣義殊洽史曰李察罕公忠足任往一見之可也同往見李恨相見晚辛丑冬朝京拜淮南行省左丞還見李公公曰張士誠非忠於國家者中原事定平江南當自姑蘇始君與史君宜協力焉同還淮安史適與張有隙亦委心於李未幾李爲田豐所害史曰不幸及此宜要金陵兵往取姑蘇待中原事定尋爲之計乃遣使授書

往金陵史本姑蘇人張得其書大怒出兵高郵張四平章  
與史素相得招與言事同曰往不可測也史曰將卒家留  
姑蘇必有所顧一也中原事如此後援未可恃二也金陵  
兵未卽向太湖三也我輩姑待時可也未必便害我輩況  
四平章我嘗救其危急宜不至此八月二十五日往會於  
高郵二十八日登舟九月二日達姑蘇士誠卽拘同問曰  
我何負於汝而反同曰我之來以汝爲元太尉忠於國家  
今汝旣叛我豈得從汝反耶四平章力營救之且具酒饌  
爲別同曰爲語平章甚荷厚意吾能死忠不能爲無義生  
也但我死後諸公亦不能久於富貴耳十二日遇害臨死  
不少屈事聞追封平陽郡公

趙訪在左丞傳

張九六及部將史椿皆士誠謀主士德被擒椿見士誠諸將驕侈又左丞徐義讓毀椿椿守淮安遣使齎書歸太祖士誠執椿誅之國初事蹟

史椿見士誠不足與有爲又左丞徐義常譖之遂遣使請降太祖遣使報之往返之間士誠覺之乃詐死而使士信主國事太祖信之遣使弔慰貽書士信言戮力北方事及史椿計決士誠遂發兵猝至淮安執之以歸士誠復出視事月山叢談

是年夏江浙行省鄉試揭曉後士子作四六彈文與省榜同時版行輟耕錄

至正二十三年癸卯

二月癸酉張士誠將呂珍攻劉福通等於安豐入其城三月

辛丑朔

上率左丞徐達參政常遇春等擊安豐

珍入安豐殺福通等

實錄

呂珍入安豐攻宋劉福通等據其城 太祖親援之珍解

圍去福通奉韓林兒棄安豐退居滁州士誠兵復入安豐

平吳錄

安豐被張氏圍困小明王在城中劉太保等遣人求救

上親率大兵援之大敗張氏軍

俞本記事錄

癸卯二月十一日官軍發兵吳門二十二日狼山觀兵詩

云官軍野次狼山口鐵騎犀船盡虎驅杼軸萬家供餽餉

旌旗千里互江湖膝行擬伏諸侯將面縛行申兩觀誅淮  
海父兄爭鼓舞將軍恐是漢金吾

陳基集

癸卯春士誠遣其將呂珍爲前鋒攻安豐而自以大兵繼  
之宋主來徵兵我太祖自將救之劉基諫不聽先遣常  
遇春趨安豐太祖尋至士誠解圍去會僞漢攻南昌

太祖往援士誠遂乘閒略定濠泗汝潁地龍鳳主退居滁  
州

月山叢談

按安豐之役呂珍先將兵往而士信率兵繼之陳基集中  
癸卯二月官軍發吳門諸詩皆紀安豐之師月山叢談以  
爲士誠親行誤也

四月乙丑諸全守將謝再興叛奔紹興降於張士誠

實錄

五月己巳朔張士誠海鹽糧十三萬石至京師 元史

九月張士誠自稱吳王來請命不報遣戶部侍郎博羅帖木

兒徵海運士誠不與 元史

九月張士誠稱吳王 實錄

歲甲辰僭稱吳王 本傳

士誠命其部屬自頌功德必欲求王爵達識帖木邇曰我承制居此徒藉口舌以馭此輩今張氏復要王爵朝廷雖微終不為其所脇但我今若逆其意則目前必受害當忍詬以從之耳乃為其文書聞於朝至再三不報士誠遂自立為吳王即平江治宮闕立官屬 元史達識鐵睦邇傳士誠母曹氏頗有知數士誠稱王進稱太妃死葬姑蘇南

門外王師伐吳

上預戒將士勿發其墓

實錄本傳

是時天下謂我

太祖為西吳士誠為東吳然士誠尚奉

元正朔江北諸郡皆詭云為元恢復而實自守之

月山叢談

基由杭來吳參太尉軍事及太尉自王於吳羣下同聲賀

之而基獨諫止太尉欲殺之不果已而超授內史遷學士

院學士階通奉大夫覃恩二代凡飛書走檄碑銘傳記多

出其手基每以為憂而未敢以為榮也

陳基傳

淮省郎中俞齊賢字中夫海陵人本陰陽家者流張太尉

開藩俞與有功達識丞相奏除前職及太尉稱吳王累犯

顏諫止不聽且版授淮省參政遂杜門謝病以卒

王逢詩序

俞思齊泰州人士誠稱王聽諛臣之言不漕貢思齊獨言

曰向爲賊不貢猶可今爲臣可乎士誠怒抵案仆地而入  
思齊知不可事卽棄官稱疾而隱楊維禎作骨鯁臣傳平吳

錄

魯淵字道原漳安人由進士遷浙西提學張太尉稱王推  
博士令召拜官并辭還山 王逢詩序

陳思字履信松江人吳藩府地連十州守將咸以爲安思  
上疏危之不報遁居海上 同上

是月謝再興兵犯東陽朱文忠擊敗之李伯昇兵號六十萬  
犯諸新城城堅不可拔乃引去 實錄

至正二十四年

甲辰

正月



上卽吳王位二月滅僞漢陳理出降

三月湯和徇黃楊山擊士誠水軍敗之四月俞通海張興祖  
略劉家港進逼通州擒其院判朱瓊元帥陳勝

實錄

八月乙卯張士誠自以其弟士信代達識帖睦迺爲江浙行  
省左丞相

元史

答蘭帖木兒爲江浙行省右丞眞保爲左右司郎中二人  
諂事士誠多受金帛數媒孽達識帖木兒之短二十四年  
士誠乃使王晟等面數其過失勒其移咨省院自陳老病  
願退又言丞相之任非士信不可士信卽逼取其諸所掌  
符印而自爲江浙行省左丞相徒達識帖木兒居嘉興事  
聞朝廷卽就以士信爲江浙行省左丞相

元史達識帖木兒傳

甲辰八月張氏國弟四平章士信克安豐還逼達識丞相以位讓之其移文略曰太尉開府儀同三司上柱國江浙行中書省左丞相照得江浙行省奠臨吳越控制江淮乃天下之雄藩實東南之重鎮自非碩德元勳雄威重望功蓋當世澤及生民者疇克居此吳王張士誠有生英傑聞世雄才其弟太尉張士信天姿英武志節忠貞伏念當職才非輔弼年已衰殘德不足以服人才不足以勝任苟不推賢以自代必至誤國而獲愆今將元受官爵行中書省行樞密院行宣政院三臺銀印各一便宜行事賞功罰罪招降討逆并金牌等付受施行

農田餘話

士誠僭稱吳王遣士信遷江浙丞相達識鐵睦邇於嘉興

酖殺之遂縱肆專命擅官爵制度僭擬士誠諸弟士德最優旣被擒死氣日以衰士信愚妄不識大體人頗嗤之當是時浙西民物蕃盛儲積殷富士誠兄弟驕侈淫佚懈於政事又闇於斷制權爲文吏所竊然士誠持重寡言欲以好士要譽士有至者不問賢不肖輒重贈遺輿馬居室無不充足士之嗜利者多往趨之及士信用事疏閒舊將奪其兵柄由是上下乘疑不肯用命凡出兵遣將當出者或卧不起邀求官爵美田宅卽厚賜之始起任事至軍則載妓女歌舞日命游談之士酣宴博弈及喪師失地而歸士誠亦不問或復用爲將其威權不立如此宜其敗也

實錄本傳

士信爲丞相建第宅東城下號丞相府居民趨附之者輒

得富貴 平吳錄

張氏割據時諸公自謂化家爲國以底小康大起第宅飾園池蓄聲伎購圖畫民間奇石名木必見豪奪國弟張士信後房百餘人習天魔舞隊園中采蓮舟楫以沈檀爲之諸公宴集輒費米千石本皆起於寒微一時得志遂至於此時人有詩云書生一夜睡不著太湖西畔是他邦士信在圍城中於城上玉棚下食金桃飲酒飛礮射入竅中擊死 農田餘話

士信到江浙省徙達識帖木兒於嘉興自爲丞相不久令潘平章守杭州士信回蘇用王敬夫葉德新蔡彥文三人謀國 太祖聞之曰我諸事無不經心法不輕恕尙且人

瞞我張九四終歲不出門不理政事豈不著人瞞時有市  
謠十七字曰丞相做事業專用王蔡葉一朝西風起乾癯  
後士信守閭門正妓飲中礮死城破械張士誠同王蔡葉  
到京命縊死之

國初事蹟

士誠用事者王蔡葉三參軍皆迂濶書生不知大計吳中  
童謠云王蔡葉作齒頰一夜西風來乾歇

實錄本傳

蔡葉行刺佞倖臣蔡彥文葉德新也張氏亡國由太弟太  
弟至此實由二佞丁未春二佞伏誅於臺城風乾其尸於  
秤刑者一月君不見僞吳兄弟四六七十年強兵富金  
穀大兄垂旒不下堂小弟秉鈞獨當國山陰蔡藥師雲陽  
葉星卜朝坐白玉堂夜宿黃金屋文不談周召武不論頗

牧機務託腹心邊籌憑耳目弄臣什什引膝前骨鯁孤孤  
納囚梏參軍俞斗南也去年東臺殺普化今年南垣殺鐵木鳳陵  
斷棺取含珠鯨海刮商劫沈玉粥官隨地進妖豔籠貨無  
時滿阬谷西風卷地來六郡下破竹朽索不御六馬奔腐  
木那知五樓覆大鉞先罪魁餘殃盡孥僇寄謝悠悠佞倖  
兒福不盈筐禍連族何如吳門市賣藥賣卜饑死心亦足  
鐵崖詠史樂府

達識帖木兒至嘉興士信峻其牆垣錮其門闔達識帖木  
兒日對妻妾飲酒放歌自若士誠令有司公牘皆首稱吳  
王令旨又諷行臺爲請實授於朝行臺御史大夫普化帖  
木兒皆不從至是旣拘達識帖木兒卽使人至紹興索行

臺印章普化帖木兒封其印置諸庫曰我頭可斷印不可  
與又迫之登舟曰我可死不可辱也從容沐浴更衣與妻  
子訣賦詩二章仰藥而死後數日達識帖木兒聞之歎曰  
丈夫且死吾不死何爲遂命左右以藥酒進飲之而死元史  
達識帖木兒傳

十月張士信以兵侵長興耿炳文破之擒其元帥宋興祖士  
信復益兵圍長興十一月湯和救長興與炳文夾擊士信兵  
敗之實錄

是冬浚常熟州白茆港

泰定間周文英奏記謂水勢所趨宜專治白茆婁江時莫  
之省也張士誠閱故牘得文英書起兵民夫十萬塹白茆

爲港長亙九十里廣三十六丈委左丞呂珍督之民憚其  
勞時人采民言歌之功卒告成民大便利 三吳水利集

白茆謠曰白茆夫何蚩蚩耰鋤版鍤二十萬盡是吳中一  
十二郡良家兒道旁過客問夫事但言將軍有令開江隄  
延袤九十里息肩弛擔知何時自從去年秋迄今猶未歸  
層冰鑿鑿墮血指北風獵獵吹單衣父母不得見兒寒妻  
嗥飢巡烽入夜急羽檄流星馳縱勞里正裹糧食長年苦  
役家亦隳費伯師帥速如火弱者已死壯者羸白茆夫良  
可悲豈無新店獵豈無趙光奇天關隔下土爾訴那由知  
生男信是生女好爾生不辰逢百罹我歌白茆夫將軍靜  
聽之君不聞晉陽水沈竈產蛙民弗離又不聞瓠子決天



命殆非人所爲水可航山可梯在德不在險先言猶足規  
承平之世念未及此況今四海皆瘡痍我願將軍心推德  
懷庶黎靖荒服平四夷上書太常旗下立襄陽碑男耕女  
織天下一坐令百姓歌雍熙

古虞文錄

又謠曰好條白茆塘只是開不全若與開得全好與西帥  
歇戰船

至正二十五年

乙巳

二月丙午李伯昇寇諸全朱文忠大破之

張士信憤諸全之敗集兵號二十萬遣李伯昇挾我叛將  
謝再興寇諸全之新城部陳延互十餘里造廬室建倉廩  
爲必拔之計胡德濟堅壁拒守嚴州行省左丞朱文忠率

諸將銜枚走新城奮擊之大敗其眾逐北十餘里溪水盡  
赤獲同僉韓謙理問滕忠元帥周遇蕭壽山等士誠第五  
子及伯昇以數騎遁去

實錄

樞密院判謝再興乃都督朱文正之妻父胡大海攻紹興  
太祖命守諸暨離城數十里張士誠令呂同僉於溪上  
築一壩每年水發輒滄城再興不時遣人偷決之力戰功  
多再興心腹右總管縻萬戶嘗以違禁物往揚州易賣  
太祖恐泄國事執二人殺之以首懸於再興廳上 太祖  
自主婚以再興次女嫁右丞徐達復取再興回京聽宣諭  
遣參軍李夢庚往節制軍馬令再興還聽調遣再興恥無  
權勢出怨言曰女嫁不令我知有同給配又著我聽人節

制與知府樂鳳就執夢庚元帥王玉陳剛以諸暨軍馬赴  
紹興投降後再與弟謝三謝五守餘杭李文忠圍之文忠  
諭降保其不死指天爲誓謝五以城降 太祖曰謝再興  
是我親家反背我降張士誠情不可恕仍將謝五凌遲  
事蹟

八月贈右丞潘元明院判潘元紹之父懋爲榮祿大夫淮南  
行中書省右丞進封鄭國公母戴氏封鄭國太夫人

公爲通州人今吳王居鄉時公嘗從之遊夫人謂其子元  
明曰此人豪也盍謹事之且爲次子元紹求婚至正癸巳  
王舉義兵江淮間公首率元明等居麾下夫人內則綜家  
事給餉餽親製戰士之服外則撫士卒如己子人皆樂爲

之用今江浙左丞呂公珍來自興化夫人見其儻因爲  
公言公與語大悅卽分授以兵使事楚國公俾居左右而  
屬任之無何公卒於秦郵之東郭及師渡江夫人居吳乙  
巳十月卒

陳基合葬誌

十月戊戌

上以張士誠屢犯疆場欲舉兵征之下令布告中外辛丑命  
中書左相國徐達平章常遇春胡廷瑞同知樞密院馮國勝  
左丞華高等率馬步舟師水陸並進規取淮東泰州等處  
士誠所據郡縣南至紹興與方國珍接境北有通泰高郵  
淮安徐宿濠泗又北至於濟寧與山東相距 上欲先取  
通泰諸郡縣翦其羽翼然後專取浙西故命達總兵取之

同上

乙巳徐達兵趨泰州浚河通舟師駐軍於海安壩丁未進圍  
泰州新城敗湖北援兵獲其元帥王成己酉淮安李院判來  
援泰州常遇春擊敗之擒萬戶吳聚城中拒守未下

實錄

閏十月乙卯朔江陰水寨守將康茂才報張士誠舟師四百  
艘出大江次范蔡港己未

上親至江陰康茂才水寨辛酉還建康

庚辰徐達常遇春克泰州虜其守將僉院巖再興副使夏思  
忠院判張士俊俘五千人送建康遣黃旗千戶劉傑徇興化  
十一月辛卯徐達追兵攻高郵

上卽軍中命馮國勝帥所部節制高郵諸軍俾達還軍泰州

圍取淮安濠泗是月士誠兵寇宜興達率精兵渡江援宜興  
敗其兵城下十二月癸亥自宜興還攻高郵其將俞同僉堅  
守不下 實錄

士誠遣左丞徐義由海道入淮援高郵義怨士誠以爲陷  
已死地屯崑山之太倉三月不進 同上

十一月大明兵取泰州時泰州通州淮安徐州宿州泗州  
濠州安豐諸郡皆張士誠所據 元史

十一月克通州興化鹽城等縣 俞本記事錄

是年冬丞相張士信重徵僧度牒錢僧苦之慧朗住持杭  
之天華寺斷一臂說四句偈以獻賴免者眾 王逢詩引

是年江浙行省鄉試丞相張士信命陳基等爲考官

至正二十六年

丙午

正月張士誠以舟師駐君山又出兵自馬馱沙滸流窺江陰上親督水軍及馬步軍往救之比至鎮江寇已焚瓜洲掠西淮而遁乃命康茂才等出大江追至浮子門力戰大破之實錄

三月徐達拔高郵

太祖命馮國勝圍高郵僞僉院俞某開門詐降國勝令指揮康泰等先入城俞某於城樓下聞盡殺之 太祖召國勝回決以大杖數十罰令步走至高郵國勝怒四門齊上一鼓而破之俞某就擒 國初事蹟

四月乙卯徐達取淮安

達兵至淮安聞徐義軍在馬驛港夜往襲之破其水寨義

泛海遁去俘其院判錢富等舟師薄城下右丞梅思祖副  
樞唐英蕭成出降庚午達率兵取興化淮地悉平

實錄

庚申濠州李濟以城降

李濟據濠名爲張氏守而觀望未決 上嘗命李善長以

書招之不報韓政督顧時等四面並攻時孫德崖久已死

城中不能支濟及知州馬麟乃出降

實錄

太祖嘗曰濠州乃吾家鄉張士誠據之我雖有國而無家  
遣龔希魯潛往說蕭把都後把都出降 太祖曰今日有

國有家遂我志也

國初事蹟

元徐州守將樞密院同知陸聚以徐宿二州詣達軍請降  
實錄



按元史徐宿二州亦士誠所據聚既降遣兵攻沛縣取邳州徐達亦克安豐

七月廖永安卒於姑蘇

八月辛亥命中書左相國徐達爲大將軍平章常遇春爲副將軍帥師二十萬伐張士誠

七月 上以淮東旣平召中書省及大都督府臣議討張士誠右相國李善長以謂張氏兵力未衰土沃民富宜俟隙而動徐達謂曰張氏驕奢暴殄此天亡之時也其所任驕將如李伯昇呂珍之徒各擁兵眾爲富貴之娛王蔡葉三參軍居中用事皆迂腐書生不知大計臣奉主上威德聲罪致討三吳可計日而定 上喜顧達曰諸人局於所

見獨汝合吾意八月以伐張天告大江之神遂卽戟門戒諭將佐毋縱士卒虜掠毋妄殺僇士誠毋葬姑蘇城外勿侵損其墓遂爲約戒軍中事命人給一紙召徐達常遇春於西苑諭以張氏若全城歸命必保全之若用師城破之日以妄殺爲戒將發又問諸將曰此行用師孰先遇春對曰逐梟者必覆其巢去鼠者必熏其穴此行當直擣姑蘇姑蘇旣破其餘諸郡可不勞而下矣上曰不然士誠起隨徒與張天騏潘元明等皆強梗之徒相爲手足士誠苟至窮蹙天騏輩懼斃必併力救之今不先分其勢而遽攻姑蘇若天騏出湖州元明出杭州援兵四合難以取勝莫若出兵先攻湖州使其疲於奔命羽翼旣疲然後移兵姑

蘇取之必矣遇春猶執前議 上作色曰湖州失利吾自  
任之若先攻姑蘇而失利吾不汝貸也遇春不復敢言已  
而屏左右謂達遇春曰吾欲遣指揮熊天瑞從行俾爲吾  
反閒也天瑞之降非其本意心常怏怏適來之謀戒諸將  
勿令天瑞知之但云直擣姑蘇天瑞知之必叛從張氏以  
輸此言如此則墮吾計矣 實錄

命傳檄姑蘇數士誠八罪

高皇帝平僞周先有榜諭曰皇帝聖旨吳王令旨總兵官  
淮中書省咨敬奉令旨余聞伐罪救民王者之師考之往  
古世代昭然軒轅氏誅蚩尤成湯征葛伯文王伐崇侯三  
聖人之起兵也非富天下本欲民近觀有元之末王居

深宮臣操威福官以賄成罪以情免臺憲舉親而劾仇有  
司差貧而優富廟堂不以爲憂方添冗官又改鈔法役數  
十萬民湮塞黃河死者枕藉於道哀苦聲聞於天致使愚  
民誤中妖術不解偈言之妄誕酷信彌勒之真有冀其治  
世以蘇其苦聚爲燒香之黨根據汝潁蔓延河雒妖言旣  
行兇謀遂逞焚蕩城郭殺戮士夫荼毒生靈無端萬狀元  
以天下錢糧兵馬大~~費~~計之略無功效愈見猖獗終不  
能濟世安民是以有志之士旁觀熟慮乘勢而起或假元  
氏爲名或託香軍爲號或以孤軍獨立皆欲自爲由是天  
下土崩瓦解余本濠梁之民初列行伍漸至提兵灼見妖  
言不能成事又度胡運難與立功遂引兵渡江賴天地祖

宗之靈及將相之力一鼓而有江左再戰而定浙東陳氏稱號據我上游興問罪之師彭蠡交兵元惡授首其父子兄弟面縛輿櫬旣待以不死又封以列爵將相皆置於朝班民庶各安於田里荆襄湖廣盡入版圖雖德化未及而政令頗修惟茲姑蘇張士誠爲民則私販鹽貨行劫於江湖興兵則首聚兇徒負固於海嶼其罪一也又 隅一區難抗天下全勢詐降於元阮其參政趙璉囚其待制孫搗其罪二也厥後掩襲江南兵不滿萬數地不足千里僭號改元其罪三也初寇我邊一戰生擒其親弟載犯浙省楊荀直擣其近郊首尾畏縮又乃詐降於元其罪四也陽受元朝之名陰行假王之令挾制達丞相謀害楊左丞其

罪五也占據江浙錢塘十年不貢其罪六也知元綱已墜公然害其丞相達識帖木兒南臺大夫普化帖木兒其罪七也恃其地險食足誘我叛將掠我邊氓其罪八也凡此八罪有甚於蚩尤葛伯崇侯雖黃帝湯文與之同世亦所不容理宜征討以靖天下以安斯民爰命中書左丞相徐達總率馬步舟師分道並進攻取浙西諸處城池已行戒飭軍將征討所到殲厥渠魁脅從罔治備有條章凡我逋逃臣民被陷軍士悔悟來歸咸宥其罪其爾張氏臣僚果能明哲識時或全城附順或棄刃投降名爵賞賜余所不吝凡爾百姓果能安業不動卽我良民舊有田產房屋仍前爲生依額納糧以供軍儲餘無科取使汝等永保鄉里

以全室家此興師之故也敢千百相聚旅拒王師卽當移  
兵勦滅遷徙宗族於五溪兩廣永離鄉土以禦邊戎凡余  
之言信如皎日咨爾臣庶毋或自疑敬此除敬遵外咨請  
施行準此合行備出榜文曉諭敬依令旨事意施行所有  
榜文須議出給者龍鳳十二年五月二十一日本州判官  
許士傑齎到 九朝野記 平吳錄同

徐達進攻湖州大敗士誠兵於阜林

癸丑諸軍發龍江辛酉師至太湖已巳 春擊敗士誠兵  
於湖州港口擒其將尹義陳旺遂次洞山 山癸酉進至湖  
州之昆山又擊敗其將石清汪海擒之張士信駐軍湖上  
不敢戰而退熊天瑞果叛去甲戌師至湖州之三里橋右

丞張天騏分兵三路來拒參政黃寶當南路院判陶子實當中路天騏自當北路同僉唐傑爲後繼達進攻之術者言今日不宜戰遇春曰兩軍相當不戰何時於是達遣遇春攻黃寶王弼攻天騏達自中路攻子實別遣驍將王國寶率長槍軍直扼其城遇春與黃寶戰寶敗走欲入城城下弔橋已斷不得入復還力戰被擒并獲其元帥胡貴以下官二百餘人天騏子實皆不敢戰歛兵而退士誠又遣司徒李伯昇來援由荻港潛入城我軍四面圍之伯昇及天騏閉門拒守達遣國寶攻其南門自以大軍繼之其同僉俞得金院判張德義及陶子實出戰復敗走士誠又遣平章朱暹王晟同僉戴茂呂珍院判李茂及其第五子號



五太子者率兵六萬來援號三十萬屯城東之舊館築五砦自固達與遇春湯和等分軍營於東阡鎮南姑嫂橋連築十壘以絕舊館之援李茂唐傑李成懼不敵皆遁去士誠壻潘元紹時駐兵於烏鎮之東爲呂珍等聲援我師乘夜擊之亦遁遂填塞河港絕其糧道士誠知事急乃親率兵來援達等與戰於阜林之野又敗之虜其戴元帥及甲士三千餘人九月辛卯士誠復遣同僉徐志堅以輕舟出東阡鎮覬我師欲攻姑嫂橋遇春遇之與戰會大風雨天晦甚遇春令勇士乘划船數百突擊之擒志堅得兵二千餘人乙巳廖永忠辭顯將游軍自湖州之德清遂取之禽其院判鍾正及判將晉德成士誠自志堅敗甚懼遣右丞

徐義至舊館覘形勢將還遇春以兵扼其歸路義不得出  
乃陰遣人約士信出兵與舊館兵合力來戰士誠又遣赤  
龍船親軍援之義始得脫與潘元紹率赤龍船兵屯於平  
望復別乘小舟潛至烏鎮欲援舊館遇春由別港追襲之  
至平望縱火焚其赤龍船軍資器械一時俱盡眾軍散走  
自是舊館兵援絕饋餉不繼多出降者十月辛亥達以所  
獲將士徇於湖州城下城中大震王子遇春兵攻烏鎮徐  
義潘元紹及其院判拒戰不勝退走遇春追至弁山遂攻  
破其平章王晟陸寨餘軍奔入舊鎮之東壁其同僉戴茂  
乞降我師馳入之是夕王晟亦降戊寅達復攻弁山水寨  
顧時引數舟繞士誠兵船船上人俯視而笑時覺其懈率

壯士數人躍入其舟大呼奮擊餘舟競進薄之士誠五太子盛兵來援遇春稍卻辭顯率舟師直前奮擊燒其船其眾大敗五太子及朱暹呂珍等以舊館降得兵六萬人遇春謂顯曰今日之戰將軍之力居多吾固不如也五太子者士誠養子本姓梁短小精悍能平地躍起丈餘又善沒水暹珍亦善戰士誠倚之至是皆降士誠爲之奪氣

實錄

高啟聞朱將軍戰沒詩云江浦戈船赤幟稀孤軍落日陷重圍殘卒自隨新將去老親空見舊奴歸

楊基悼朱秦仲總制云力盡戈鋌援不回猶揮赤手搏風雷謾使張遼說關羽誰將全武易秦裴

攻湖州遇春躬率將士於大錢港與張氏將禿張左丞交

鋒遇春中矢創甚踞牀督戰將士莫知遂大敗張氏兵進圍湖州俞本記事錄

十一月甲申大明兵取湖州路丙申取杭州路及紹興路辛丑取嘉興路元史

甲申達遣馮國勝以降將呂珍王晟等徇於城下語李伯昇出降伯昇在城上對曰張太尉養我厚我不忍背之抽刀欲自殺爲左右抱持得不死左右語伯昇曰勢孤援絕久困城中不如降伯昇俛首不能言其左丞張天驥總管陳昧等以城降伯昇亦降乙丑達引兵向姑蘇至南潯元帥王勝降辛卯至吳江州圍其城參政李福知州楊彝降實錄

十一月初二日湖州守將李司徒并禿張右丞降城中市  
不易肆張氏弟四丞相領精兵十萬援湖州駐舊館怯不  
敢進乃立柵以自固夕攜妓歌舞蹴鞠爲戲遇春領兵攻  
之全軍倒戈而降四丞相僅免遁去

俞本記事錄

洪武元年以榮祿大夫中書平章政事李伯昇兼同知詹  
事院事二年將兵討湖廣慈利土酋平之八月同耿炳文  
分兵守陝西三年論功行賞賜文綺及帛十六匹命以中  
書平章食祿而不視事子孫世襲指揮僉事五年命爲征  
南右副將軍同吳良討靖州十二月班師賞綺帛八匹七  
年正月命往真定統理軍務八年正月命往彰德屯田開  
衛六年七月大將軍命分討殘胡十二年十二月定伯昇

與王溥潘元明歲祿七百五十石十三年往漳州理軍務

四月齋符召還

實錄

伯昇後坐胡黨見胡惟庸事略及昭示奸黨錄諸招

張氏之敗由李伯昇先降故吳人謂負主者曰李司徒

客論

治城

張天騏興化人歸附後命爲江西行省右丞洪武三年陞本省左丞食祿世襲與伯昇同

九月己未命文忠帥師攻杭州十月文忠遣將攻桐廬降戴元帥略富陽擒同僉李天祿遂合兵圍餘杭謝再興之弟謝五拒守文忠許以不死乃出降遂進兵杭州平章潘元明遣員外郎方彝納款明日以款狀來曰嬰城固守乃

受任之當爲歸款救民亦濟時之急務竊伏自念起身草  
野叨爲省樞非心慕於榮華乃志存於匡定豈意邦國殄  
瘁王師見加事雖貴於見幾名實同於歸義念是邦生靈  
百餘萬比年物故十二三今旣入於職方願溥覃於天澤  
謹將杭州土地人民及諸司軍馬錢糧之數以獻文忠至  
杭州元明及同僉李勝奉士誠所授行省及樞密院浙西  
江東兩道廉訪司印並執蔣英劉震出降

實錄

是月十九日李文忠攻杭州張氏壻平章潘駙馬降城中  
不識軍容安堵如故遂招撫紹興

俞本記事錄

署雲南布政司事平章潘元明卒元明秦州人初與張士  
誠俱起鹽徒元兵圍高郵士誠與十八人突圍出走元明

及李伯昇呂琛與焉後爲浙江行省平章以杭州降仍授原官士誠由是勢孤以至於亡洪武三年以浙江行省平章食祿而不視事子孫世襲指揮同知十三年七月命往福建理軍務十四年平雲南署布政使司事庚子士誠同僉李思忠總管衡良佐以紹興路降華雲龍率兵攻嘉興守臣宋興以城降

實錄

癸卯徐達等進兵圍平江

十一月進抵姑蘇其屬縣相繼來歸惟蘇州孤立而已

上欲困服之乃圍其城

皇明本紀

癸卯大軍至姑蘇城南鮎魚口擊敵將竇義走之康茂才至尹山橋遇敵兵又擊敗之焚其官渡戰艦千餘艘及積



聚甚眾達遂進軍圍其城達軍葑門遇春軍虎丘郭子興軍婁門華雲龍軍胥門湯和軍閶門王弼軍盤門張溫軍西門康茂才軍北門耿炳文軍城東北仇成軍城西南何文輝軍城西北四面築長圍困之又架木塔與城中浮屠對築臺三層下瞰城中名曰敵樓每層施弓弩火銃於上又設襄陽礮以擊之城中震恐有楊茂者無錫莫天佑部將也善沒水天佑潛令入姑蘇與士誠相聞邏卒獲之於閶門水柵旁送達軍達釋而用之時城堅不可破天佑又阻兵無錫爲士誠聲援達因縱茂出入往來因得其彼此所遺蠟丸書由是悉知士誠天佑虛實而攻圍之計益備達時督兵攻婁門士誠出兵拒戰指揮茅成左脇中矢死

實錄

蘇州城堅兵銳屢攻不下達令各衛列營於城之周挑長  
壕所在相連接起敵臺以圖之高四丈下瞰城中往來男  
婦可以辨數 俞本記事錄

至正二十七年 丁未 吳元年

元史

正月庚子大明兵取松江府

四月丙午朔上海民錢鶴皋作亂據松江府大將軍徐達驍

騎衛指揮葛俊等討平之 實錄

初達攻蘇州遣元帥楊福參謀費敬直諭松江府守臣王

立中以城降達令就攝府事 上命苟玉珍代之達檄各

府驗民田徵磚甃城鶴皋不奉命遂結張士誠故元帥府

副使韓復春施仁濟聚眾至三萬餘人攻府治開庫庾通判趙倣驅妻子十八人赴水死玉珍棄城走追殺之鶴皋自稱行省左丞署旂爲元字刻磚爲印僞署官屬以姚大章爲統兵元帥張思廉爲參謀施仁濟谷子盛爲樞密院判令其子遵義率小舟數千走平江求援達遣俊討之兵至連湖蕩望見遵義所率眾皆操農器知其無能爲也乃於蕩東西連發十餘礮驚潰溺死者不可勝計兵及松江城鶴皋閉門拒守俊攻下之獲鶴皋檻送大將軍斬之仁濟等率餘黨遁去

實錄

國兵困姑蘇上洋人錢鶴皋起兵援張氏巨姓號泖湖謝亦與焉事敗皆破滅瞿佑泖湖詩有揮戈思指日傳檄欲

存吳之句

東遊集

五月丙子朔

上遺士誠書諭降不報

書曰蓋聞成湯放桀武王伐紂漢祖滅秦歷代帝王之興  
兵勢相加乃爲常事王莽之亡隋之失國豪傑乘時蜂起  
圖王業據土地及其定也必歸於一天命所在豈容紛然  
雖有智者事業弗成亦當革心畏天順民以全身保族若  
漢之竇融宋之錢俶是也自古皆然非今獨異爾能順附  
其福有餘毋爲困守孤城危其兵民自取滅亡爲天下笑  
書至士誠不降

六月己酉士誠兵大敗於平江之山塘

六月己酉士誠被圍既久欲突圍決戰覘城左方見軍陣嚴整不敢犯乃遣徐義潘元紹潛出西門欲掩襲我軍轉至閭門將奔常遇春營遇春覺其至分兵北濠絕其歸路遣兵與戰良久未決士誠復遣參政黃哈剌把都帥兵千餘人助之又自出兵山塘爲援塘路狹塞不可進麾令稍卻遇春撫王弼背曰軍中皆稱爾爲猛將能爲我取此乎弼應曰諾卽馳鐵騎揮雙刀往擊之敵眾小卻遇春因率眾乘之士誠兵大敗人馬溺死沙盆潭甚眾士誠有勇勝軍號十條龍皆倉夫善爲盜者也士誠每厚賜之令披銀鎧錦衣將其眾出入陣中人不能測是日俱溺死錢萬里橋下士誠馬驚墮水幾不能救肩輿入城計忽忽無所出

時降將李伯昇知城勢迫欲說令歸命乃遣客詣士誠門告急士誠召之入曰爾欲何言客曰吾言爲公興亡禍福之計願公妄意聽之士誠曰何如客曰公知天數乎昔項羽暗嗚叱咤百戰百勝卒敗死垓下天下歸於漢祖何則此天數也公初以十八人取高郵元兵百萬圍之此時如虎落窠中死在旦夕一旦元兵潰亂公提孤軍乘勝攻擊東據三吳有地千里甲士數十萬南面稱孤此項羽之勢也誠能於此時不忘高郵之危苦心勞志收召豪傑度其才能任其職事撫民人練軍旅嚴御將帥有功者賞敗軍者戮使號令嚴明百姓親附何特可保三吳天下可取也士誠曰足下此時不言今復何及客曰此時雖有言亦不

得聞也何則公之子弟及親戚將帥羅列中外美衣玉食歌妓舞女日夕酣宴身衣天下至美口甘天下至味猶未厭足提兵者自以爲韓白謀畫者自以爲蕭曹傲然視天下不復有一人當此之時公深居於內敗一軍不知失一地不聞縱知亦不問故淪亡至於今日士誠曰吾亦甚恨無及然則今當何如客曰吾有一策恐公不能從也士誠曰不過死耳客曰使死有益於國家有利於子孫死固當不然徒自苦耳且公不聞陳友諒乎跨有荆楚兵甲百萬與江左之兵戰於姑孰鏖於鄱陽友諒舉火欲燒江左之船天乃反風而焚之友諒兵敗身喪何則天命所在人力無如之何且今攻我益急公恃湖州援湖州失嘉興援嘉

興失杭州援杭州又失今獨守尺寸之城誓以死拒然竊慮勢極患生猝有變從中起公此時欲死不得生無所歸故吾竊以爲莫如順天之命自求多福令一介之使疾走金陵稱公所以歸義救民之意公開城門幅巾待命亦不失萬戶侯况嘗許以贖融錢俶故事耶且公之地譬如博者得一人之物而復失之何損士誠俛首沈慮良久曰足下且休待吾熟思之然卒狐疑莫能決也王子士誠復帥兵突出胥門索戰鋒甚銳遇春禦之兵小卻士信方在城樓上督戰忽大呼曰軍士疲矣且止且止遂鳴金收兵遇春因乘勝奮擊大破之追至城下攻之益急復築壘逼其城自是士誠不復得出矣士信張幕城上踞銀椅與參政



謝節等會食左右方進桃未及嘗忽飛礮碎其首而死實錄

六月二十四日張四丞相於西閭門督戰方食桃頰中石礮而死達領四十八衛將士圍城每一衛置襄陽礮架五座七稍礮架五十餘座大小將軍筒五十餘座四十八衛營寨列於城之周遭張氏欲遁不能飛度銃礮之聲晝夜不絕俞本記事錄

銅將軍刺偽相張士信也丁未六月六日爲龍井礮擊死

銅將軍無目視有準無耳聽有神高沙紅帽鐵篙子南來開府稱藩臣兵強國富結四鄰上稟正朔天王尊阿弟柱國秉國神宗廟諱僭逼大兄稱孤君案前大事有妖嬖後宮春豔干花嬪水犀萬弩填震澤河丁萬鍤輸茅津神愁鬼憤

哭萬民銅將軍天假手疾雷一擊粉碎千金身斬妖蔓拔  
禍根烈火三日燒碧雲鐵篙子面縛西向爲吳賓鐵崖樂府  
潘元紹出戰歸見事急召其妾七人謂曰我受國重寄義  
不顧家脫有不測若輩當自引決最少妾段氏請先死六  
人皆相繼自經元紹焚之瘞後圃丁未七月五日也潯陽  
張羽作七姬權厝志

僞周據吳日開賓賢館以致天下士其陪臣潘元紹以國  
戚元勳位重宰相雖酗酒嗜殺而能禮下文士故此石出  
於倉卒之際而一時文章書字皆極天下之選

文徵明跋

七姬之死蓋出於潘之逼之謂之不幸則可平居優雜子  
女而漁聚之一旦有變恐樂他人之少年而雉經之潘之

惡甚矣 楊慎跋

金盤美人刺偽駙馬潘元紹也潘娶美娼凡數十內一爲蘇氏才色兼美醉後尋其罪殺之以金盤薦其首於客宴絕類北齊主事國亡伏誅臺城投其首於溷中 昨夜金牀喜喜薦美人體今日金盤愁愁薦美人頭明朝使君在何處溷中人溺血骷髏君不見東山宴上琵琶骨夜夜鬼語啼篋篋 鐵崖樂府

九月辛巳大明兵取平江路執張士誠

時城圍旣久熊天瑞教城中作飛礮以擊我師城中木石俱盡至拆祠廟民居以供礮具達令軍中架木若屋狀承以竹笆軍伏其下載以攻城矢石不得傷至是達督將士

破葑門遇春亦破閭門新寨遂率眾渡橋進薄城下樞密  
唐傑登城拒戰士誠駐軍門內令參政諸節周仁立柵以  
補外城傑知不敵投兵降周仁徐義潘元紹及錢參政皆  
降士誠軍大潰諸將遂蟻附登城城已破士誠猶使副樞  
劉毅收餘兵尙二三萬親率之戰於萬壽寺東街復敗劉  
毅降士誠倉皇歸獨坐室中左右皆散走達遣舊將李伯  
昇至士誠所諭意時日已暮士誠拒戶自經伯昇決戶令  
降將趙世雄抱解之氣未絕復蘇達又令潘元紹以理曉  
之反覆數四士誠瞑目不言乃以舊盾昇之出葑門途中  
易以戶扉昇至舟中

實錄

初達與遇春約城破之日中分撫定先集將士申明上

意令將士各懸一小木牌令曰掠民財者死拆民居者死  
離營二十里者死及城破達軍其左遇春軍其右號令嚴  
肅軍士莫敢妄動居民晏安

同上

七月初八日張氏守葑門將朱平章開門納達兵張氏令  
妻子眷屬登齊雲樓自焚遂登樓飲鴆侍者奪之須臾遇  
春兵至李司徒扶士誠出殿達與其舟至應天府

俞本記事錄

己酉取通州丁亥取無錫州

達等遣許千戶取通州次狼山守將張右丞降士誠從子  
所謂火眼張也莫天佑等至無錫達累遣使諭降俱殺之  
胡廷瑞攻之急州人張翼率父老說天佑出降天佑沈思  
良久擲帽於地曰守此誠難不如降也翼乃縋城而下詣

軍前請命天佑遂出降天佑性兇猛有勇力人稱爲莫老  
虎壬辰聚眾自保張士誠陷常州招之不從發兵攻之不  
勝士誠受元太尉官天佑乃降累表爲同僉樞密院事實錄  
是月克無錫常熟俞本記事錄

乙丑張士誠至建康自縊死

上召見士誠但瞑目不言不食賜之衣冠亦不受遂令御  
士扛於竺橋御杖四十而死 上命焚瘞於石頭城俞本  
記事錄

大將軍徐達遣人送張士誠至建康士誠在舟中閉目不  
食至龍江堅卧不肯起昇至中書省相國李善長問之不  
語已而士誠言不遜善長怒罵之 上欲全士誠而士誠

竟自縊死賜棺以葬之死時年四十七

實錄

張氏生有東南富饒之地軍食豐足兵多驕脆諸暨老謝  
叛歸之其勢足以得浙東婺州苗軍叛歸之其勢可以得  
婺州皆遲而不取臺兵十三萬攻之不戰而潰先是乙巳  
常遇春襲通泰據鹽場夜負小舟過壩攻取高郵淮東悉  
爲明有未幾盡取浙西獨平江與無錫莫老虎堅守前後  
攻圍一年臺兵死者十餘萬城破械送子臺以弓弦勒殺  
之副莫老虎

九朝談纂

初士誠見兵敗謂其妻劉氏曰我敗且死矣若曹何爲劉  
氏曰君勿憂妾必不負君乃積薪齊雲樓下及城破驅其  
羣妾侍女登樓趣其自盡令養子辰保縱火焚之遂自經

死士誠有二子皆幼城將破劉氏以白金遺乳媪令負二子逃民間不知所終

實錄

劉夫人至正太尉吳王嬪笄珈車服置弗御澹煙常鎖雙眉春中州援遠敵在目權貴日驕疆日蹙背城借一王本心狐狸狐搨將軍欲夫人勇決烈女義百口樓居親舉燧片時陰慘萬世生月明風清珮音至君不見男兒成敗古有之孰以楚霸輕虞姬蘇民安得夫人祠烏棲白鳥庶少

衰

王逢梧溪集

凡獲其官屬平章李行素徐義左丞饒介參政馬王麟謝節王原恭董綬陳恭同僉高禮內史陳基右丞潘元紹等所部將士杭湖嘉興松江等府官吏家屬及外郡流寓之



人凡二十萬餘並元宗室神保大王黑漢等皆送建康叛將熊天瑞伏誅

實錄

城破械張士誠同王蔡葉到京命縊殺之及獲原叛降人王哈刺不花徐大舍單同僉熊天瑞太祖曰此等叛逆之人皆明正典刑

國初事蹟

辛丑平吳師還論功行賞

召右相國李善長左丞相徐達平章常遇春都督馮宗異平章湯和胡廷瑞右丞廖永忠左丞華高都督康茂才都督副使張興祖梅思祖參政薛顯趙庸曹良臣及各衛指揮千百戶於戟門封善長爲宣國公達爲信國公遇春爲鄂國公達綵段表裏十一匹遇春十匹廷瑞宗異各九匹

和良臣各八匹永忠高茂才各七匹顯庸興祖各六匹指  
揮人五匹千戶人四匹百戶人三匹軍人米一石鹽十斤  
明日達等入謝 上語之曰公等還第置酒爲樂否對曰  
荷主上恩德皆置酒相慶 上曰吾寧不欲置酒與諸軍  
爲一日之歡但中原未平非宴安之時公等不見張氏所  
爲乎終日相與酣歌逸樂今竟何如宜深戒之壬寅 上  
視朝戟門召浙西來歸諸將諭之曰吾所用諸將多濠泗  
汝穎壽春定遠諸州之人勤苦儉約不知奢侈非比浙江  
富庶耽於逸樂汝等亦非素富貴之家一旦爲將握兵多  
取子女玉帛非禮從橫今旣歸於我當革去舊習如吾濠  
泗諸將庶可保爵位汝等誠能盡心效職從大軍除暴平

亂使大業早定非獨已受富貴子孫亦得以世享其富貴  
若肆志一時雖暫得快樂旋復喪敗何得爲真富貴乎此  
皆汝等所親見者不可不戒也諸將皆頓首

實錄

吳元年國兵圍姑蘇張士誠縊不死就擒天台王澤叔潤  
有詩哀之云天星夜墮水犀軍又見吳宮走鹿羣睥睨金  
湯徒自棄倉皇玉石竟俱焚將軍只合田橫死國士今無  
豫讓聞風雨明年寒食節麥孟誰灑太妃墳先伯亦有絕  
句云虎鬪龍爭旣不能雞鳴狗盜亦何曾陳平韓信皆歸  
漢只欠彭城老范增蓋張氏據有浙西地富饒而好養士  
凡不得志於前元者爭趨附之美官豐祿富貴赫然有北  
樂府譏之云阜羅辮兒紫扎稍頭帶方簷帽穿領潤袖衫

坐箇四人轎又是張吳王倮蟲兒來到了及城破無一人  
死難者武夫健將惟束手賣降而已詩意有所謂也

瞿祐  
歸田

詩話

史官曰張氏據吳建國偃然自王其勢若甚易者何哉蓋  
當四方擾攘民心皇皇無所依歸有能保障之者亦可以  
苟安也惟當時主以游談之人濟以脆輓之卒上下逸豫  
遂忘遠圖終焉天兵一臨獸伏鳥散三吳故疆竟歸真主  
使張氏如錢俶之見幾待命不勞血戰亦足以庇其子孫  
何至國蹙城破身爲俘囚如劉鋹耶雖然倔强激烈負氣  
而死其兄弟妻孥亦不受辱較之李重光之柔懦則過之  
耳故嘗以所聞故老之語及士大夫所記參以史書所載

爲錄以藏之後世必有考焉 平吳錄

余嘗過張士誠故宮廢墟殘堞鞠爲茂草有足悲者及詢  
之父老往往能言其槩方其據吳僭王財賦甲兵雄於四  
方亦隗囂公孫述之徒匹也卒之疆圉日蹙猶欲嬰城巷  
戰以蕞爾偏隅抗我王師妻孥爲戮彼其政教弗修淫泆  
汰奢賢豪弗爲之用卽有所設施足以自亡而已矣哀哉  
錄三卷吳文定公寬所撰後有論 袁襄平吳錄序

士誠之敗何也士誠施仁而不當於理將士奢侈而惜其  
生及馭將士無異於富家養驕子豈主國命師之道哉出  
師之日總兵者駐城遷延不進遣人詣士誠曰糧賞不敷  
士卒不敵衣甲旗幟不鮮俟如其請方行又攜妓妾從征

及遇大敵交鋒將士潰散而回又不誅責卻加升賞如此  
不亡者鮮矣士誠之心知施恩而不知施威知取之易而  
不知守之難也悲夫

國初羣雄事略卷七



國初羣雄事略卷八

虞山錢謙益牧齋甫編

方谷眞

谷眞台之黃巖人初名國珍後更名眞避廟諱也又改國爲谷避高帝御字也仁祖實錄諸書概從舊名誤矣當以宋濂神道碑正之至正八年聚眾海上吳元年十二月來降凡二十年授資善大夫廣西等處行中書省左丞洪武七年三月壬辰卒於京師鍾山里之私第年五十又六葬於城東二十里玉山之原

至正八年戊子台州方國珍爲亂聚眾海上命江浙行省參知政事朶兒只班討之元史順帝本紀續編十一月



台州黃巖民方國珍爲蔡亂頭王伏之讐逼逐入海爲亂劫掠漕運糧執海道千戶德流于實事聞詔江浙參政朶兒只班總舟師捕之追至福州五虎門國珍知事危焚舟將遁官軍自相驚潰朶兒只班遂被執國珍迫其上招降之狀朝廷從之國珍兄弟皆投之以官國珍不肯赴勢益暴橫

元史泰不花傳

公長七尺狀貌魁梧身白如瓠有偉丈夫量未嘗宿怨識者已知其爲貴人至正初李大翁嘯眾倡亂出入海島劫斂漕運舟殺使者有司捕索久不獲因從而緩輯之劇盜蔡亂頭聞其事謂國家不足畏復效尤爲亂勢鴟張甚中書參知政事朶兒只班發郡縣兵討之怨家誣構與其通

逮繫甚急屢捐貲賄吏尋捕如初公謀于家曰朝廷失政  
統兵者玩寇區區小醜不能平亂自此始今酷吏藉之爲  
姦謀孽及良民吾若束手就斃一家枉作泉下鬼不若入  
海爲得計耳咸欣然從之郡縣無以塞命妄械齊民以爲  
功民亡公所者旬日得數千久屯不解朝廷察其非罪奏

爲慶元定海尉使散眾各安其居

洪武九年十一月翰林  
學士承旨宋濂奉敕

撰神道碑銘其子禮請于朝留守都尉經歷天台詹鼎撰  
行狀

國珍名珍以字行世以販鹽浮海爲業長身面黑頗沈勇  
至正中同里蔡亂頭嘯聚惡少年行劫海上有司發兵捕  
逐國珍怨家陳氏誣供國珍與寇通國珍怒殺陳氏陳之  
屬訴于官官發兵捕之急國珍遂與兄國璋弟國瑛國珉

國不盡左...  
及鄰里之懼禍逃難者亡入海中旬月間得數千人劫掠  
漕糧執海道千戶事聞詔行省參政朶兒只班總舟師捕  
之兵敗反爲所執國珍因迫使請于朝下招降之詔元主  
從之遂授慶元定海尉國珍雖受官還故里而兵聚不解  
勢益暴橫 實錄方國珍本傳

國珍台之寧海人其居有山在其中曰楊氏嘗有童謠曰  
楊氏青出賊精其初亦欲爲國宣力後失賞遂出忿言曰  
蔡能爲盜我豈不能耶遂叛力能走及奔馬與兄國璋弟  
國瑛姪亞初同爲亂 草木子

谷真乃台州之土豪至正初造艦千艘于海上劫掠商賈  
集蠻卒數萬阻元之海運霸占浙東西瀕海州邑

楊氏一曰洋嶼山素無草木是年青草徧生國珍之兵果起方氏事蹟

先是蔡亂頭剽劫海商始懸格命捕之方爲台之楊氏人慕賞功官爵募眾至數千人時台州總管焦鼎等納蔡之賂薄其罪而不加誅玩忽歲月方遂入海爲寇官兵皆不戰而敗朝廷恐爲海運之梗招安之卽啖之以海運千戶及既定瀕海之民不憤與萬戶蕭戴之謀襲殺之不果又叛草木子

十年庚寅十二月己酉方國珍攻温州元史

國珍復入海燒掠沿海州郡元史素不花傳

十一年辛卯正月庚申命江漸行省左丞孛羅帖木兒討方國

珍六月孛羅帖木兒爲國珍所敗 元史

二月詔孛羅帖木兒爲江浙行省左丞總兵至慶元以泰不花諭知賊情狀遷浙東道宣慰使都元帥分兵于温州使夾攻之未幾國珍寇温州泰不花縱火焚之一夕遁去既而孛羅帖木兒密與泰不花約以六月乙未合兵進討孛羅帖木兒乃以壬辰先期至大閭洋國珍夜率勁卒縱火鼓譟官軍不戰皆潰赴水死者過半孛羅帖木兒被執反爲國珍飾詞上聞泰不花聞之痛憤輟食數日朝廷弗之知復遣大司農達識帖木邇江浙行省參知政事樊執敬等至黃巖招之國珍兄弟皆登岸羅拜退止民間小樓是夕中秋月明泰不花欲令壯士襲殺之達識帖木邇適

夜過泰不花密以事白之達識帖木邇曰我受詔招降耳  
公欲擅命耶事乃止檄泰不花親至海濱散其徒眾拘其  
器舟國珍兄弟復受官有差

元史泰不花傳

朝廷命參政孛羅討方國珍兵未交先潰郝萬戶爲所獲  
方拘制舟中使求招安郝故出高麗后位下請託得行遂  
特旨釋之進爵已拜參政嗚呼邊方貪官旣失之於始中  
宮寵后又失之於終刑賞無章紀綱大壞而中原之寇起  
矣

草木子

十二年

壬辰

三月方國珍復劫其黨下海入黃巖港台州路達

魯花赤泰不花率官軍與戰死之

元史

朝廷征徐州命江浙省臣募舟師守大江國珍懷疑復入

海以叛泰不花發兵扼黃巖之澄江而遣義士王大用抵國珍示約信使之來歸國珍益疑拘大用不遣以小舸二百突海門入州港犯馬鞍諸山國珍戚黨陳仲達往來計議陳其可憐狀泰不花率部眾張受降旗乘潮而前船觸沙不能行垂與國珍遇呼仲達申前議仲達目動氣索泰不花覺其心異手斬之卽前搏賊船射死五人賊躍入船復斫死二人賊舉槳來刺輒砍折之賊羣至欲抱持過國珍船泰不花嗔目叱之起奪賊刀又殺二人賊攢槳刺之中頸死猶植立不仆投其屍海中僮名抱琴及臨海尉李輔德千戶赤蓋義士張君璧皆死之

元史泰不花傳

五月命江南行臺御史大夫納麟給宣敕與台州民陳子由

楊恕卿趙士正戴甲令其集民丁夾攻方國珍

元史

方寇起瀕海豪傑如蒲圻趙宗戴綱司家陳子游等傾家募士爲官收捕至兄弟子姪皆殲于盜手卒不沾一命之及屯膏吝賞至於此其大盜一招再招官已至極品矣于是上下解體人不向功甘心爲盜矣

草木子

方之初亂有宣敕十數道懸以購人立功及有功亦竟不與又獲功之官于法非得風憲體覆牒文不輒命官憲使招權非得數千緡不與行遣有功無錢者事從中輟皆抱怨望其後盜塞寰區控名宣敕遇微功卽填給人己不榮之矣

同上

十二年五月方國珍寇台州自中津橋直上登樓騎屋山



肉薄臨城城中人方拒擊樓忽自壞登者盡壓死賊遂縱

火焚郭外民舍樓并毀

劉基台州路天如廟碑

八月方國珍率其眾攻台州城浙東元帥也忒迷失福建元帥黑的兒擊退之

元史

中書參知政事帖理帖穆爾出爲江浙行省左丞領征討事賊聞之因守帥吳世顯納款請降奏上有詔命左丞與南臺侍御史左答納實理同往察便宜以行招討二公至台州遣使宣諭方氏兄弟悉歸所俘民願歲帥其徒防漕糧至直沽以自效於是海上悉平

劉基天如廟碑

十三年癸巳正月丙子方國珍復降三月命江浙行省左丞帖里帖木兒江南行臺侍御史左答納失里招諭方國珍十月

庚戌從二人之請授方國珍徽州路治中國璋廣德路治中國瑛信州路治中督遣之任國珍疑懼不受命元史

十四年

甲午

四月以阿兒溫沙爲江浙行省右丞恩寧普爲本

省參知政事總兵討方國珍元史

先是帖里帖木兒等招諭國珍報國珍已降乞立巡防千戶所朝廷授以五品流官令納其船散遣徒眾國珍不從擁船一千三百餘艘仍據海道阻絕糧運以故御史臺臣糾言二人之罪命阿兒溫沙等討之元史

帖里帖木耳招諭方寇辟公爲行省都事公建議以爲方氏首亂掠平民殺官吏其兄弟宜拒而斬之餘黨宜從招安方氏懼請重賂公公不受左丞以公所議請于朝方氏

乃悉其賄使人浮海至燕京省院臺俱納之準招安授谷

真以官罷左丞輩羈管公於紹興是後方氏益橫誠意伯行狀

按誠意伯行狀與元史異蓋元史所據者一時省臺之議

與左丞輩相左者也當以行狀為正

九月方國珍拘執元帥也忒迷失黃巖州達魯花赤宋伯顏

不花知州趙宜浩以俟詔命元史

國珍攻台州久不下有漁者九人常夜從水關入城漁畢

則出既久乃就國珍獻計國珍與計而遣之一夕國珍兵

至西門漁者佯數人于西門大噪放火城中官兵盡趨救

之又數人密從東門斬關而出納外兵遂陷台州月山叢談

方氏陷温台慶三郡俱在甲午乙未間元史及實錄俱不

詳

至正壬辰春方國珍率海島貧民千餘艘突入劉家河燒海運船無算遂抵太倉大肆焚掠浙省參政寶哥樊執敬以兵數千來援遣平江奕十字軍為前鋒潰于張涇賊大獲金帛而歸

十四年國珍復率蘭秀山賊來寇水軍副萬戶董搏霄禦之于劉家河及半涇斬首數百級賊遂遁去並嘉定縣志

十五年乙未方國珍剽掠温州慶元等路朝廷招諭不下方氏事蹟

十六年丙申三月戊申方國珍復降以為海道運糧漕運萬戶兼防禦海道運糧萬戶其兄國璋為衢州路總管兼防禦海道事

元史

十七年酉方國珍據温台慶元等處 方氏事蹟

厥後汝穎兵大起海內鼎沸齊國忠襄王李察罕保釐河  
雒晉冀李思齊張思道號令關陝陳友諒明玉珍分有江  
漢荆益張士誠據淮淪公亦有慶元台温三郡之地同縣  
張子善者好縱橫之術走說公曰夷狄無百年之運元數  
將極不待智者而後知今豪傑並起有分裂之勢足下奮  
袂一呼千百之舟數十萬之眾可立而待沂江而上則南  
北中絕擅餽運之粟舟師四出則青徐遼海閩廣甌越可  
傳檄而定審能行此人心有所屬而伯業可成也公曰君  
言誠是然智謀之士不爲福先朝廷雖無道猶可以延歲  
月豪傑雖並起智均力敵然且莫適爲主保境安民以俟

眞人之出斯吾志也願君勿復言子善謝去

神道碑

八月乙丑升左丞方國珍爲江浙行省參知政事海道運糧萬戶如故

元史

公累遷至江浙行中書參知政事會有詔徵兵討張士誠公遂出師士誠知公且至遣其將史文炳呂眞統十將軍兵七萬禦公于崑山崑山去姑蘇七十里士誠之僞都在焉文炳眞陳兵城中乃以步騎夾岸爲陣士誠命游兵往來旌旗數十里不絕氣勢甚盛公曰濱海之地非四達之衢乃復參用步騎兵雖眾不足畏也公舟師僅五萬身率壯士數百趨菴子橋文炳眞使十將軍薄水戰矢石如雨公戒其眾持葦席藉塗泥冒矢石急奮夾岸之軍以火箭

亂射公燎及鬚鬢橫刃大呼而入殺兩將軍及十餘人軍  
大潰公與壯士追擊趨其中堅文炳真接戰公出入陣中  
所向輒披靡橋左右水騎迄不得成列而岸上軍又敗北  
文炳真棄馬走亡七將軍溺死者萬計公乃次兵於岸明  
日又戰七戰七捷直至城下士誠得報遣使者送款請奉  
元正朔公還遂授公節鉞鎮浙東開治于鄞元之君臣多  
公之助復數加爵賞俄至太尉江浙行省左丞相賜衢國  
公印章昆弟子姓賓客皆至大官

神道碑

僞周張士誠據姑蘇常湖等郡元患之且欲藉國珍收士  
誠因授江浙行省參知政事兄弟轉官有差令其將兵討  
士誠國珍率兄弟諸姪以舟師五萬進擊崑山州七戰七

捷會士誠亦送降款于元元從其請遂命國珍罷兵國珍  
還開治于慶元而兼領温台全有三郡之地遂以兄國璋  
弟國瑛居台姪明善居温而留弟國珉自副

實錄本傳

十六年張士誠據平江國珍已歸元以温台明三州之師  
來稱克復張氏遣其將呂珍守裔子有漕戶倪蓬頭者爲  
國珍內應潛襲呂珍珍僅以身免後張氏降元國珍復來  
寇士誠復遣呂珍迎之大破三州兵浮屍蔽江江水爲之  
不流自是方氏不敢復爲寇

嘉定縣志

神道碑但記裔子之勝而志無記三州之敗蓋各從其國  
記也

士誠屢爲我軍所敗又南與楊完者接境方國珍乘隙又



以海濱攻擊崑山乃託丁氏往來說合結為婚姻于是兩境之民稍息

秘閣元龜政要

按元授國珍參政在丁酉八月士誠降元亦在是月而政要諸書紀兩家結好乃在丙申之十二月其誤明矣姑改附于此

丁酉海寇劫崑山即國珍兵也

鄭元祐白雲海記

十八年

戊戌

方國珍遣兵襲據紹興屬縣樞密院判官邁里古思曰國珍本海賊今既降為大官而復來害吾民可乎欲率兵往問罪先遣部將黃中取上虞中還請益兵朝廷方倚重國珍資其舟以運糧而御史大夫拜住哥與國珍素通賄賂

憤邁里古思擅舉兵且恐生事卽召邁里古思至其私第  
與計事命左右以鐵鎚搥死之斷其頭擲廁溷中黃中乃  
率其眾復仇盡殺拜住哥家人及臺府官員掾史獨留拜  
住哥不殺以告于張士誠士誠乃遣其將以兵守紹興元  
邁里古思傳

戊戌十月廿三日邁里古思出兵與方谷真部下馮萬戶  
鬪不利駐軍東關單騎馳歸廿四日遲明拜召君私第議  
事至中門左右以鐵鎚搥殺之部將黃中率眾爲復仇入  
拜家舉其屍無元大索三日得于溺池中

輟耕錄

十二月遣主簿蔡元剛儒士陳顯道往慶元招諭方國珍  
時 上親取婺州

方氏事蹟諸書並云是年 上遣典籤劉辰使慶元卻國  
珍所遣侍姬而實錄不載

十九年己亥正月乙卯方國珍遣使奉書獻黃金五十斤白金  
百斤金織文綺百端實錄

蔡元剛至慶元國珍與其下謀曰方今元運將終豪傑並  
起惟江左號令嚴明所向莫敵今又東下婺州恐不能與  
抗況與抗敵者西有張士誠南有陳友定莫若姑示順從  
藉爲聲援以觀其變眾以爲然至是遣使奉書獻金幣願  
合兵其滅張士誠書略曰國珍生長海濱魚鹽負販無聞  
于時向者因怨搆誣逃死無所遂竄海島爲眾所推連有  
三郡非敢稱亂迫于自救而已惟明公倡義濠梁東渡江

左據有形勝以制四方奮敷威武以安百姓國珍嚮風慕  
義欲歸命之日久矣道路壅遏不能自通今聞親下婺城  
撫安浙左威德所被人心景從不棄獷愚猥加誨諭開其  
昏矇俾見天日此國珍所素願也謹遣使奉書上陳懇款  
或有指揮願效奔走首言爲定明神實臨 上復遣省都  
鎮撫孫養浩報之國珍雖納款然尙陰持兩端

三月丁巳方國珍遣郎中張本仁以温台慶元三郡來獻且

以其次子關爲質

關後改名明完一作亞關

上厚賜而遣之

實錄

公遣子完入侍 上喜曰英雄以義氣相許當如青天白  
日事成同享富貴何以質子爲遂使完歸公復遣使者願  
守城邑如錢鏐故事歲貢白金以給軍資 上許之然猶

自海道輸粟元都 上方勵志中原公獨屏蔽江海使者  
交于二境上惟求庇民而已 神道碑

九月甲寅遣博士夏煜授方國珍兄弟行省平章等官有差  
授方國珍福建等處行中書省平章政事國璋行中書省  
右丞國瑛行中書省參政國珉江南行樞密院僉院各給  
符印乃以本部兵馬城守俟命征討煜至慶元國珍欲不  
受業已降欲受又恐受制乃詐稱疾但受平章印告老不  
任職遇使者亦頗倨惟國珉開樞密分院署事 實錄  
國珉行用樞密院印其餘印信留而不用心持兩端 太  
祖寬容之 國初事蹟

太祖遣亞關回降以銀印令奉龍鳳正朔遣博士夏煜齊

往慶元分署 月山叢談

十月以方國珍爲江浙行省平章政事 元史

方是時元每歲遣官督國珍備海舟至張士誠所以漕米  
十萬餘石渡海北輸元都累加國珍官至太尉江浙行省  
左丞相自是國珍兄弟子姪貪虐日甚雖時遣人入貢其  
實假此以爲覘伺

二十年 庚子

正月夏煜自慶元還言國珍姦詐狀 上曰吾方致力姑  
蘇未暇與較乃遣都事楊憲傅仲彰往諭之曰吾始以汝  
爲豪傑識時務不待征討幡然歸命嘉汝之意命以高官  
兄弟顯榮自制一面豈效他人陽交陰備徒爲羈縻之國

而已豈意汝自迷惑味遠大之圖爲覆滅之計外雖納降  
內實反覆欲覘我虛實則遣質子欲卻我官爵則稱老病  
此何爲者吾寧不能遣一偏裨將十萬眾直窮海島以取  
汝耶顧以汝率先來歸姑忍須臾待汝自改耳汝及今滌  
心改過不負初心則三郡之地庶幾可全福祿庶幾可保  
不然吾恐汝兄弟敗亡妻子爲僇徒爲人所指笑夫智者  
轉敗爲功因禍爲福汝其圖之國珍不省

實錄

十一月甲寅朔復遣博士夏煜陳顯道諭國珍曰福基于  
至誠禍生于反覆譎詐者亡負固者滅隗囂公孫述之事  
可以鑒矣汝首致甘言終懷反覆大軍一出不可以甘言  
解也汝宜深思之國珍始惶懼對使者謝曰鄙人無狀致

煩訓諭使者歸遂遣謝過

實錄

方國珍既獻三郡不奉正朔 太祖累遣夏煜李謙孫養  
浩楊憲傅仲章程明善往諭之國珍答曰當初獻三郡爲  
保百姓請上位多發軍馬來守交還城池若遽奉正朔張  
士誠陳友諒來攻援若不及則危矣姑以至正爲名彼則  
無名罪我果欲從命必須多發軍馬卽當以三郡交還國  
珍願領弟姪赴京聽命止乞一身不仕以報元之恩德  
上曰姑置之俟我克蘇州雖欲奉正朔則遲矣

國初事蹟

二十一年

辛丑

三月戊寅方國珍遣檢校燕敬來謝夏煜之命且以金玉飾

馬鞍轡來獻

上卻之

實錄



太祖正克江西李善長遣其使就往進獻 太祖謂其使

曰我取天下用馬奚取此物次年國珍又進大西馬四匹

太祖曰此馬可蹋街隨賜將官克蘇州 國初事蹟

二十二年 壬寅 二月國朝苗軍降將蔣英李福叛將由台州走

福建方國璋率兵邀擊於僊居爲所敗被殺 實錄本傳

苗軍劉震蔣英等叛婺州殺首帥胡大海持其首來曰願

隸麾下眾皆賀獨公不許曰吾昔遣使效錢鏐言猶在耳

今納其叛人是見小利而忘大信也遂帥師擊之仲兄中

流矢而歿 上遣使弔祭且慰撫其遺孤 神道碑

二十三年 癸卯

二十四年 甲辰

九月方明善攻平陽參軍胡深遣兵擊敗之

實錄

先是温州土豪周宗道據温之平陽屢為明善所逼歸降于我明善恐益率兵攻之宗道求援于深深出師擊敗之遂攻下瑞安進兵温州明善懼與國珍謀輸歲貢銀二萬兩充軍費請守鄉郡如錢鏐故事 上許之命深班師

同上

二十五年<sub>乙巳</sub>十月以方國珍為淮南行省左丞相開省慶元

元史

二十六年<sub>丙午</sub>四月方國珍遣經歷劉庸等來貢白金二萬兩

實錄

十月以方國珍為江浙行省左丞相弟國瑛國珉姪明善並為江浙行省平章政事

元史

公世爲善人而其父尤柔良人弱之屢致侵蝕父歎曰吾  
諸子當有興者無久苦我其後五子果貴顯元季以公之  
貴贈曾祖祖皆行省平章勳柱國越國公父伯奇淮南行  
省左丞相上柱國追封越國公會祖妣暨兩妻董氏皆越  
國夫人 神道碑

明善小字亞初 方氏事蹟

吳元年丁二月己未

上以國珍反覆以書數其十二過 實錄

國珍既入貢復陰泛海北通擴廓帖木兒南交陳友定王  
師討姑蘇國珍擁兵坐視屢假貢獻覘勝敗爲叛服計  
上以書數其過曰當爾起事之初元尙承平天下誰敢稱

亂惟爾倡兵海隅元官皆世襲子弟顧惜妻子其軍久不知戰故臨陣而怯爾得鴟張於海隅及天下亂爾遂陷三州之地扼海道之衝竊據山島二十餘年朝送款于西暮送款于北此豈大丈夫之所爲爾過一也吾下婺時四方強敵甚多豈暇用兵海島與汝較短長爾自懷懼遣子納降吾以誠心待人不逆爾詐卽遣還爾子爾乃詭詐多端不數年閒迭生兵隙爾過二也近者浙左會稽浙右錢塘諸郡皆下爾陰蓄異志時遣人覘吾虛實爾過三也未有釁端先起猜忌自懷反側爾過四也易交而輕侮爾過五也擴廓帖木兒以曹操之姦將烏合之兵東奔西擾損師乏糧又爲李思齊張思道逐出潼關三秦已失中原徐宿

邳郡爲吾藩籬大河爲吾門戶吾舟師往來如入無人之境爾不能料中原事勢顧且泛海交好聲言擊我虛張聲勢以速怨尤爾過六也彼若倉卒有事爾隔海濱豈能應援敗亡由爾彼若無事交疏禮薄則豪傑之怨禍亂之生由此始矣爾過七也爾兄弟無功于元朝無恩于下民盜據海隅以勢要君以私賄下坐邀名爵跋扈萬狀今歸於我而又不能善保富貴欲驅民於鋒鏑爾過八也爾兵數出掠我並海之民上帝好生下民思治乃遠天虐民爾過九也爾若有大志盡驅温台慶元之民與我較勝負此果決丈夫之志也今不能此徒遣數舟狗偷鼠竊小舉而興大怨爾過十也吾遣兵入浙下湖州軍舊館張氏將士盡

皆降附遂擣姑蘇對壘深溝民安如故爾乃誘我海上土  
豪作亂近已平定匿其首惡此豈良謀爾過十一也福建  
陳友定姦謀稔惡以致阮德柔輩自相吞噬彼可合乎爾  
乃陰扇潛結遙爲聲援以詐交詐豈能長久如吾以誠待  
爾反自疑貳輒以詐罔所謂首言爲定者何在爾過十二  
也吾爲爾計當未交敵國之先不必送款納降但有豪傑  
止以平禮相好守分保民自安海隅臨事而處見幾而作  
不輕屈膝亦不生釁此爾之福民之福今大敵未至自生  
疑惑起事危身非計之善亮此非爾之情或由左右所誤  
如左右有豪傑之士能爲爾謀擇交大敵有一無二保全  
必多矣爾其深燭成敗高覽遠慮自求多福尙可圖也國

珍得書不報

七月遣使責國珍貢糧二十三萬石仍以書諭之 實錄

國珍之初降也約云杭城下卽納地來朝及克杭州據境  
自若時時遣間諜覘我虛實 上以書責之曰汝初納款  
謂杭城克卽獻土來歸此汝左右之士共保富貴之良謀  
也豈意汝懷姦挾詐陽降陰叛數相愚弄張士誠與爾壤  
地相接取爾甚易然所以不敢加兵于爾者誠以吾力能  
制之爾故得以安處海隅坐享三郡之富是吾大庇于爾  
也爾乃自爲不祥背棄信義時遭姦細覘我動靜潛結陳  
友定以圖相援彼自救不暇何暇救人爾何惑之甚也今  
明以告爾吾師下姑蘇南取温台慶元水陸並進無能禦

也爾早於此時改過效順能盡以小事大之義猶可保其富貴以貽子孫以及下人如其不然集三郡之兵與我一較勝負亦大丈夫之所爲不然舍三郡之民爲偷生之計揚帆乘舟竄入海島然吾恐子女玉帛反爲爾累舟中自生敵國徒爲豪傑所笑也非分之思不可數得爾宜慎思之書至國珍大懼集弟姪及諸將佐決去就其郎中張本仁曰江左之兵方圍姑蘇姑蘇勅敵也國富兵強高城深池懷必死之志勝負難必彼安能輕越千里而取我劉庸曰江左兵多步騎步騎平地用也施諸海濱其如吾海舟何國珍弟姪多以爲然唯正枻爭曰此二者皆非所以爲公福也惟智可以決事惟信可以守國惟直可以用兵江



左一下姑蘇出兵南向乘勝而驅責吾背叛之罪辭直而  
師壯吾誰與爲援者將一敗塗地矣莫若遣使奉書明示  
不敢背德庶幾可以解紛息兵而公得以常保富貴福及  
子孫不然禍至無日矣國珍素戇闇不能決惟日夜運珍  
寶集拒艦爲汎海計

九月甲戌朔命參政朱亮祖帥浙江衢州金華等衛馬步舟  
師討方國珍 上曰國珍魚鹽負販皆竄偷生觀望從違志  
懷首鼠今出師討之勢當必克彼無長策惟有泛海遁耳三  
州之民疲困已甚城下之日毋殺一人丁酉進攻台州方國  
瑛出兵拒戰我師擊敗之辛丑克台州國瑛奔黃巖 實錄  
國瑛聞王師至卽欲遁去其都事馬克讓白慶元還言國

珍方治兵爲城守計勸國瑛勿去始乘城拒守士卒往往  
逃潰我師攻之急以巨艦載妻子夜出與善門守黃巖亮  
祖入其城徇下仙居諸縣十月兵至黃巖州國瑛燒廨宇  
民居遁海上守將哈兒魯降

實錄

癸丑命御史大夫湯和爲征南將軍僉大都督府事吳禎爲  
副將軍帥常州長興宜興江陰諸軍討方國珍于慶元

實錄

國珍聞之益懼遂乘大舶遁入海島和與禎等引舟乘潮  
夜入曹娥江夷壩通道出其不意直抵車廐

方氏事蹟

己巳朱亮祖攻温州方明善挈家遁去

同上

亮祖自黃巖進兵温州擊敗國珍部將于城南七里破其  
太平寨遣指揮張俊湯克明攻其西門徐秀攻東門柴虎

匡衣冠志書田卷ノ  
將遊兵應援晡時克其城獲其員外郎劉本方明善先已挈妻子遁去亮祖分兵徇瑞安樞密同僉謝伯通以城降  
實錄

十一月癸酉朔亮祖率舟師襲敗方明善于樂清之盤嶼追至楚門海口遣百戶李德招諭之  
同上

亮祖陣于温州城南七里其將黃宗雲朱景達來降亮祖納之授以元帥時李文忠遣耿天璧將蘇州兵抵温州太平嶺下方明善遣衛士拒戰我師失利宗雲等叛去明日天璧復引兵攻之明善來禦奮擊大敗之逐北至生婁門外下遂破其太平寨亮祖分兵急攻遂克其城明善遁去宗雲等復詣章溢降溢怒其反覆戮之

十一月癸未大明兵取慶元路

元史

湯和兵至紹興渡曹娥江進次餘姚降其知州李樞上虞縣尹沈煜遂進兵慶元府判徐善等出降方國珍部下驅乘海舟遁去和率兵追之國珍以眾力戰我師擊敗之禽其僞副樞方惟益元帥戴廷芳等國珍率餘眾入海和還師慶元徇下定海慈谿等縣丁酉和等兵至車廐會降者言方氏已挈家入海禎卽引師追至盤嶼及之國珍還師來拒合戰至夜三鼓敗之國珍復挈妻子棄其師而遁盡獲其戰船輜重而還遂下慶元分兵戍之乙未和等進兵

温州

己丑方國珍入海島命中書平章廖永忠爲征南副將軍帥

師自海道會和討之 實錄

方國瑛遣經歷郭春及其子文信詣朱亮祖納款壬辰方國珍部將徐元帥李僉院等率所部詣湯和降國珍見諸將皆叛不得已亦遣郎中承廣員外郎陳永奉書于和乞降又遣其子明完明則從子明輦等納其省院及諸司銀印銅印二十六并銀一萬兩錢二千緡于和丙申朱亮祖兵至黃巖南監方國瑛及其兄子明善來見送之建康實錄十二月方國珍歸於大明 元史

大將軍平姑蘇縛士誠獻京師公以久疾不視事又幕府賓客無所陳說失朝賀禮 上怒大軍且壓鄞公憂懼不知所爲乃封府庫籍民數使城守者出迎躬挈妻孥避去

海上使完奉表謝曰臣聞天無所不覆地無所不載王者體天法地於人無所不容臣荷陛下覆載生成之德久矣安敢自絕于天地敢一陳愚衷惟陛下裁察臣本庸才處乎季世保境安民非有黃屋左纛之念曩者陛下霆擊電掣之師至於婺州臣愚以爲天命有在遣子入侍于時固已知陛下有今日矣所謂依日月之末光望雨露之餘澤者也而陛下開誠布公賜手書歸質子俾守郡縣如錢鏐故事十年之閒與中吳角立皆陛下之賜也逮天兵下臨吳會臣嘗上書謂朝定杭越則暮歸田里不意今年以來老病交攻頓成昏昧而弟兄子姪志意不齊致煩陛下興問罪之師方懷憂懼未能自明而大軍已至台温令臣計

無所出雖遣使再三而承詔之師勢不容已是以封府庫  
開城郭以俟王師之至然猶未免爲浮海之計者昔有孝  
子于其親也遇小杖則受大杖則走臣之事適與相類雖  
然臣一介草莽亦安敢自絕于天地故每自思欲面縛待  
罪闕庭復恐陛下萬一震雷霆之怒天下後世議者不謂  
臣得罪之深將謂陛下不能容臣豈不累天地之大德哉  
謹昧死奉表以聞俯伏俟命 上覽表趣公入覲公至京  
師 上且喜且讓曰若來何晚也公卽叩首謝罪 神道碑  
上始怒其反覆覽表憐之乃賜書曰吾當以汝此誠爲誠  
不以前過爲過汝勿自疑 實錄

辛亥方國珍及其弟國珉率見湯和于軍門送國珍等赴京

師實錄

得其部卒九千二百人水軍一萬四千三百人官吏六百  
五十人馬一百九十匹海舟四百二十艘糧一十五萬一  
千九百石戊午徙方國珍所署偽官左右丞元帥劉庸等  
居于濠州 實錄

國珍實欲泛海以風不順不得已歸命 月山叢談

洪武二年十月以方國珍爲廣西行省左丞李思齊爲江西  
行省右丞俱不之官食祿于京師 實錄

三年十二月子孫世襲指揮僉事 同上

七年三月壬辰廣西行省中書左丞方國珍卒 同上

太祖命湯和攻慶元國珍懼十年不改正朔下海避之繼



又請降惟姪明善拒敵後亦降太祖以國珍既降不念舊惡授廣西行省參政起造千步廊一百間報功其次子亞關獻三郡海船水手數萬及建言沿海築城立衛所防倭

太祖從之

國初事蹟

谷真朝畢宣升奉天殿賜以龍衣冠帶命與大臣班坐而

宴

俞本紀事錄

上以公誠懇遇之特厚每賜宴饗皆與功臣列坐未幾有廣西左丞之命俾奉朝請一日侍上燕坐不能興輿至第則成末疾矣上數遣中使賜問官其子禮廣洋衛指揮僉事完虎賁衛千戶所鎮撫令得親見之已而疾革

上遣中使問所欲言公指使者中坐良久曰臣荷陛下厚

恩無尺寸之功而子孫椎魯絕不知人間事幸陛下以臣故曲加保全則臣感恩九泉爲犬馬報陛下矣言畢而逝

上親御翰墨爲文命官致祭皇太子暨親王亦如之中書省大都督府御史臺亦皆奉 旨臨祭成禮而去先是

公病時嘗屬諸子曰我卽死無歸葬海濱主上遇我過厚可求京城外之地埋焉且使後人習于禮義及是卜城東二十里玉山之原禮部爲奏請 上欣然可之 神道碑

國珍與兄弟俱不知書時佐其謀議者同邑劉仁本張本仁鄭永思永嘉正枏輩惟正枏頗廉慎餘皆由州縣胥吏進用貪賄營私無深慮遠略其兄弟子姪分治二郡政刑租賦率任意爲輕重姪明善居温頗循法度而兄國璋弟

國瑛居台惟以買田造舟殖貨為富家計及國珍降其參  
佐皆杖死惟赦耜仕為韶州知府

實錄本傳

國初羣雄事略卷八

國初羣雄事略卷九

虞山錢謙益牧齋甫編

擴廓帖木兒

擴廓帖木兒潁州沈丘人本姓王氏名保保察罕帖木兒之甥自幼養以爲子元拜太尉中書右丞相封河南王洪武八年八月卒於哈刺那海之衙庭

至正二十三年

壬寅

六月戊子田豐及王士誠刺殺察罕帖木兒眾乃推察罕帖木兒之子擴廓帖木兒爲總兵官復圍益都詔授擴廓帖木兒光祿大夫中書平章政事兼知河南山東等處行樞密院事同知詹事院事一應軍馬並聽節制

元史順帝本紀

王保保者察罕甥也嘗養爲子察罕入城之夕諸將惶惑  
不知所從軍中頗有異論同僉白鎖住乃察罕舊人有機  
識遽倡言曰總兵奉朝廷命討逆寇總兵雖死朝命不可  
中止況今總制官王保保曾爲總兵養子朝廷又賜其名  
擴廓若立以爲主總兵雖死猶不死也于是率先下拜眾  
亦皆拜人心始定

庚申外史

二十一年四月察罕遣其子副詹事擴廓帖木兒貢糧至  
京師皇太子親與定約遂不復疑

元史本紀

十一月乙巳擴廓帖木兒復益都田豐等伏誅庚申詔授擴  
廓帖木兒太尉銀青榮祿大夫中書平章政事知樞密院事  
太子詹事便宜行事襲總其父兵

元史

擴廓帖木兒既襲父職身率將士誓必復讐人心亦思自奮圍城益急遂克之盡誅其黨取田豐王士誠之心以祭察罕帖木兒

元史

十二月元將擴廓帖木兒遣尹煥章以書來獻馬

實錄

先是察罕帖木兒駐兵汴梁上嘗遣使通好既而察罕亦以書來聘上以前所遣使不返不之荅察罕死擴廓帖木兒代領其眾乃遣煥章送我使者自海道來還因以

馬來獻

實錄

至正二十三年

癸卯

正月丙寅

上遣中書省都事汪河送尹煥章歸汴以書報擴廓帖木兒

實錄

書略曰元失其馭中原鼎沸廟廊方岳之臣互相疑沮喪  
師者無刑得志者方命悠悠歲月卒致土崩閣下先王奮  
起中原英勇智謀過于羣雄聞而未識是以前歲遣人直  
抵大梁實欲縱觀未敢納交也不意先王捐館閣下意氣  
相期遣送使者涉海而來深有推結之意加之厚貺何慰  
如之薄以文綺若干用酬雅意自今以往信使繼踵商賈  
不絕無有彼此是所願也

實錄

二月擴廓帖木兒自益都領兵還河南三月詔遣中書平章  
政事愛不花分省冀寧擴廓帖木兒遣兵據之六月戊申孛  
羅帖木兒遣竹貞等入陝西據其省治擴廓帖木兒遣部將  
貊高與李思齊合兵攻之竹貞出降八月戊午孛羅帖木兒

言擴廓帖木兒踵襲父惡有不臣之罪乞賜處置

字羅帖木兒自察罕帖木兒既沒後數以兵爭晉冀雖屢  
諭解之而警隙日深二十三年擴廓帖木兒駐太原與字  
羅帖木兒構兵御史大夫老的沙與知樞密院事禿堅帖  
木兒得罪于皇太子皆奔大同字羅帖木兒匿之營中

至正二十四年

甲辰

三月詔數字羅帖木兒罪解其兵權削其

官爵字羅帖木兒不受詔八月字羅帖木兒大舉犯闕擴廓

帖木兒部將白鎖住奉皇太子奔于太原

元史

十二月乙巳 上遣使以書與擴廓帖木兒

實錄

書曰嘗觀英雄得志於天下也何其難哉立於始或沮於  
終成於前或墜於後此古今之所深惜也曩因元政不綱



中原大亂其命將出師罔有攸濟者閣下之先人潁川王  
以一軍之卒用於眾敗之餘僅得加兵於齊魯功未及成  
而禍嬰不測使一時豪傑莫不悼惜閣下孝切於中勇發  
於義鼓率憤旅竟雪讐恥以成父志方其臨難不撓意氣  
慷慨激厲三軍雖李存勗之規略莫是過潁川爲不死矣  
邇聞北庭多事變生肘腋控制河朔挾令夷夏孛羅犯闕  
古今大惡此政閣下正義明道不計功令之時也夫以閣  
下雄才取之有餘然常勝之家意多輕敵應變之術不可  
不審今閣下居河南四戰之地承潁川新造之業邊庭未  
固近郊多壘其所以軍民相附鄰與不窺者誠潁川存日  
能盡撫養盟好之道而人不忍遽絕也或孛羅侵寇不已

閣下何靳一介之使渡江相約予地雖不廣兵雖不强然  
春秋卹交之意常竊慕焉且亂臣賊子人得而討之又何  
彼此之分哉況予近平僞漢四境已安正息兵養銳之時  
豈不往助閣下乎且英雄豪傑相與之際正宜開心見誠  
共濟時艱毋自猜阻失此舊好茲專人備道斯忱惟閣下  
圖之

至正二十五年己三月皇太子下令擴廓帖木兒軍中討孛  
羅帖木兒七月孛羅帖木兒伏誅擴廓帖木兒扈從皇太子  
入朝九月詔拜擴廓帖木兒爲太尉中書左丞相錄軍國重  
事同監修國史知樞密院事兼太子詹事閏十月辛未詔封  
擴廓帖木兒河南王代皇太子親征

元史

伯撒里累朝舊臣而擴廓帖木兒以後生晚出乃與並相

居兩月卽遣南還視師

元史察罕傳

擴廓居軍中久樂縱恣無檢束居京師兩月怏怏不樂朝士往往輕之謂其非根腳官人左右勸擴廓請出治兵江淮詔從之

庚申外史

是年七月甲子上遣使以書與擴廓帖木兒

寶錄

書曰曩者初無兵端尹煥章來得書惠騎卽遣汪河同往爲生者賀沒者弔使者去而不回復遣人往皆被拘留且閣下昔與孛羅搆兵雌雄未決尙以知院郭雲同僉任亮攻我景陵掠我沔陽予思此城雖元之故地久在他人之手予從他人得之非取於元也閣下外假元名內懷自造

一旦輕我遂留前使子雖不較但以閣下內難未除猶出兵以欺我使其勢專力全又當何如閣下果若挾天子令諸侯創業於中原則當開誠心示磊落睦我江淮今乃遣竹昌忻都率兵深入淮地殺掠人民殆非所宜況有自中原來者備言張思道李思齊等連和合從專併閣下此正可慮之秋安可坐使西北數雄結連關內反舍近圖欲趨遠利獨力支吾非善計也予嘗博詢廣采聞中軍將欲爲變恐不利於閣下故再遣人敘我前意述我所聞閣下其圖之節次使命若能遣回庶不失舊好惟亮察焉

十月徐達出兵淮東 上遣使諭之曰邇聞王保保兵入關中爲李思齊張思道逐出潼關還至汴梁復東取樂安

又爲俞寶所敗追過清河溺死者甚眾今保保驅其人民已北遁矣孔興脫烈伯天保奴兵走三晉汴梁唐鄧之間餘兵據守此迤北消息汝宜知之

寶錄

思道卽良弼

至正二十六年

丙午

二月擴廓帖木兒遣河南調度各處軍馬

陝西張良弼拒命三月擴廓帖木兒遣兵西攻張良弼於鹿臺李思齊脫烈伯孔興等兵皆與良弼合

元史

擴廓旣出無意治兵欲廬父墓側或曰總兵旣受朝命不可中止擴廓左右有孫翥趙恆者儉人也畏江南強盛欲故緩其計以容其奸謂擴廓曰丞相總天下兵肅清江淮兵法欲治人者先自治今李思齊脫里白孔興張思道四軍坐食關中累年不調丞相合調四軍南出武關與大軍

併力渡河彼若不受調則移軍征之據有關中四軍惟丞相意所使不亦善乎擴廓欣然從之于是分撥關虎等統兵從大興關渡河以俟先劄付調關中四軍張思道脫里白孔興俱不受調李思齊得調兵劄大怒罵曰乳臭小兒黃髮猶未退而反調我耶我與汝父同鄉里汝父進酒猶三拜而後飲汝於我前無立地處而公然稱總兵調我耶令各部曰一戈一甲不可出武關王保保來見則整兵殺之擴廓自是進兵關中兩家相持一年前後百戰勝負未決而國家大事去矣

庚申外史

二月 上聞王保保欲南攻兩淮遣使諭徐達于高郵已而王保保聞有備竟不至

實錄

五月徐達克安豐聞王保保欲侵徐州卽分兵趨徐旣而  
兵至王保保大敗而去 同上

是年七月辛巳朔 上遣使以書與擴廓帖木兒

實錄

書曰曩者尹煥章來隨遣汪河報禮至今不還予思閣下  
之意當此之時孛羅提精兵往雲內與京師密邇其勢必  
先挾天子閣下恐在其號令中故力與之競若歸使者必  
泄其謀故留而不遣閣下豈不知春秋戰國豪傑之王平  
居則謀信脩睦朝聘以時如季札至魯請觀周樂韓起來  
聘因知周禮未聞有拘留之典也有事則遠交近攻合從  
連衡以卹鄰國以保宗社至於觀兵約戰使命往來猶懼  
後期相誤亦未聞有拘留者古人誠信相待如此惟春秋

有鄭告絕於楚楚人執良霄漢累伐匈奴匈奴拘蘇武此  
夷狄報怨之淺見豈意閣下反效之予亦不以此介意予  
嘗言齊有十二山河桓公因之以九合諸侯秦有百二山  
河周漢據之以統天下三晉表裏山河晉文以之世主霸  
業幽燕北有居庸南阻三關天下都會此四要之地閣下  
兼得而跨有之當留意於此閣下自以智高勢大傲然不  
答亦不復留心於此方且千里裹糧遠爭江淮之利是閣  
下棄我舊好而生新釁也兵勢旣分未免力弱是以亭羅  
雖死餘孽跳梁於西北鳳翔鹿臺之兵合黨而東出俞保  
拒戰于樂安王仁逃歸于東齊幽燕無腹心之託若加以  
西南之兵四面並起當如之何此皆中原將士來歸者所



說豈不詳於使臣復命之辭閣下拘使臣果何益哉意者  
閣下不過欲挾天子令諸侯以效魏武終移漢祚然魏武  
能使公孫康擒袁尚以復遼東使馬超疑韓遂以定關中  
皇后太子如在掌握中方能僞定中原閣下自度能垂紳  
搢笏決此數事恐皆出魏武下矣且古之爲國者不獨君  
能斷於上臣亦善謀於下漢王在成舉待楚使以草具待  
亞父之使以太牢從陳平之計也禮雖有厚薄未嘗敢拘  
留也拘留之意雖出閣下所主亦可見謀臣又出陳平之  
下矣事皆如此魏武之業豈得成哉倘能幡然改轍續我  
舊好還我使臣救災恤患各保疆宇則地利猶可守後患  
猶可緩爲閣下利豈淺淺哉如或不然我則整舟楫乘春

水之便命襄陽之師經唐鄧之郊北趨嵩汝以安陸沔陽  
之兵掠德安向信息使安豐濠泗之將自陳汝擣汴梁徐  
邳之軍取濟寧淮安之軍約王信海道舟師會俞寶同入  
山東加以張季及天保奴腹心之疾此時閣下之境必至  
土崩瓦解是拘使者之計不足爲利而反足以爲害矣惟  
閣下與眾君子同謀之毋徒獨斷以遺後悔

十月擴廓帖木兒遣其弟脫因帖木兒及貊高完哲等駐兵  
濟南以控制山東

元史

擴廓由懷慶屯彰德彰德蓄積糧草十萬坐食之帝始疑  
擴廓有異志曰擴廓之出爲清肅江淮也不肅清江淮而  
結怨關中關中之戰雌雄未決而復移兵彰德豈欲窺我

京師耶又怒其后及太子曰汝母子誤我天下太子致被  
捶擊走而免朝廷屢促擴廓南征不得已命母弟脫因帖  
木兒及貊高完仲宜駐兵濟寧鄒縣等縣名爲保障山東  
且以塞南軍入北之路

庚申外史

皇太子之奔太原也欲用唐肅宗靈武故事因而自立擴  
廓帖木兒與孛蘭奚等不從及還京師皇后奇氏傳旨令  
擴廓帖木兒以重兵擁太子入城欲脅帝禪之位擴廓帖  
木兒知其意比至京城三十里卽散遣其軍由是皇太子  
心銜之及是屢趣其出師江淮擴廓帖木兒第遣其弟及  
部將以兵往山東而西兵終不解帝又下詔和解之顧乃  
戕殺詔使天保奴等而跋扈之跡成矣

元史

至正二十七年丁未

正月李思齊張良弼脫列伯自會于含元殿基推李思齊爲

盟主同拒擴廓帖木兒

元史

是月甲辰 上遣使與擴廓帖木兒書

實錄

書曰蓋聞有匡天下之志者必有容天下之量然後能成  
安天下之功使其規模狹隘執見不廣其爲量也小矣又  
何能成安天下之功哉予自起義以來拓地江左閣下之  
先王以興復爲名提兵河北相去遼遠各天一涯繼聞令  
先王去世閣下克成其功一旦以尹煥章齎書致禮跋涉  
而來使予踴躍興起乃知閣下能行令先王未行之事豈  
不爲之快然用遣汪河致禮同往爲死者弔生者慶初非

無故也及汪河去而不還予初不能無疑然久而自釋者  
政以此時孛羅跋扈倒持國柄元之興替在其掌握故閣  
下以靜御動一則恐起天下豪傑之心二則恐出孛羅自  
爲之後汪河之留似有說矣茲歷歲久終不見還乃知閣  
下執見不廣度量不弘何自信其始而不信其終耶予請  
復以古人之事言之昔春秋之世諸侯分治亦有以社稷  
爲重生靈爲念者故朝聘以時會盟以道且如魯襄公卽  
位之始衛使女叔晉使知武子來聘襄公亦以季武子如  
衛穆叔如晉此交好之閒未嘗執其使者齊桓公伐楚楚  
使行人來聘師乃次于陘此交兵之際亦未嘗執其使者  
古人豈不思一介之使不過將誠導意所拘者小所失者

大也況閣下控守之地東連齊岱西距秦隴北接幽薊南  
抵長河地非不遠兵非不多所慮者張思道操刃于潼關  
李思齊抗衡于秦隴俞寶之兵蓄變于肘掖王信之眾生  
釁于近郊恐閣下自以功成名遂安如泰山置之不聞坐  
使諸雄連結禍幾一發首尾莫救此深爲閣下惜也所以  
數四遣人喋喋奉書瀆聽者是予欲盡一得之愚於閣下  
閣下何爲自矜拘使不答聞者禍起山東兵連秦塞幽并  
溷撓鼎沸不寧此皆予前日屢告之言爲閣下今日明驗  
閣下何不取鑒焉抑又聞古之立事業者必取士之多聞  
博學以廣其才深謀遠慮以益其智今閣下用兵中原迨  
及十載幕下豈無其人乎使有其人不知以衛晉之使於

魯也爲何如魯之復命於衛晉也爲何如設曰各盡其禮則當磊磊落落竭忠言於閣下執此爲法卽遣能使刻日將命以汪河錢禎等還豈惟不失前盟亦可取信於天下使其不然是又開我南方之兵端爲彼後時之戰患禍經日嬰惡貫日積強敵以增仇讐不解閣下雖深謀如莽操詭計如懿溫英雄滿前何以取生古云功被天下守之以遜富有四海守之以謙況其爲臣者乎閣下其深思之

二月擴廓帖木兒遣左丞李二侵徐州指揮傅友德擊敗之生擒李二

實錄

徐達圍蘇州

太祖特命指揮傅友德領馬軍三百與徐

州陸參政出哨濟寧以警中原

國初事蹟

四月 上語侍臣曰靜觀元臣依違者十八九假恢復爲名惟擴廓帖木兒耳又爲諸將所沮勢不能展久不進兵必生疑閒況其下皆四集之民師老眾潰將不過一匹夫耳而彼尙拘吾信使撓我邊境豈識時務者哉

實錄

是月遣使遺河南擴廓帖木兒陳州譚右丞貊高脫因帖

木兒等紗羅葛布有差

同上

八月丙午詔命皇太子總天下兵馬擴廓帖木兒領本部軍馬肅清江淮李思齊等分兵進取其濟時艱擴廓帖木兒不肯受分兵之命貊高關保等皆叛詔黜其兵權就命貊高討之壬子爲皇太子立大撫軍院總制天下軍馬專備擴廓帖木兒

元史



二十七年擴廓增兵入關日求決戰張李軍頗不支使人  
求助於朝廷朝廷因命左丞袁煥知院安定臣中丞明安  
帖木兒傳旨令兩家罷兵孫翥進密計曰我西事垂成不  
可誤聽息兵之旨且袁煥貪人也此非其本意可令在京  
藏吏私賄其家則袁必助我袁果私布意于擴廓曰不除  
張李終爲丞相後患於是攻張李益急七月翥恆復進計  
曰關中四軍李思齊最強思齊破則三軍自下矣今關中  
兵將彼此相持不決所畏者惟貊高耳宜急抽貊高一軍  
疾趨河中自河中渡河擣鳳翔覆思齊巢穴則渭北之軍  
一戰可降此唐莊宗破汴梁之策也擴廓即日從其計貊  
高部將多孛羅之黨行至衛輝夜聚議曰朝廷用我敵南

軍今李思齊乃官軍也以官軍殺官軍如何于是河西平  
章船張知院沙劉參政拔劍誓眾曰不必多言五鼓罷扶  
貊高作總兵不從則殺作血城以去八月六日天未明如  
其言以叛貊高卽使守領官胡安之控告朝廷使謝雪兒  
北奪彰德僞爲使人以入殺擴廓守將范國瑛劉沙西奪  
懷慶守將黃瑞覺之閉城不得入朝廷方議奪擴廓兵柄  
見貊高奏至大喜陞貊高知院兼平章總河北軍且詔擴  
廓率潼關以東兵下淮南李思齊等四軍出武關下襄漢  
貊高率河北軍與也速及脫因帖木兒完者仲宜兵下淮  
東然脫因帖木兒盡劫掠山東以西民畜西聚衛輝擴廓  
盡率河雜民兵北渡懷慶貊高懼擴廓兄弟夾攻亦盡劫

掠衛輝民畜北入彰德朝廷無如之何有帖臨沙伯元臣  
李國鳳者進謀于太子于是開大撫軍院于京師天下兵  
馬省臺部院皆受節制以貂高首倡大義所部將士皆賜  
號忠義功臣

庚申外史

九月戊戌 上又以書遺擴廓帖木兒

實錄

書曰曩者累遣使皆被拘留未審閣下雅意若何今都事  
李節思歸特遣人送去所拘使者亦望發還方今天下豪  
傑如萌芽之發尙未長成閣下如存大義宜整師旅聽命  
於朝令四境貢賦入京或時赴朝廷與君共謀大事以安  
天下可也不然名爲臣子而朝廷之權專於軍門縱此心  
自以爲忠安能免於人議若猶豫不決恐變生部屬事有

難言閣下果忠於君當以赤心事之若有他圖速宜堅兵以固境土予近於九月初八日削平姑蘇張氏江南已定東連大海西巴蜀南及嶺廣止有閩中一區已遣偏師征討旦夕必下即日諸軍屯駐在內居閒養銳閣下如欲借力但遣一使至即時調發應援薄有金織文綺四端用見遠意

十月壬子詔擴廓帖木兒落太傅中書左丞相并諸兼領職事依前河南王以汝州爲食邑與弟脫因帖木兒同居河南府而以河南府爲梁王食邑凡所總諸軍命諸將分領之擴廓帖木兒不受詔卽退軍屯澤州 元史

十一月擴廓自懷慶北據澤州 庚申外史

十二月 上諭山東所俘楊左丞等曰古之忠臣良將臨大事當大任者身貴而愈謙權盛而愈下敵勝而愈戒故能立功於當世流芳於無窮王保保本一孺子承李察罕餘烈驟得重權恢復山東河南北諸郡遽襲王爵遂萌驕縱之心豈有豪傑之見使其能知禮義欲爲一代中興名將則必盡忠于元凡閫外生殺之權專之可也至於選法錢糧必歸之朝廷重兵在手攻戰守禦必盡其心若夫成敗利鈍一聽于天以此存心是爲忠臣使其不能出此分兵以守要地 仕賢智去其儉邪釋其私忿一心公忠凡事稟於天子不失君臣之禮功成名立此又其次也今王保保不此之務自除官職其麾下稱左右丞參政院官不

可勝數而各處錢糧皆收入軍中不供國用此與叛亂何  
異名雖尊元實則跋扈若一旦爲敵國所敗天下後世將  
謂何如是遺臭也古之賢哲寧如是乎

實錄

是月大軍至濟南元平章忽林台詹同脫因帖木兒先驅  
人民引軍遁去

同上

洪武元年

至正二十八年戊申正月朝廷命左丞孫景益分省太原關保  
以兵爲之守擴廓帖木兒遣兵據太原盡殺朝廷所置官二  
月壬寅朔詔削其爵邑令諸軍共討之丙辰擴廓帖木兒自  
澤州退守平陽關保據澤潞二州與顏高合是月大明兵  
至河南李思齊張良弼皆遣使詣擴廓帖木兒告以出師非

臣不學五書四考才

本心乃解兵西還 元史

朝廷誘擴廓將李景昌封為國公景昌以汴梁歸之誘關

保亦封為許國公亦以晉冀歸之擴廓退據平陽 庚申外史

三月己亥大將軍徐達兵至陳橋左君弼竹昌迎降汴梁守

將李克彝夜驅軍民遁入河南 景昌 克彝字 四月戊申兵至河南

塔兒灣詹同脫因帖木兒戰敗於雒水之北收散卒走陝州

李克彝走陝西河南行省平章梁王阿魯溫以梁王金印出

降河南平

阿魯溫者察罕帖木兒父也 實錄

是月馮宗異兵至陝州脫因帖木兒遁去進攻潼關李思

齊棄輜重走鳳翔張思道走鄜城 同上

四月大軍平汴梁河南諸州相次降附擴廓退據太原五月詔下勦除擴廓令關保與貊高合勢攻其東李思齊張思道脫里白孔興合軍攻其西

庚申外史

五月擴廓帖木兒遣尙書蔣也先參政溫某自太原以馬三匹白金二錠詣大軍脩饋禮徐達受馬反金遣舍人王銘送也先赴京仍遣溫參政還報擴廓

實錄

五月庚寅 車駕幸汴梁

實錄

上幸汴遣老保招諭王保保保保鳩殺之老保姓李氏一名保保陽武縣中智保人從察罕起義沈正復羅山縣除澤州路治中後平方脫脫之亂老保以功改除樞密院知院守澤州復隨察罕攻山東察罕死與其甥王保保攻拔



益都遂陞平章政事留守丁未十一月城破被執實錄

六月庚子朔大將軍達自河南至行在上問取元都計

達曰臣自平齊魯下河雒王保保逡巡太原徒爲觀望今潼關又爲我有張思道李思齊失勢西竄元之聲援已絕臣等乘勢擣其孤城必然克之同上

是月上遣人祭故忠襄王李察罕曰草之勁者非疾風不顯人之忠者非亂世難名爾李將軍當中原擾攘元政不綱大臣竊命守將擅兵于外是致干戈鼎沸國勢日危人將以爲元無人矣何將軍之忠義倡農夫爲三軍拔智勇以上聞頒爵以官之明其分數義旗舉而兵興齊魯強兵僅能固守爾能陳兵於野請命於朝進退有方君命是

聽當是時忠心昭如五曜號令嚴若冰霜所以動天地而感鬼神以其忠之所致夫何兵既勝志少盈納逋逃釋有罪忠義漸虧鬼神鑒見俄而禍膺不測殞於敵手然忠未終而奸未顯壽不期年果屬何耶豈果竭忠以身先而致是歟抑人臣之有將而若此歟噫子數其事而醜之猶生之對也靈醮而往予紀而歸誅心之言爾其聽乎

御製文集實錄

上幸河南遣人具牲醴祀齊王李察罕墓察罕元追封齊王又以其甥王保保總山東山西番漢兵上欲其來附娶其妹爲秦王妃令民數戶守墓

俞本記事錄

七月貊高關保進攻平陽閏月己亥朔擴廓帖木兒擒貊高

關保詔關保貊高閒謀搆兵依軍法處治關保貊高皆被殺  
貊高逼太原城爲陣貊高輕脫從數騎巡陣擴廓部將毛  
翼望見易旗幟駐兵于其西角貊高誤入其陣擒之關保  
營在貊高西未及布陣縛貊高示之皆潰關保亦被擒兩  
部將士皆降于擴廓

庚申外史

丁巳詔罷大撫軍院復命擴廓帖木兒依前河南王太傅中  
書左丞相以兵從河北南討甲子擴廓帖木兒自平陽退守

太原 大明兵至通州丙寅帝北奔八月庚午 大明兵入

京城國亡

元史

朝廷聞關保貊高軍敗大驚遽罷撫軍院歸罪太子殺伯  
元臣李國鳳盡復擴廓官爵閏七月差哈完太子來督擴

廓出援燕京擴廓得詔乃提兵向雲中或曰丞相率師勤  
王宜出井陘口向真定與河間也速軍合勢可以邀截南  
軍若入雲中至燕京迂途千里無乃不可乎擴廓曰我潛  
師由紫荆關口入出其不意豈不可乎趙恆曩元輝曰朝  
廷開撫軍院步步要殺丞相乃要勤王我駐軍雲中觀其  
成敗爲計耳後七月二十七日大軍至通州二十八日夜  
帝卽卷其子女玉帛出居庸關遁入上都庚申外史  
詔擴廓帖木兒以兵從河北南討也速趨山東禿魯出潼  
關李思齊出七盤金商以圖復汴雜未幾也速兵潰禿魯  
思齊兵亦未嘗出擴廓帖木兒自晉寧退守冀寧不敢復  
南向事已不可爲矣元史察罕帖木兒傳

是月壬申大將軍遣故元尚書九住還太原告諭擴廓帖

木兒

癸未命大將軍徐達副將軍常遇春率師取山西是月又命

偏將軍湯和右副將軍馮宗異俱率師從大將軍取山西實錄

九月壬申馮宗異湯和兵至太行山碗子城破其關癸酉

取澤州元平章賀宗哲張伯顏等遁去擴廓帖木兒部將

平章韓札兒毛義以馬步兵來攻楊景張斌等往援大戰

于韓店我師失利實錄

是月大都督府都事汪河癸卯歲奉使擴廓帖木兒被拘

于陝州者六年至是始還以為吏部侍郎同上

十二月丁卯朔大將軍徐達克太原擴廓帖木兒宵遁降其

眾實錄

大明兵至太原擴廓帖木兒即棄城遁領其餘眾西奔於

甘肅 元史察罕帖木兒傳

師次太原擴廓帖木兒兵尙盛中山王夜劫其營擴廓中

傷宵遁 天潢玉牒

十一月擴廓兵數十萬駐太原十二月大將白碗子城入

破擴廓于澤潞 是月擴廓部將賀宗哲來援晉冀駐龍

鎮衛口子去太原七十里而大軍先鋒常遇春夜砍擴廓

營侵及中軍擴廓匹馬隻鞞夜遁于是晉冀之地皆平 庚申

外史

元主北奔命擴廓帖木兒復北平因是率兵出雁門關將

由保安州經居庸關以攻北平達聞之謂諸將曰王保保率師遠出太原必虛北平孫都督總六衛之師足以鎮禦我與汝等乘其不備直抵太原傾其巢穴則彼進不得戰退無所依此兵法所謂批吭擣虛也若彼還軍救太原則已爲我牽制進退失利必成擒矣諸將皆曰善遂引兵徑進擴廓帖木兒至保安州聞之果還軍其鋒甚銳副將軍常遇春謀於達曰我騎兵雖集而步兵未至未可與戰莫若遣精兵夜襲其營其眾可亂主將可縛也達然之達兵至太原兩軍對壘列營二十餘里相持凡三日達選善劫營軍師夜劫之河南王覺單騎而遁達令汪興祖追襲至大同不獲克其城會擴廓帖木兒部將豁鼻馬潛遣

人約降且請爲內應達於是遣兵夜襲其軍擴廓帖木兒  
方然燭坐帳中使兩童子執書以侍眾覺亂擾擴廓帖木  
兒倉猝不知所出亟納鞞未及竟跣一足踰帳後出乘驛  
馬從十八騎遁去迨旦豁鼻馬遣其子來報達等勒兵進  
營于太原城西豁鼻馬以其將士降得兵四萬人馬四萬  
餘匹擴廓帖木兒奔大同遇春以兵追之至忻州不及而  
還擴廓帖木兒遂走甘肅

俞本記事錄

洪武二年記四月右副將軍馮宗異兵至臨洮李思齊降張  
思道亦以慶陽降于我已而復叛

初張思道在慶陽聞王師克臨洮懼而走寧夏使其弟良  
臣與平章姚暉守慶陽思道至寧夏與金牌張俱爲擴廓



帖木兒所執徐達既下平涼卽謀取慶陽湯和部將謝三往招良臣遂以城降達遣薛顯將兵赴慶陽良臣出迎匍伏道左逮暮以兵劫營我師迸散顯被傷走還良臣驍勇善戰軍中呼爲小平章又慶陽城高險可據以守其兵又精悍養子七人皆善戰軍中語曰不怕金牌張惟怕七條鎗又倚其兄與王保保爲聲援賀宗哲韓禮兒爲羽翼姚暉葛八之徒爲牙爪故復據慶陽以叛欲拒守以成大功達恐其黨與相扇爲聲援先遣兵鈔其出入之路六月達駐師東原分遣諸將圍其城良臣遣竹奇往寧夏求援被執于環州又獲王保保謀者四人七月王保保部將韓禮兒攻破原州又陷涇州欲以援慶陽馮宗異自驛馬關引

兵擊之禮兒遁去八月張思道遣右丞王讓等以白氊衣與良臣爲信且言王保保已往永昌俾以城降爲我軍斬獲良臣數出戰不利內外音問不通糧餉乏絕至煮人汁丸泥嚙之姚暉等以城降良臣父子俱投井中引出斬之

實錄

是月李文忠擒脫列伯于大同孔興走綏德先是元主北走屯蓋里泊命脫列伯孔興以重兵攻大同欲圖恢復至是元主無意南向矣

同上

上遣使諭元將擴廓帖木兒

曰昔帝王之得天下當大功垂成之際尤必廣示恩信雖素相仇敵者亦皆收而並用之所以法天地之量而成混

一之業也朕自起兵淮右收攬羣雄平定華夏惟西北邊  
備未撤蓋以汝守孤城保其餘眾遠處沙漠朕甚念之是  
用特與湔滌示茲至懷必能知時達變慨然來歸其部下  
將帥及各部流移軍士多我中土之人果能革心從順文  
武智謀當一一用之有願還鄉者聽其賀宗哲孫翥趙恆  
等朕悉涵容皆所不計投機之會間不容髮朕言不再其

審圖之

高皇帝御製文集

十二月王保保知大軍南還以兵襲蘭州指揮張溫拒守  
保保進攻不利乃引去

同上

三年正月初三日夜半有馬銜山民王黑子叩臨洮城門  
報曰元小總兵軍馬已圍蘭州指揮俞光被擒哨兵將至

矣指揮韋正登城設備達旦哨果至聞有備而回元兵攻  
蘭州百計不能克兵眾食乏互相殺食主將不能禁三月  
大將軍達右副將軍和左副將軍愈督兵四十萬援之

洪武三年

庚戌

正月癸巳

上以王保保爲西北邊患命徐達爲征虜大將軍李文忠爲  
左副將軍往征沙漠

實錄

上曰王保保方以兵臨邊今捨彼而取元主失緩急之宜  
吾欲分兵爲二道大將軍自潼關出西安擣定西以取王  
保保左副將軍出居庸入沙漠以追元主使其彼此自救  
不暇應援元主遠居沙漠不意吾師之至如孤豚之遇猛

虎取之必矣諸將受命而行 同上

王保保駐兵安定縣之西巉入侵蘭州無所得而去乃縱游兵四出被其擾 同上

三月戊午大將軍達師至定西

王保保退屯車道峴達進兵沈兒峪遣左副將軍鄧愈直抵其壘立柵以逼之

兵至定西乾溝達諭將士曰我在此安營元兵必棄圍赴戰及彼至吾已息兵二日戰必勝矣居二日小總兵果留圍城之兵率部下赴敵達令陝西運糧相繼元兵食愈乏愈本記事錄

四月初五日達令各衛士卒輪晝夜驚擾之元兵飢甚而

不得息初七日夜不令軍士擾之俟元兵睡熟選將士造其中軍劫之元兵大潰小總兵遁去部下將帥悉擒至興元斬之士卒派錄各衛隨征成都

四月王保保走和林

大將軍駐沈兒峪口與保保隔深溝而壘日數交戰保保發兵千餘由閒道從東山下潛劫東南壘東南一壘皆驚擾達親率兵擊之乃退明日力戰大敗保保兵于川北亂冢間擒元剌王文濟王及國公閻思孝平章韓札兒虎林赤巖奉先李景昌察罕不花等一千八百六十五人保保僅與妻子數人從古城北遁去至黃河得浮木以渡遂由寧夏奔和林愛猷識理達臘復任以事

實錄

是月丙戌帝庚申殂於應昌五月癸卯 大明兵襲應昌府皇

孫買的里八刺及后妃并寶王皆被獲皇太子愛猷識禮達

臘從十數騎遁 元史

洪武四年辛亥九月丙辰冊故元太傅中書右丞相河南王王

保保女弟為秦王棧妃 實錄

時妃有外王父喪 上命廷臣議之禮部尚書陶凱奏大

功以下雖庶人亦可成婚況王妃無服 上遂令中使及

女史往諭妃家行納徵發冊禮冊曰朕君天下封諸子為

王必選名家賢女為之妃今朕第二子秦王棧年已長成

選爾王氏昔元太傅中書右丞相河南王之妹授以金冊

為王之妃爾其謹遵婦道以助我邦家敬哉 實錄

按保保姓王氏爲李察罕之甥今秦王妃曰選爾王氏知爲保保本生妹也曰有外王父喪者蓋卽察罕之父梁王阿魯溫也

洪武五年壬子正月遣征虜大將軍徐達左副將軍李文忠征西將軍馮勝率師征王保保實錄

上御武樓與諸將論邊事徐達曰王保保出沒邊境遁居和林宜勦絕之得兵十萬足矣上曰兵須十五萬分三道以進大將軍由中路出雁門颺言趨和林而實遲重致其來擊之必可破也左副將軍由東路自居庸出應昌掩其不備征西將軍由西路出金蘭取甘肅以疑其勢卿等宜益思戒慎不可輕敵同上



二月藍玉兵至土刺河與王保保遇擊敗其眾保保遁去五月徐達兵至嶺北與虜戰失利斂兵守塞

實錄

洪武元年劉基乞歸將行言于上曰擴廓帖木兒雖可

取然未可輕願聖明留意其後定西失利擴廓帖木兒竟

北走沙漠

基本傳

五月命中山王等分道征進和林

天潢玉牒

洪武三十年六月敕諭晉王今上曰吾用兵一世指揮諸

將未嘗敗北致傷軍士正欲養銳以觀胡變夫何諸將日

請深入沙漠不免疲兵于和林此蓋輕信無謀以致傷生

數萬

實錄

高帝謂天下一家尙有三事未了一少傳國璽一王保保

未擒一元太子無音問分三路出討至漠北大敗死者先

後約四十餘萬人

草木子餘錄

傷生數萬草木子則云四十餘萬蓋通前後征胡而言

實錄

洪武六年

癸丑

六月王保保遣兵寇雁門

據南北二山守關指揮吳均拒卻之

實錄

十一月遣使諭大將軍徐達等曰近聞王保保欲來求和必非實意其步將普賢奴乃兒不花魁的斤等各將人馬恐假此來擾我邊須多伏精兵盛爲之備近術士張鐵冠言子月有戰卿等未可卽還

同上

十一月達等自朔州還至代縣聞王保保兵至大同北卽率師往擊之至貓兒莊遇大雪退營雁塔堡遣裨將掩捕

懷柔胡騎至三角村擒武平章康同僉獲馬八千餘匹而還同上

洪武七年甲寅九月 上遣崇禮侯買的里八剌北歸復遺其

父愛猷識里達臘織金文綺錦衣各一襲實錄

洪武八年乙卯八月故元將王保保卒實錄

保保自定西之敗走和林愛猷識理達臘復任以事後從徙金山之北至是卒于哈刺那海之衙庭其妻毛氏亦自經死同上

元滅其臣擁兵不降者惟擴廓帖木兒 太祖嘗獲其家屬厚恩以招來之終不至一日大會諸將問曰我朝誰為好男子或對曰常遇春領兵不過十萬所向克捷此好男

子也 上曰未若王保保斯所謂好男子也其後民間每

相誚曰常西邊拿得王保保來耶至今遂諺語

姚福清溪漫筆

野史斷曰平定江淮大事也庚申帝漫爾而付之擴廓擴廓亦漫爾而受命其根本已非矣而又庚申帝宣淫于上擴廓肆愚于下上淫而下愚上虐而下暗處則昧經邦之大計出則昧兵家之神機及大兵一動君臣俱及其禍豈不宜哉 庚申外史

高岱論曰擴廓強獷善用兵以逋逃棄盡之勢猶能轉戰千里屢挫不衰中山自入中原未嘗少衄獨隴右之克甚艱至多斬殺其部曲暨其運終祚訖遠遁沙漠而不爲亡國之俘我 太祖激厲諸將嘗曰王保保天下奇男子也

豈非深羨之耶

鴻猷錄

二十一年四月藍玉兵至捕魚兒海詹事院同知脫因帖木兒將逃失馬竄伏深草閒擒之七月與樞密院知院託台謀叛託台發其事命玉逮問僇之于薊州脫因帖木兒者王保保之弟也以其同知詹事院故又稱爲詹同云

國初羣雄事略卷九終

國初羣雄事略卷十

虞山錢謙益牧齋甫編

光祿大夫中書平章政事李思齊

思齊字世賢汝寧羅山縣人累官銀青光祿大夫太尉  
中書平章政事兼知樞密院事封許國公洪武二年來  
降授資善大夫江西行省左丞三年除榮祿大夫中書  
平章政事七年九月四日卒年五十二

至正十二年

壬辰

察罕帖木兒與信陽之羅山人李思齊同起

義兵襲破羅山授察罕帖木兒爲汝寧府達魯花赤思齊汝

寧府知府 元史

當元之季汝潁兵起公招集義旅數平郡縣官中順大夫汝

寧府知府

宋濂撰平章李公權厝志

羅山縣典史李思齊與察罕克復羅山縣

庚申外史

十七年

丁酉

二月察罕帖木兒與李思齊以兵自號援陝西以

察罕帖木兒為陝西行省左丞思齊為四川行省右丞

元史

十八年

戊戌

正月察罕帖木兒李思齊合兵於鳳翔是月詔察

罕帖木兒屯陝西思齊屯鳳翔

四月察罕帖木兒李思齊會宣慰張良弼等討李喜喜於鞏

昌喜喜敗入蜀察罕帖木兒駐清湫李思齊駐斜坡張良弼

駐秦州郭擇善駐崇信拜帖木兒等駐通渭定住駐臨洮各

自除路府州縣官徵納軍需李思齊張良弼同謀襲殺拜帖

木兒分總其兵五月思齊殺同僉樞密院事郭擇善

二十一年辛丑正月李思齊進兵平伏羗縣等處

五月癸丑四川明玉珍陷嘉定等路李思齊遣兵擊敗之是月李思齊受李武崔德等降

明玉珍陷嘉定在十八年實錄

九月四川賊兵陷東川郡縣李思齊調兵擊之

十一月察罕帖木兒李思齊遣兵圍鹿臺攻張良弼詔和解之俾各還信地兵乃解

二十二年壬寅正月詔李思齊討四川張良弼平襄漢時兩軍不和故有是命

二月知樞密院事禿堅帖木兒奉詔諭李思齊討四川時思齊退保鳳翔使至進兵益門鎮使還復歸鳳翔三月遣兵攻



張良弼至于武功良弼以伏兵大破之

六月戊子田豐王士誠刺殺察罕帖木兒

二十三年<sup>癸卯</sup>四月孛羅帖木兒李思齊互相交兵六月孛羅

帖木兒方奉詔討襄漢擴廓帖木兒部將歹驢等駐兵藍田  
七盤思齊攻圍興平遂據蓋屋踵襲其後孛羅帖木兒遣竹  
貞等入陝西據其省治擴廓帖木兒遣部將貊高與思齊合  
兵攻之竹貞出降

二十五年<sup>乙巳</sup>正月癸亥封李思齊爲許國公

三月皇太子下令于擴廓帖木兒軍中以孛羅帖木兒襲據  
京師命擴廓帖木兒及陝西平章政事李思齊各統軍馬奮  
義恢復六月皇太子加李思齊銀青榮祿大夫郊國公中書

平章政事皇太子詹事兼四川行樞密院事

進保關陝歷官至銀青光祿大夫太尉中書平章政事兼知樞密院事全境安民衛元社稷其功爲

權厝志

二十六年丙午二月擴廓帖木兒還河南調度各處軍馬陝西張良弼拒命李思齊脫烈伯孔興等兵皆與良弼合

初李思齊與察罕帖木兒同起義師齒位相等及是擴廓帖木兒總其兵思齊心不能平而張良弼首拒命孔興脫列伯等亦皆以功自持請別爲一軍莫肯統屬擴廓帖木兒乃遣關保虎林赤以兵西攻良弼于鹿臺而思齊亦與良弼合兵連不能罷

元史察罕傳

七月甲申以李思齊爲太尉

是月擴廓帖木兒遣關保虎林赤台兵渡河會竹貞商嵩且  
約李思齊以攻張良弼良弼遣子弟質于思齊以求援良弼  
拒守關保等不利思齊請詔和解之

九月李思齊兵下鹽井獲川賊余繼隆誅之禮部侍郎滿尙  
賓吏部侍郎掩篤刺哈自鳳翔還京師先是尙賓等持詔諭  
思齊開通川蜀道路思齊方兵爭不奉詔留鳳翔一年至是  
始還

二十七年未三月李思齊張良弼脫列伯自會于含元殿基  
推李思齊爲盟主同拒擴廓帖木兒

五月李思齊遣張良弼部將郭謙等守黃連寨關保虎林赤  
等引兵拔其寨郭謙走會貂高等爲變關保虎林赤夜遁李

思齊速解而西

六月李思齊據長安與商曷拒戰侯伯顏達世進兵攻李思齊秦州守將蕭公達降思齊思齊知關保等兵退遣蔡琳等破其營侯伯顏達世奔潰

七月李思齊遣許國佐辟穆飛會張良弼脫列伯兵屯于華陰時命禿魯爲陝西行省左丞相思齊不悅遣其部將鄭應祥等守陝西而自還鳳翔

八月詔命皇太子親出總天下軍馬而分命擴廓帖木兒自潼關以東肅清江淮李思齊自鳳翔以西進取川蜀禿魯與張良弼孔興脫列伯等取襄樊

十二月詔陝西行省左丞相禿魯總統張良弼脫列伯孔興

各枝軍馬以李思齊爲副總統統禦關中撫安軍民脫列伯  
孔興等出潼關及取順便山路渡黃河合勢東行其勤王事  
思齊等皆不奉命

是歲詔分潼關以西屬李思齊以東屬擴廓帖木兒各罷兵  
還鎮於是關保退屯潞州商曷留屯潼關以上俱元史

是歲十月丙辰遣使以書諭元將李思齊張思道

實錄

書曰曩者元君失馭天下土崩羣雄欲成霸功者甚眾然  
處非其地徒擾擾以傷民今十有七年矣功業之建概乎  
無聞邇者吾將軍德友德守徐州師至中灤獲王保保部  
將始知二公割據秦中而王氏亦已守之三分其險數年  
之間民無一定之歸使人旁觀似無智者以吾料之非智

不足也患在因循假元君之舊號決智不速而使民橫遭塗炭耳區區雖昧於見聞然嘗與高明長者才能之士論訪海內形勢天運去留之幾頗知一二況人之常言天道所助者在德地利可據者在險今百二山河二公割據不相上下必欲相爲犄角分富貴於其中恐可保其暫未可保其終也今吾不畏二公之怒直辭相告二公當揣其福德威力足慰民望者推一人爲尊撫定關中以一民心擁精兵守要害虎視太行之東大河南北使君尊於上公卿將相各安於下家樂其業人全其生不亦可乎若乃各據一隅以殺戮相高雖快志一時必有不測之禍脫有不虞身名俱滅比之屈節揣分尊朋友有德者爲君己爲公卿

國朝通志卷之五  
五  
將相永保功名富貴其賢不肖豈不大相遠哉若吾以用  
兵爭強之事相告使二公彼此角力以決雌雄是秦民未  
有休息之日終非賢人君子知天運者之所爲今以相尊  
相讓之事告二公者蓋欲休兵息民爲二公之福不淺也  
二公當度之揣之其勢其德可尊者誰苟爲不然鵲蚌相  
持漁者獲利悔將無及

洪武元年

二十八年戊申二月詔削擴廓帖木兒爵邑命禿魯李思齊等  
討之是月大明兵已至河南李思齊張良弼等解兵西還  
思齊次渭陽良弼次櫟陽

時李思齊張良弼孔興脫列伯與擴廓相持日久大明兵

已至河南思齊良弼皆遣使詣擴廓告以出師非本心乃

解兵大掠西歸

元史察罕傳

三月 大明兵取河南李思齊張良弼會兵駐潼關火焚良

弼營思齊移軍葫蘆灘調所部張德欽穆辭飛守潼關 大

明兵入潼關攻李思齊營思齊棄輜重奔于鳳翔

元史

四月甲子馮宗異進攻潼關李思齊張思道棄關宵遁初

思齊與思道聞王師取河南卽駐兵潼關以拒旣而火焚

思道營思齊乃移軍退守葫蘆灘遣部將張德欽穆辭飛

守關及王師至思齊棄輜重走鳳翔思道奔鄜城丙寅宗

異遂入潼關引兵西取華州

實錄

大軍攻潼關張李脫孔四軍皆潰而西

庚申外史



思齊思道各擁大眾來武功東川而軍思齊在東思道在西以禦我軍

鴻猷錄

五月李克彝棄河南城奔陝西推李思齊爲總兵駐兵岐山是月李思齊部將忽林赤脫脫張意據整屋商嵩據武功李克彝據岐山任從政據隴州七月李思齊會李克彝商嵩張意脫列伯於鳳翔

元太尉李思齊守鳳翔總轄山外二十四州之地 上察參政孫希孟都府經歷王均美等與侍衛指揮毛驥張煥盟爲昆季飲生雞血酒爲誓 上疑之鞭希孟均美遣齎敕往諭思齊思齊不聽縛于陝西菜市副之

俞本記事錄

閏七月丁巳詔李思齊南出七盤金商圖復汴洛與擴廓帖

木兒等四道進兵思齊兵未出擴廓帖木兒退守太原是月

丙寅帝北奔八月庚午大明兵入元都元史

洪武二年己酉三月庚子大將軍師至鹿臺遂入奉元路癸卯

副將軍遇春宗異發陝西進取鳳翔丙午李思齊奔臨洮實錄

元太尉李思齊總關陝秦隴之兵西至吐蕃南至礮頭關

東至商維北至環慶皆思齊主之精兵不下十餘萬聞大

軍至棄陝西之鳳翔陝西父老迎達降俞本記事錄

初李思齊據鳳翔副將許國英穆辭飛等守關中張思道

孔興脫列伯金牌張龍濟民李景春等駐鹿臺以衛秦元

及大兵入關思道等先三日進野魚口遁去師至鳳翔李

思齊懼率所部十餘萬西奔臨洮遇春獲其部將辭平章

等實錄

四月丁丑右副將軍宗異師至臨洮李思齊降

大軍呼李思齊至鳳翔遇春軍至思齊已遁至固關見萬木夾道遣人砍木截路以阻襲軍遇春令軍士步者攀崖踰嶺騎士斷木焚之四月至鞏昌土官汪靈真保降十二月達遣馮勝追思齊至臨洮土官平章趙脫兒挾思齊出降達以金吾衛指揮潘尋守之令騎士送思齊靈真保脫兒三人赴京

俞本記事錄

大將軍在鳳翔議師所向諸將咸以張思道之才不如李思齊慶陽易于臨洮欲先由豳州取慶陽然後從隴西攻臨洮達曰不然思道城險而兵悍未易猝拔臨洮之地西

通蕃夷北界河湟我師取之其人足以備戰鬪其產足以  
供軍儲今以大軍蹙之思齊不西走胡則束手就降矣臨  
洮旣克則旁郡自下遂移師趨隴西下鞏昌遣右副將軍  
宗異將天策羽林驍騎雄武金吾豹韜等衛將士征臨洮  
李思齊降初思齊之在鳳翔也 上以書諭之曰前日遣  
使通問至今未還豈所使非人忤足下而留之歟抑元使  
適至足下不能隱而殺之歟若然亦時勢之常大丈夫當  
磊磊落落豈以小嫌介意哉夫堅甲利兵深溝高壘必欲  
極力抗我軍不知竟欲何爲昔足下在秦中人以兵眾地  
險而從之雖有張思道專尙詐力孔興等自爲保守擴廓  
帖木兒以兵出沒其閒然皆非勅敵足下當時不能圖秦

自王已失此機今中原全爲我有向與足下相爲犄角者皆披靡竄伏足下以孤軍相持徒傷物命終無所益厚德者豈爲是哉朕知足下不守鳳翔則必深入沙漠以圖後舉足下初入其地胡或面從然非我族類其心必異據其地不足以爲資失其地適足以自殞使兵威常強尙云可也倘中原相從之眾以胡地荒涼或不樂居其心叵測一旦變生肘腋孑然孤弱妻孥不能相保矣且足下本汝南之英祖宗墳墓所在深思遠慮獨不及此乎誠能以信相許去夷就華當以漢待竇融之禮相報否則非朕所知也思齊見書有降意其養子趙琦與其麾下給之與西入吐蕃思齊信之遂俱奔臨洮琦等竊寶貨婦女避匿山谷閒

思齊遂窮蹙至是舉臨洮降琦等亦相繼來歸琦狄道人  
一名脫脫帖木兒時呼爲趙脫兒世爲元土官云 實錄

魏國公統兵定中原公駐軍臨洮遂率士馬數萬來歸 權  
誌

五月乙卯大將軍遣指揮曹崇送李思齊赴京以所獲臨洮  
銀印一白金五千兩黃金百兩送陝西行省 實錄

十月以方國珍爲廣西行省左丞李思齊爲江西行省左丞  
俱不之官食祿於京師 實錄

洪武三年 庚戌從大將軍破定西王保保還取興元陞中書平  
章政事 實錄

從大將軍征定西復漢中 權厝志

是年冬論功賞文綺及帛各二十四匹十二月辛巳陞中書平章子孫世襲指揮僉事思齊等皆起兵歸附之臣

上欲優之命食祿而不視事

實錄

洪武七年

甲寅

八月以李世昌爲金吾衛指揮同知

實錄

誥曰昔君天下者賞有功而官有德聖人之心明焉歷代相承永爲模範爾李世昌年雖未冠而授兵衛之職者何蓋爲爾父遭時大亂能率眾以保關內是以民安而地闢及至胡人退諸雄有無知者以漢人棄父母之邦遺工墮從胡人復仇我中國者無所成惟爾父效竇融之事帥二萬騎及步兵之眾助朕成功至今關內之民時思之爾嘗習將之籌謀以待成人而備侮特授爾某官永爲世襲爾

懋哉 高皇帝御製文集

九月戊辰中書平章政事李思齊卒

六年公復從大將軍征大同至代縣得疾而還寵勞備至遣醫官絡繹治療且幸其第視之尋賜新第一區官其子世昌懷遠將軍同知金吾右衛指揮使司事甥鄭王武略將軍羽林衛鎮撫以慰其心豈期公在苒沈疴竟弗能瘳卒之日側室臨汝陳氏年三十三亦自經而死事聞皆親製文遣使者祭之且贈陳氏淑人謚以貞烈是月二十日與公合殯京城上元縣之向村以俟他日歸葬禮也

權厝誌

洪武七年 上遣思齊往諭沙漠河南王王保保至則待之以禮留數日遣歸令騎士送至界上騎士辭思齊曰總



兵有旨請留物以作遺念思齊曰我爲公差遠來無以留  
贈騎士曰請留一臂思齊知不可免斷一臂與之還京而  
死 上以其幼子爲指揮使厚卹其家 俞本記事錄

按思齊之死俞本所記爲確權厝誌云從征大同得疾而  
還又云在蓐沈疴竟弗能瘳雖諱言其實而其微詞亦可  
思矣

上御製祭李思齊文曰卿昔爲民中原時逢世亂獨能仗  
義施仁挺身奮臂率義旅以保關中臣元有年矣何元綱  
不振社稷陵替卿尙能固守臣節斬我行人忠臣之義可  
謂盡矣然大廈將傾非一木可支未幾胡君遁去中原之  
地復我漢人朕遂爲生民主當是時漢人棄正壠從胡爲

我中國仇讐至今身膏草野骨委沙漠惟卿退守臨洮心  
思父母之邦義忠族類是以全境保民助我成功今七年  
矣夫何久疾不痊以致長往噫握兵一世又得善終亦人  
之所難卿能如是豈不美哉朕聞卿歿不勝痛悼今遣某  
官用牲醴致祭卿其享之

高皇帝御製文集

洪武八年<sub>乙卯</sub>正月辛未遣官祭功臣於雞籠山廟增祀故淮  
安侯華雲龍平章李思齊等百八人

實錄

國初羣雄事略卷十

國初羣雄事略卷十一

虞山錢謙益牧齋甫編

海西侯納哈出

納哈出木華黎裔孫也至正乙未被擒縱之北還官至  
署丞相封開元王洪武十九年五月歸降九月封海西  
侯食祿二千石賜鐵券二十一年七月辛丑卒于武昌  
舟中

乙未六月克太平執其萬戶納哈出十二月釋元萬戶納哈  
出北歸

上初獲納哈出以爲元世臣子孫待之甚厚納哈出居常  
鬱鬱不樂 上遣降將萬戶黃儔察其去就儔見納哈出

言 上所以待遇之意納哈出曰荷主公不殺誠難爲報然我本北人終不能忘北儔以告 上上曰吾固知其心也謂徐達等曰納哈出元之世臣心在北歸今強留之非人情也不如遣之還達等以爲虜心難測若舍之去恐貽後患不如殺之 上曰無故而殺之非義吾意已決姑遣之因召納哈出及降臣張御史謂之曰爲人臣者各爲其主況汝有父母妻子之思念遣歸仍從汝主于北因資而遣之納哈出等辭謝而去 實錄

洪武二年四月

上遣使以書與元主又以書諭納哈出

上聞元將納哈出擁兵據遼陽爲邊患乃遣使以書與元

主曰朕聞自昔有國家者必知天命去留之機審人事成敗之勢進可以有爲退可以自保此理之必然曩者君之祖宗起自北方奄有中土兵強事舉華夷咸服及君嗣位之時中外猶安兵甲非不衆人材非不盛一旦多故天下鼎沸處置乖方力莫能禦以致豪傑分爭生民塗炭朕本淮右布衣不忍坐視因人心之所向遂仗義興兵羣雄所據之地悉爲我有君亦知天命所在遜于沙漠朕師非不能盡力窮迫以君知時通變於心所有不忍近聞兵擾邊陲民罹鋒鏑豈君之故將妄爲生事耶亦君失算而使然耶若果不知自省而猶爲此舉則是不能識機度勢恐非君之福也朕今爲君熟計當限地朔漠修德順天效宋世

臣不羣左馬田老一  
南渡之後保守其方弗絕其祀毋爲輕動自貽厥禍又以  
書諭納哈出曰將軍昔自江左辭還不通音問十五年矣  
近聞戍守遼陽士馬強盛可謂有志之士甚爲之喜茲因  
使通元君道經營壘望令人送達所遣內臣至將軍營卽  
令其還書不多及

三年五月 上遣使復以書諭納哈出

書曰曩因天革元命四海鼎沸羣雄角逐塗炭生民朕以  
一旅之眾從淮渡江姑孰之捷爾實在焉時朕未知天命  
所向無必取天下之心凡遇元臣忠於所事者未嘗不憫  
其勞而惜其無成也朕賴天地之靈將士一心旌旗所指  
靡不服從今天下已定南極朱崖北際燕雲一時豪傑順

天愛民悉來歸我獨河東渠帥擁眾北歸比之關中諸人  
稍爲崛強然其順天愛民籌算之良殆不若李思齊矣大  
將軍徐達未至吐蕃蜂屯蟻聚復來攻城戰敗俘擒之餘  
有若孤狔故破竹之勢直指川蜀雲南六詔使者相望交  
趾占城萬里修貢高麗稱藩航海來庭於是盧龍戍卒登  
萊浙東並海舟師咸欲奮迅一造遼瀋朕聞爾總其眾不  
忍重擾特命使者告以朕意使還略不得其要領豈以遼  
海之遠我師不能至歟抑人謀不決故首鼠兩端歟不然  
必以曩時來歸未盡賓主之歡謂朕不能虛懷耶何相忘  
之深也昔竇融以河西歸漢功居諸將之右朕獨不能爲  
遼東故人留意乎茲遣人再往從違彼此明白以告哲人



國朝書影卷十一  
三  
知幾毋貽後悔

四年六月遣斷事官黃儔齎書諭納哈出

書曰前者萬戶黃儔回聞將軍威鎮遼左英資如是足以  
保定一方然既往不復君子豈不察歟昔在趙宋君主天  
下立綱陳紀黎庶奠安逮至末年權綱解紐故元太祖興  
于朔方世祖入主中國此皆天道非人力所能強爲也元  
之疆宇非不廣人民非不多甲兵非不眾城郭非不堅一  
旦紅巾起於汝潁羣盜徧滿中原其間盜名字者凡數人  
小明王稱帝於亳徐眞一稱帝於蘄陳友諒稱帝於九江  
張九四稱王於姑蘇明昇稱帝於西蜀彼四帝一王皆擁  
甲兵有二十萬者有二十五萬者有十五萬者有十萬者

相與割據中夏踰二十年朕本淮民爲羣雄所逼因集眾  
禦亂遂渡江與將軍會于太平比待他俘特加禮遇且知  
將軍爲名家故縱北歸今又十七年矣近年以來朕見羣  
雄無成調兵四出北定中原南定閩越東取方氏西收巴  
蜀四帝一王皆爲我俘虜惟元昏君奔北自亡華夷悉定  
天下大安此天命非人力也賢人君子宜必知之近聞將  
軍居金山大張威令吾兵亦守遼左與將軍旌旗相望將  
軍若能遣使通舊日之間貢獻良馬姑容就彼順其水草  
猶可自逞一方不然胡無百年之運大廈旣傾非一木可  
支釁之後先惟將軍自思之儔至金山納哈出拘不遣  
是月元平章洪保保馬彥翬謀殺指揮同知劉益右丞張

良佐等擒彥翬殺之保保走納哈出營良佐以其事來聞  
上書中書省曰本衛地方遼遠僻處海隅肘腋之間皆為  
敵境元平章高家奴固守遼陽山寨知院哈刺張屯駐瀋  
陽古城開元則有丞相也先不花之兵金山則有太尉納  
哈出之眾互為聲援今洪保保逃往其營必有構兵之費  
實錄

七月 上以劉益之變而元臣納哈出等未附以馬雲葉  
旺為定遼都衛都指揮使總轄遼東諸衛軍馬

七年十一月納哈出復引兵寇遼陽千戶吳壽等擊走之

實錄

八年納哈出寇遼東都指揮使葉旺大敗其兵

實錄葉旺本傳

八年十二月納哈出寇遼東先是 上敕遼東都同曰今

天寒冰結虜必乘勢入寇宜堅壁清野以待之慎勿與戰  
使其進無所得退有後慮伏兵阻險扼其歸路虜可坐致  
也至是果入寇都指揮使馬雲等探知納哈出將至命蓋  
州衛指揮吳立張良佐房嵩等嚴兵城守虜至堅壁勿與  
戰及納哈出至見城中備禦嚴不敢攻乃越蓋州城徑趨  
金州時金州城垣未完軍士寡少指揮韋富王勝等聞虜  
至督勵士卒分守諸城門選精銳登城以禦之納哈出裨  
將乃刺吾自恃其驍勇率數百騎竟至城下排戰城上發  
弩射之乃刺吾被傷悶絕遂獲之虜勢大沮富等復縱兵  
出擊納哈出不利慮援兵且至引兵退走以蓋州有備不  
敢經其城乃由城南十里外沿柞河遁歸部指揮葉旺策

其將退先引兵趨柞河自連雲島至窟駝寨十餘里緣河  
疊冰爲牆以水淋之經宿皆凝沍隱然如城藏釘板於沙  
中設陷馬奔于平地伏兵以待之命老弱卷旗登兩山閒  
戒以聞礮卽豎旗焉雲于城中亦立一大旗令定遼前衛  
指揮周鶚及吳立等各嚴兵以候四顧寂若無人已而虜  
兵至旺等候其過城南礮發伏兵四起兩山旌旗蔽空鼓  
聲雷動矢石雨下納哈出倉皇北奔趨連雲島遇冰城馬  
不能前皆陷入奔中遂大潰雲于城中亦出兵追擊至將  
軍山畢栗河斬戮虜人馬及凍死者甚眾旺等復乘勝逐  
至楮兒峪覆其士馬無算納哈出僅以身免旺等相慶曰  
非主上明見萬里授以神算何能有此旺遣人送乃刺吾

至京師羣臣請戮之 上不許命爲鎮撫賜以妻妾田宅  
實錄

十一年六月遣使齎詔往金山諭納哈出

詔曰人生天地間能觀天地變化之機知時識勢而不失  
者乃爲傑丈夫古人有云活千人者其後必封爾爲元臣  
忠則忠矣何苦違天道昧人事而失德若是耶昔者爾被  
擒於江東朕特縱爾歸北朕順人心而生全爾也大抵人  
蹈患難者孰不欲脫患難而全其身當時爾在俘囚之中  
果願死乎生乎若以此心度之則必不敢肆其殘忍矣凡  
兩軍之間有力不及汝者被爾拘囚之爾能以己之受患  
欲脫之心推及俘囚爾必大昌福及後嗣矣爾乃不能以

己心推之盡殺勿顧如去年冬爾將兵寇我邊境回軍之日棄卒多矣朕皆生全之未嘗輕殺一人曩者萬戶黃儔捧朕命而往豈儔之所願哉實有朕命不得已也且其人嘗有恩於爾何期爾不思好生惡死之情一旦殺之爾之患難爲儔所生儔之身爲爾所殺人可欺天不可欺天心鑒爾禍將歸焉今爾與朕守邊將士旌旗相望略較勝負彼此相當矢石之下罹害者眾然已往之事不咎未來者可不思乎自今已往若能通一介之使雪前日之愆朕亦不較不然必致生縛於此之時何面目以見朕諭至其審思之

十一年十二月詔諭故元丞相哈刺章蠻子驢兒納哈出

等曰自有元多事羣臣有棄君親而自苟全者有抗朝命而自爲者目擊耳聞實非一人卿等獨奮忠仗義衛君深塞歲月如流倏然十有一年今聞爾君因疾而崩在卿等可謂有終有始良臣之名播矣或聞欲立新君其親王有三卿等正在猶豫之間此三人皆元之嫡派卿等若欲堅忠貞之意毋抑尊而扶卑理應自長而至幼此乃人倫正天道順也歟若有賢愚之別禮難備拘從賢則吉夫當流離之際而爲臣者猶能竭力爲之不絕有元之祀美聲盈人耳豈不難哉苟或不然尊卑賢愚置之弗論但以立君爲名而內自專生殺之威則非人臣之道矣況同類頡頏彼此疑猜當此之時卿等富貴如風中之燭命如草杪之



國不遺去書附卷十一  
霜深可慮也

十九年十二月

上諭宋國公馮勝曰納哈出據金山數侵擾遼東宜於大寧諸邊隘分兵置衛以控制之

二十年正月癸丑命宋國公馮勝爲征虜大將軍穎國公傅友德永昌侯藍玉爲左右副將軍前軍都督商高參贊軍事率師二十萬北伐

上諭勝等曰虜情詭詐未易得其虛實汝等慎無輕進且駐師通州遣人覘其出沒虜若在慶州宜以輕騎掩其不備若克慶州則以全師徑擣金山納哈出出其不意吾師之至必可擒矣旣而上復遣前所獲番將乃刺吾北還

以書諭納哈出及毛闡撒里達溫蠻子晃失台和尚伯蘭等曰昔者天更元運華夏奮爭朕自甲辰春親定荆楚歸遣諸將東平吳越洪武初遂命中山武寧王開平忠武王率甲士渡江越淮以定中原元君北奔深塞於是息民於華夏諸夷附者莫不奠安今二十年矣惟爾納哈出等聚兵愈眾出沒不常意較勝負由是乃刺吾留而未遣今有年矣朕推人心誰無父母之念夫婦之情故特命其生還以全骨肉之愛且聞其善戰今遣北歸更益爾戰將他日再較勝負爾心以爲何如嗚呼天之於物氣運變遷果人事之必然耶抑天道之使然耶茲命儀禮司官前僉院蠻子鎮撫張允恭送乃刺吾抵爾所在使者未審可還乎餘

不多及

三月馮勝等師出松亭關築大寧寬河會州富峪四城遂提兵駐于大寧

五月丙寅遣使齋敕諭大將軍宋國公馮勝等曰往者慶州之捷俘虜赴京者皆云胡已北行遼東送來降者所陳亦同五月五日得軍中遣至降胡又云納哈出棄金山巢穴營於新泰州去遼陽千八百里朕計羣胡雖起營北行似若遠遁尙恐詭謀稿發尤不可不爲之備況今天象水火相犯迨至八月天災屢有警諸將宜嚴號令整行伍遠斥候以逸待勞則必有當之者矣

庚午馮勝留兵五萬守大寧率大軍趨金山

辛未 上復遣使密敕大將軍宋國公馮勝等曰前日以天象之變戒卿等軍中之事嚴爲之備今觀所徵其咎在虜揆之人事正與天合宜乘機進取不可稽緩朕計納哈出去金山未遠以兵促之勢必來降且胡主謂我得志無意窮追必順逐水草往來黑山魚海之間乘其趑趄攻其無備虜眾可盡圖也

六月丁酉馮勝等進師金山之西

勝等至遼河之東獲納哈出屯卒三百餘人馬四十餘匹遂進師駐金山之西是時乃刺吾還至松花河見納哈出納哈出大驚曰吾謂汝死矣今日乃復得相見執手勞問殷勤乃刺吾因諭納哈出朝廷所以送還之意納哈出喜

卽遣其左丞劉探馬赤參政張德裕隨使者張允恭等至勝軍獻馬欲因以覘我勝遣人送赴京師旣而納哈出送乃刺吾至漢北虜主欲殺之左右諫曰乃刺吾久被俘囚今獲生還奈何殺之因得免還納哈出所備以朝廷撫恤之恩語其眾由是虜眾多有降意

癸卯師踰金山至女直苦屯納哈出部將全國公觀童來降丁未遣右副將軍藍玉至納哈出營降其眾

初納哈出分兵爲三營一曰榆林深處一曰養鵝莊一曰龍安一曰河輜重富盛畜牧蕃息虜主數招之不往及是大軍逼之納哈出計無所出乃刺吾因勸之降納哈出猶豫未決適大將軍馮勝遣指揮馬某往諭之納哈出乃遣

使至大將軍營陽爲納款而實覘兵勢勝遂遣玉往一禿  
河受其降虜使見大將軍師盛還報納哈出納哈出聞之  
乃指天嘖嘖歎曰天不復與我有此眾矣遂率數百騎自  
詣玉約降玉大喜出酒與之飲甚相歡納哈出因酌酒酬  
玉玉請之先納哈出卽飲訖復酌以授玉玉解衣以衣之  
謂曰請服此而後飲納哈出不肯服玉亦持酒不飲爭讓  
久之納哈出取其酒澆地願其下咄咄語將脫去時鄭國  
公常茂在坐其麾下趙指揮者解胡語以告茂茂直前  
搏之納哈出驚起欲就馬茂拔刀斫之傷臂不得去都督  
耿忠遂以眾擁之見勝納哈出所部妻子將士凡十餘萬  
在松花河北聞納哈出被傷遂驚潰餘眾欲來追勝遣前

降將觀童往諭之於是其眾亦降凡四萬餘并得其各愛馬所部二十餘萬人羊馬驢駝輜重互百餘里納哈出有二姪不肯降勝復遣人諭之乃折弓矢擲于地亦來降勝以禮遇納哈出復加慰諭令耿忠與同寢食遣使奏捷于京仍奏常茂驚潰虜眾遂班師悉以納哈出來降將卒妻子及其輜重俱南行仍以都督濮英等將騎兵三千爲殿七月遣使賜納哈出及其部將

庚辰遣使賜故元降將納哈出玉帶一金飾香帶一白金一千兩文綺帛各四十四匹鈔一千貫又以素金帶百花素銀帶七百紗帽八百賜其將那木罕等及銀鈔各有差仍遣使齎鈔三十萬綻織金文綺三十四匹送赴燕府以備賞

賜來降納哈出部眾

丁酉納哈出所部營王失刺八禿等來降

先是納哈出既降營王失刺八禿等以病在道相失至是與雲安王蠻吉兒的郡王桑奇失里和尚國公等復來降大將軍馮勝遣人送京師乃遣定遠侯王弼發定遠等衛官軍往迎降將家屬於信州道爲虜所襲亡馬七百餘匹信州卽納哈出所屯一禿河也

八月庚戌再遣使往賜納哈出等

遣指揮李隆往賜故元降將納哈出文綺帛各十匹白金二百五十兩衣一襲賜其妻衣鍼線鞞全國公觀童宗王先童司徒完者不花撒里撻温院使佛家奴知院阿勒帖



木兒同知曩如思平章晃失台院判察罕帖木兒參政撒里帖木兒並賜文綺帛各一匹白金二十五兩

乙卯命左軍都督僉事耿忠于永平撫安降附達達酋長軍士及給賜納哈出妻子米五百石達達將軍士男女四萬四千一百七十五人布一十七萬六千七百一十七匹綿襖二萬七千五百五十二項皮裘五千三百五十三領冬衣及色絹衣三萬二千二百四十餘襲

丁丑征虜大將軍馮勝上賀平納哈出表

勝等以故元降將納哈出所部官屬將三千三百餘人馬二百九十餘匹金印銅印一百顆金銀虎符及牌面一百二十五事王九國公郡王四太尉國公五行省丞相一司

徒平章十三右丞左丞三十一參政知縣三十三各院使  
同知副樞八十一僉院院判二百八十院副使五宣慰使  
副使僉事一百八十九萬戶千戶路府州總管同知等官  
九百二十七尙書參議二承旨學士十文學司馬七大卿  
司卿少卿十八衛帥府僉事三郎中員外十五王府官六  
蒙古宗人衛副使一客省大使二十六廉訪司使副鹽運  
司使副六衛帥府使一治書安撫司農各一太少監理問  
斷事部郎中主事兵馬指揮府衛鎮撫崇福司使副經歷  
都事太醫院官及州縣等官二百二十二將一千四百餘  
人送至京師上表賀曰三苗逆命大禹有徂征之師獫狁  
侵陵宣王有北伐之舉屬妖氛之迅掃致醜虜之來歸喜

盜臣民懽騰遠邇臣勝等竊惟故元丞相納哈出以氈裘  
之遺孽亡國之賤俘負天地生全之恩懷虎狼貪殘之性  
殺戮我信使寇竊我邊陲上違逆於天心下阻遏於聲教  
除殘去暴爰興問罪之師按節臨戎謬忝總師之寄將佐  
效忠而致力士卒賈勇以爭先軍威遠震於虜庭義氣橫  
飛於瀚海兵有不戰之勝敵無交刃之慮其納哈出卽詣  
軍門納款輸誠格心向化其餘軍民人等咸加撫諭各遂  
生全同沾化育之恩永絕腥膻之穢是皆皇帝陛下神謀  
運於宥密睿知發乎先幾故能豫制於萬全是以成功於  
莫測臣等仰遵成算祇奉天威獲殫犬馬之驅馳少盡涓  
埃之報答萬方胥慶覩日月之光華率土歸心樂乾坤之

覆載

九月戊寅朔封納哈出爲海西侯

故元降將納哈出及諸王哥列沙國公觀童及故官帖木兒不花等至京納哈出入見上撫慰甚至賜以一品服封爲海西侯誥曰自古哲人明去就之機者必仰觀天道俯察人事審勢定謀知天命之不可違事機之不可失乃決去就焉所以事無輕舉動獲萬全由是享富貴于悠久延祿位於無窮以其所見者明所察者精故也朕荷天休命統一華夏于今二十年矣海內海外九夷八蠻莫不革心向化惟故元播遷塞外日就澌盡爾納哈出知天命之有在一心奉天相率來歸生全多命今特命爾爲推誠輔

運欽承效力輔臣柱國海西侯食祿二千石及爾子孫後世以報推誠之義爾其一乃心固初志與國同休敬哉毋怠其所部官屬悉賜衣服冠帶有差第其高下授以指揮千百戶俾各食其祿而不任事分隸雲南兩廣福建各都司以處之上以納哈出之降乃刺吾與有力焉陞授千戶仍賜以金帛

庚辰海西侯納哈出上表謝恩獻馬三百八匹

壬午賜納哈出織金文繡冬衣各一襲

丁亥賜海西侯納哈出羊十羴酒百尊

己巳賜海西侯納哈出等官三百一十八人白金二萬三千八百四十兩文綺帛二千九十四匹鈔一萬二千九百

六十九錠

丙申賜海西侯納哈出部將二百餘人衣鈔鞞鞢

丙寅賜海西侯祿米二千石以江西公田給之

二十一年七月辛丑海西侯納哈出卒

納哈出性嗜燒酒飲常過度當盛夏時每以水沃身因得疾上命醫療之而愈常戒其飲至是從傅友德往征雲南飲酒如初行至武昌疾復作卒于舟中 上聞而閔之詔歸其柩于京師葬都城南門外

八月癸丑命故海西侯納哈出子察罕襲爵改封瀋陽侯

誥曰朕惟列爵建侯子孫世祿國之大典非有勳勞者不得與焉爾察罕父納哈出昔爲元臣自元運告終退守金

山幾二十載比者知天道之莫違率眾來降朕嘉其能全一方之民特封爲海西侯肩於功臣邇命從征百夷冀其成功忽途中嬰疾而逝聞之惻然然父死子襲初誓不忘茲特改封爾察罕爲欽承父業推誠效力武臣柱國瀋陽侯爾尙一乃心力上思朕所以待爾父之誠下爲爾父立報國之功豈不神人共鑒而福祿悠久者乎勉之毋怠

二十六年四月壬午瀋陽侯察罕坐藍玉黨伏誅

實錄

瀋陽侯察罕

遼陽人氏

招云洪武二十六年正月初三日因做

生日有一般達官乃兒不花帖里白脫禾赤朵列帖木兒劉謙忽都帖木兒和尚友也速不花也先火者和尙友都不花等到來遞手帕拜壽就留各官茶飯乃兒不花說俺

比先在草地裏時遇著大人今日好的日子呵殺牛宰馬  
儘着俺用那等快活那裏有如今在這裏

上位好生疑俺達達人都將四散調開去了看起他的動靜

也只是弄性命俚未知俺日後怎麼的如今只等領軍出

征一帶兒反將出去到得靜辦

乃兒不花招云

上位將

一個著去了俺久後也知道怎麼俚咱預

備著出軍去一發反將出去眾人依允 察罕說這裏雖

著俺做公侯不如俺那裏做個刀官人儘得快活您眾人

休著外人知道好友尋個長便本月十四日察罕同月魯

不花等到乃兒不花家喫酒本官言咱幾時能彀出征反

將出去涼國公征進回來使法古

蒙古左衛指揮

來說他是總兵

官要他做一件大勾當着俺收拾人馬聽候若事成了都



大家享富貴又放俺本處去俚十分快活日子有俚議允各散在後時常藍玉府內往來謀逆

月魯不花招同

又招云二十六年正月十五日舊頭目錦衣衛鎮撫楊和等右僉都御史帖古思帖木兒男帖法成頭目三寶奴等來本家慶賞元宵察罕備述乃兒不花帖里白等傳達涼國公說話又云似這等看來順了他到得快活俚楊和等同言既如此官人儘向前小人都來出力酒畢各散以後時常同各人去藍玉家商議

帖法成白賽因帖木兒楊和招並同

住奴招云住奴北平人夫楊二病故官府差撥伏侍西番和尚後起取赴京西番和尚汝寧尚書去天禧寺出家住奴同義女把秃罕在聚寶門廊下住坐瀋陽侯察罕亦在

聚寶門外住坐西番和尚常去本官家看經住奴以此來往熟識二十六年正月西番和尚同外甥阿秃赤鎖男古友來住奴家說我和瀋陽侯探望涼國公他說要謀大事瀋陽侯你收拾些達達人準備着我已與三塔寺住的國師達達和尚打力麻失里雞鳴寺黨九國師徒弟帖木兒都說得知道了你可去瀋陽侯家來往打聽消息住奴依允黨事敗露住奴又以賣雞爲由前去探聽不期差人抄扎將住奴等拿捉前來

北平府僧人省無礙招云二十六年正月十五日同一般和尚耶舍巴等本寺西番和尚汝寧和尚書等到瀋陽侯宅慶賞元宵本官邀請軍官在家就留筵席飲酒閒瀋陽侯

匡不羣在事田名一一  
說涼國公要謀大事教我收拾達達人來接應汝寧尙書  
等俱各喜允說我每一般達達歸附今朝做官只是法度  
利害熬不出去有這光景不如隨順他做一場汝寧尙書  
招同已  
上並逆臣錄

國初羣雄事略卷十一終

國初羣雄事略卷十二

虞山錢謙益牧齋甫編

陳友定

友定一名有定字安國福州福清縣人徙汀之清流累官福建行省平章政事據守邵武建寧延平福州興化泉漳汀潮諸路洪武元年被執不屈就誅

友定世業農爲人沈勇喜游俠鄉人畏服之王辰兵起所在騷動汀州府判蔡公安至清流募民兵友定以壯士見公安與語奇之令統所集民兵署爲黃土寨巡檢

實錄友定本傳

友定清流明溪人幼孤傭于橘州富室羅氏雖病頭瘡其狀魁岸有志略卽樵采爲戲輒設隊伍羅翁奇之將以爲

婿其妻不悅呼爲瘡頭郎因失鵝而奔宿于鄰舍王氏之門其家夢虎踞門得友定大異之乞于羅翁妻以女俾習商販輒折其貲大困充明溪驛卒壬辰寇起寧化曹柳順據曹坊擁眾數萬其黨八十餘突來明溪索馬眾莫敢拒友定被酒半酣諭眾給而盡殺之柳順怒率步騎千餘將屠明溪友定發老孺登寨誓其侶賴政孫通胡瑯等五百人乘柳順營自馳擊之斬獲過當遂追屠曹坊擒柳順以歸事聞授明溪寨巡檢

郭造卿撰陳友定傳

從福建僉都元帥吳按攤不花討汀延邵建諸山寨以功授清流縣主簿尋陞縣尹

實錄本傳

尋陞清流縣尉鄰寇數十皆所剋平陞延平路總管

郭傳

吳按攤不花將樂人紅巾寇據邵武募義兵克復之授福建行省參政入閩通志

至正戊戌五月陳友諒遣康泰趙琮鄧克明等以兵陷邵武路十一月癸卯陳友諒陷汀州路已亥十一月戊申陳友諒兵

陷杉關元史

歲已亥陳友諒遣康泰取邵武鄧克明攻汀州轉略延平將樂諸處行省乃授友定汀州路總管以禦之戰于黃土獲其將鄧益克明遁去元拜友定行省參政實錄本傳

戊戌十一月癸卯陳友諒將鄧克明陷汀州越庚子進圍清流友定駐兵于縣前平安寨間道夜襲大敗之追至寧化清流以復繕崆峒嶺關寨及南北寨守之郭傳

己亥秋福建運糧數十萬至京師

庚申外史

先是朝廷以張士誠內附封爲太尉且以歲饑遣使徵海  
運士誠據浙西有糧方國珍據浙東有船兩寇相攻糧竟  
不至賴福建濱海又爲王士獨能運糧至京師由是京師  
民始再活 同上

癸卯四月守漳州右丞羅良遣僚佐由海道運糧抵遼東  
以給行在軍詔授光祿大夫封晉國公仍守漳州良遂設  
南詔屯田萬戶府伍宗堯清流人元末盜起邑人推宗堯  
爲長至正庚子鄧克明來侵清流宗堯與其子四人率兵  
決戰皆死之寇亦退去 八閩通志

歲辛丑鄧克明復取汀州進攻建寧不克而還友定遂復汀

州開分省守禦陞左丞

實錄本傳

辛丑克明轉掠永豐寧都石城汀州寧化等縣遂陷寧昌破杉關掠光澤道順昌以攻建寧不克還兵據撫州是冬

鄧愈兵逼撫州

實錄

鄧克明偕胡廷瑞復陷邵武延平攻建寧城西北立數十砦以鐵礮火箭雲車機弩攻突不少息凡十有八旬城中食且盡平章完者帖木兒謂非陳總管不可解八月壬辰友定奉檄偕行馳數十騎突圍入戰眾懼呼曰陳總管來吾屬生矣友定叱守將阮德柔開北門焚檄攬山砦還奪水南砦敗之于菱角塘萬安州賊踐溺者千餘人孫通等尋復建陽崇安浦城諸縣友定尋復邵武郡縣賊散走輒



遮殺之度三關以遁安撫使李國鳳上其功第一陞福建  
行省參知政事郭傳

按元史順帝紀壬寅五月友定復汀州稱參知政事則知  
實錄辛丑陞左丞者誤也當以復建寧功陞參知政事耳  
郭傳紀復建寧在壬寅歲則又誤也當依實錄載在辛丑  
爲正考鄧愈及克明本傳則知之矣

壬寅五月乙巳朔福建行省參知政事陳友定復汀州路元史

壬寅五月友定復汀州鑿九龍灘石通舟楫以運汀糧郭傳

友定自延平南引兵水陸並進一由順昌出將樂一溯延  
平溪而上清流會攻汀州克其城友定旣復汀州遂有據  
福建之志威迫平章燕只不華所收郡縣倉庫悉入爲家

賞收官僚以爲臣妾有不從者必行誅竄威鎮閩中

元祕閣

政要

甲辰又置分省于延平以友定爲平章於是閩中八郡皆其

所守 實錄

按元史友定陞平章在丙午八月此云甲辰陞者誤也

至正十六年復置福建行中書省二十六年置福建行樞密院至是天下大亂福建諸路及廣東潮州俱平章陳友定據而守之

建寧十七年改建寧路總管府二十二年立建寧分省既而陳友定據之復廢分省

泉州 十八年立泉州分省二十二年西域那兀那納等

竊據其地二十六年陳友定取之

漳州 二十二年漳州行中書分省右丞羅良據其地二十六年陳友定取之

汀州 延平 邵武 俱二十二年為陳友定所據

八閩通志

乙巳二月己丑朔元福建行省平章陳友定侵處州

實錄

參政胡深往援友定聞深至遁去深追至浦城擊敗守將

岳元帥遂下浦城

同上

四月己丑朔胡深攻克建寧之松溪獲友定守將張子玉而還

實錄

五月胡深言近克松溪獲張子玉餘眾敗奔崇安請發廣信撫州建昌三路兵併攻之因規取八閩 上曰子玉驍

將今爲我禽彼必喪膽乘勢攻之必無不克命指揮朱亮  
祖由鉛山建昌左丞王溥由杉關會深進兵

六月壬子朱亮祖等克崇安進攻建寧參軍胡深被執死之  
陳友定將阮德柔嬰城固守亮祖欲攻之深視氛祲不利  
亮祖迫深使進德柔兵屯錦江逼深陣後亮祖督戰益急  
深不獲已進擊之破其二柵德柔盡率精銳圍深軍數重  
日已暮深突圍而出德柔伏兵忽起深馬蹶被執送于友  
定友定初甚敬禮之會元使至督迫遂遇害

實錄

友定赴建寧遣阮德柔兵四萬屯錦江繞深背以斷歸路  
深破其二寨有定率牙將賴政等二千餘人突與深戰德  
柔逆兵夾攻深馬蹶被執頗寬遇之深爲具道上威德

并道天命所在援寶融歸漢事以撼之友定笑曰己旣被執而且誘人不忠何耶 太祖遣使以良馬金幣贖深會元使至督逼之遂殺深并其使

郭傳

按實錄深爲德柔兵所執深神道碑及行述俱云深破其二柵友定愬帥精銳圍我營公突陣與決戰馬蹶被執蓋碑與行述所紀爲詳而實錄從其略也郭傳載此戰尤核丙午陳友定平興化泉州二路

丙午興化林琪與惠安陳同柳伯順仇殺引番阿巫那及亦思巴奚兵攻劫累年時伯順據興化行省檄友定討捕番寇遂擁兵南下四月阿巫那黨白牌馬合謀金阿里等攻興化迎眞門友定之子宗海已領兵夜入城中明日開

西南二門縱兵而出白牌等見城門驟開已疑及見兵出  
旗服鮮明步伐整肅益恐亦思巴奚所恃者弓箭刀牌宗  
海兵直前搏執之亦思巴奚大敗僵屍數千追擒白牌等  
殺之餘眾奔潰所在農民以鋤梃擊殺惟逸四騎去是日  
友定師至撫集軍民完復路治聲勢赫然伯順在城中聽  
令而同及琪皆斂兵奉約束先是泉州賽甫丁據福州路  
戰敗餘眾航海還據泉州故有阿巫那之亂友定命宗海  
督伯順及同等兵合琪水軍並攻泉州友定自以師繼之  
五月克泉州擒阿巫那等至是興泉二郡始免亦思巴奚  
之禍

吳源至正近說

郭傳同

八月戊寅以李國鳳爲中書左丞陳友定爲福建行省平章

政事 元史

國朝卷之四十一

八月晉行省平章修城池繕守備分遣諸將各守郡縣郭傳

九月陳友定陷漳州路

長汀人羅良授漳州總管與友定素有卻九月友定使至漳良獨不下乃以書責友定友定大怒益發兵攻之良使三千人操強弓毒矢伏江東以待之誠有警勿輕移一夜友定以兵千人夜攻海倉寨揚言奪海舟乘潮直下千夫長張右古等違良節制悉兵赴之友定兵遂渡柳營江士卒驚潰良迎戰于馬岐山敗績遂圍城環攻旬月良誓死以守城中矢石俱盡良嘗誅百夫長盧清其子善徵在幕下延友定入城良與巷戰死之友定遂據漳州以其地勢

完固乃鑿山以洩之而縮城之西北凡平閩諸寨三百餘  
庵有潮州以行省郎中王翰德望素著表授潮州總管兼  
督循梅惠州郭傳

至正二十六年省丞陳友定命總制郡事理問張某改築  
東西北三面視舊基小一千餘丈獨南一面仍其舊浚河  
三百六十九丈

王翰廬州人江西行省郎中元亡屏居永福山中洪武中  
以薦被徵自裁並八閩通志

友定既爲平章發兵討省內未服者遠近聞風獻城無敢  
角者惟良卓然不屈以書責之曰足下爲參政國之大臣  
也汀州之復乃其職耳可以功而自恣耶燕只平章足下



之僚長也可以威而迫之耶夫非其君命而得郡邑者人  
人皆得而誅之矣今郡邑之長君命也固不可以加僇百  
司之職君役也固不可以加竄足下破郡邑爲家貲驅官  
僚爲臣妾口言爲國心實私耳跬步之際眞僞甚明不知  
足下將爲郭子儀乎將爲曹孟德乎友定得書大怒益兵  
攻漳州檄曰早降則終享富貴不降則噍類無遺

龍飛紀略

羅良事不見正史俟更考之

十二月陳友定將建寧阮德柔遣使來納款

實錄

詔德柔以原官守郡德柔卒爲友定所併見章溢傳

丁未三月戊寅以空名宣敕遣付福建行省命平章政事曲  
出陳友定同驗有功者給之

元史

友定據全閩八郡之政皆用其私人以總制之朝廷命官不得有所與

元史迭里彌實傳

藍光江西人官行省都事時八郡騷擾陳參政方事興復光總藩幕獨審審持正偶一言不合遂拂衣而退曰吾豈貪祿者哉國兵下全閩光深衣幅巾隱居教授越三十二載卒

黃仲昭八閩通志

福寧州人陳瑞孫爲福建宣慰使出鎮福清州拒友定被執憤罵見殺其妻及幼女皆投井死崇安令孔楷拒友定而死建陽人詹翰保障其鄉不從友定亦遇害友定由福清平海上烏尾賊海上人立碑頌之遂于建陽因閩越王大潭城址增築之以備我兵

郭傳

癸未福建行宣政院以廢寺錢糧由海道送京師

元史

閩人貢大都道路阻絕友定歲時多遣貢舶由海道抵登

萊其得達者十之三四元主嘉之下優詔褒美

王世貞補元史列傳

甲申諸將言陳友定竊據閩中擅作威福宜乘勢取之

上曰吾方致力姑蘇而張氏降卒新附未可輕舉友定據

閩已久積糧負險以逸待勞我師深入主客勢乖萬一不

利進退兩難兵法貴知彼知己徐而取之未晚也

實錄

九月命參政朱亮祖等帥師討方國珍

實錄

谷眞求援于友定友定恨其部下誤殺海戍不之援

郭傳

十月命中書平章胡廷瑞爲征南將軍江西行省左丞何文

輝爲副將軍率安吉寧國南昌袁贛滁河無爲等衛軍由江

西取福建湖廣參政戴德從征

上諭廷瑞曰汝以陳氏丞相來歸忠實無過汝往年嘗攻  
閩中必深知其地理險易故命汝總兵取福建何文輝戴  
德皆吾親近之人勿以此故廢軍政

實錄

十二月丁巳大明兵度杉關取邵武路時邵武建寧延平福  
州興化泉漳汀潮諸路皆陳友定所據

元史

十一月壬寅廷瑞師攻杉關賴政爲指揮戰屢不利退保  
汀州廷瑞遣指揮沈友仁費子賢乘勝略光澤下之十二  
月甲辰師至邵武守將李宗茂降丁巳至建陽守將曹復  
疇降留沈友仁守之

戊午敕征南將軍湯和副將軍廖永忠都督僉事吳禎帥舟

師自明州海道以取福州 實錄

以騎兵出杉關取邵武以舟師由海道趣閩 元史

己未廣信衛指揮沐英破分水關略崇安縣克之 同上

上問平閩諸將于章溢即日詔李文忠出師從浦城取建寧

章溢神道碑 實錄本傳 實錄載在洪武元年二月岐陽神道碑同

上詔文忠出師以溢子存道率鄉兵從之文忠率部將繆

美鎮撫譚濟等兵三萬攻浦城友定守禦偏將胡瑀豪悍

多力屢出死戰美濟兵屢不利文忠復遣萬戶武德兵挑

戰瑀不為意閉關酣酒而臥繆美武德乘夜雨斫關入瑀

醉起手刃數十人時大寒血凝刃遂敗死進攻無益銅船

山寨文忠不敢輕進乃屯浦城待海師消息友定大驚自

率兵至延平復遣兵至邵武建寧

郭傳

郭傳載攻浦城事不見他書其記文忠出師與章溢神道碑合可以補羅史之闕故存之

庚午大明兵由海道取福州守臣平章政事曲出遁行宣政院使朶耳死之

元史

初陳友定環福州城外皆築壘爲備每五十步更築一臺嚴師守之聞我師入杉關乃留同僉賴正孫副樞謝英輔院判鄧益以眾二萬守福州自率精銳守延平以拒和等舟師自明州乘東北風徑抵福州之五虎門駐師南臺河口遣人入城招諭爲平章曲出所殺曲出出南門逆戰指揮謝得成等擊敗之是夜參政袁仁遣人納款我師於臺

上蟻附登城遂開南門鄧益拒戰于水部門擊殺之正孫  
英輔自西門出走延平曲出等皆懷印綬挈妻子遁去參  
政尹克仁赴水死行宣政院使朶耳麻不屈下獄死僉樞  
密院柏鐵木兒居侯官積薪樓下縱火焚其妻女遂自剄  
和遣袁仁暨員外余善招諭興化漳泉諸路分兵徇略福  
寧等州縣未附者 實錄

和等率舟師由明州海道擒殺把海指揮孫通嚴程乘虛  
而下不數日掩至福州城下圍西南水部三門 郭傳

廣東廉訪司僉事獲獨步丁閑居寓福州以石繫其腰投  
井死江西行省左右司都事呂復以行省命攝長樂縣尹  
引繩自縊死 元史忠義傳

侍御史韓準請老未報藉藁堂下以喪禮自處吏來追其  
宣敕準取而枕之礪刃向吏曰必欲之并取吾首去後病  
不飲藥而卒 八閩通志

戊申洪武元年五月興化州軍民詣湯和軍納款

參政袁仁遣宣慰使關住至興化諭降友定所設府判徐  
昇及元帥王思義葉萬等密謀殺關住及經歷鄭元明盡  
取豐盈庫銀帛驅其兵走泉州耆民李子誠吳彌明等首  
倡迎降之說往福州全城歸附 吳源至正近說

壬午胡廷美等師至建寧壬辰克建寧

廷美師至守將同僉達里麻參政陳子琦謀曰大明兵自  
入杉關其鋒不可當今城中軍士不下萬餘儲蓄尙富可



以拒守彼攻不克必將自退因而乘之或可以得志廷美等數與挑戰固守不出我師攻圍益急達里麻不能支夜潛至副將軍何文輝營納款廷美整兵入城執子琦送京師實錄

大明兵取建寧延平二路陳友定被執元史

先是上遣使招諭友定友定大會諸將殺使者置其血酒瓮中慷慨飲之誓眾死守湯和師至延平隔水而陣分一軍渡水攻其西門友定謀于眾曰彼兵方銳不如持久以困之伺間而動必有可勝遂嚴敕軍士巡城晝夜不少息諸將請出戰友定不許數請不已友定乃疑其部將蕭院判劉守仁有貳心卽收其兵柄殺蕭院判守仁知事急

侍御史韓準請老未報藉藁堂下以喪禮自處吏來追其  
宣敕準取而枕之礪刃向吏曰必欲之并取吾首去後病  
不飲藥而卒

八閩通志

戊申洪武元年五月興化州軍民詣湯和軍納款

參政袁仁遣宣慰使關住至興化諭降友定所設府判徐  
昇及元帥王思義葉萬等密謀殺關住及經歷鄭元明盡  
取豐盈庫銀帛驅其兵走泉州耆民李子誠吳彌明等首  
倡迎降之說往福州全城歸附

吳源至正近說

壬午胡廷美等師至建寧壬辰克建寧

廷美師至守將同僉達里麻參政陳子琦謀曰大明兵自  
入杉關其鋒不可當今城中軍士不下萬餘儲蓄尙富可

以拒守彼攻不克必將自退因而乘之或可以得志廷美等數與挑戰固守不出我師攻圍益急達里麻不能支夜潛至副將軍何文輝營納款廷美整兵入城執子琦送京師實錄

大明兵取建寧延平二路陳友定被執元史

先是上遣使招諭友定友定大會諸將殺使者置其血酒瓮中慷慨飲之誓眾死守湯和師至延平隔水而陣分一軍渡水攻其西門友定謀于眾曰彼兵方銳不如持久以困之伺間而動必有可勝遂嚴敕軍士巡城晝夜不息諸將請出戰友定不許數請不已友定乃疑其部將蕭院判劉守仁有貳心卽收其兵柄殺蕭院判守仁知事急

來奔士卒多踰城夜遁圍城凡十日城中軍器局失火礮聲亂發我軍疑其內叛遂并力攻城友定見勢窮蹙乃與副樞謝英輔參政文殊海牙訣曰大事已去吾無以報國家惟有死耳公等宜自勉迺退於省堂按劍仰藥飲之達魯花赤白哈麻具服北望拜泣與謝英輔皆自剄死賴正孫等夜開門出降黎明我師入城友定氣未絕遂昇之出水東門外值大雷雨復甦械繫送京師以唐鐸知府事友定子海聞其父兵敗自將樂來降遂併執之

寶錄

湯和等命指揮孫虎督新附者守福州乘勢自水口舟騎並抵延平水南隔溪而陣廖永忠渡水攻西門友定倉卒遣參政文殊海牙指揮賴政等七戰不勝閉門堅守湯和

奉命招降友定力拒之曰我爲元守土官可以土地易富  
貴耶子宗海叩諫不聽遣出守將樂將佐知其不降乃數  
請出戰友定心疑殺其將蕭院判士卒多踰城夜遁徐大  
興攻其東北廖永忠攻其西南鼓譟甚逼又聞李文忠胡  
廷瑞兵皆逼友定度不能支乃衣冠北面拜訖神武門疾  
雷震醒械送京師宗海自將樂來歸併執之

郭傳

友定至京師 上詰之曰元綱不振海內土崩天命更革  
豈人力所能爲爾竊據偏方負固逆命害吾參軍殺吾使  
者陸梁弗服欲何爲哉友定對曰事敗身亡惟有死耳尙  
何言遂併其子誅之

實錄

國兵旣取閩俘友定至京 上命公之子禎齎其肉以祭

公 胡深行述

友定至京師 帝將釋之授以原官曰不降伏銅馬古炮  
烙刑也友定伏之命瘞其屍 郭傳

二月湯和傳檄至漳州路達魯花赤迭里彌實死之

大明兵既取福州興化泉州皆納款吏走白招諭使者至  
迭里彌實從容詣廳事具公服北面再拜引斧斫其印文  
大書年版曰大元臣子卽入位端坐拔佩刀割喉中以死  
既死猶手執刀按膝坐儼然如生 元史忠義傳

五月甲子陳友定故將金子隆陷將樂

友定既敗其將金子隆馮谷保糾合清流寧化散卒陷將  
樂殺知縣馬源主簿蘇兼善乘勝寇延平攻四鶴門指揮

羅得聚千戶李申擊卻之復與官軍戰于城南橋指揮蔡  
玉奮擊大破其眾追至沙縣之青雲寨子隆等負險固守  
沐英遣兵夾攻破之擒馮谷保七月李文忠攻破清流寧  
化諸山寨獲金子隆及其餘黨閩地悉平 實錄

解縉云元末起義諸人獨陳友定始終盡節為無愧 月山叢談

閩有三忠謂福建平章陳友定僉樞白帖穆爾子壽漳州

達魯花赤迭禮迷失子初也 王逢集

福清參軍陳八不仕藏友定像長身巨目狀貌偉然其家

尚世祀之 郭傳

友定起布衣以累功而受職視谷真輩不同既為平章據  
全閩郡縣不服則征之其時既亂不得以便宜從事耳

朶耳迭里彌實輩多元死節之臣倘友定果跋扈竊據則  
朶耳輩必先死之安肯與亂臣同事哉

郭造卿傳贊



國初羣雄事略卷十二

右國初羣雄事略十五卷 國朝錢謙益牧齋撰牧齋常熟  
人萬歷庚戌年進士及第官至禮部侍郎弘光時禮部尚書  
入 國朝仍爲禮部侍郎事蹟入貳臣傳牧齋博極羣書聲  
望卓著崇禎朝扼于溫體仁弘光朝扼于阮大鍼國朝扼于  
謝陞宦旣不達欲以史事自見而亦未有任之者纂名臣名  
人傳誌訂成數百冊又爲六丁取去惟存列朝詩選聊見微  
旨而已此書卽其造史長編首韓林兒次郭子章次徐壽輝  
次陳友諒次明玉珍次明昇次張士誠次方國珍次擴廓帖  
木兒次陳友定次李思齊次納哈出次察罕次何眞次何榮  
十五人分爲十五篇采自諸書牴牾處不改定參差處不畫  
一仍是長編之例實非刊定之書周在浚黃俞邵徵唐宋祕

051  
1

175

國子書院

書本書目此書在焉然迄未刊行之者今以漢唐齋馬氏蘭  
味軒莊氏兩鈔本互校訂定以明昇察罕方榮各從其父定  
爲十二卷收齋著作刊播於世實爲最後矣癸丑十二月烏  
程張鈞衡跋



21101000188676